

唐 李延壽 撰





中 華 書 局

第 卷

五三至卷六七(傳) 五

册

南史卷五十三

列傳第四十三

梁武帝諸子

媛 生豫章王綜。 武帝八男。 董昭儀生南康簡王績。 丁貴嬪生昭明太子統、簡文皇帝、廬陵威王續。 丁充華生邵陵攜王綸。 葛修容生武陵王紀。 阮修容生孝元皇帝。 吳淑

垂强仕,方有冢嗣,時徐元瑜降,而續又荆州使至,云:「蕭穎冑暴卒。」時人謂之三慶。 昭明太子統字德施,小字維摩,武帝長子也。 以齊中興元年九月生于襄陽。 武帝既年 少日

而 建鄴 平, 識者知天命所集。

天監元年十一月,立爲皇太子。 列 僔 第 四 + Ξ 梁 武 帝 諸 子 時年幼, 依舊居於內、日一拜東宮官屬,文武皆入直永 一三〇七

福省。五年六月庚戌,出居東宮。 🖃

經,盡通大義。講畢,親臨釋奠于國學。 不樂。帝知之,每五日一朝,多便留永福省,或五日三日乃還宮。八年九月,於壽安殿講孝 太子生而 聰叡,三歲受孝經、論語,五歲偏讀五經,悉通諷誦。 性仁孝,自出宮,恒思戀

決之。 孥戮,今縱不以其罪罪之,豈可輕罰而已,可付冶十年。」 書,曰:「是皆可念,我得判否。」有司以統幼,給之曰:「得。」其獄皆刑罪上,統皆署杖五十。 有司抱具獄,不知所爲,具言於帝,帝笑而從之。自是數使聽訟,每有欲寬縱者,即使太子 年十二,於內省見獄官將讞事。問左右曰:「是阜衣何爲者?」曰:「廷尉官屬。」召視其 建康縣讞誣人誘口,獄翻,縣以太子仁愛,故輕當杖四十。今曰:「彼若得罪,便合家

降干慧義殿,咸以爲至德所感。時俗稍奢,太子欲以己率物,服御朴素,身衣浣衣,膳不 於宮內別立慧義殿,專爲法集之所。招引名僧,自立二諦、法身義。四一普通元年四月,甘露 作劇韻,皆屬思便成,無所點易。帝大弘佛敎,親自講說。太子亦素信三寶,偏覽衆經。乃 加 金博山。太子美姿容,善舉止,讀書數行並下,過目皆憶。 十四年正月朔旦,帝臨軒,冠太子於太極殿。舊制太子著遠游冠、金蟬翠緌纓,至是詔 每游宴祖道,賦詩至十數韻,或

兼肉。

來立 爲論 情豈 悼。。 事 以。 也。 徐勉、左 宜 劉 限 賢 孝 則 稱 亦 意, 無悲。 然』。 綽議 至 ,此自難一也。用張鏡之『舉樂』,棄張鏡之**『稱悲』**。 更 成 「兼慕,卒哭之後,依常舉樂,稱悲竟,此理例相符。 謂猶應稱兼慕,請至卒哭。」 [B] 僕射 陸家令止云『多歷年所』,恐非事證。雖復累稔所用,意常未安。近亦嘗以 又云,『凡三朝發哀者,踰月不舉樂』。[三]劉僕議云,『傍絕之義,義在去服,服雖可奪, 7共詳 如 小。 年十一月,始興王憺薨。舊事以東宮禮絕傍親,書翰並依常儀。太子以爲疑,命僕 ,謂猶應有慕悼之言。 率周捨、家令陸襄並同孝綽議。 元正六佾,事爲國章,雖情或未安,而禮不可廢。 其事。孝綽議曰:「案張鏡撰東宮儀記,稱『三朝發哀者,踰月不舉樂,鼓吹寢奏、服 尋傍絕之義,義在去服,服雖可奪,情豈無悲。 鐃歌輟奏,良亦爲此。 差可緣 卒哭之後,依常舉樂,稱悲竟,此理例相符』。 衷。 」司 農卿明山賓、步兵校尉朱异議,稱「慕悼之解,宜終服月」。〔4〕於是付典 心 聲樂自外,書疏自內,樂自他,書自己。 太子令曰:「張鏡儀記云」。「依士禮,終服月稱慕 尋情悲之說,非止卒哭之後,緣情 小。(E) 所以用 鐃吹軍樂,比之亦然,書疏方之, 鏡之言,取捨有異,此自難二 劉僕 之議,卽情未安。 小而 忽大, 此問 旣 有悲情, 良亦有 外,由 可 令

七 年 十一月、貴嬪有疾、太子還永福省、朝夕侍疾、衣不解帶。 及薨,步從喪還宮,至

列

用

以爲

水準。

塡塞成疾。 麥粥一升。 比於不孝。 殯,水漿不入口,每哭輒慟絕。 武帝敕中書舍人顧協宣旨曰:「毁不滅性,聖人之制,不勝喪 體素壯,腰帶十圍,至是減削過半。每入朝,士庶見者莫不下泣。 有我在,那得自毁如此。 故應强加饘粥,不俟我恒爾懸心。」「台雖屢奉敕勸逼,終喪日止一溢,不嘗菜果 武帝又敕曰:「聞汝所進過少,轉就羸瘦。我比更無餘病,政爲汝如此,胸中亦 可卽强進飲粥。」太子奉敕,乃進數合,自是至葬,日進

古今,繼以文章著述,率以爲常。于時東宮有書幾三萬卷,名才並集,文學之盛,晉、宋以來 仁。性寬和容衆,喜慍不形於色。引納才學之士,賞愛無倦。恒自討論墳籍,或與學士商榷 誤巧妄,皆卽辯析,示其可否,徐令改正,未嘗彈糾一人。平斷法獄,多所全宥,天下皆稱 未之有也。 太子自加元服,帝便使省萬機,內外百司奏事者填塞於前。太子明於庶事,每所奏謬

此 二十餘年,不畜音聲。未薨少時,敕賜太樂女伎一部,略非所好。 性愛山水,於玄圃穿築,更立亭館,與朝士名素者遊其中。嘗泛舟後池,番禺侯軌盛稱 止。 出宮

巷,視貧困家及有流離道路,以米密加振賜,人十石。又出主衣絹帛,年常多作襦袴,各三 普通 中,大軍北侵,都下米貴。太子因命菲衣減膳。每霖雨積雪,遣腹心左右周行閭

竊 江。 權 此 征 唯 逸,必獲後利。 疏 斂 成未 信義 停 得 容 多 曰:「伏聞當遣王弈等上東三郡人丁開漕溝渠,導洩震澤,使吳興一 領,
冬月以施寒者,
不令人知。 此 齊集,已妨蠶農。 變色。 伺 中 大通 功,待優實以不。」武帝優韶以喻焉 候 歸 去秋有稔,復非恒役之民。 强丁 人間 常以戶口未實, 二年春,詔遣前交州刺史王弈假節發吳、吳興、信義三郡 虚實,若善人從役, 疎少,此雖小舉,竊恐難合。 未萌難覩,竊有愚懷。 去年稱爲豐歲,公私 重於 公勞擾。 若死亡無可斂,則爲備棺槥。 則抄 刨 日東境穀稼猶貴,劫盜屢起,在所有司,皆不聞奏。 所聞吳興累年失收,人頗流移 吳興郡屢以水災不熟,日百十三當漕大瀆以寫 未能足食,如復今茲失業,慮恐爲弊更深。 增。 吏一呼門,動爲 吳興未受其益,內地已離其弊。 人蠹。 每聞遠近百姓賦役勤苦,輒 又出丁之處,遠近不一,) 吳郡十城,亦不全熟, 人丁就役。(10)太子上 境無復水災, 暫勞永 不審可 且 今 得 草 浙

臺。 宿被召 太子 |孝謹 當入,危坐達旦 天至,每 文 朝、未五 一鼓便守城 門開。 東宮雖燕居內殿,一坐一起,恒向西南 丽

至尊 不言,以寢疾聞。 知我 三年三月,游後 如 此 惡。」因 武帝敕看問 池、乘彫文舸摘芙蓉。 便 嗚 咽 ,輒自· 四 月乙巳,暴惡,馳啓武帝,比至已薨,時年三十一。 力手 書啓。 姬 人蕩舟,沒溺 及稍 篤 左 右 而得出,因 欲 、啓聞、 動股,恐貽帝憂,深誠 猶 示 許, 曰:「云 帝臨哭 何 令

子

列

下

盡 詔斂 以衮冕 諡 日 昭 明。 五月庚寅,葬安寧陵,詔司徒左長史王筠爲哀册文。 朝 野

愕,都 太 子 男女奔走宮門,號泣滿路。 四 方 、甿庶及疆徼之人,聞喪皆哀慟 之,云以清道驅 人。 太子

牒攤 者法 頻 食 中得蠅蟲之屬,密置 性仁恕,見在宮禁防捉荆子者,問 士人結流徒、自己庶人結徒。 件邊,恐 厨人獲罪,不令 太子 曰:「私錢自戲 人 知 不 叉 犯 見 公物, 後閣 恐復致痛,使捉手板 小兒 此 科太重。」令注 攤 戲後 屬 有 刑 獄

所著文集二十 卷,又撰古今典誥文言爲正序十卷,五言詩之善者爲英華集二十卷,三言

文選三十卷。

三歲,士人発官。

獄牒

應死

者必

降長

徒,自此以下莫不

減

半。

江公營封 同 常 薨後,長 儀 唯 岳 陽 別立 子東 郡王 金華 中 一警封 郎 宮 將南徐州 武 爲 異。 昌 郡 王, 刺 帝旣廢嫡立庶, 史華容公歡封豫章郡王, 鑒封 義陽 郡 海 王,各二千 內噂階, 故各封諸子大郡以慰 戶。四女悉 次子枝江公譽封 同 正 主。 河 東 蔡妃 其 郡 王, 供 侍 曲 压

陽 王 **營流涕受拜**,累日不 食

市之。 萬,許 初 以 葬畢,有道士善圖墓,云「地不利長子,若厭伏或可申延」。乃爲蠟鵝及諸物 了 了 白 萬 貴 魔薨,太子遣人求得善墓 與 之。 三副 密啓武帝,言太子 地,將 所 斬 得 草, 地 不 有 如 賣 今 地者因閹 所 得 地 於 人兪 流帝吉 ,帝末年 副 求 市, 多忌, 埋墓 若 得 側 便 長

之罪 是太 太子 子 位。 牒官 子迄 厭 禱 有宮監鮑邈之、魏雅者,二人初並爲太子所愛,邈之晚見疎於雅,密啓武帝云:「雅爲 終 。」帝密遣檢掘, **)簡文追處太子寃,揮淚誅之。** 以 此 慚慨,故其嗣 、果得 ·鵝等物。 不立。 後邵陵王臨丹陽郡, 大驚,將窮其事。 邈之兄子僧隆爲宮直,前 徐勉固諫得止,於是唯誅道士,由 因 邈之與鄉人爭婢, 未知邈之姪,即 議 日 以 爲 誘略 出

章王 字 厰 歡 办 孟 主 追 歸 還 孫,位 歡 主 去 先 任。 來 是 大 於 業 崇 人間 雲麾將軍 鹿子 往謠言「心徘 正殿 **,又以心** 謠 開者 解髮臨哭。 曰:「鹿子開城門,城門鹿子開,當開復 江州 **衡故**,意在 ,

反語爲來子哭,

云帝哭也。 徊」者 刺史。 歡旣嫡孫,次應嗣位,而 ,未定也。「城 晉安王,猶豫 薨,諡安王。 中諸 自四 子楝嗣。 月上 歡 少年,逐歡歸去來」,復還除方之象也 前 遲 未開,使我 爲南徐州 旬至五月二十一日方決。 疑 未決。 、太子果薨,遣中書舍人臧 帝旣 心 徘 新有 徊。 关下, 城 (中諸 恐不 歡 少年,逐 止 封 可 以 豫

終。 妃 所 爲 氏 於 棟字元吉。 泣 爲 是 而 皇 年 升輦。 太 號 后,妃 天正,追 及簡文見廢,侯景奉以爲主。 及卽位,升武 爲 皇后。 尊 昭明太子日 未幾 德殿,数 行行 昭明皇帝,安王 禪讓禮,棟封淮陰王,及二弟橋、樛,並鎖 有 迴 風 棟方 從 地 涌 與妃張氏鋤葵,而法駕奄至,棟驚 爲安皇帝 起, 翻 飛 華蓋 金華敬 ,徑出端門,時 妃 蔡氏 爲敬 於密室。 人 皇后,太 知 其 不 示 景 知

宣猛 「六門之內,自極兵威。」僧辯曰:「平賊之謀,臣爲己任,成濟之事,請別舉人。」 有懼 敗 將 兄弟相 初 軍朱買臣使行忍酷。 、王僧辯之爲都督,將發,諮元帝曰:「平賊之後,嗣 扶出,逢杜崱於道,崱去其鎖。弟曰:「今日免横死矣。」棟曰:「倚伏難知,吾猶 會簡文已被害, 棟等與買臣遇見, 君萬 呼往船共飲, 福 ,未審有 何 儀注?」帝曰: 未竟, 由是帝別 並 敕

于水。

將 湘州 加 東王譽字重孫,普通二年,封枝江縣公。 刺 史。 未幾,侯景寇建鄴,譽入援,至青草湖,臺城沒,有 中大通三年, 改封河東郡王。 詔 班 師。 譽還 湘 累遷南 鎭 中郞

泉討 得衆 陵。」元帝甚懼,沈米斷 隸人。」「三使三反,譽並不從。 軍 " 逐被執。 譽,幷 橘 時 'n 洲 元帝軍 ,譽攻之又 元帝 陳示 謂守者曰:「勿殺我,得一見七官,申此讒賊,死無恨。」主者曰:「奉令不許。」 于武城, 又遣領軍王僧辯代 禍 福。 見敗。 譽謂 纜 新除 而 於是逐 歸 日 雍州 :「欲前 元帝大怒,遣世子方等 因遣諮議周弘 鮑泉攻譽。 刺史張纘密報元帝 韋 之。 即前,無所多說。」泉軍于 譽幼 譽將潰 直 而 驍勇,馬 至譽所督其糧衆。 日; 圍 征 而 之,反爲譽敗死。 河東 出 上 用 石 起兵, 會其 弩,兼有 槨寺,譽逆擊不利 / 麾下 譽曰:「各自軍府 岳陽 膽 將慕容華引 氣 聚米, 又令信州 能 撫 將 士 而 僧辯 來 刺 卒, 還。 襲江 史 何 逐 甚 鮑 泉 忽 入

城

進

斬首,送荆鎭。一一帝返其首以葬焉。

驢,從城出,不知所在。 初,譽之將敗,引鏡照面,不見其頭。 譽甚惡之,俄而城陷。 又見長人蓋屋,兩手據地噉其臍。 又見白狗大如

豫章王綜字世謙,武帝第二子也。 天監三年,封豫章郡王。 累遷北中郎將、 南徐州 刺

史。入爲侍中、鎭右將軍。

粗服。 之。 心驚不已。頻密問淑媛曰:「夢何所如。」夢旣不一,淑媛問夢中形色,頗類東昏。 之會,諸侯王妃主及外人並知此懷,唯武帝不疑。 士姓王,以屯躓投告了综于時大乏,唯有眠牀故阜複帳,卽下付之。 其降意下士,以伺風雲 曰:「汝七月日生兒,安得比諸皇子。汝今太子次弟,幸保富貴勿洩。」綜相抱哭,每日夜恒 淑媛寵衰怨望。 初,綜母吳淑媛在齊東昏宮,寵在潘、余之亞。及得幸於武帝,七月而 厨庫恒致罄乏。常於內齋布沙於地,終日跣行,足下生胝,日能行三百里。嘗有人 又每靜室閉戶,藉地被髮席藁。 及綜年十四五,恒夢一年少肥壯自挈其首對綜,如此非一,綜轉成長, 輕財好士,分施不輟,唯留身上故衣,外齋接客,分 生綜, 宮中多疑 因密報之

及 長 有 才 學 ,善屬文。 武帝御諸子以禮, 朝見不甚數。 綜 恒怨不 ·見知。 毎 出 蕃, 淑媛

恒 隨 之 至鎭。 時 年十五, 尚裸袒嬉戲於前, 晝夜 八無別。 妃袁氏, 尚書 令昂之女也。 淑 媛 恒

節其宿止,遇哀妃尤不以道,內外咸有穢聲。

並 出 優敕 無 。羣臣 勉未 有 綜 答之。 後 期度,招引 不敢 敢言,因 在 徐州 輕言得失,凡綜所行, 徐州所有練 政刑 是怒勉 道士、探求 酷暴,又 前 樹,並令斬殺, 以白 數 有勇 術。 惠 弗之知 扇,圖 性 力, 聰 制及奔馬,摄殺駒犢。 敏多通,每武 以帝小名練 也。 伐檀之詩, 於徐 州 言其 故。 還 帝有敕疏至,輒 賄 累致意 頻 也。 裁表 常陰服微行,著烏絲布 尙 陳便宜, 書僕射 忿恚 求經 形於顏色。 徐勉, 略 邊境。 求 山 帽。夜 帝性 鎭 襄

宮及 徴 信 矣, 聞 諸 在 俗 在 王 西 說 西 좕 州 以 色不 生次 生者血 於別室歲時設席, 恭 男月: 遜。 瀝死 餘 嘗 日,潛 者骨渗, 改 歲後,問 殺之。 卽 厛 齊氏 爲 訊 父子。 旣瘞,夜遣 臨 七廟。]]] 王 綜 宏, 乃私 又累微 人 出 發 發齊東昏墓, 至 取 行 中閣 其 至曲 、骨叉試之,其 登宏羊 阿拜齊明帝陵。 出 其骨、瀝 車 酷 次 遺 忍 糞 血 如 試 然 而 此 之。 出 猶無以自 毎 居 對 旣 有 東

普 通 几 年 爲 都督、 南 兗 da 刺 史。 頗勤於事,而不見賓客。 其辭訟則隔簾理之。

出

行

垂

惟於輿,

每云惡

人識其

面

也。

下

所

爲

多

如

此

者

陽 廣陵,往來通魏尤數,每舍淮陰苗文寵家。言文寵於綜,綜引爲國常侍。 人梁話母死,法鸞說綜厚賜之,言終可任使。 ,齊故建安王蕭寶寅在魏,綜求得北來道人釋法鸞使入北通問於寶寅,謂爲叔父。襄 綜遺話錢五萬。及葬畢,引在左右。 法鸞

見城 延明 逐発難。 正也」。延明喜,下地執其手,答其拜,送于洛陽。 與魏安豐王元延明相持,夜潛與梁話苗文寵三騎開北門,涉汴河,遂奔蕭城。 知當更有敗軍失將,恐綜爲北所擒,手敕綜令拔軍。每使居前,勿在人後。 | 燠脚痛不復得上馬,於是向馬泣曰:「騅子,我於此死矣。」 馬因跪其前脚,燠乃得上馬 《外魏軍叫曰:「汝豫章王昨夜已來在我軍中。」城中旣失王所在,衆軍乃退,不得還者甚 而 湘州益陽人任煥常有雕馬,乘之退走。煥脚為抄所傷,人馬俱弊,煥於橋下歇,抄復 六年,魏將元法僧以彭城降,帝使綜都督衆軍,權鎭彭城,幷攝徐州府事。 拜。 綜長史江革、太府卿祖暅並爲魏軍所禽,武帝聞之驚駭。 延明坐之,問其名氏,不答,曰:「殿下問人有見識者。」延明召使視之,曰「豫章 及旦,齊內諸閤猶閉不開,衆莫知所以,唯 ' 自稱隊主,見 武帝曉別玄 綜恐帝覺,

文,自己追服齊東昏斬衰,魏太后及羣臣並弔 綜 至魏,位侍中、司空、高平公、丹陽王,梁話、苗文寵並爲光祿大夫。綜改名贊字德

八月,有司奏削爵土,絕其屬籍,改子直姓悖氏。未及旬日,有詔復屬籍,封直永新侯。

久之乃策免<u>吳淑媛,俄遇鴆而卒;有詔復其品秩,諡曰椒,使</u>直主其喪。

之送洛陽。 時吳淑媛尙在,敕使以綜小時衣寄之。信未達而慶之敗。 及蕭寶寅據長安反,綜復去洛陽欲奔之。 魏孝莊初,歷位司徒、太尉,尚帝姊壽陽長公主。 魏法,度河橋不得乘馬,綜乘馬而行,橋吏執 陳慶之之至洛也,送綜啓求 未幾,終於魏。

初,綜在魏不得志,嘗作聽鍾鳴、悲落葉以申其志,當時莫不悲之。後梁人盜其柩來

舜、武帝猶以子禮祔葬陵次。

直字思方,位晉陵太守,沙州刺史。

州 刺 史。 南康簡王續字世謹,小字四果,武帝第四子也。天監七年,封南康郡王。 時年 七歲,主者有受貨洗改解書,長史王僧孺弗之覺,績見而詰之,便卽首服,衆 十年,爲南徐

成歎其

、聰警。

領石頭戍軍事。 闕 上表,口切稱績尤異 十七年,爲都督、南兗州刺史,在州以善政稱。 五年,出爲江州刺史。 一十五條,乞留爲州任。 丁董淑媛憂,自己居喪過禮,固求解職。 優韶許之。 尋有韶徵還,百姓曹樂等三百七十人詣 普通四年,徵爲侍中、雲麾將軍, 乃徵授安右

將 軍 ,領石頭戍軍事。 尋加護軍。 **羸瘠**,不親視事。 大通三年, 因咸疾薨于任。 贈開府儀

同三司、諡曰簡。

績寡 ;玩好,少嗜欲,居無僕妾,躬事儉約。 所有租秩,悉寄天府。 及薨後,少府有南康

國無名錢數千萬。子會理嗣。

五為 湘州 累遷都督、南兗州刺史。 會 見天子,使汝等知。」會理厚送資糧,數遣慰喩。令心腹於青草湖爲盜,殺納百口俱 理字長才,少聰慧,好文史。年十一而孤,特爲武帝所愛,衣服禮秩與正王不殊。十 刺 史,多信左右。行事劉納每禁之,會理心不平,證以贓貨,收送建鄴。納歎曰: 太清元年,督衆軍北侵,至彭城,爲魏師所敗,退歸本鎮

京都, 襲 雖 敕 年 廣陵。 在 召 會理。 寇手 受制 圖之肘腋。」遂納紹先。 一年,侯景圍城,會理入援。 争 會理擊破之,方得進路。 、賊虜,今有手敕召我入朝,臣子之心,豈得違背。 其僚佐曰:「紹先書豈天子意。」咸勸拒之。 思匡復,與西鄉侯勸等潛布腹心,自己要結壯士。時范陽祖 紹先入,以烏幡麾衆,單馬遣之至都。 會北徐州刺史封山侯正表將應其兄正德,外託赴援,實謀 臺城陷,會理歸鎮。 會理用 侯景遣前臨江 且處江 其典籤范子鸞計, 北,功業難成,不若身赴 景以爲司空無尚書令。 太守董紹先以武帝手 皓斬董紹先 曰:「天子 據廣陵

列

傅

城起義,期 以會 理 爲內應。 皓敗、辭相連及。 侯景矯詔免會理官,猶以白衣領尚書令。

通理 也。」 事必 集。 敬禮 |有所資,今無寸兵,安可以動。||會理曰:「湖熟有吾故舊三千餘人,昨來相 計 是冬,景往晉熙, , 贼守兵不過千人, 若大兵外攻, 吾等內應, 直取王偉, 事必有成。 曰「善」。 于時百姓厭賊, 都下虛弱, 會理 咸思用命。 復與柳敬禮及北兗州司馬成欽謀之。 建安侯賁以謀告王偉, 偉遂收 縱景後 敬禮 會理 歸, 知, 日:「 剋期 無能 及其弟 舉大 爲 響

之,遙曰:「褚郎、卿豈不爲吾致此邪、然勿言。」王偉害會理等、冕竟以不服、偉赦之。 會理 時 有錢唐褚冕,會理之舊,亦囚於省,問事之所起,考掠千計, 弟通理字仲宣,位太子冼馬,封祈陽侯,至是亦遇害。 終無所言。 會理隔壁聞

或 日一 通 服闋 此 理 弟乂理字季英。 簡 見武帝,升殿,又悲 王宮 人喪畢去耳。」父理 生十旬而簡王薨,至三歲能言,見內人分散, 不自勝,帝爲之收涕,謂左右曰:「此兒大必爲奇士。」大同八 便號泣, 悲不 自 勝。 諸宮人見之,莫不 涕泣相送, 哀感, 爲 問 之停者 其故,

义理慷慨慕立功名, 每讀書見忠臣烈士,未嘗不廢卷歎曰:「一生之內,當無愧古人。」 年,封安樂縣侯

博覽多識,有文才。 嘗祭孔文舉墓,幷爲立碑,製文甚美。

未知天命何如耳。」至都,以魏降人元貞忠正可以託孤,乃以玉柄扇贈之。 辭母,因謂其姊安固主曰:[10]「兄若至,願使善爲計自勉,勿顧以爲念。 質乞師。行二日,會景遣董紹先據廣陵,遂追獲之,防嚴不得與兄相見。 曰:「後當見憶。」會祖皓起兵,义理奔長蘆,爲景所害。 及侯景內寇,义理聚客赴南兗州,隨兄會理入援。 元貞始悟其前言,往收葬焉。 及城陷,又隨會理還廣陵,因入齊爲 前途亦思立効,但 乃僞請先還都,入 貞怪不受, 义理

通二年,爲都督、雍州刺史、寧蠻校尉。大同元年,遷江州刺史,又爲驃騎將軍、開府儀同三 發命中。 又爲都督、荆州刺史。薨,贈司空,諡曰威。 武帝歎曰:「此我之任城也。」嘗馳射於帝前、續中兩麞、冠於諸人。帝大悅。 中大

元帝之臨荆州,有宮人李桃兒者,以才慧得進,及還,以李氏行。時行宮戶禁重,三三續 始元帝母阮修容得幸,由丁貴嬪之力,故元帝與簡文相得,而與廬陵王少相狎,長相

列傳

第四十三

梁武

歸內 人者。 自是二王書問不通。 及續薨,元帝時爲江州,聞問,入閤而躍,屧爲之破。

尋自

江州 復爲 荆州 ,荆州人迎于我境,帝數而遣之,吏人失望。

帝意乃解 乎。」宣融曰:「此之謂多,安可加也。 軍 謝宣融送所上金銀器千餘件,武帝始知其富。 續多聚馬 `仗,蓄養趫雄,耽色愛財,極意收斂, 夫王之過如 以爲財多德寡,因問宣融曰:「王金 日月之蝕,欲令陛下知之, **倉儲庫藏盈溢。** 臨終有啓, 遣中錄事參 故終而 不隱。」 盡 一於此

「此可食不?」答曰:「不可。」應曰:「旣不可食,並特乞汝。」他皆此類。 世子憑以罪前誅死,三三次子應嗣。 應不慧,王薨,至內庫閱珍物,見金鋌,問左右曰

邵 陵攜王編字世調,小字六眞,武帝第六子也。 少聰穎,博學善屬文,尤工尺牘。

十三年,封邵陵郡王。

自是百姓惶駭,道路以目。 法。 遨遊 普通 市里,雜 五年,以西中郎將權攝南徐州事。三四在州輕險 於 厮 隸。 嘗問 嘗逢喪車,奪孝子服而著之,匍匐號叫。 賣 魁者曰:「刺史何 如。」對者言其躁虐,倫怒,令吞觛以死, 躁虐,喜怒不恒,車服僭擬,肆行非 籤帥懼罪,密以聞。 帝

朝以爲君,自陳無罪。 送葬之法,使嫗乘車悲號。 始嚴責,綸不能改,於是遺代。 使就坐剝褫,捶之於庭。 會意不堪,輕騎還都以聞。 綸悖慢逾甚,乃取一老公短瘦類帝者,加以衮冕,置之高坐, 忽作新棺木,貯司馬崔會意,以轜車挽歌 帝恐其奔逸,以禁兵取之,將於獄賜 爲

敕責,府丞何智通具以聞,因被責還第。 第,於內人檻中禽瓜、撒、智英。子高驍勇,踰牆突圍,遂免。 帝懸錢百萬購城, 韩目智通,於白馬巷逢之,以槊刺之, 刃出於背。 後預餞衡州刺史元慶和,於座賦詩十二韻,末云「方同廣川國,寂寞久無聲」。大爲武帝賞, 左 新亭,四面火炙之焦熟,敞車載錢設鹽蒜,雇百姓食撤一臠,賞錢一千。 徒黨幷母肉 右職局防閣爲絳衫、內人帳幔。 中大通四年,爲揚州刺史。 昭明太子流涕固諫,得免,免官削爵土還第。 倫鎖在第,舍人

諸

曇

祭

并

主

師

彼

身

守

視

。 有西州游軍將宋鵠子條姓名以啓, 倫素驕縱,欲盛器服,遣人就市賒買錦采絲布數百疋,擬 百姓並關閉邸店不出。 恒遣心腹馬容戴子高、戴瓜、李撒、趙智英等於路 。智通以血書壁作「邵陵」字乃絕,遂知之。 、大通元年,復封爵。 **免爲庶人。經三旬乃脫鎖,** 敕遣舍人諸曇粲領齋仗五百人圍綸 。臺續使少府市采, 智通子敞之割炙食之,卽載出 頃之復封爵。 經時不能得, 逐盡 與

太清二年,位中衞將軍、開府儀同三司。 侯景構逆,加征討大都督,率衆討景。 日·「汝人才如

此,何慮無聲。」旬日問,拜郢州刺史。

潰。 乃日 流 有 帝 日 從 風 物 誠 賊 贼 · 王 蕩 綸 起 徑路直指鍾山,出 曰:「侯景 義 又來攻, 舟 至 而 人馬溺者十一二。遂率西 小 鍾 將 拾之。 失 Щ 覆 利, 戰 日晚 小豎,頗習行陣,未可以一戰卽殄,當以歲月圖之。」綸發白下 識者尤異之。 敗,奔還京口。 俊, 政爲糧盡還京口。 賊稍退。 中書舍 其不意, 綸從之。 南安侯駿以數十騎馳之,賊回拒駿, 人靈超子也 及次 軍主霍俊見獲,賊送于城下,逼云已禽邵陵王。 一豐公大春、新淦公大成等步騎三萬發京口,將軍趙伯 (鍾離,景已度)采石,編乃晝夜兼道,旋軍入赴。 俊爲 衆軍 《託邏所獲,非軍敗也。」賊以刀背敺其髀,悛色不 奄至,賊徒大駭,分爲三道攻論,綸大破之。翌 、駿部亂,賊 因逼 ٠, 中江 俊 大軍,大軍 濟江, 偽許之⁷ 而 浪起, H 超

皆附。 軍 事 有赤 大寶 年 臨城 綸 蛇 元 於 正月,綸與東揚州刺 繞 是置 年 公 牛口出。 大連懼將害己,乃圖之。 綸 百官 至野 改 州,刺 南 浦 聽 施 事 史南平王恪 安幄 為正 史大連等入援至 帳,無何 陽殿,內外齋省 **給覺**乃去。 讓州 風 起, 於綸,綸 |驃騎洲,進位司空。 飄沒于江 悉題署焉。 至尋陽, 不受。 尋陽公大心欲以州 乃上綸爲假 m 數有變怪,祭城隍 臺城陷,綸奔禹穴 黄鉞、都督 讓之, 神 中 將將 不受。 外諸

元帝書曰:「道之斯美,以和爲貴, 于 時 元帝 圍 泂 東王譽於 長沙 旣久,譽請救 况天時地利不及人和。 於綸, |給欲 豈可手足肱支, 往 救 之, 爲 軍糧 不繼 自 相屠害。 遂 此。 卽 乃 H 與

罪 相 則 搆,料今訪古,未或弗亡。 大 不 魚 有喪,勞兵損義,虧失多矣。 敵猶强,天讎未雪。 可 一肉,是謂代景行師,景便不 解圍之狀。 論省書流涕曰:「天下之事,一至於斯」」左右聞之,莫不掩泣。 余爾昆弟,在外三人,如不 夫征 ·勞兵力,坐致成効,醜徒聞此,何快如之!」元帝復書,陳譽有 一戰之理,義在克勝。 侯景之軍所以未窺江外者,政 三数, 至於骨肉 安用臣子。 之戰, 爲蕃 屏盤固 愈勝愈酷,捷則 如使逆寇未除, ,宗鎭强密。 於是大修 非 功, 若自 禍 敗 仍

器

,將討侯景

安陸 于江 魏聞 翅所 侯景 聞給 餘 太牢往祭殯焉。 人 一岸,經 、輕舟· 之,遣大將楊忠、儀同 败, 人郝 署汝南 將任約 元帝 馳往 走武 聞 破 日 製綸 城主李素孝者、「云」綸之故吏,開城納之。 敵 其盛,乃造王僧辯 色不變,鳥獸莫敢近。 迎。 昌 斂之於襄陽。 百姓 。沙門法磨與綸 , 綸 敗 走。 元帝 憐之,爲立祠廟。 復遣將徐文盛追攻之。 |侯幾通攻破城,執編,編不爲屈。 定州 葬之日,黄雪雰糅, 帥舟師一萬以逼綸。 刺史田龍祖迎綸,綸懼爲所執,復歸齊昌。 有舊,藏之巖石之下。時論 時飛雪飄零,屍橫道路, 岳陽王營遣迎喪,葬於襄陽望楚山南,贈太宰,諡 綸復收卒屯于齊昌郡, 唯冢 |編將||劉龍武等降||僧辯,||編遂與子躓等十 論乃修復城池、收集士卒、將攻 擴所獨 長 通乃臥大鼓,使綸 周 不 史韋質、 下 口 雪。 數 步 司馬姜偉 ٠, 楊忠 將引魏軍 獨不 知 行收 而 坐上殺 先在外 悔 人兵至 共攻南陽 舊主 汝南 之,投 竟陵 使以 帥

列

後元 帝 議 追加諡,尚書左丞劉瑴議、諡法「怠政交外曰攜」。從之。

常,無事 鎭 京 П, 綸 任情卓越,輕財愛士,不競人利,府無儲積。聞有輒求,旣得卽散,士亦以此歸之。初 涉疑,遂使零散。 大造器甲、旣涉聲論、投之于江。 今日討抄,卒無所資。」 及後出征,戎備頗闕,乃歎曰:「吾昔造仗,本備非

|綸亦 **倫觖望滋甚,於是伏兵于莽,用伺車駕。** 百器,上以賜寺人,飮之而斃。 不懼。 初,昭明之薨,簡文入居監撫,綸不謂德舉,而云「時無豫章,故以次立」。及廬陵之沒, 武帝竟不能有所廢黜,卒至宗室爭競,爲天下笑。 上乃不自安,頗加衞士,以警宮內。 而臺舍人張僧胤知之,其謀頗洩。 於是傳者諸相疑阻 又綸獻曲阿酒

清三 屯太陽 王。 年,堅 其 長子壓字長白,大同元年,以例封汝南侯。 人 門,終日 得 書佐董勛華、白曇朗等以堅私室醞釀,亟有烹宰,不相霑及,忿恨, 書 大駭,執以諫堅,堅曰:「前言戲耳。」人曰:「不願以此爲戲耳。」侯景圍城, 蒲飲,不撫軍政。 吏 士有功,未嘗申理,疫癘所加,亦不 亦善草隸,性頗庸短,嘗與所親書,題云「嗣 存恤,士咸憤怨。 夜遣賊登樓,

城

逐陷

堅

一遇害。

弟

汝 能 文,所 確 字 仲正 以 特 有 少 此授。 、驍勇,有文才 大同 7,尤工 年 一,封爲 一楷 隸, E 階侯, 公家 碑碣皆使書之。 復 徙 封永安。 常 除秘書丞, 在 第 中 習 騎 武 射, 帝謂曰:「爲 學兵法,

時 人 以 爲 狂 左 右或進 諫, 確 日 聽吾 爲 國家破 以城,使 汝 知之。」

驟 往 返,不 鍾 Щ 之役, 以爲 確所 勞 諸將服 向披靡,羣 其 壯 勇。 賊憚之。 軍敗 賊 確 毎 使負砲,不之知 臨陣對 敵 , 意 甚詳 也。 膽,帶甲據鞍, 確 因 隙 自拔, 自 得 朝 達 朱 及 夕 方 /,馳

廣 E 綸 以 識 猶 父,無以二 日 一一自 陷 州 意 君 大 不 怒 及 矣 肯 刺 而 後 我 確 綸 史。 推 謂 帝 侯景 得 流 一宮爲 其 流涕 趙 之, 涕 日 確 事 伯 乞盟 而 知 念。」 謂 可 自 超 出,遂 猶 此 見。 曰:「汝 我 日二 盟 可 憚確 失 多貳,城 入城。 今召我 之, 譙 戰 欲 及 州 不! 亦 趙 反 一威方 邪 復 及 卿 入,未見益 必 對 景 淪 _! 時 何 爲 日 恨, 背盟 我 没, 在 臺 斬 外,慮爲 欲 幸 人 之。 使 復 也。」 先遣 朩 心 周石珍 車 累子 不 城,城 當 後患, 石珍 趙威方入, 可。 **I**齎首 孫。」 在 陷。確 曰:「敕旨 臣 坐,確 赴 啓求 向 乃使 闕。」 格 確 排 召 日 戰 確 伯 因 確 闥 如 不禁, 爲 南 超 入 入 侯景 此,侯豈 慰 啓。 揮 城。 奔。 勞文, 刃 縋下 雖云 編聞 時 眄 詔 一得辭。」 武 日 功 謂 欲 僅 帝 召確 之, 去,而 日言 得 方寢 我 逼 至 確 識 爲 此 確 爾 君 執 南 不 速 確 使 解 耳 意 中 武 去謂 日 郞 長 獪 帝 圍 堅, 歎 城 確 汝

及 出 見景 景 愛 其 膂 力, 恒 令在 左 右。 後從景仰見飛鳶, **羣賊爭射** 不中,確 射 之應弦卽

列

傅

第

四

落。 將射景,弦斷不得發,賊覺殺之。 賊徒忿嫉,咸勸除之。 ·惜死,欲手刃之。 先是綸遣典籤唐法隆密導確,確謂使者曰:「侯景輕恌, 卿還啓家王,願勿以一子爲念。」後與景獵鍾山, 同 逐禽 可 . 一 夫 引弓

年, 讓,是其廉也,知法不犯,是其愼也,庶事無留,是其勤也。」紀特爲帝愛,故先作牧揚州 封武陵王。 武陵王紀字世詢、武帝第八子也。 大同三年,爲都督、益州刺史。 尋授揚州刺史。 中書詔成,武帝加四 以路遠固辭,帝曰:「天下方亂,唯益州 少而寬和,喜怒不形於色,勤學有文才。 句曰:「貞白儉素,是其淸也; 可発,故以處汝, 天監十三 臨 財能

寧、越嶲,貢獻方物,十倍前人。 汝其勉之。」紀歔欷,旣出復入。帝曰:「汝嘗言我老,我猶再見汝還益州也。」紀在閩,開建 朝嘉其績,加開府儀同三司。

軍 屬 一蜀精兵三萬,受湘東王繹節度。 意焉。 、驃騎大將軍、太尉、承制。大寶元年六月辛酉,曰己紀乃移告諸州征鎭, 初,天監中,震太陽門,成字曰:「紹宗|梁位唯武王。」解者以|武陵|王當之,[[ヨウ]於是 ,及侯景陷臺城,上甲侯韶西上至峽,出武帝密敕,加紀侍中、假黃鉞、都 釋命圓照且頓白帝,未許東下。 七月甲辰,湘東王釋遣 遺世 子圓 督 征 討 朝 照 領 野

鮑檢 中斗 絕 報紀以武帝崩問。 易動難安,弟可鎭之,吾自當滅賊。」 十一月壬寅、紀總戎將發昼鎮, 又別紙 云:「地擬孫 釋使胡智監至蜀,以書止 (劉)各安境界,情深魯 之日:「獨

書信恒通。」

襲圓 善 諫,且以怦與將 而 封秦郡王。 王,圓普南 爲二人,「正」爲一止,言各一年而止 玄之敗實在仲春。 [人國之基也,今乃誅之,不亡何待。] 叉謂所 照於白帝 二年四月乙丑,紀乃僭號於濁,改年曰天正,暗與蕭棟同名。 譙王,圓肅宜都王。 司馬王僧略、直兵參軍徐怦並固諫,皆殺之。 圓 帥書云「事事往人口具」,以爲反於己,誅之。 照弟圓正 今年日天正,在文爲『一 時爲 以巴西、 一西陽太守,召至,鎖于省內 也。 梓潼二郡太守永豐侯撝爲征 紀叉立子圓照爲皇太子,圓正 止。 親曰:「昔桓玄年號大亨,識者爲謂『二月了』 其能久乎 僧略, 一丁卯,元帝遣萬州刺史宋簉 永豐侯撝歎曰:「王不克矣。夫 僧辯弟,怦, 識者尤之,以爲於文「天」 西 爲 大將軍、 西陽王,圓滿竟陵 勉從子也, 益州 刺 以

赴援,魏將尉遲 爲 沙 州 初,楊乾運求爲 刺 史。 二人皆憾不獲所請,[10]各遣使通 迥逼涪水,楊乾運降 梁州刺 史不得,紀以爲 之。 迥 卽 潼 趨 州 成 西魏。 刺 都 史。 楊法 及聞 魏 深 軍侵蜀 求為黎州 刺 紀遣其將 史亦 不 譙淹 得,行动以 回

五月己巳,紀次西陵,軍容甚盛。 元帝命護軍將軍陸法和立二城於峽口,名七勝城,鎖

列

俥

第

四

+

=

梁武

帝諸

子

謂天 鎖。 江 以 行。 爲 助。 及登 晉 元 帝 安 舟 復 王 及 頓 於 司 無 兵日 馬 獄 雨 拔 が撤 而 謝答仁爲步 禁兵 水 長 頻戰不 六尺。 以 配 利 之。 兵梭尉, 劉孝勝 師老糧 幷 遣宣 喜日 配 盡 衆 猛 智力 將 殆 旅 軍 (俱殫。 劉 天 上 棻 贊 赴。 也 共 叉觑 約 紀 之將 將 西 赴。 人 至 入 峽, 發 剣閣 六月 也 有黑 江 成都 龍 紀 水 築 負 可 虚 舟 揭 連 弱 城 其 前 攻 將 部 絕 帥 不 咸 得 鐵

路 陸 於 遣 救 以 景 知 里。 旣 方 所 將 紀 納 根 未 平, 軍 本 居 知 平,宜急 先 爲 許 侯叡 一更思 侯景已 是, 尊位,宣言於 以茲玉體,辛苦行陣, 其還 誻 元帝 軍 傍險 後 蜀 並 征 一平,便 專 討。 Ė 圖 西 出 平 赴, 。」諸將 制 法 侯景, 有 衆,敢諫 已聞 元帝 崏 和 悔 後, 方。 色, 愈以 荆鎭爲景 執所 乃 臨 乃睠 者 召 與 紀 爲 水 俘馘, 圓照 紀 不 死。 築 然。 西顧, 書 從 所 晶 命 責之。 目 蜀 禦 圓 滅, 頻 中 報 琳 照 遣 我勞如 甚苦大智 將 疾下 報 書 劉 及 卒 圓 紀。 法 如 孝 照 日 大軍 何。 家 和 勝 夜 日::「 世子 人 思 獨 自纁 禮。 元帝書遺紀 | 侯景 季 言 歸 紀謂 圓)月煩 不 照鎭 醜憑 旣 可,紀 雖 所 爲 而 署 暑,流 誅 陵, 實 巴 侯 江州 江 然, 乃止。 東, 叡 遣光 羯胡 陵 爲 金 故 留 刺 未服 一鑠石, 任 州 執不 史王 仍率 叛換, 約、 旣 刺 宜 而 史鄭 開 衆 謝答 遣。 聚蚊 聞 吾年 業 沿 速 安中 平 進曰:「宜 江 啓 成 琳 夢。 」 爲 急 紀 雷 所 將 往 云 進 破 至, 喩 紀 H 封 之 還 意 狐 叉 亦 於

之哀 長 口 屬 鳴 弟 望 有 宣 荆 分 平 門 室 亂之功, 形 披 共 驚 圖 氣 浪 嵯萬 膺此 见 且 肥 雷 樂推 奔, 弟 始之長逝。 瘦 兀 無復 事 鳥 歸 當壁。 相 心 代 乎愛矣, 之 期 三聲悲 儻 遣使乎, 讓柔推 書不 夜 ₹ 」 圓 盡 操,長 良所 言。」大智 希 罷 E 也。 在 歡 偸 獄 如 之 中 紀 日 日。 連 别 不 句 字 然, 上 也。 日:「水 林 於 帝 靜 此 長 叉 拱 投 三江 爲 聞 詩 匹 急, 友

三峽

願

貰

淮

南罪,思報

阜陵

恩。」

帝

看

詩

而

泣

等 兄 拔 許 不 敢 刃 日 於 升 逼 紀 是 園 人 舟 此 頻 兩岸 敗 顧 間 猶 而 卿 宁 圓 左 -知 送我 之。 照 右 餘 不 日 振, 奔 城 逐 擲 法 見七官 遣署 俱 阳 和 降。 第 馳 郎 度 五 何 啓 支尚 卿 游 以 子 上 擊將 至 圓 必 密 書樂奉業往 滿 當 此 敕 富 軍 馬也 樊猛 貴。」 樊猛 圓 來 就 照 日 猛 率 父, 曰:「失 江 所 日:-紀 生 陵 領 首 還 論 計 天 至 旣 不 和 願 子 紀 落 緝 成 所, 何 爲 之計。 功 由 圓 公 也 紀 可 作 滿 在 見。 奴。 軀 猛 船 元帝 亦 率 中 殺 法 分 申 知紀 遶 足 和 士 牀 下 叶 法 必破, 祝 而 遣 和 此 走, 文 之。 收 金 簡 太 遂 以 何 之。 張 子 金 拒 擲 圓 天 而 成 猶 照 猛 不

哀。 質 元 守 以 圓 帝 帝 禍 照 使 特 難 字 謂 愛 之 明 紀, 日: 周 興 皆 故 西 中 造 由 軍 大 以副 圓 E 司 照 敗 初 紀。 於 汝 爲 是 紀 父 益 唯哭世子 之 州 不 搆 知 東 釁 存亡。」意 奫 恋悉 鄎 · 言不絕聲 其 宋寧宋 謀 欲 也。 使 興 其 次 上謂圓 自裁 弟 郡 圓 太守。 正 正聞 而 先 圓 見鎖 遠鎭 問 正 悲 旣 在 感 諸 奉 江 王 此 陵 必 世 問 應 及 子 自 皆 便 紀 殺 號 在 旣 哭 頻 以 建 鄴 杰 兵

唯 知 玄 不 計誤。 ·能死, 又付廷尉獄。及見圓照曰:「阿兄,何乃亂人骨肉,使酷痛 並命絕食於獄,齧臂啖之,十三日死,天下聞 而悲之。 如 此。」圓照 更無所言,

守,有惠政。 而囚之。 從王命。 国 [正字明允,紀第二子。 及景破,復謀入蜀。 旣居 上流,人附者甚衆。 美風儀,善談論,寬和好施,愛接士人。 元帝將圖之,署爲平南將軍。 及侯景作逆,圓正收兵衆且一萬,後遂跋扈中流, 及至弗見,使南平嗣王恪等醉 封江安侯。 歷西陽

所愛。 之,大怒曰:「武陵有恤人拓境之勳,汝有何績 及聞紀爲征 時 武帝諸子罕登公位,唯紀以功業顯著,先啓黃扉。 紀稱梁王。及紀敗死,爲有司奏請絕紀屬籍,元帝許之, 西,綸撫枕歎曰:「武陵有何 功業,而位乃前我? 兄邵陵王編屢以罪黜,心每不平。 朝廷憒憒, 賜姓饕餮氏。 似不知人。」武帝聞 紀最為武帝

幢 匹,上足者置之內廐,開寢殿以通之,日落,輒出步馬。 有百簉;銀五倍之,其他錦罽繒采稱是。 太清初,帝思之,使善畫者張僧繇至蜀圖其狀。 及聞國難,謂僚佐曰:「七官文士,豈能匡濟。」旣 內修耕桑鹽鐵之功,外通商賈遠方之利,故能殖 每戰則懸金帛以示將士,終不賞賜。 在蜀十七年,南開 便騎射,尤工 東下,黃金一 其財用,器甲 斤爲餅, 一舞矟。 寧州、 九 ·殷積。 越嶲, 百餅 日講武 寧州 爲簉, 西通資 刺史陳 馬 躬

亦知 知 祖 請散金銀募勇士,不聽,慟哭而去。 不復能 濟。 瞻望氣色,歎吒天道,椎牀聲聞于外。 自是人有離心,莫肯爲用。 有請事者,以疾辭不見。 紀頗學觀占, 旣死,埋於 善風角,

沙洲

,不封無櫬。

元帝以劉孝勝付廷尉,葬免之。

爲 識者曰:「王敦祆花,非佳事 利 初,紀將僭號,祇怪不一,內寢栢殿柱繞節生花,其莖四十有六,靃靡可愛,狀似荷花。 申歲發圖,酉年入開,不可失也。」發圖之歲,太白在西,比及明年,則已東出矣。 也。」時蜀知星人說紀曰:「官若東下,當用申年,太白 出西,從之

季。 |陂多財爲累,雄心自立,未及騁暴,早沒爲幸。 能 子,間兄弟,廢楚嫡,疎漢嗣,可爲太息,良非一塗。以昭明之親之賢,梁武帝之愛之信,謗言 及,至死不能自明,況於下此者也。 無及乎。 邵陵 論 曰:甚矣,讒佞之爲巧也! 夫言附正直,跡在恭敬,悅目會心,無施不可。 少而 險躁,人道頓亡,晚致勤王,其殆優矣。 綜處秦政之疑,懷負尺之志,肆行狂悖,卒致奔亡。廬 南康爲政有方,居喪以禮,惜乎早天,不拯危 武陵地居勢勝,卒致傾覆,才輕志大, 至乃離父

校勘記

[1] 依舊居於內 「居」字各本並脫,據梁書補。

五年六月庚戌出居東宮 「六月」各本作「五月」。 按五月乙丑朔,無庚戌,六月甲午朔,庚戌爲

十七日。據通鑑改。

三 自立二諦法身義 「二諦」各本作「三諦」,「法身義」各本脫「身」字。按全梁文載蕭統令旨解二

說義及今旨解法身義,謂二諦爲「眞諦」、「俗諦」。 謂「法者,軌則爲旨;身者,有體之義。 軌則

之體,故曰法身」。今據正。

[6] 謂猶應稱兼慕請至卒哭 「稱」字各本並脫,據梁書補。

五〕凡三朝發哀者逾月不舉樂 「樂」字各本並脫,據梁書補

張豈不知舉樂爲大稱悲事小 「知」各本作「以」、據梁書改。

[七]稱慕悼之解宜終服月 「解」各本作「辭」,據梁書改。

不俟我恒 一爾懸心 「不俟」梁書及太平御覽八五九引並作「不使」。

九九 吳興郡屢以 水災不熟 「吳興郡」各本作「吳郡」,據梁書補。 按下疏云「使吳興一 境無復水災」

是此「吳」下脫「興」字。

詔遣前交州刺史王弈假節發吳吳興信義三郡人丁就役 「王弈」梁書作「王弁」。「信義」梁書作

封信義王,見陳書後主諸子傳。 義興」。按義興自晉歷宋齊爲郡,見州郡志。梁廢義興置信義,見隋志地理志。 隋平陳後廢義興爲縣, 見隋志毗陵郡。 南史修成於唐、故改義 陳後主有子祗

興爲信義。

- 聞喪皆哀慟 「皆」各本作「者」、據梁書、册府元龜二五八改。
- [1三] 士人結流徒 「徒」通志作「徙」。
- 爲英華集二十卷 梁書、册府元龜並作「文章英華二十卷」,隋書經籍志同。
- [12] 各二千戶 「二」各本作「三」。按梁制諸王戶封數以二千爲限,册府元龜二六四封建三,自臨川 <u>靖惠王宏至簡文子樂梁王大園共二十二王皆然。</u> 梁書河東王譽傳: 「改封河東郡王,邑二千
- [1五] 何忽隷人 「隷」各本作「疑」,據梁書改。

戶。」今據改。

- 綜改名贊字德文 稱東昏子,必不肯與梁武諸兒名同從『系』旁。」 「贊」各本作「纘」。錢大昕廿二史考異:「北史『纘』作『贊』,當從之。 |綜旣自
- 百姓曹樂等三百七十人詣闕上表 「曹樂」梁書作「曹嘉樂」。
- 丁董淑媛憂 「淑媛」前序作「昭儀」、梁書作「淑儀」。疑「淑媛」、「昭儀」並「淑儀」之譌。
- 與西鄉侯勸等潛布腹心 「勸」各本作「歡」。按歡爲昭明太子長子豫章郡王名, 勸爲吳平侯景

次子名,封西鄉侯,附景傳,今改正。

因謂其姊安固主日 「安固」各本作「固安」,據梁書、册府元龜二八五乙。 按南齊書州郡志安固

屬秦州安固郡。

時行宮戶禁重 册府元龜二九八及通志並作「時得營戶禁重」。

簡文和之得止 「得止」各本作「不得」,據册府元龜二九八改。按下云「元帝猶懼」,應是「和之

得止」,非「和之不得」。

世子憑以罪前誅死「世子憑」梁書作「長子安」。「罪」各本作「非」、當爲爛缺、通志作「罪」,今據正。

以西中郎將權攝南徐州事「南徐州」梁書作「南兗州」,册府元龜二八〇同

至吾 時綸長史章質司馬姜偉先在外 「姜偉」梁書作「姜律」、通鑑梁大寶元年亦作「姜律」。

魏所署汝南城主李素孝者「李素孝」梁書、通鑑梁大寶元年作「李素」。

[114] 解者以武陵王當之 「當之」二字各本並脱,據通鑑補

大寶元年六月辛酉 按是年六月無辛酉。下七月無甲辰,十一月無壬寅,二年五月癸酉朔,亦

無己巳。

[1元] 楊法深求爲黎州刺史亦不得 「法深」北史作「法琛」。

CMO] 二人皆憾不獲所請 「二人皆憾」各本並作「二憾」,不辭,據<u>强</u>志補正。

南史卷五十四

列傳第四十四

梁簡文帝諸子 元帝諸子

一級建王大擊。 其臨川王大款、桂陽王大成、汝南王大封、樂良王大園,並不知母氏。 王大鈞。 南海王大臨、安陸王大春。 生皇子大訓,早亡無封。其餘不知不載。 簡文二十子。王皇后生哀太子大器、 范夫人生武寧王大威。 謝夫人生瀏陽公大雅。 褚修華生建平王大球。陳夫人生義安王大昕。 南郡王大連。 張夫人生新興王大莊。 陳淑容生尋陽王大心。 包昭華生西陽 朱夫人生 左夫人生 潘美人

哀太子大器字仁宗, 列 傅 第 簡文嫡長子也。 中大通四年,封宣城郡王。四太清二年十月,侯

景寇建鄴,敕太子爲臺內大都督。 三年五月,簡文卽位。六月丁亥,曰立爲皇太子。

能見殺。」乃指繫帳竿下繩,命取絞之而絕。 人掩至。太子顏色不變,徐曰:「久知此事,嗟其晚耳。」 刑者將以衣帶絞之,太子曰:「此不 大寶二年八月、景廢簡文,將害太子。 時景黨稱景命召之,太子方講老子,將下牀而刑 時年二十八。

就死。 承聖元年四月,追諡哀太子,祔太廟陰室。 豈有無父之國。」 便涕泗嗚咽,命卽前進。 神貌怡然,未喻此意。」答曰:「吾自度死必在賊前,若諸叔外來,平夷羯寇,必前見殺,然後 復陵慠呵叱,其終不敢言。若見害時至,雖一日百拜,無益於死。」問者又曰:「官今憂逼 曰:「自國家喪敗,志不圖生。主上蒙塵,寧忍違離。吾今若去,乃是叛父,非謂避賊。 上,攜太子同行,及敗歸,船往往相失。所乘船入縱陽浦,舟中腹心並勸因此入北。 太子性寬和,兼神用端嶷,在賊中每不屈意。左右竊問其故,答曰:「賊若未須見殺,雖 若其遂開拓上流,必先見殺,後取富貴。 賊以太子有器度,每憚之。

恐爲後患,故先及禍。 何能以無益之愁,横憂必死之命。」景之西

而

縣公。 尋陽王大心字仁恕,簡文第二子也。 |大同元年,爲都督、郢州刺史,時年十三。|簡文以其幼,戒之曰:「事無大小,悉委行 幼而聰朗,善屬文。 中大通四年,以皇孫封當陽

陷,上甲侯蕭韶南奔宣密詔,加散騎常侍,進號平南將軍。 財賄,不能綏接百姓。二年,侯景寇都,大心招集士卒,與上流諸軍赴援宮闕。三年,臺城 事。」大心雖不親州務,發言每合於理,衆皆驚服。」太淸元年,爲雲麾將軍、江州刺史。貪冒 大寶元年,封尋陽王。

大心乃止,遂與約和。 二年,將遇害,邊牀謂賊廂公王僧貴曰:「我以全州歸命,何忍相苦。」 「旣無糧儲,難以守固,若輕騎往建州,以圖後舉,策之上也。」其母陳淑容不從,撫胸慟哭, 必不全其首領,請援之。」乃遣將侯璵救鐵,夜破韋約等營。大心大懼。於是二蕃釁起。 之,鐵敗乞降。 鄱陽世子嗣先與鐵善,乃謂範曰:「昔與鐵游處,其人才略從橫,若降江州, 上,以盆城處之,廩饋甚厚,欲與勠力共除禍難。會鐵據豫章反,大心令中兵參軍韋約討 不能進。時鄱陽王範率衆棄合肥,屯于栅口,待援兵總集,欲俱進。大心聞之,遣要範西 事,悉以委之,以爲豫章內史。景數遣軍西上寇抄,大心輒令鐵擊破之,禽其將趙加婁,賊 **景將任約略地至盆城,大心遣司馬韋質拒戰敗績,時帳下猶有勇士千餘人,咸說曰:** 初,歷陽太守莊鐵以城降侯景,旣而又奉其母來奔。大心以鐵舊將,厚爲其禮,軍旅之

乃見射而殞。

臨 川王大款字仁師,簡文第三子也。初封石城縣公,位中書侍郎。太清三年,簡文即

位,封江夏郡王。大寶元年,奔江陵,湘東王承制,改封臨川王。 魏剋江陵,遇害。

年,封南海郡王,出爲都督、東揚州刺史,又除吳郡太守。時張彪起義於會稽,吳人陸令公、 十一年,長兼侍中,出爲琅邪、彭城二郡太守。侯景亂,屯端門,都督城南諸軍事。大寶元 遭左夫人憂,哭泣毁瘠,以孝聞。後入國學,明經射策甲科,拜中書侍郎,遷給事黃門侍郎。 潁川庾孟卿等勸大臨投之。|大臨曰:「彪若成功,不藉我力;如其撓敗,以我說焉,不可往 也。」二年遇害。 南 海王大臨字仁宣,簡文帝第四子也。大同二年,封寧國縣公。少而敏慧。年十一,

侍郎。 韶,不敢輒習。」敕令給馬試之。 大連兄弟據鞍往還,各得馳驟之節。 帝大說,卽賜所乘馬。 樂,兼善丹青。大同二年,封臨城縣公。七年,與南海王俱入國學,並射策甲科,皆拜中書 及 啓謝,辭又甚美。 南郡王大連字仁靖,簡文第五子也。少俊爽,能屬文。舉止風流,雅有巧思,妙達音 十年,武帝幸朱方,大連與兄大臨並從。武帝問曰:「汝等習騎不。」對曰:「臣等未奉 帝他日謂簡文曰:「昨見大臨、大連,風韻可愛,足慰吾老年。」遷給事

黄門侍郎,轉侍中。

王。賊遣將趙伯超、劉神茂來攻。 之,大連棄城走,追及於信安縣,大連猶醉弗之覺。 於是三吳悉爲賊有。 還東揚州。 太清元年,出爲東揚州刺史。侯景入寇建鄴, 會稽豐沃,糧仗山積,東人懲景苛虐,咸樂爲用,而大連恒沈湎于酒。 大連專委部將留異,以城應賊,大連棄走,爲賊所獲。 大連率衆四萬來赴。 大寶元年,封南郡 及臺城沒,援軍散 宋子仙 攻

景以爲江州刺史。

二年遇害。

陸郡王,出爲東揚州刺史。二年遇害。 寇,大春奔京口,隨邵陵王入援,戰于鍾山。 十圍。大同六年,封西豐縣公,至三拜中書侍郎。 安陸王大春字仁經,簡文第六子也。少博涉書記,善吹笙。天性孝謹,體貌褒偉,腰帶 軍敗,肥大不能行,爲賊所獲。 後爲寧遠將軍, 知石頭戍軍 大寶元年,封安 事。 侯景內

出,人謂爲劫,斫之,遂失左髻。覷剋江陵,遇害。 大寶元年,奔江陵。湘東王承制,改封桂陽王。 大成性甚兇粗,兼便弓馬。 桂陽王大成字仁和,簡文第八子也。初封新淦公。太清三年,簡文卽位,封山陽郡王 至江陵,被甲夜

三四二

汝南王大封字仁叡,簡文第九子也。 初封臨汝公。 太清三年,簡文即位,封宜都郡王。

大寶元年,奔江陵。 湘東王承制,封汝南王。 魏剋江陵,遇害。

武帝所愛。 瀏陽公大雅字仁風,簡文第十二子也。 臺城陷,大雅猶命左右格戰。 賊至漸衆,乃自縋而下,發憤感疾薨 大同九年,封瀏陽縣公。 少聰警,美姿儀,特爲

年、封新興郡王、位南徐州刺史。二年遇害。 新興王大莊字仁禮,簡文第十三子也。 性躁動。 大同九年。回 封高唐縣公。

書,對日學詩。因今諷誦,卽誦周南,音韻淸雅。 封西陽郡王,位丹陽尹。二年,監揚州,遇害。 西陽王大鈞字仁博,至簡文第十四子也。 性厚重,不妄戲弄。年七歲,武帝嘗問讀何 帝重之,因賜王羲之書一卷。大寶元年,

武寧王大威字仁容, 簡文第十五子也。 美風儀,眉目如畫。 大寶元年, 封武寧郡王。

皇子大訓字仁德,簡文第十六子也。少而脚疾,不敢躡履。太淸三年,未封而亡,年十歲。

|球年甫七歲,聞而驚謂母曰:「官家尙爾,兒安敢辭。」乃六時禮佛,亦云:「凡有衆生應獲苦 報,悉大球代受。」其早慧如此。二年遇害。 初,侯景圍臺城,武帝素歸心釋敎,每發誓願,恒云:「若有衆生應受諸苦,衍身代當。」時大 建平王大球字仁玉,〔六〕簡文帝第十七子也。大寶元年,封建平郡王。〔七〕性明慧夙成。

游泣、眼爲之傷。 及武帝崩,大昕奉慰簡文,嗚噎不自勝,左右莫不掩泣。 安郡王。二年遇害。 義安王大昕字仁朗,簡文帝第十八子也。 年四歲,母陳夫人卒,便哀毀有若成人,晨夕 大寶元年,封義

當 一年遇害。 滅 廣屬。」嬭媼驚掩其口,曰:「勿妄言,禍將及。」大擊笑曰:「禍至非由此。」大寶元年封, 綏建王大摯字仁瑛,簡文第十九子也。 幼雄壯有膽氣,及臺城陷,乃歎曰:「大丈夫會

列傳第四十四 梁簡

文帝諸子

樂良王大圜,簡文第二十子也。 大寶元年封。 後入周。 仕隋位內史侍郎。

生愍懷太子方矩。 元帝諸子。 徐妃生武烈世子方等。「公 夏貴妃生敬皇帝。 自餘 不顯。 王貴嬪生貞惠世子方諸、始安王方略。 袁貴人

形。 聞之,又惡方等,方等益懼,故述此論以申其志。 以嫉妬失寵,方諸母王氏以冶容倖嬖。 特好散逸。 恒在掌握。 如之,及其覺也,何憂斯類,良由吾之不及魚鳥者遠矣。 生在蒿蓬,死葬溝壑,瓦棺石椁,何以異茲。吾嘗夢爲魚,因化爲鳥。 武烈世 舉首懼觸,搖足恐墮。 嘗著論曰:「人生處世,如白駒過隙耳。 子方等字實相,元帝長子也。 若使吾終得與魚鳥同遊,則去人間 及王夫人終,元帝歸咎徐妃, 少聰敏,有俊才,善騎射,尤長巧思。 一壺之酒,足以養性,一簞之食,足以怡 故魚鳥飛浮,任其志性,吾之進退, 方等意不自安。 .如脫屣耳。」初,徐妃 方其夢也, 性愛林泉, 何樂

得衆 景 乃配 元帝觀之甚說,入謂徐妃曰:「若更有一子如 亂 和 步騎一萬,使授臺城。 ,元帝召之,方等啓曰:「昔申生不愛其死,方等<u>豈</u>顧 時武帝年高,欲見諸王長子。 元帝始歎其能。 方等又勸修築城栅,以備不虞,旣成,樓雉相望, 贼每來攻,方等必身當矢石。 元帝遣方等,方等欣然升舟,冀免憂辱。 此, 吾復何憂。」徐妃不答,垂泣 其生。」元帝省書歎 城陷,方等歸荆州, 行至 周回七十餘里。 息, 而 收 退。 集士馬, 知 繇水,遇侯 無還意 元帝忿 甚

刺史,諡忠壯世子,幷招魂以葬之。 溪,軍敗溺 都督,令南討。 時 河東王 死,求屍不得。 爲湘州刺史,不受令。 方等臨行謂所親曰:「吾此段出征,必死無二,死而獲所,吾豈愛生。」及至麻 元帝聞之心喜,不以爲戚。後追思其才,贈侍中、中軍將軍 方等求征之,元帝謂曰:「汝有水厄,深宜愼之。」 揚州 拜

之,因疏其穢行牓于大閤,方等入見,益以自危

方等注范曄後漢書、未就。 所撰三十國春秋及為靜子行於世。日

爲陳 主梁 後 王 嗣, 人所 琳迎送 元 帝卽位,改諡武烈世子。 自盆 敗, 建鄴。 其御 城濟江。 及敬帝立,出質于齊。 .史中丞劉仲威奉以奔壽陽,遂入齊。 二月,卽帝位于郢州,年號天啓,置百官。 封子莊爲 敬帝太平二年,陳武帝將受禪,王琳請莊于齊以 永嘉王。 及魏剋江陵,莊年甫七 齊武平元年,授特進、 王琳總其軍 歲,爲 國。 開府儀同三 人家 明年,莊 所匿

列

傳

第

司 対梁王。 齊朝許以興復,竟不果而齊亡,莊在鄴飲氣 而 死。

以歸。 特為 軍在下,虜安得來。」始命閉門, 文盛與侯景將任約相持,方諸年十五,童心未革,恃文盛在近,不恤軍 爲念。」因拜中撫軍將軍以自副。自己又出爲郢州刺史,鎭江夏,以鮑泉爲行 侯景知之,乃遣其將宋子仙從間道襲之。 元帝所愛,母王氏又有寵。 貞惠世子方諸字明智,5103元帝第二子也。幼聰警博學,明老、易,善談玄, 王僧辯軍至蔡洲、景遂害之。 及方等敗後,元帝謂曰:「不有所廢,其何以 賊已入城。 元帝追諡貞惠世子。 方諸方踞泉腹,以五色毦辮其鬚。 百姓奔告,方諸與鮑泉並不信, 政,日與鮑泉蒱酒 事。 興。 日:「文盛 時元帝遣 子仙執方諸 風采清越, 勿以汝兄

及升儲位、昵狎羣下,好著微服。 侍中,中衞將軍。 「太子聖德乃未極日新,幸無大過。」帝曰:「卿以我父子故未直言,從容之間,無失和嶠之 弘 愍懷太子方矩字德規,元帝第四子也。 正責之,因使太子師弘正。 元帝承制,拜王太子,改名元良。 嘗入朝,公服中著碧絲布袴,摳衣高,一一一見之大怪,造尚 佗日,弘正謁見,元帝問曰:「太子比頗受卿導不。」對日 少勤學,美容止。 承聖元年十一月丙子,立爲皇太子。 初封南安侯。 太淸初, 累遷

對。」便有廢立計。 未及行而江陵喪亡, 遇害。 太子聰穎凶暴猜忍, 俱有沅帝風。 敬帝承

制,追諡愍懷太子。

嬪、次妹又爲良人,並蒙寵幸,方略益鍾愛。侯景亂,元帝結好于魏,方略年數歲便遣入關。 無封失名。 千里送遠垂。」至長安卽得還,贈遺甚厚。江陵喪亡,遇害。 元帝親送近畿,執手歔欷,旣而旋駕憶之,賦詩曰:「如何吾幼子,勝衣已別離,十日無由宴, 始安王方略,元帝第十子,貞惠世子母弟也。 母王氏,王琳之次姊, 貴嬪、良人並更誕子,未出閤, 元帝卽位,拜貴

之材、居冢嗣之任、竟亦當年擯落、通塞亦云命也、哀哉! 論曰:簡文提挈寇戎,元帝崎嶇危亂,諸子之備踐艱棘,蓋時運之所鍾乎。 武烈以幹蠱

校勘記

中 大通 四年封宣城郡王 「四年」各本作「三年」,據武帝紀改。

- 六月丁亥 「丁亥」各本作「癸酉」。 按是月乙酉朔,無癸酉,據武帝紀改。
- = 封 **西豐縣** 公 「公」各本作 :「侯」,據梁書改。 張森楷南史校勘記: 按太子子例皆封公。」各本

並誤。

- 〔四〕 大同九年 「九年」各本作「元年」,據梁書改。
- 〔五〕西陽王大鈞字仁博 「仁博」梁書作「仁輔」。
- [、] 建平王大球字仁玉 「仁玉」梁書作「仁珽」。
- نا-نا-ا 封建平郡王 「建平」各本作「建安」。 按本卷前序及梁書皆作「建平」,是,今據改。
- 德本、南監本、汲古閣本、金陵局本亦並作「忠烈」。 徐妃生武烈世子方等 傳乃云:「元帝即位,改諡武烈世 「武烈」北監本、殿本作「忠壯」,傳文同,而 子。」 本書元帝紀:「承聖元年冬十一月,改諡忠壯太子爲武烈 按梁書皆作「忠壯」, 並無「忠烈」之文; 總目及後論作「忠烈」。 而本 元大

太子。」皆與傳合,今據改。

- . ∱. ∐ 所撰三十國 春 秋及篤 靜子 ,行於世 「篤靜子」梁書作「靜住子」。 按隋書經籍志著錄淨住子,謂
- 南齊竟陵王子良撰。
- (10) 貞惠世子方諸字明智 「明智」梁書作「智相」。
- 因拜中撫 軍將軍以自副 「中撫軍」下「將軍」二字,梁書無。

至己卯始立皇太子。

列傳第四十四 校勘記

南史卷五十五

列傳第四十五

王茂 曹景宗 席闡文 夏侯詳 子亶 夔 魚弘

吉士瞻 蔡道恭 楊公則 鄧元起 羅研 李膺

張惠紹 馮道根 康絢 昌義之

王茂字休連,53一字茂先,太原祁人也。 **祖深,北中郎司馬。** 父天生,宋末爲列將,剋

司徒袁粲,以勳歷位郡守,封上黃縣男。

書,究其大指。性隱不交游,身長八尺,潔白美容儀。齊武帝布衣時嘗見之,歎曰:「王茂先 |茂年數歲,爲大父||深所異,常曰:「此吾家千里駒,成門戶者必此兒也。」及長,好讀兵

列傳第四十五 王茂

年少堂堂如此,必爲公輔。」

褶隨紹叔入見。武帝大喜,下牀迎,因結兄弟,被推赤心,遂得盡力。 便以王佐許之,事無大小皆詢焉。 可耳。」紹叔曰:「都下殺害日甚,使君家門塗炭,今欲起義,長史那猶臥。」茂因擲枕起,卽袴 網焉,乃誅言者。或云茂與帝不睦,帝諸腹心並勸除之。而茂少有驍名,帝又惜其用,曰 「將舉大事,便害健將,此非上策。」乃令腹心鄭紹叔往候之。遇其臥,因問疾。 後爲臺 郎,累年不調。 亦知齊之將亡,求爲邊職。 人或譖茂反,帝弗之信。譖者驟言之,遣視其甲矟,則蟲 久之,爲雍州長史、襄陽太守。 茂曰:「我病

盛兵朱雀門,衆號二十萬。及戰,梁武軍引却,茂下馬單刀直前,外甥韋欣慶勇力絕人,執 外議。」帝乃出之。軍主田安啓求爲婦,玉兒泣曰:「昔者見遇時主,今豈下匹非類。 鐵纒矟翼茂而進,故大破之。|茂勳第一,|欣慶力也。|建康城平,以|茂爲護軍將軍,遷侍中、 已,義不受辱。」及見縊,潔美如生。 輿出,尉吏俱行非禮。 領軍將軍。時東昏妃潘玉兒有國色,武帝將留之,以問茂。|茂曰:「亡齊者此物,留之恐貽 發癬部,遣茂爲前驅。、郢、魯旣平,從武帝東下爲軍鋒。師次秣陵,東昏遣大將王珍 乃以余妃賜茂,亦潘之亞 也。 死而後

姦盜,自表解職,優詔不許。 羣盜之燒神獸門,茂率所領應赴,爲盜所射。茂躍馬而進,羣盜反走。茂以不能式遏 加鎭軍將軍,封望蔡縣公

是歲,江州刺史陳伯之叛,茂出爲江州刺史,南討之。 伯之奔魏。時九江新經軍寇,茂

詹事 後,每見言色。 務農省役,百姓安之。 ,,車騎將軍,開府儀同三司,丹陽尹。時天下無事,武帝方敦文雅,茂心頗怏怏,侍宴醉 武帝宥而不責。進位司空。 四年,魏攻漢中,茂受詔西禦,魏乃班師。 歷位侍中,中衞將軍,太子

惰容。 樂,旣成列,鐘磬在格,果無故編皆絕墮地。 樂旣極矣,能無憂乎。」俄而病卒。 不取奉,獄無滯囚,居處被服,同於儒者。 茂性寬厚,居官雖無美譽,亦爲吏人所安。 初,茂以元勳,武帝賜鐘磬之樂。 **麥表瓌麗,須眉如畫,爲衆所瞻望。** 茂在州,夢鐘磬在格,無故自墮,心惡之。 薨于州。 徙驃騎將軍、開府同三司之儀、江州刺史。 |茂謂長史||江詮曰:「此樂、天子所以惠勞臣也。 居處方正,在一室衣冠儼然,雖僕妾莫見其 武帝甚悼惜之,詔贈太尉,諡曰忠烈公。 及覺,命奏 在州

子貞秀嗣,以居憂無禮,爲有司所奏,徙越州,後詔留廣州。 與魏降人杜景欲襲州城,

刺史蕭昂斬之。三

曹景宗字子震,新野人也。父欣之,仕宋位徐州刺史。

景宗幼善騎射 ,好畋獵,常與少年數十人澤中逐**麞**鹿,每衆騎赴鹿,〔三〕 鹿馬相亂,景宗

列傳第四十五 曹景宗

馬將數 遣船到武陵,收其屍,迎還殯葬。 騎將軍敬兒少子也,爲武陵太守。 頗愛史書,每讀穰苴、樂毅傳,輒放卷歎息曰:「丈夫當如是」」少與州里張道門善,道門,車 於衆中射之,人皆懼中馬足,鹿應弦輒斃,四以此爲樂。 人,於中路卒逢蠻賊數百圍之。 鄉里以此義之。 敬兒誅,道門於郡伏法,親屬故吏莫敢收。 景宗帶百餘箭,每箭殺蠻,蠻遂散走。 未弱冠,欣之於新野遣出 因以 景宗自襄陽 膽 州,以匹 勇聞

達宵奔,景宗導入山道,故顯達父子獲全。 Щ 王英四萬人。及剋馬圈,顯達論功,以景宗爲後。 仕齊以軍功累加游擊將軍。 建武四年,隨太尉陳顯達北圍馬圈,以奇兵二千破魏援中 景宗退無怨言。魏孝文率衆大至,顯

宗軍士皆桀黠無賴,御道左右莫非富室,抄掠財物,略奪子女,景宗不能禁。及武帝入頓西 景宗被甲馳戰,居士棄甲奔走,景宗皆獲之。又與王茂、呂僧珍掎角,破王珍國於大航。 襄陽即位,武帝不從。及至竟陵,以景宗爲軍鋒。道次江寧,東昏將李居士以重兵鎭新亭, 城,嚴申號令,然後稍息。 **陵太守。及帝起兵,景宗聚衆幷率五服內子弟三百人從軍,遣親人杜思冲勸先迎南康王於** 景宗在州、鬻貨聚斂、於城南起宅、長堤以東、夏口以北、開街列門、東西數里。 梁武爲雍州刺史,景宗深自結附,數請帝臨其宅。 城平,封湘西縣侯,除郢州刺史,加都督。天監元年,改封竟陵縣 時天下方亂,帝亦厚加意焉,表爲意 而部曲

及司 年十月、魏攻司州、圍刺史蔡道恭。 州城陷,爲御史中丞任昉所奏。 帝以功臣不問,徵爲右衞將軍 城中負板而汲、景宗望關門不出,但耀軍游獵 加

眼 伐芻藁,皆爲大眼所略。 逼。 景宗進頓邵陽洲,立壘與魏城相去百余步。 進, 叡 來攻、景宗破之,因得壘成。 亦 遇暴風卒起,頗有沈溺,復還守先頓。 若孤 援焉,而受景宗節度。 景宗等器甲精新,魏人望而 五. 年 軍獨往,城不時立,必見狼狽。 ·,魏中山王英攻鍾離,圍徐州刺史昌義之,武帝詔景宗督衆軍援義之,豫州刺史章 景宗乃募勇敢士千餘人,徑度大眼城南數里築壘,親自舉築。 韶景宗頓道人洲,待衆軍齊集俱進。 使別將趙草守之,因謂爲趙草城。是後恣芻牧馬。 奪氣。 魏將楊大眼對橋北岸立城,以通糧運。每牧人過岸 今得待衆軍同進,至一始可大捷矣。」及章叡至,與 帝聞之曰:「此所以破賊也。景宗不進,蓋天意 魏連戰不能却,傷殺者十二三,自是魏軍不敢 景宗欲專其功,乃違敕 大眼遣 而

章寂 等乘 攻其北。 先是、詔景宗等預裝高艦,使與魏橋等、爲火攻計。令景宗與叡各攻一橋。 艦登岸,擊魏洲 六年三月,因春水生,淮水暴長六七尺。叡遣所督將馮道根、李文釗、裴邃、 上軍盡殪。 景宗使衆軍復鼓噪亂登諸城,呼聲震天地, 叡攻其南, 大眼於西

抄掠,輒爲趙草所獲。

列

傅

第

四十五

闦

景

宗

淮 軍 岸燒營,英 百餘 主 馬 廣躡 里 屍 自東岸 骸相藉。 大眼至濊水上 棄城走,諸壘相 虜五 萬餘 四十餘 人,收其軍糧器械 里, 次土崩、悉棄其器甲,爭投水死, 伏屍 相枕。 山積,牛馬驢騾不可稱計。 義之出逐英至洛口 淮水爲之不流。 英以匹馬入梁城,緣 景宗乃搜所 景宗 得

生

口

[萬餘

人,馬千匹,遣獻捷。

馬脚 鍾離,蔣帝神報敕,必許扶 起火,當神上忽有雲如繼,倏忽驟 自此帝畏信遂深。 盡有泥濕,當時並目觀焉 先是早甚,詔 亦 自踐 蔣帝 作以來, 神水 助。 雨,十旬不降。 旣 未嘗躬自到廟, 而 雨 無雨水長, 如 寫 臺中宮殿皆自振 帝怒,命載荻欲焚蔣廟幷神影。 逐挫敵 於是備法駕將朝臣修謁。 人, 亦神之力焉。 動。 帝懼、馳韶追停、 凱旋之後,廟中人 是時,魏軍 爾日 少時還靜 開朗、欲 ·攻圍

韻。 競。借問 求賦 時韻 詩。 景宗振旅凱入,帝於華光殿宴飲連句,令左僕射 行 已盡, 帝曰:「卿伎能甚多, 路 八, 唯餘競病二字。 何如 霍去病。」帝歎不已。 人才英拔, 景宗便操筆, 何必止在 約及朝賢驚嗟竟日,詔令上左史。 斯須 而成, 一詩。」景宗已醉,求作不已, 沈約賦韻。 其辭曰:「去時兒女悲, 景宗不得韻,意色不平,啓 於是進爵 韶令約 歸 來 笳 鼓 爲 賦

景宗爲人自恃尙勝,每作書字,有不解,不以問人,皆以意造,雖公卿無所推,唯以韋叡

拜侍

中、領軍

將軍

年長,且州里勝流,特相敬重,同宴御筵,亦曲躬謙遜。 武帝以此嘉之。

露漿。 樂,臘月於宅中使人作邪呼逐除,徧往人家乞酒食。本以爲戲,而部下多剽輕,因弄人婦 得。 騎,拓弓弦作礔礰聲,箭如餓鴟叫,平澤中逐麞,數肋射之,渴飲其血,飢食其脯,於一甜如甘 女,奪人財貨。帝頗知之,景宗懼乃止。 以位望隆重,人所具瞻,不宜然。景宗謂所親曰:「我昔在鄕里,騎快馬如龍,與年少輩數十 路行閉車幔,小人輒言不可。 景宗好內,妓妾至數百,窮極錦繡。 覺耳後生風,鼻頭出火,此樂使人忘死,不知老之將至。今來揚州作貴人,動轉不 閉置車中,如三日新婦,此邑邑使人氣盡。」爲人嗜酒好 性躁動,不能沉默。 出行常欲褰車帷幔,左右輒諫

江州刺史,赴任卒於道。贈雍州刺史、開府儀同三司,諡曰壯。子皎嗣 帝數宴見功臣,共道故舊。景宗酒後謬妄,或誤稱下官。帝故縱之,以爲笑樂。後爲

刺史。 景宗題書後答曰:「買猶未得,云何已賣。」義宗貪鏹遂成。 豪强之門。 景宗齊永元初任竟陵郡,其第九弟義宗年少,未有位宦,居在雍州。 向家兄弟憑附曹氏,位登列卿。後義宗爲都督,征穰城,軍敗,見獲於魏,卒。 市邊富人姓向以見錢百萬欲埤義宗,「引以妹適之。義宗遣人送書竟陵諮景宗, 後隨武帝西下,歷位梁、秦二州 旣方伯之弟,又是

其子穎冑善。 席闡文,安定臨涇人也。 復歷西中郎中兵參軍,領城局。 孤貧,涉獵書史。 梁武帝之將起兵,闡文勸穎胄同焉,仍遣客 齊初,爲雍州刺史蕭赤斧中兵參軍,由是與

田祖恭私報帝,幷獻銀裝刀,帝報以金如意。

留 鎭雍部,乃與西朝羣臣迎憺總州事,故賴以寧輯。 和帝稱尊號,為衞尉卿。 穎冑暴卒,州府騷擾,闡文以和帝幼弱, 中流任重,時始興王

期 憺 而 至。 帝受禪、除都官尚書,封山陽伯,出爲東陽太守。 改封湘西侯。〔三卒官〕諡曰威。 在郡有能名。 冬至、悉放獄中囚、依

夏侯詳字叔業,譙郡譙人也。 年十六遭父艱,居喪哀毁,三年廬于墓側。 嘗有三足雀

來集其廬戶,衆咸異焉。

仕 宋 爲新汲令,政有異績。 豫州刺史段佛榮班下境內,爲屬城表。 轉中從事 史,仍遷

別駕。歷事八將,州部稱之。

齊 明帝爲刺史,雅相器遇。 及輔政、引詳及裴叔業日夜與語、詳輒不酬。 帝以問叔業,

叔業 以告詳。 詳 日三 不爲福始,不爲禍先。」由此微 有件。 出為征虜長 史、義陽太守

於詳。 詳 適 右 ·僕射、尋授荆州刺史,詳又固讓于憺。 其 不 子 同 及 南康 變。 ,以告柳忱。 頃之穎胄卒,梁武弟始興王憺留守襄陽 王 大事方建,西臺以詳爲 爲荆 州 忱曰:「易耳。 詳 爲 西中 郎 中領 近洋求昏未之許,令成昏而告之, 司 馬 軍 、新興太守。 ,加散騎常侍、南郡太守。 ,詳乃遺 梁武 使迎憺共參軍 帝起兵,長史蕭穎胄同 凡軍 不憂立異。」於是 國。 國大事 **元** 遷侍中、 ず、穎冑 創大舉,慮 以女 尙書 多 决

給 以 城 表 南 親 司 損 信二十人,改封豐城縣公。 臨 天監元年,徵 諡 挹 水 日景。 之志。 有 ·峻峯,舊傳云「刺史登此 子亶 後徵爲尚 爲侍中、車騎將軍,封寧都縣侯。 嗣 書左僕射、 三年,遷湘州 山輒 金紫光祿大夫, 代」,由 刺 史。 是歷政莫敢至。 詳累讓,乃更授右光祿 詳善吏事,在州四載,為 道病卒。 上為素服舉哀,贈開府儀 詳於其地起臺榭 大夫,侍中 百 姓 所 ,延僚屬, 稱 如 州 同

迎亶。 主 帥 0 亶 字 **凰乃齎宣** 及 崔 世龍,齊永元末,父詳爲西中 上慧景: 作亂 德 皇后令,令南康王纂承大統。 『夏以 **捍禦**功,除驍騎 郎 南 將 康 王 軍 司馬,隨府 建鄴平,以直爲尚書吏部郎,俄遷侍中,奉 及梁武 起兵,詳 鎭 荆 州 與長 亶 留 史蕭穎胄 都 下 , 爲 協 東昏 同 密遣 聽 政

列

傳

第

四

+

五.

席

M

文

夏

侯

詳

璽於帝。

爲 書,遷給事中、右衞將軍。 司州刺史,領安陸太守。 天監六年,累遷南郡太守。 累遷吳興太守。 服闋,襲封豐城縣公。 父憂解職、居喪盡禮、廬于墓側、遺財悉推諸弟。 在郡復有惠政、吏人圖其像、立碑頌美焉。 居州甚有威惠,爲邊人悅服。 歷都官尚 八年,起

充復。 立碑置祠、詔許之。 豫、南豫二州刺史,加都督。 降城五十二,獲男女口七萬五千人。詔以壽陽依前代置豫州,合肥鎭改爲南豫州,以亶爲 **亶後, 亶與僧智還襲破之。進攻黎漿,貞威將軍韋放自北道會焉。** 孫、陳慶之等稍進。[10] 亶帥湛僧智、魚弘、張澄等通淸流澗將入淮、肥。[11] 魏軍夾肥築城出 尋敕班師合肥,須堰成復進。七年夏,潍堰水盛,壽陽城將沒,武帝復遣北道軍元樹帥彭寶 道攻壽陽,未剋而邃卒,乃加亶使持節代邃,與魏將河間王琛、臨淮王彧等相拒,頻戰剋捷。 普通五年,爲中護軍。 卒于州鎭。 帝聞之,卽日素服舉哀,贈車騎將軍,諡曰襄。州人夏侯簡等表請爲亶 六年,大舉北侵,先遣豫州刺史裴邃帥譙州刺史湛僧智等自南 壽春久離兵荒,百姓多流散,亶輕刑薄賦,務農省役,頃之人戶 兩軍旣合,所向皆降,凡

帝謂亶曰:「夏侯溢於卿疏近。」亶答云:「是臣從弟。」帝知溢於亶已疏,乃曰:「卿傖人,如何 | 直美風儀,寬厚有器量,涉獵文史,能專對。 宗人夏侯溢爲衡陽內史,辭日,亶侍御坐,

不辨族從。」。直對曰:「臣聞服屬易疏,所以不忍言族。」時以爲能

妓衣。 晚年頗好音樂,有妓妾十數人,並無被服姿容。[三]每有客,常隔簾奏之,時謂簾爲夏侯 **亶歷六郡三州,不為產業,祿賜所得,隨散親故。性儉率,居處服用充足而已,不事華** 子誼襲封豐城縣公。

刺史,兼督司州,封保城縣侯。 慶和於內築棚自固,及變至遂請降,凡降男女口萬餘人。顯伯聞之夜遁,衆軍追虜二萬餘 於廣陵,入其郛。魏將元顯伯率軍赴援,僧智逆擊破之。變自武陽出會僧智,斷魏軍歸路。 任 人,斬獲不可勝數,由是義陽北道遂與魏絕。及郢州刺史元願達降,詔改爲北司州,以變爲 思祖出義陽道,攻平靜、穆陵、陰山三關,剋之。時識州刺史湛僧智圍東豫州刺史元慶和 **亶弟夔字季龍,位大匠卿,累遷司州刺史,領安陸太守。 帥壯武將軍裴之禮、直閣將軍**

漑 | 夔在州七年,遠近多附之,有部曲萬人,馬二千匹,並服習精强,爲當時之盛。 叉居焉, 旧千餘頃,歲收穀百餘萬石,以充儲備,兼贍貧人,境內賴之。變兄亶先經此任,至是變 中大通六年,爲豫州刺史,加督。豫州積歲連兵,人頗失業,變乃率軍人於蒼陵立堰, 兄弟並有恩惠於鄉里。百姓歌曰:「我之有州,頻得夏侯。前兄後弟,布政優優。」 性奢豪,後房

列

傳第

伎妾曳羅綺飾金翠者百數。 愛好人士,不以貴位自高, 文武賓客常滿坐,時亦以此稱

卒于州、諡曰桓。子譔嗣,官至太僕卿。

盡略有之。 明被魏囚,復爲侯景長史。 明在州有四妾障、於、汪、阮,並有國色。 景反,蹯前驅濟江,頓兵士林館, 明被魏囚, 破邸第及居 刺史貞陽侯明引 其妾並還都第, 膰至破第 人富室, 爲府長史。 子女財貨

納焉。

不勝 守。 通 生如 用銀鏤金花壽 金翠,服翫車馬,皆窮一時之驚絕。二三有眠牀一張,皆是蹙栢,四面 、輕塵棲弱草,白駒之過隙。 嘗謂人曰:「我爲郡有四盡:水中魚鼈盡,山中麞鹿盡,田中米穀 魚弘,襄陽人。身長八尺,白晢美姿容。 福 兩 重爲脚。 人生但歡樂,富貴在何時。」於是恣意酣賞。 累從征討,常爲軍鋒。 盡 歷南譙、 一,村里 周 一一無一 人庶盡。 盱眙、 侍妾百餘人, 竟陵太 有異, 丈夫

振。逢敕迎瑞像,自己王令送像下都,弘率部曲數百,悉衣錦袍, 人覓一菱不得。 爲湘 東王鎭西司馬,述職西上,道中乏食,緣路採菱,作菱米飯給所部。 又於窮洲之上,捕得數百獼猴,膊以爲脯,以供酒食。 赫弈滿道,頗爲人所慕。 比及江陵,資食復 弘度之所,後 塗

齊和 義陽 平魯休 校 廖 學,因誦鮑照詩云:「豎儒守一 別。 卜者王先生計祿命, 帝 太守王撫之、天門太守王智遜、武陵太守蕭彊等並不從命、鎭 吉士瞻字梁容,馮翊蓮勺人也。 建康 烈 卽 位 軍 一,得絹 一、以爲 平,爲巴東相 領軍 三萬疋,乃作百禪,其外並賜軍士,不以入室。 司馬。 王生曰:「君擁旄杖節非 、建平太守。 經,未足識行藏。」拂衣 士瞻少時嘗於南蠻府中擲博、三三無褌褰露,爲儕輩所侮。 少有志氣,不事 一州,後一 不顧。 生業。 年當得戎馬大郡。」及梁武起兵, 年逾四十,忽忽不 時徵士吳苞見其姿容, 以軍功,除輔國將軍 軍 蕭穎胄遺士瞻討平之。 得志, 乃就江 勸 、步兵 以 及 經

爾金鉤, 初, 士瞻為 且公且 開府 侯。」士瞻娶夏侯詳兄女, 城局參軍,浚萬人仗庫防池,得一 女竊以 與詳,詳喜佩之。 金革鉤,隱起鏤甚 及是革命,詳果封侯,而 精 巧。 篆文日 [:|[錫

士瞻不錫茅土。

陽、武昌 天 監二年,入爲直閤將軍,歷位秦、梁 二郡太守。 在 郡 清約,家無私積。 二州 始士瞻夢得一積鹿皮,從而 河刺史, 加都督。 後爲太子右衞 數之,有十一 率, 叉出 領。 爲 及 西

列

傳

不

顧

軍

制

,

輒離所部,

遂以孝聞。

詔

下

·旌異。

覺喜 療。 日:日 普 通 七年 鹿 者祿 卒於郡,贈左衞將 也, 吾當居十一 軍,諡 祿乎。」 自其仕進所莅已九,及除二郡, 日 胡子。 子琨時在戎役,聞問 踊 心惡之, 而絕, 良久乃蘇 遇疾不肯

蔡道恭字懷儉,南陽冠軍人也。父那,宋益州刺史。

恭 素著 道恭 威略,專相 少寬厚有大量,仕 :委任。 齊 和 齊 帝 爲 卽 西 位, 中 郎中兵參軍 爲 右衞 將軍。 , 加 出 輔 爲 國 司州 將 軍。 刺 史。 梁武帝起兵, 梁 天 監初 蕭穎 論 功封 冑 以 漢 道

壽縣伯,進號平北將軍。

兄子 作 用 壍 士, 水 大 四 四 僧勰、從弟 ,稍,長二丈五 石 三年 道 面 I 鳥漆 俱前 恭 魏 載 大弓射,所中皆洞甲飲羽, 圍 土独 欲以 |靈恩及將率謂曰:「吾所苦勢不能久, 司 尺, 州 塞之。 《塡壍。 ,時城 施長 相持 中衆不滿五千人,食裁半歲。 可, 道恭壍內列 百 使壯士執 餘 日 , 一發或貫 艨 前後斬獲不可勝計。 以 艟 刺魏 鬭艦 人。 兩 以 人,敵人望弓皆靡。 待 魏軍甚憚之,將退。 汝等當以死固 之。二三魏 魏軍 攻之,晝夜不息, 魏 大造 人不 節, 得 梯 進 又於城內作 衝 無令吾沒有遺恨。」 會道恭 、攻圍 又潛作伏 乃作 日 疾篤 急。 土 大 道 一,乃呼 Щ 車 道 以 恭 決

又令取所持節授僧勰曰:「稟命出疆,旣不得奉以還朝,方欲攜之同逝。 可與棺柩 相隨。」衆

皆流涕。 其年五月卒。魏知道恭死,攻之轉急。

軍, 並尋購喪櫬。 先是,朝廷遣郢州刺史曹景宗赴援,景宗不前。 八年,魏許還道恭喪, 其家以女樂易之。 至八月,城內糧盡,魏剋之。 葬襄陽。 傳國至孫固,早卒, 贈鎭西將

或

除。

討琰,仲懷力戰,死於橫塘。 仲懷首。 楊公則字君翼,天水西縣人也。 公則斂畢,徒步負喪歸鄉里,由此著名。 公則隨父在軍,年未弱冠,冒陣抱尸,號哭氣絕良久。 **父仲懷,爲宋豫州刺史殷琰將。** 琰叛,輔 國將 |動命還 軍 劉

勔

竭,陷于寇,抗聲罵賊,鳥奴壯之,要與同事。 將軍,復領太守。 詔襃美。 後梁州刺史范柏年板爲宋熙太守、領白馬戍主。時氐賊李烏奴攻白馬,公則 除晉壽太守,在任淸潔自守。 頃之,荆州刺史巴東王子響構亂,公則進討。 遷扶風太守,母憂去官。 公則偽許而圖之,謀泄,單馬逃 事平,遷武寧太守,百姓便 雍州刺史陳顯達起爲 齊高 矢盡 寧朔 帝 糧

入爲前軍將軍。

和 帝 爲 荆州 刺 史, 公則爲西中郎中兵參軍。 及蕭穎青協 同梁武,以公則 為輔 國 一將軍,

日俱 頟 會于夏口 西 中郎 下,公則受命先驅。 誻 時荆州 議 参 軍 諸軍 率 兵東 悉受公則節度,雖蕭穎達宗室之貴亦隸焉。 江州旣定,連旌東下,直造建鄴。 下。 和帝卽位 当,授湘州 刺史。 梁武 公則號令嚴明, 軍次沔口 郢城平,武帝 公則 秋豪不 率湘府之衆 命衆 犯,所 軍 在 卽

莫不賴焉

平,城 麾蓋. 進號左將軍,還鎭 選勇士攻公則 人,性懦怯,城內輕之,以爲易與,每出盪,輒先犯公則壘。 一,縱神鋒弩射之, 大軍 內出者或被剝奪,公則親率麾下,列陳東掖門,衞送公卿士庶,故出者多由公則營焉 至新林,公則自越城移屯領軍府壘北樓, 棚,軍中驚擾。 南藩 矢貫 胡牀, 左右皆失色。 公則堅臥不起, 徐命擊之, 公則曰:「虜幾 與南掖門相 東昏軍 公則 中吾脚。」談 對。 幾厲軍 · 乃 退。 嘗登樓望 士,剋 公則 笑 獲更多 所 如 戰, 領 初 多 城中 是 東昏 及城 湘 遙 夜 溪 見

南將 無威 、嚴、然 軍 初,公則 一,封 寧都 勵己廉慎,爲吏人所悅。 東下,湘部諸郡多未賓從,及公則還 縣侯。 湘州寇亂累年, 湘俗單門多以路求州職,公則至皆斷之,所辟皆州郡著 人多流散。 州, 公則 然後諸屯聚並散。 輕刑 薄斂, 頃之戶口 天監元年, 充復。 爲 進 政 號 雖 平

姓。

武帝班下諸州以爲法。

一三六六

豫州 公則 豈可僶俛辭事。 年老見遺,猶自力請用。今國家不以吾朽懦,任以前驅,方於古人,見知重矣。 威名素著,至都,詔假節,先屯洛口。公則受命將發,遘疾,謂親人曰:「昔廉頗、馬援以 刺史薜恭度遣長史石榮等前鋒接戰,卽斬石榮,逐北至壽春,去城數十里而返。疾篤, 三年,徵中護軍。[14]代至,乘二舸便發,送故一無所取。 馬革還葬,此吾志也。」遂强起登舟,至洛口,壽春士女歸降者數千戶。魏 遷衞尉卿。時朝廷始議北侵, 雖臨塗疾苦,

卒于師。武帝深痛惜之,即日舉哀,諡烈侯。

公則 爲人敦厚慈愛、居家篤睦、視兄子過於己子,家財悉委焉。性好學,雖居軍旅,手

不輟卷,士大夫以此稱之。

子膘嗣,有罪國除。帝以公則勳臣,特聽庶長子眺嗣。曰己眺固讓歷年,乃受。

孙 冑 刺 與 史,仍爲 書招之,卽 鄧元起字仲居,南郡當陽人也。 前軍。 日上道,率衆與武帝會于夏口。 建康城平,進號征虜將軍。 少有膽幹,性任俠,仕齊爲武寧太守。 天監初,封爲當 齊和帝卽位,拜廣州 陽縣侯,始述職焉 刺 史。 中興元年,爲益 梁武起兵,蕭穎

初, 梁武 之起,益州刺 史劉 季連持兩端。 及聞元起至,遂發兵拒守。 元起至巴西,巴西

列

太

衆 涪 軍 糧乏 心 令李膺 離,雖 絕,或說之曰:「蜀郡 諫曰:「使君前有嚴敵,後無繼援, 悔 無及。 膺請 政慢,若檢巴西一 出圖之,不患資糧不足也。 山人始附, 郡籍注,江弘因 。」元起 於我觀德。 日:「善,一以委卿。」膺退,率富 而罰之,所獲必厚。」元 若糾以刻薄,人 必 起然之。 不堪。

道 路 斷 元 絕。 起 進 屯 季 連 西平,季連始嬰城自守。 計 窮。 會明年武帝使赦季連罪, 時益州兵亂旣久,人廢耕農,內外苦飢, 許之降, 季連 創日 開 城納 元 起 元起送 人多相食, 季

連于

建

康

人

上

軍

資

米

俄

得三萬斛

脱, 事 事 而 與 口 黔婁 政 元 庾 不 迹 起 黔婁志 論 稍 甚 以 財色。 清 鄕 損 潔, 人庾黔婁爲錄事參軍,又得荆州 行 不同, 光濟 性能 飲酒, 多計 乃言於元起曰:「城 謀 至 並勸 斛 不 爲 亂, 善政。 及 中稱有三刺 是絕之,爲蜀 刺史蕭遙欣故客蔣光濟, 元起之剋季連也, 史, 節 土 所 下何以堪之。」元起 稱。 城 內財 元 起舅子 寶 並厚待之,任 無所 梁 私 由 矜 此 孫 勤 以州 疎 性 恤 黔 輕

夏侯道遷 在 政 公二年, 以南鄭叛 以 母老乞歸供養, 引魏將王景胤 詔 許焉。 孔陵、攻東、西晉壽、並遣告急。衆勸元起急救之。 徴爲 右衞將軍,以西昌侯蕭藻代之。 時 梁州 元 長

催督 起 曰 [c.] 黔婁等苦諫之,皆不從。 武帝亦假元起節、都督征討諸軍 :「朝廷萬里,軍不卒至,若寇賊浸淫,方須撲討, 董督之任,非我而誰? ·,GOD將救漢中。 何事 忽忽便 相

已攻剋兩晉壽。

乃散。 闕訟之,帝曰:「果如我所量也。」使讓藻曰:「元起爲汝報讎, 乃貶藻號爲冠軍將軍。 郞 子, 蕭藻將至,元起頗營還裝,糧儲器械略無遺者。 何用馬爲。」藻恚,醉而殺之。元起麾下圍城,哭且問其故。 **遂誣以反,帝疑焉。** 贈元起征西將軍,給鼓吹,諡忠侯。 。有司追劾削爵土,詔減邑之半,封松滋縣侯。 蕭藻入城,求其良馬。 汝爲讎報讎,忠孝之道如何。 藻懼曰:「天子有詔。」衆 故吏廣漢羅所詣 元起曰:「年少

役,臨汝侯嘲之曰:「卿蜀 不 重 田 ·過數家有食,窮迫之人,什有八九,束縛之使,旬有二三。貪亂樂禍,無足多怪。 |為刺史, 州人爲 ,勞擾百姓。 五 母之鷄,一母之豕,牀上有百錢布被,甑中有數升麥飯,雖蘇、張巧說於前,韓、白按劍 羅 研字深微,少有材辯。元起平蜀,辟爲主簿,後爲信安令。故事置觀農謁者,圍桑度 研請除其弊,帝從之。鄱陽忠烈王恢臨蜀,聞其名,請爲別駕。及西昌侯藻 之懼,研舉止自若。 人樂禍貪亂,一至於此。」對曰:「蜀中積弊,實非一朝。 侯謂曰:「非我無以容卿、非卿無以事我。」齊尚兒之 百家爲村, 若令家

51

傅第

於後、將不能使一夫爲盜、況貧亂乎。」

勿失。」範至,復以爲別駕,升堂拜母,燭人榮之。數年卒官。 大通二年,爲散騎侍郎。 嗣王範將西,忠烈王恢謂曰:「吾昔在蜀,每事委羅研,汝遵而 **獨土以文達者**,唯附與同郡

以如意擊席者久之。乃以爲益州別駕。著益州記三卷行於世。 如昔李膺。」對曰:「今勝昔。」問其故,對曰:「昔事恒、靈之主,今逢薨、舜之君。」帝嘉其對, 膺字公胤,有才辯。 西昌侯藻爲益州,以爲主簿。使至都,武帝悅之,謂曰:「今李膺何

蜀亂,使蔣光濟筮之遇蹇,喟然歎曰:「吾豈鄧艾而及此乎。」後果如筮。子鏗嗣。 行,母曰:「汝貧賤家兒忽得富貴,詎可久保。我寧死此,不能與汝共入禍敗。」及至巴東,聞 因厚遺之。少時又嘗至其西沮田舍,有沙門造之乞,元起有稻幾二千斛,回己悉以施之,時 都,華在城內甚懼。城平,而元起先遣迎華,語人曰:「庾別駕若爲亂兵所殺,我無以自明。」 初,元起在荆州,刺史隨王板元起爲從事別駕,庾蓽堅執不可,元起恨之。及大軍至

理,吏人親愛之。 黨數百人竊入南、北掖門,夜燒神獸門,害衞尉張 起兵,乃自歸,累有戰功。 太子右 張 衛率, 惠紹字德繼,義陽 以軍 徵還爲左衞將軍,加通直散騎常侍,甲仗百人,直衞 功累增爵邑。 人也。 武帝踐作,封石陽縣侯,位驍騎將軍 少有 歷位衞尉卿, 武幹,仕齊爲竟陵橫桑戍主。 左衞 弘弘策。 將軍,司州刺 惠紹馳 ·、直閣、左細 率所領赴戰,賊乃散 史,領安陸太守。 母喪歸鄉里。 殿中。 仗主。 卒,諡 時 聞梁武 日忠 在州 走。 東昏餘 遷 帝 和

以遺 母。 馮 道 年 根字互基,廣平酇人也。 十三,以孝聞 郡 召 爲 少孤,家貧,傭賃以養母。 主簿,不就,曰:「吾當 使封 侯廟 行得甘肥, 食 一安能 未嘗先食, 爲儒 吏邪 必遽還

率。

卒官、諡曰愍。

子澄嗣。〔三〕累有戰功,與湛僧智、胡紹世、魚弘並爲當時驍將。

歷官衞尉卿,太子左衞

左右 奮擊,殺傷甚 年 十六,鄉人蔡道班爲湖陽戍 多,道 班 以発, 由 是知 主,攻蠻錫城,反爲蠻困。 名。 道根 教之、 匹馬 轉戰 ,提雙劍

齊 建武 列 傅 末,魏 第 四 + 孝文攻陷 五 張 惠 南陽 紹 等五 馮 道 郡。 根 明帝遣太尉陳顯達爭之,師入為口 , (三) 道根說顯

達 曰:「汮水急,不如悉棄船於酇城,方道步進。」顯達不聽,道根猶以私屬從軍。 及顯達敗

夜走,賴道根指路以全。 尋爲袀口 戊副。

乎。」因率鄉人歸武帝、隸於王茂、常爲前鋒。 以母喪還家。聞樂武帝起兵,乃謂所親曰:「金革奪禮,古人不避, 武帝卽位,爲驍騎將軍,封增城縣男。 揚名後世, 豈非孝

下,道根壍壘未固,城中衆少,莫不失色。 笑之。 軍戰,敗之,魏軍因退。 天監二年,爲南梁太守,領阜陵城戍。 道根曰:「怯防勇戰,此之謂也。」修城未畢,魏將党法宗、傅堅眼率衆二萬,奄至城 遷輔國將軍。 道根命開城門,緩服登城,選精銳二百人出與魏 初到阜陵,修城隍,遠斥候, 如敵將至者。 衆頗

簡,境內安之。 累遷右衞將軍 刻 築 連橋, 、壘掘壍逼魏城。 六年、魏攻鍾離、武帝詔豫州刺史韋叡救之。道根爲叡前驅,至徐州,建計據邵陽洲 魏軍敗績。 進爵爲伯,改封豫寧縣。八年,拜豫州刺史,領汝陰太守。[IE]爲政淸 道根能走馬步地,計馬足以賦功,城隍立辦。 及淮水長,道根乘戰艦斷

沈約,美其口不論勳。 功 其部曲或怨非之。 道根性謹厚,木訥少言,爲將能檢御部曲。 道根喻曰:「明主自鑒功之多少,吾將何事。」武帝嘗指道根示尚書令 約曰:「此陛下之大樹將軍也。」歷處州郡,和理淸靜,爲下所懷。 所過村陌、將士不敢虜掠。 每征伐終不言 在

朝 服其清退,武帝亦雅重之。 是雖貴顯,而性儉約,所居宅不修牆屋,無器服侍衞,入室則蕭然如素士之貧賤者。 微時不學,旣貴粗讀書,自謂少文,常慕周勃之器量 當世

謝曰:「臣所可報國家,唯餘一死,但天下太平,恨無可死之地。」豫部重得道根,人皆喜悅 十六年,復爲豫州。將行,武帝引朝臣宴別道根於武德殿,召畫工使圖其形,道根踧踖

武帝每稱曰:「馮道根所在,能使朝廷不復憶有一州。」

獻公當祭,請尸曰:『有臣柳莊,非寡人之臣,社稷之臣也。 遂以襚之。 及出宮,有司以聞。 子懷嗣。 居州少時遇疾,乞還。 道根雖未爲社稷臣,亦有勞王室,臨之禮也。」帝卽駕幸其宅,哭之甚慟。 帝問中書舍人朱异曰:「吉凶同日,今可行乎。」對曰:「昔柳莊寢疾,衞 朝廷徵爲散騎常侍、左軍將軍。 聞其死,請往。』不釋祭服 卒於官。 是日,輿駕春祠二廟, 而往, 諡日

穆。 待詔河西,因留不去,其後遂氏焉。晉時隴右亂,遷于藍田。胸會祖因爲苻堅太子詹事,生 康絢字長明,華山藍田人也。 穆爲姚萇河南尹。 宋永初中, 穆率鄉族三千餘家入襄陽之, 峴南, 宋爲置華山郡藍 其先出自康居。 初,漢置都護,盡臣西域,康居亦遣侍子 田

列傳第四十五 康絢

縣,寄立於襄陽 以穆爲秦、 梁二州刺史。 未拜, 卒。 胸伯元隆、父元撫,並爲流 人所推, 相

繼 爲 華山 太守。

內。 監元年, 觀者悅之。 胸身長八尺,容貌絕倫,雖居顯職,猶習武藝。 絈 少俶儻有志氣,仕齊爲華山太守,推誠撫循,荒餘悅服。 封南陽縣男,戶三除竟陵太守。 其日,上使畫工圖絢形,遣中使持以問綯曰:「卿識此圖不]其 累遷太子左衞率,「長〕甲仗百人,與領軍蕭景直殿 帝幸德陽殿戲馬,敕絢 梁武起兵,絢舉郡 見親 馬射,撫弦貫的 如 以 此 應。 天

不能 督淮 節慰勞,幷加蠲復。 者肩穿。 沙土漂輕,不堅實,其功不可就。 格,潼沱爲激溝,併灌鉅 雨決壞崖岸,其性惡鐵。因是引東西二冶鐵器,大則釜鬲,小則鋘鋤,數千萬斤沈於堰所, 合脊於中流。 合。 上諸 時魏降人王足陳計,求堰淮水以灌壽陽。 夏日 軍事,幷護堰作役 乃伐樹爲井榦,至道以巨石,加土其上。 :疾疫,死者相枕,蠅蟲晝夜聲合。 十四年四月,堰將合, 是冬寒甚,淮、泗盡凍,士卒死者十七八。帝遣賜以衣袴。 野澤。」帝以爲然,使水工陳承伯、 人及戰士,有衆二十萬,於鍾離 帝弗納、發徐、揚人率二十戶取五丁以築之。 淮水漂疾,復決潰。 武帝愍之、遣尚書右僕射袁昂、侍中謝舉假 足引北方童謠 緣淮百里 衆患之。 材官將軍 南起浮山、北抵巉石、依岸築土、 內岡陵 曰:「荆山爲 或謂江 祖师 木石 視 無巨細必盡 、淮多蛟、能乘 上格, 地 形, 假絢 浮山 咸謂 一,負擔 節 淮 爲 都 猶 風 内 下

列傳第四十五 康絢

悅

嗣

黢 游 視 陽 Ŧ. 山深五 百 波寬緩,堰得不 邑居墳墓,了然皆在其下。 丈,高二十丈,深十九丈五尺,夾之以堤,幷樹杞柳,軍人安堵,列居其上。 王 一府司 里 + 地。 丈,開湫北注。水日夜分流,湫猶 馬徐方興, 月, 魏壽陽城戍稍徙頓八公山。此南居人散就岡壟。 魏遣將楊大眼揚聲決堰, ·壞。」絢然之,開湫 魏軍小却。 或謂絢曰:「四瀆天所以節宣其氣,不可久塞,若鑿湫東注 十 五. 東注。 年四月, 胸命諸軍撤營露次以待之。 '不減。 又縱反間於魏曰:「梁所懼開湫。」魏人信之,果 堰成, 其月,魏軍竟潰而歸。 其長九里,下闊一百四十丈,上廣四十 遣 其子悅挑戰,斬魏 水之所及,夾淮方 其水清潔,俯 一,則 咸

絢 與 魏 初, 交通。 堰起徐州界,刺史張豹子謂已必尸其事。 帝雖不納,猶以事畢徵詢。 尋除司州刺史,領安陸太守。 旣而胸以佗官來監作,別子甚慚,由是 潛

獄 百 里。 絢 쎼 在 徵還,自己豹子不修堰,至其秋,淮水暴長,堰壞,奔流 水 州三年,大修城隍,號爲嚴整。 中怪 物, 隨流 而下,或人頭魚身,或龍形馬首, 殊類詭狀, 不可勝名。 于海,殺數萬人。 **其聲若雷,聞** 祖暅坐下

不 能 言 通 號 元 爲 年,除衞 長厚。 尉卿、未拜卒。 在 省 毎寒月, [云]見省官有繼縷者, 輒遣遺以繻衣, 其好施 輿駕. 即日臨哭,諡 日壯。 絢寛和 少喜懼,在朝廷見人如 如 此。

一三七

昌義之, 歷陽烏江人也。 少有 武幹,爲馮翊戍主。 梁武帝為雍州, 因事帝, 帝亦厚遇

之。及起兵、板爲輔國將軍、軍主。每戰必捷。

洛 時 其 勢追 城 實 П 中 躡 也。」乃遣修鍾離城,敕義之爲戰守備。 ,義之爲前軍,攻魏梁城戍, 天監元年,封永豐侯,累遷北徐州 衆 ,攻沒馬頭等城。 纔 三千,義之督帥,隨方抗禦,前後殺傷萬計,魏軍 城內糧貯,魏悉移 剋之。 刺史,鎭鍾離。 五年冬,武帝以征役人,詔班師。)歸北,議者 是冬, 英果率衆數十萬圍鍾 1咸謂 四年,大舉北侵,臨川王宏督衆軍向 無復南向。 死者 與 (城平。 帝 離,衝 曰:「此必進兵,非 魏 中 Щ 車 王元英乘 ·毁西墉

功 進 六年, 號軍 師 帝遣 將 軍 曹景宗、 ,再遷都督、南兗州刺史。 章叡率衆二十萬救焉,大破魏軍。 坐以禁物出 蕃,爲有司 義之率輕兵追至洛口而 所 奏発 以

衆逼 石 義之又率 荆 十五年,授北徐州刺史。 Щ ·三 年, ·; 揚 朱衣 聲 累遷左衞將軍。 決 直閣 堰。 王 韶假義之節救 神念救之。 義之不 是冬, 絢 知書,所識不過十字。 魏克 帝遣太子 一一一一 軍未至, 右衛率康絢督衆軍 ,義之班師,爲 胸等已 一破。運軍。 性寬厚, 有司 作荆 所奏,帝 魏 爲將能得 又遣 山堰,魏將李曇 以 大 其 將 人死 軍 功 李平 臣 力。 不 攻陝 定大 問 及

居藩任,吏人安之。 改封營道縣侯。 徵為護軍將軍, 卒於官。 帝深痛惜之,諡曰烈。 子)寶

景嗣。[10]

豊 浮山之役,而 政刑、於斯爲失。私戚之端,自斯而啓,年之不永,不亦宜乎。張惠紹、馮道根、康絢、昌義 雲之感會也。一元起勤乃胥附,功惟闢土,勞之不圖,禍機先陷。冠軍之貶,於罰已輕,梁之 王茂等運接昌期,自致勤王之舉。若非天人啓期,豈得若斯之速乎。 人事乎,其天道也。 論 曰:永元之季,雖時主昏狂,荆、雍二州,尚未有釁。武皇迹緣家酷,首唱孟津之師, 康絢實典其事。 互有厥勞,寵進宜矣。 先是鎭星守天江而堰實興、退舍而決、 鍾離、邵陽之逼,馮、昌勞効居多。 其隆名顯級,亦各風

校勘記

[1] 王茂字休連 「休連」梁書作「休遠」。

刺 史蕭 昂斬之 刺刺 史」各本作「長史」, 據梁書蕭昂傳改。 按傳「昂出爲廣州刺史」

列傳第四十五 昌義之 校勘

記

長史。

每衆騎赴鹿 「赴」梁書、太平御覽八三一引並作「趁」。 趁,逐也,較「赴」義生動。

〔四〕 鹿應弦輒斃 「鹿」字各本並脫,據梁書補。

五 今得待衆軍同進 「衆」字據梁書補。 按上云「待衆軍齊集俱進」,有「衆」字爲是。

○ 飢食其脯 「脯」各本作「胃」、據册府元龜八五五、太平御覽八三一引改。 按梁書作「肉」。

[4] 市邊富人姓向以見錢百萬欲埤義宗 「埤」通志作「壻」。

改封湘西侯 按上云「封山陽伯」,此改封非進封,「湘西」下不應有「侯」字,梁書無「侯」字,是。

Cn] 詳乃遣使迎憺共參軍國 「迎」字各本並脫,據梁書補。

COC武帝復遣北道軍元樹帥彭寶孫陳慶之等稍進 「陳慶之」各本脫「之」字,南監本復譌作 陳

盛」,據梁書訂正。 按陳慶之傳,壽陽之役,慶之假節,總知軍事

亶帥湛僧智魚弘張澄等通淸流澗將入淮肥 「淸流澗」各本作「流淸澗」,據梁書乙正。

並無被服姿容 「姿容」據北監本、殿本。 大德本、南監本、汲古閣本、金陵局本作「安容」。 張元

濟南史校勘記:「按安容與被服並稱,當是裝飾之名,姿容未必便是。」

【11】服翫車馬皆窮一時之驚絕 「驚絕」疑當作「精絕」。

逢敕迎瑞像 「瑞像」各本作「瑞豫」、據通志改。 按下云「王令送像下都」,則「豫」字非是。

- 南蠻校尉府也。」按張說是,南齊書百官志:「護南蠻校尉,府置佐史。」今從改。 士瞻少時嘗於南蠻府中擲博 「南蠻府」各本作「南蠻國」。 張森楷南史校勘記:一國當作府,謂
- 道恭變內列艨艟鬭艦以待之 「列」各本作「作」,據梁書改。
- 三年徵中護軍 「三年」各本作「四年」,據梁書武帝紀及夏侯詳傳改。 按傳云詳以天監三年遷

湘州刺史,即此下云「代至」。

- 子瞟嗣有罪國除帝以公則勳臣特聽庶長子眺嗣 「瞟」、「眺」南史皆從目,梁書作「膘」、「朓」皆
- [17] 若檢巴西一郡籍注 「一郡」各本作「二郡」,據梁書改。

從月,未知孰是。

- 武帝亦假元起節都督征討諸軍 「都督」二字各本並脫,據梁書補。
- [三] 元起有稻幾二千斛 「二千斛」,梁書作「二十斛」。
- 子澄嗣 「澄」各本作「登」、據梁書改。 按梁書夏侯詳傳、裴邃傳並有張澄。
- 師入沟口 **洵之音,而傳寫者乃誤入正文。」今從改。** 「袀口」各本作「汋均口」。 王鳴盛十七史商権六三二为當作為。 下同。 均』字乃後 八旁注
- 置 領汝陰太守 於 合肥。 馮道 「汝陰」當作「南汝陰」。 根傳領汝陰太守,亦當爲南汝陰,史缺南字耳。」 錢大昕廿二史考異云:「是時豫州治合肥,南汝陰郡亦僑

- CIED 封南陽縣男 「南陽」梁書作「南安」。
- [云] 累遷太子左衞率 「左衞率」梁書作「右衞率」。
- (中三) 乃伐樹爲井榦 「井」字各本並脫,據梁書補。 按井榦乃架木爲欄作井形。
- [三八] 絢徵還 「徵還」各本互倒,今乙正。
- [13] 在省每寒月 各本並脫「月」字,據梁書補。
- []] 其功則末 子寶景嗣 「末」各本作「未」,今改正。 「寶景」梁書作「寶業」。 按梁書作「其功則輕」。

南 史卷五十六

列傳第四十六

張弘策子緬 纘 綰 庾域 子子輿 鄭紹叔 呂僧珍

子法才

張弘策字真簡, 范陽方城 梁文獻皇后之從父弟也。 **父安之**, 青州主簿、 南蠻行

参軍。

兄弟。

母憂,三年不食鹽菜,幾至滅性。 弘策幼以孝聞,母嘗有疾,五日不食,弘策亦不食。 兄弟友愛,不忍暫離。 雖 母强為進粥,弘策乃食母 各有室,常同 、臥起, 世比之姜肱 所餘。 遭

弘策 列 傅 與梁武帝年相輩, 第 四 + 六 張 ijĹ 幼見親狎,恒隨帝游處。 策 每入室,常覺有雲氣, 體輒 肅 然, 弘策

劉。 張 英雄興。」弘策曰:「瞻鳥爰止,于誰之屋。」帝笑曰:「光武所云,『安知非僕』。」弘策起曰:「今 亂,舅知之乎?冬下魏軍方動,則亡漢北。 夜之言,是天意也,請定君臣之分。」帝曰:「舅欲數鄧晨乎。」 由 兩赤眼,容能立事。」帝曰:「敬則庸才,爲天下唱先爾。主上運祚盡於來年,國權當歸江、 此特加敬異。 而江甚隘,劉又闍弱,都下當大亂,死人如亂麻。齊之歷數自茲亡矣。梁、楚、漢當有 建武末,與兄弘胄從武帝宿,酒酣,移席星下,語及時事。帝曰:「天下方 王敬則猜嫌已久,當乘間而作。」弘策曰:「敬則

遺詔以帝爲雍州刺史,乃表弘策爲錄事參軍,帶襄陽令。帝觀海內方亂,有匡濟之心,密 爲儲備。謀猷所及,唯弘策而已。 言當驗。」帝笑曰:「且勿多言。」弘策從帝西行,仍參帷幄,身親勞役,不憚辛苦。齊明帝崩, 是冬,魏軍攻新野,齊明帝密詔武帝代曹武監雍州事。弘策聞之心喜,謂帝曰:「夜中

虚 畫敕,各欲專成。且嗣主在宮本無令譽,媒近左右,蜂目忍人。一居萬機,恣其所欲,豈肯 惠庸主,諸王爭權,遂內難九興,外寇三作。方今喪亂有甚於此,六貴爭權,人握王憲,制主 理 坐主諾,委政朝臣。積相嫌貳,必大誅戮。始安欲爲趙倫,形迹已露,蹇人上天,信無此 且性甚猜狹,徒取禍機,所可當軸,江、劉而已。而怯而無斷,暄弱而不才,折鼎覆餗 時帝長兄懿罷益州還,爲西中郎長史、行郢州事。帝使弘策到郢,陳計於懿曰:「昔晉 傅第四十六 張弘策

51

漢 土 跂 沔。 崩 踵 可 今得 待。 雍 州 外 潚 士 潘 比 馬 胸懷 呼 幸 圖 猜忌 吸 身計 、數萬。 動言 及 時 今猜 相 安 傷。 則 防 竭 徐孝嗣 未 誠 生 本 ·朝,時亂 宜 才非 召諸 柱石 弟, 則 爲 以 聽 或 時 一翦暴, 聚 、穿鼻。 集。 如 郢 岩隙 不 州 早 控帶 開 圖 、釁起, 荆 悔 無 湘 及 必 也 西 中 注 外

懿

聞之變

色,心

未

之許

于 侍 宿 驅 主 ', 封 次, 直 時 城 及 立 洮 指 領萬 懿 內 陽 頓 建 珍 遇 縣侯。 處所 鄴 寶委 禍 人 弘策 督 帝 積 弘策 後 弘策 將 與帝 部 弘策 起 事 預 盡忠奉 兵, 意 o 爲 申勒 合。 及 圖 夜召 郢 Ŀ 部 皆 叉 城 弘策、 曲 訪 知 在 平, 寧 無 目 秋 蕭 不爲 中。 朔將 呂僧珍 毫 穎 無犯。 達 一,交友 軍 城 平, 庾 楊 文 域 定 公 故 遷 帝遣 入議 則 舊, 衞 域 諸 尉 又 隨 弘 日 將皆 同 卿 策 才 乃 與呂僧 薦拔 發兵。 欲 加 卽 給 頓 H 縉 事 軍 L 珍 中。 夏 以 紳 道 先 弘 口 皆 往 天監 凡 策 趨 淸 磯 帝 爲 焉 宮, 浦 以 輔 初 爲 村 國 封 宜 加 將 檢 散 乘 軍 府 騎 軍 勝 庫 行 軍 長

作 林 踰 兵 垣 亂 激 匿 時 乃散, 擊 于 東 帥 旮 不 數 龍 官 能 廏 百 餘 黨 軍 却 遇 o 捕 孫文明 因 賊 文 上 見害。 運 戎 明 荻 等初 斬 服 炬 于 御 束 賊 逢赦 東 前 仗, 叉 殿 前 進 得 令,多未 張 謂 燒 入南 氏 尚書省 僧 親屬 珍 北 自 日 安。 臠食之。 及 掖 閣 門 賊 至 夜 道 文明 雲龍 來 夜 叉嘗 帝哭之慟 是 焼神 衆 門, 少 夢 前 一,曉 乘馬 軍 則 曰:「痛哉 司 總章 至 走 馬 雲 矣。」 呂 觀, 龍門, 僧 命 衞 珍 入 尉 打 衞 直 心 五. 憨 殿 尉 天下 鼓 省 府 共 弘 事 賊 帥 謂 33 遂

復與誰論。」詔贈車騎將軍,諡曰閔侯。

賜 皆散之親友。 弘 策 爲 人寬厚通率,篤舊故。及居隆重,不以貴地自高, 及遇害,莫不痛惜焉。 子緬嗣。 故人賓客接之如布衣,日祿

色。 賞之。 南太守。時年十八,武帝疑其年少,未閑吏事,遣主書封取郡曹文案, 名也。」齊永元末兵起,弘策從武帝向都,留緬襄陽,年始十歲,每聞軍 及 緬 弘策遇害,緬喪過于禮,武帝每遣喻之。 再遷雲塵外兵參軍 字元長、年數歲、外祖中山劉仲德異之曰:「此兒非常器、非止爲張氏寶、方爲海內令 服闋,襲封洮陽縣侯。 見其斷決允愜,甚稱 有勝負,憂喜形於顏 起家秘書郎,出為淮

郡 子 勉 '洗馬 所 日 緬 得 緬 私室常闃然如 で中へ :俸祿不敢用,至乃妻子 此曹舊用文學,且雁行之首,宜詳擇其人。」勉舉緬充選。頃之,爲武陵太守,還拜太 少勤學,自課讀書,手不輟卷。 舍人。 緬 貧素者 母劉氏以父沒家貧,葬禮有闕,遂終身不居正室,不隨子入官府。 不易衣裳,及還都,並供之母振遺親屬。 有質疑者,隨問便對,略無遺失。殿中郎缺,帝謂徐 雖累載所蓄,一 朝隨 緬在

累遷豫章內史。 緬爲政任恩惠,不設鉤距,吏人化其德,亦不敢欺。 故老咸云「數十年

未有也」。

繩 無所 後 爲 顧望,號爲勁 御史中丞,坐收捕人與外國使鬭,左降黃門,兼領先職, 直。 武 帝 乃遣 圖其形於臺省,以勵當官。 遷侍中,未拜卒,詔便舉哀。 俄復舊任。 緬居憲司,推

昭明太子亦往臨哭。

五

卷。

緬弟纘。

緬 抄 、後漢、 晉書 衆家異同爲後漢紀四十卷,晉抄三十卷,曰又抄江左集未及成,

補 緬 目 陽 疎朗 有書萬餘卷,晝夜 公主,拜駙馬都尉,封利亭侯。 其居職 可言優仕 纘 字伯緒, ,神采爽發。 例 矣。」 不數十日 出繼從伯弘籍。 Ξ 武帝異之,嘗曰:「張壯武云『後八世有逮吾者』,其此子乎。」纘好學, 放讀,殆不輟手。 如此三載,方遷太子舍人,轉洗馬,中舍人,並掌管 便遷任。 纘固 武帝舅也,四梁初贈廷尉卿。 召補國子 求不徙,欲遍觀閣 秘書郞四員,宋、齊以來, 生。 起家秘書郎,時年十 內書籍。 **纘年十一,尚武帝第四女富** 嘗執 爲甲族起家 七, 四 高端. 身長七尺四寸,眉 目 之選, 曰:「若讀 待次 此 兄

明 見而 纘 嗟服 與 琅 邪 累遷 王錫 齊 尙 書 名。普通 吏部郎、俄而長兼侍中、時人以爲早達。 初,魏使彭城 人劉善明 通 和 水識 纘 河東裴 與錫。 子野 **纘時年二十三,善** 日 張吏部有

列

喉 天 爲 脣之任,已恨 忘年 ·之交。 其晚矣。」子野性曠達,自云年出三十不復詣人。 大通中 ·,爲吳興太守,居郡 省煩苛,務淸靜,人吏便之。 初未與纘遇,便虛相推重,

定。」舉 時 |纘 在? 之。 在 坐, 纘 從 大同 負 其 問 從 ·坐愕然,其件物 兄謐 纘 容 八才氣 曰:「丈人二從津、碗藝業何如?」 日:「纘 津 並不學問,性又 徵爲吏部尚書。 無所 有艦、津,亦殿下之衡、定。」太子色慚。 與讓。 如 此。 定襄侯祗 凡愚。 後門寒素 無學術, 恭、祗 一介者,皆見引拔, 纉 嘗預 頗 曰:「下官從弟雖並 東宮盛集,太子戲纘 有文性, 或 與兄衡山侯恭俱爲 云纘從兄津及爾 不爲貴門屈意,人士翕然稱 無多, 日二 **猶賢殿下之有衡** 丈 愚短 人謐 皇太子愛賞 津皆 湘 東王

何

之 矣。 對 初 門,以外戚 共 纘 何敬容 事 而 五 與 寸 年 〈参掌 ·, 武 衿 殘客。」及是遷 此 顯 所滯,近蔽 言 重, 何 帝 以 敬容 詔 指敬容也 高自 日:「纘 意 擬 耳目 趣 倫, 不協、敬容居權 外氏英華,朝中領袖, 爲 ,深淺清濁 讓表曰:「自出守股 而韶 在 職議南郊御乘素輦,適古今之衷。 有「司空范陽」之言, ,豈有能預 軸,賓 客輻凑,有過詣 司空已後,名冠范陽。 肱, 加 入居衡尺, 以 深用爲 繑 心 飾貌,酷非 狹。 纘纘 可 以仰首伸眉, 又議印綬官若備朝服,宜 以朱异草 「輒距 可尙書僕射。」纘本寒 所閑,不喜俗 不前 詔 論 日:「吾不 與异不平。 列 是非 人, 能 與 者

並

綬

時

並施行。

相 禮 遇。 改爲湘 及編作牧郢蕃,規隨從江夏。 州 刺史,述職經塗,作南征賦。 遇纘出之湘鎭, 初,吳興吳規頗有才學,邵陵王 路經郢服, 綸餞之南浦。 綸 引爲賓客, **纘見規** 在

知之,翁孺因氣結,爾夜便卒。 坐,意不能平,忽舉盃曰:「吳規,此酒慶汝得陪今宴。」規尋起還,其子 規恨纘慟兒,憤哭兼至,信次之間又致殞。 翁孺見父不悅, 規妻深痛夫、子 問 而

翌日又亡。時人謂張纘一盃酒殺吳氏三人,其輕傲皆此類

也。

州

卷,有油二百斛,米四千石,佗物稱是。 皆異畝同穎。 界零陵、衡陽等郡有莫徭蠻者,依山險爲居,歷政不賓服, 至州務公平,遣十郡慰勞,〔云〕解放老疾吏役,及關市戍邏、先所防人,一 在政四年,流人自歸,戶口增十餘萬,州境大寧。 因此 向 晚頗好積聚,多寫圖書數萬 化。 益陽縣 人作田二頃, 皆省併。

府庶 口,湘 至,謁督府,方還州。 之以斃譽兄弟。 事,日留纘 騰素輕少王, 州府候迎及資待甚薄, 譽深銜之。 太清二年,徙授領軍,俄改雍州刺史。 東王屆郢州之武城。屬侯景已請和,武帝詔罷援軍。 時湘東王與譽及信州刺史桂陽王慥各率所領入援臺,下硤至江津,譽次江 不遣。會聞侯景寇建鄴,譽當下援。 纘乃貽湘東書曰:「河東戴檣上水,欲襲江陵,岳陽在確,共謀不逞。」 初聞邵陵王編當代己爲湘州,其後更用河東王 湘東王時鎭江陵,與纘有舊, 及至州,譽遂託疾不見纘,仍檢 譽自江 口將旋湘鎮, 欲待 纘 湘 將 括 東 大 州

列 傳

第

四

+

六

張 弘

江陵 遊軍 主朱榮又遣使報云:「桂陽住此欲應譽、 湘東信之, 乃鑿船沈米, 斬纜 而

至江陵收慥殺之。荆、湘因構嫌隙。

負才 引等。 杜岸紿 **死**,請 南 因 前 ,防守纘者慮追兵至,遂害之,棄尸而去。 一與岸兄弟盟,乃要雍州 刺 任氣。 史岳 纘 元帝少時,纘便推誠委結,及帝卽位,追思之,嘗爲詩序 爲 纘 杜岸馳告營,營令中兵參軍 尋 沙門,名法緒。 陽 棄 日 其 :「觀岳陽不容使君,使君素得物情, 王營推遷未去鎮,但以城西白馬寺處之。 見余則申旦達夕,不能已已。 、部曲、 ,攜其二女,單舸赴江陵。 **營襲江陵**,常載纘 人席引等於西山 尹正等追討。 懷夫人之德, 隨後,逼使爲檄,固辭以疾。 聚衆。 元帝承 湘東遣使責讓譽, 若走 乃服 纘以爲赴期, 制,贈開府儀 會聞賊陷 婦 入西山 何日忘之。」纘著鴻寶 人 衣, 云:「簡憲之爲人也,不 義 大喜, 乘青布輿, 舉, 臺城,營因不受代。 索纘部下,仍遺纘向雍州 同三 事 司,諡簡 及至並禽之。 無不濟。」 及軍退敗,行 與親 憲 信十餘 百卷, 纘 公。 事 以爲然 州助 至 纘 王侯, 一滩水 人奔 懼 防 不

萬卷並摙還齋,珍寶財物悉付庫 初 ·) 纘之往雍州,資產悉留江陵。 ,以粽蜜之屬還其家 性旣貪婪, 南中貲賄塡積。 及死, 湘東王皆使收之,

次子希字子顏,早知名,尚簡文第九女海鹽 公主。 承聖 初,位侍中。 **横弟**館。

制旨禮記正言義,四姓衣冠士子聽者常數百人。 僕射,及百司就列,兄弟並導騶分趨兩陛,至前代未有,時人榮之。出爲豫章內史,在郡述 時宣城王府望重,故有此旨焉。大同四年元日,舊制僕射中丞坐位東西相當,時館兄纘爲 散騎常侍、中軍宣城王長史。 遷御史中丞。 武帝遣其弟中書舍人胸宣旨曰:「爲國之急,唯 在執憲直繩,用人之本,云不限升降。晉、宋時,周閔、蔡廓兼以侍中爲之,卿勿疑是左遷。」 |縮字孝卿,少與兄纘齊名。|湘東王|釋嘗策之百事, 館對闕其六,號爲百六公。位員外

賊,受縮節度。 旬月間,賊黨悉平。 八年,安成人劉敬宮挾祇道,遂聚黨攻郡,進寇豫章,[10]刺史湘東王遣司馬王僧辯討

者,縮與右衞朱异、太府卿賀琛遞述制旨禮記中庸義。太淸三年,爲吏部尚書,宮城陷,奔 十年,復爲御史中丞。繪再爲憲司,彈糾無所回避,豪右憚之。時城西閒士林館聚學

江陵,位尚書右僕射。 魏剋江陵,朝士皆俘入關,綰以疾免,卒於江陵。

次子校,字少游,尚簡文第十一女定陽公主。日日承聖二年,官至秘書丞,掌東宮管記。

時魏 雙鶴來下,論 家,妻子猶 努力堅守。」衆心以安。 軍 荆 庾 域 攻圍 南 字 祀 事井臼,而域所衣 南 司 梓, 者 鄭 大,新野 以爲 其在 ,州有空倉數十所,域 孝威所 斯 人也。 乎。 軍退,以功拜羽 か、致い 加 大布,餘奉 少沈靜,有名鄉曲。 以 恩 禮 手 林監。 專充供養。 自封 長沙 宣武王為梁州 題,指示將士曰 及長 梁文帝為郢州, 沙王 母好鶴唳,域在位營求,孜孜不 爲益州 ::「此中粟皆滿,足支二年。 以爲錄 域 ·辟爲主簿,[三數美其才, 隨爲 事參軍 懷寧太守。 帶華陽 怠,一旦 罷 太守。 任 還 但

武帝 乃止。 伯。」夬反,西臺 議 参軍 東下,師次 永元 郢城平,域及 初, 南 即授武 楊 康 口 王 張弘策 板 和帝 帝黄 西 中 遺御 鉞。 議 郎諮議 與 史中 武 蕭穎冑旣都督中外諸軍 帝意 参軍 丞宗夬勞軍。 河,即 ,母憂去職。 命衆軍便下,域謀多被納 域 梁武帝舉兵, 乃諷 事 夬 ,論者謂武 曰:「黃鉞未加 起爲寧朔將軍, 帝應 用。 致牋,域 霸府· 非 所 初 以 開 爭 領 總率侯 " 為 諮 不聽 行選

寧蜀 于時 道遷 太守。 降 兵 天 監 魏 後 初,封廣牧縣子、後軍 人飢 魏襲 卒于官。 域上 巴西 表振貸, 子子與。 域固 守。 不待報輒 城 司 中糧 馬。 盡 開 出為寧朔 ,將士皆齕草供食, 倉, 爲 有司 將軍、 所糾。 巴西梓潼 上遷域 無有 離 西中 郡 心 太守。 鄎 魏 司 軍 馬、輔 退,進 梁州 長 爵 國 史夏侯 將 爲伯 軍

答曰 淚恒 幷。 :::〔孝,德之本,何謂不多。」齊永明末,除州主簿。 子 輿字孝卿,幼而歧嶷。 長沙宣武王省疾見之,顧曰:「庾錄事雖危殆, 五歲讀孝經, 手不釋卷。 時父在 可憂更在子輿。」 或曰:「此書文句不多, 梁州 遇疾, 尋丁 子輿奔侍醫藥, 母 何用自苦。」 憂, 哀至輒

嘔血,父戒以滅性,乃禁其哭泣。 梁初爲尚書郎

聞哭泣之聲,必飛翔簷宇,悲鳴激切。 爲 部 秋 相 之語 伍 水猶壯。 隨。 至 天監三年,父出守巴西,子輿以蜀路險難,啓求侍從,以孝養獲許。 **父於路感心疾,每痛至必** 此,石猶不見。 曰 ::「淫預如幞本不通 巴東有淫預,石高出二十許丈,及秋至,則纔如見焉,次有瞿塘大灘,行旅忌之, 子輿撫 ,瞿塘水退爲庾公。」初發蜀,有雙鳩巢舟中,及至又栖 心長叫,其夜五更水忽退減,安流南下。 叫,自己子輿亦悶絕。 及父卒, 哀慟將絕者再。 及度, 父遷寧蜀, 水復舊, 奉 [廬側] 喪還鄉, 子輿亦 行人 每

弟。 食,志守墳墓。 見標度處所,有若 欲爲 累遷兼 父立佛寺,未有定處。 中 郞 叔該謂 人功,因立精舍。 曰:「汝若固志,吾亦抽簪。」於是始仕。 夢 有僧謂曰:「將修勝業, 居墓所以終 喪,服闋, 嶺南原即 手足枯 雖以嫡 攣, 可營造。」明往履歷, 待 長襲餌, 人而 起。 國秩盡推諸 仍 布 衣 果 蔬

列 傅 第 四 + 六 庾 域

司

斂,酒脯施靈而已。

全濟理難,豈可貪官, 大通二年,除巴陵內史,便道之官,路中遇疾。 陳尸公廨。」因勒門生不得輒入城市,卽於渚次卒。 或勸上郡就醫,子與曰:「吾疾患危重, 遺令單衣恰履以

鄭紹叔字仲明,滎陽開封人也。累世居壽陽。 祖琨,宋高平太守。

收誕,兵使卒至,左右驚散,紹叔獨馳赴焉。 見而異之,曰「祖逖之流也」。 紹叔年二十餘,爲安豐令,有能名。 後爲本州中從事史。 誕死,侍送喪柩,衆咸稱之。 時刺史蕭誕弟灎被誅, 到都,司空徐孝嗣 臺遺

間道 陽。 植曰:「朝廷遣卿見圖,今日閑宴,是見取良會也。」賓主大笑。令植登城隍,周觀府署,士卒 獨 固請願留。 雍州 西歸,補寧蠻長史、扶風太守。 刺史蕭遙昌苦要引,紹叔終不受命。 梁武帝臨司州,命爲中兵參軍,領長流。 ,託候紹叔,潛使爲刺客。 帝曰:「卿才幸自有用,我今未能相益, 紹叔知之,密白帝。 東昏旣害朝宰,頗疑于帝。 遙昌將囚之,鄉人救解得免。 因是厚自結附。 宜更思佗塗。」固 及植至,帝於紹叔處置酒宴之,戲 帝罷州還都,謝遣賓客,紹叔 紹叔兄植為東昏直後,東昏 不許。 及帝爲雍州, 於是乃還壽 紹叔

器 将亦欲爲刺客, 詐言作使, 上亦密知, 宴接如常。 子言之,兄若取雍州, 一械,舟艫戎馬,莫不富實。 紹叔請以此衆一戰。」送兄於南峴, 植退謂紹叔曰:「雍州實力, 伯符懼不敢發。 未易圖也。」紹叔曰:「兄還具 相持慟哭而 上後即位,作五百字詩具 別。 續復遣主帥 杜伯 為天

卿以爲羽翼。 鎭 運無闕乏。 關中,漢祖 初 起兵,紹叔爲冠軍將軍,改驍騎將軍,從東下。 得成山東之業,寇恂守河內,光武建河北之基。今之九江,昔之河內,我故留 前途不捷,我當其咎,糧運不繼,卿任其責。」紹叔流涕拜辭,於是督江、湘糧 江州平,留紹叔監州事,曰:「昔蕭何

尉卿。 矣。」帝甚親信之。母憂去職。 此皆聖主之策。」不善,則曰:「臣智慮淺短,以爲其事當如是,殆以此誤朝廷也。臣之罪深 得 及四方遺餉,悉歸之兄室。忠於事上,所聞纖豪無隱。每爲帝言事,善則曰:「臣愚不及, 天監初,入爲衞尉卿。 以營道縣戶凋弊,改封東興縣侯。 紹叔少孤貧,事母及祖母以孝聞,奉兄恭謹。 紹叔有至性,帝常使人節其哭。頃之,封營道縣侯,復爲衞 及居顯要,糧賜所

鎭 關南,以紹叔爲司州刺史。 三年,魏圍合肥,紹叔以本號督衆軍鎮東關。 紹叔至,創立城隍,繕兵積穀,流人百姓安之。 事平,復爲衞尉。 既而義陽入魏,司州移 性頗矜躁,以

列

權勢自居,然能傾心接物,多所舉薦。士亦以此歸之。

卒後 惜 如 此。 帝將 徴 帝嘗潸然謂朝臣 爲 子貞 左 臨 其殯 一衛 嗣。 將軍 ,紹叔宅巷陋, ·,CIED至家疾篤,詔 曰:「鄭紹叔立志忠烈,善必稱君,過則歸己,當今殆無其比。」其 不 容輿駕,乃止。 於宅拜授, 輿載還府。 詔 贈散騎常侍、護軍 中使醫藥, 一將軍 日數至。 諡 日 忠。 卒於府 、見賞 紹 叔

曹輩 相 建 之寇東陽, 生,指僧珍日 一後當一 陽 門 皆敬之。 呂僧珍字元瑜,東平范人也。日三世居廣陵, 道,不過 不 見減 文帝率衆 :「此兒有奇聲,封侯相 文帝 私室。 (`深自努力。) 為豫州 東討,使僧珍 文帝 刺 益以 史, 此 以爲典籤,帶蒙令。日心帝遷領 知行 知之。 也。」事梁文帝 軍 衆 司 局事。 空陳顯達出 家甚寒微。 僧珍宅在建陽 爲 門下 軍沔北, · 書佐。 童兒時從師學, 軍 身長 門 將 見 東, 而 軍 呼坐, 七尺七 自受命當 補 主 謂 簿。 一寸,容貌 有 相工 日 行,每 祆 卿 賊 歷觀諸 , 甚偉, 唐寓 有 H 貴 由

梁州 刺史,魏軍 建 武 年,魏軍 · 圍守連月,義陽與雍州 南 攻, 五. 道 並 進。 路斷。 武帝 帥師 武帝欲遣使至襄陽,求梁州問 援義陽, 僧珍 從 在軍 中。 時 長 衆莫敢 沙宣 行。 武 王 僧 爲

珍 固請充使,卽日單舸上道。 及至襄陽,督遣援軍,且獲宣武王書而反,武帝甚嘉之。

雍州 張。 乃出先所具,每船付二張,爭者乃息。 爲止舍。 歸之者甚衆。 及兵起,悉取檀溪材竹,裝爲船艦,葺之以茅,並立辦。 `僧珍固求西歸`得補邔令。[l+]及至, 武帝命爲中兵參軍, 委以心膂。 東昏卽位,司空徐孝嗣管朝政,欲要僧珍與共事。 多伐材竹,沈於檀溪,積茅蓋若山阜,皆未之用。 武帝頗招武猛,士庶響從,會者萬餘人。 因命按行城西空地,將起數千間屋 僧珍知不久當敗, 衆軍將發,諸將須櫓甚多,僧珍 僧珍獨悟其指,因私具櫓數 竟弗往。武帝臨 僧珍陰養死士, 百

再遷左衞將軍,加散騎常侍,入直祕書省,總知宿衞。 出其後,內外齊擊,居士等應時奔散。及武帝受禪,爲冠軍將軍、前軍司馬,封平固縣侯 立,茂移頓越城,僧珍守白板。 不可戰,亦勿遙射。 王茂率精兵先登赤鼻邏。 武帝以僧珍爲輔國將軍、步兵校尉,出入臥內,宣通意旨。大軍次江寧,武帝使僧珍與 須至塹裏,當幷力破之。」俄而皆越塹,僧珍分人上城,自率馬步三百人 其日,東昏將李居士來戰,僧珍等大破之,乃與茂進白板橋。 李居士知城中衆少,直來薄城。 僧珍謂將士曰:「今力不敵, 壨

天監四年,大舉北侵,自是僧珍畫直中書省,夜還秘書。「己五年旋軍,以本官領太子

·庶子。

荷國 過禮,平心率下,不私親戚。 市西小屋臨路,與列肆雜。 僧珍牀。」及別室促膝如故。 有督郵廨,鄉人咸勸徙廨以益其宅。 重恩,無以報効,汝等自有常分,豈可妄求叨越。當速反葱肆耳。」僧珍舊宅在市北,前 僧珍去家久,表求拜墓,武帝欲榮以本州,乃拜南兗州刺史。 僧珍常導從鹵簿到其宅,不以爲恥。 從父兄子先以販葱爲業,僧珍至,乃棄業求州官。 兄弟皆在外堂,並不得坐。 僧珍怒曰:「豈可徙官廨以益吾私宅乎。」姊適于氏,住 指客位謂曰:「此兗州刺史坐、非呂 僧珍在任,見士大夫迎送 僧珍曰:「吾

醉後取一甘食,武帝笑謂曰:「卿今日便是大有所進。」祿俸外,又月給錢十萬,其餘賜贅不 絕於時。 總 心膂,性甚恭慎。 在州百日,徵爲領軍將軍,直祕書省如先。 當直禁中,盛暑不敢解衣。 每侍御坐,屏氣鞠躬,對果食未嘗舉箸。 常以私車輦水灑御路。 僧珍旣有 大勳, 因 任

痛壯熱,及明而額骨益大,其骨法蓋有異焉。 初,武帝起兵,攻郢州久不下,咸欲走北。 僧珍獨不肯, 累日乃見從。 一夜,僧珍忽頭

與昔政同,必不復起。」竟如言卒于領軍官舍。 必謂不濟。 十年,疾病,車駕臨幸,中使醫藥日有數 主上見語、『卿有富貴相、必當不死』。 四。 武帝卽日臨殯、贈驃騎將軍、別府儀同三司、 僧珍語親舊曰:「吾昔在蒙縣熱病發黃,時 俄而果愈。 吾今已富貴,而復發黃,所苦

諡 曰忠敬。 武帝痛惜之,言爲流涕。 子淡 嗣

刺 通 一,强 史。 初 之乃進。 百萬買宅, 、宋季雅罷 將行,謂所親 僧 珍 南 千萬買鄰。」及僧珍 日:「不可以負呂公。」在州大有政績。 疑其故,親自發, 康郡 ,市宅居僧珍宅側。 少生子, 乃金錢 11 季雅往賀, 僧珍問宅價,日「一千一百萬 遂言於帝,陳其才 署 涵 日「錢 一千一。 能,以爲壯 閽 人少之, 怪其貴、 武將軍 衡 季雅 弗 州

其舅 雍州 樂藹字蔚遠,南陽淯陽人,晉尚書令廣之六世孫 刺 史宗懿嘗陳器物 ,試諸甥姪。 調時 益善之。 尚幼, 也。 而 無所 家居江陵。 取 , 慇 由 此奇 方頤隆準,舉 之。 叉取 動 史傳各 醞藉

卷

授藹

等,

使讀畢言所記。

藹略

讀

具

舉

俗、山 見藹 齊 jή 閉 豫章王嶷 險 閤 易 讀 調 書。 為荆州 隨 後爲 問 立 大 對,若案圖牒,嶷 刺 史, 司馬記 以藹 室 爲 驃騎 益 行參軍 重 焉。 ,領州 州 人嫉之, 主 簿, 或 參知 譜藹 州事。 廨 門 如市 疑嘗 問藹 嶷 遣 城隍風 混之,

見藹 永 問 明 以 八 西 年 事 荆州 調 占對詳敏 刺 史巴東 ,帝悅,用爲荆州 Ī 子響稱 兵反,及敗,焚燒府舍,官曹文書 中從事 ,敕付以修復府 州 事 時蕩 高 還 州 盡。 齊武 繕 修 廨 帝

列

傳

署數 中 郎,以藹 區 ,頃之咸 爲諮議 參 畢。 軍 豫章王嶷薨,萬解官赴喪,率荆、湘二州故吏建碑墓所。 蕭穎 **胄引嬴及宗夬、劉坦任以經** 略 南康王 西

時 藹 果遷焉。 稱其博 日 天監初,累遷御史中丞。 昔晉 物 性公强, 弘 武庫火,張華以爲積油萬石必然,今庫若灰, 恕 居憲臺甚稱職。 初,萬發江陵,無故於船得八車輻, 時長沙宣武王將 葬, 非 而 ·吏罪· 車府 也。」旣 忽於 如中丞建步避道者, 庫 失 而 一檢之, 油 絡, 果有 欲推 .待 主者。 至是

於官。 舒, 因 掠 年, 元瑜 出爲平越中郎將、廣州刺史。 財産。 元瑜走歸廣州 借兵於藹, 前刺史徐元瑜罷 託 欲討 賊, 歸, 而實謀襲譾。 遇始 興 人士反, 調農決之 逐內史 崔睦 尋卒

子法才。 藹 姊 適 徵士同郡劉虬,亦明識有禮訓。
 關爲州、迎姊居官舍、三分祿秩以供焉、西
 稱

秩, 舟卿,尋除南康內史。 比去 法才 將 字元備 至 百金,縣 幼 曹啓! 與弟法藏俱 恥以讓奉受名,辭不拜。 輸 臺 庫。 有美名。 武 帝 嘉 其清 沈約 歷位 節, 見之曰:「法才實才子。」 日「居 少府卿,江夏太守, 職若 斯, 可以 爲 爲 因被代, 建 百 城 康 表 令, 矣」。 表求 不 便道 受奉 遷太

還鄉。 至家,割宅爲寺,棲心物表。 尋卒。 法藏位征西錄事參軍,早亡。

子雲曰:「終爲廣矣,不如守以死節。」遂仆地,卒於馬蹄之下。 子子雲,美容貌,善舉止。位江陵令,元帝承制,日む除光祿卿。魏剋江陵,衆奔散,呼子

當官任事,寵秩不亦宜乎。 梁之亂階,惜乎! 僧珍之肅恭禁省,紹叔之勤誠靡貳,蓋有人臣之節矣。 離貳,纘不能叶和蕃岳,克濟溫 論曰:張弘策惇厚愼密,首預帝圖,其位遇之隆, 豈徒外戚云爾。 庾域 、鄭紹叔、呂僧珍等,或忠誠亮蓋,或恪勤匪懈,締構王業,皆有 、陶之功,如可而苟懷私怨,以成釁隙之首。 至如太清板蕩, 風格若此,而爲 力焉。 親屬

校勘記

- 以弘策為 輔國將軍軍主 「主」上各本並脱「車」字,據梁書補。
- 故 人賓客接之如 布衣 梁書及册府元龜八〇六「布衣」下有「時」字。
- 緬 抄 後 漢晉書衆 家異 同為後漢紀四十卷晉抄三十卷 「衆家異同爲後漢紀四十卷晉」十二字

列傳第四十六 校勘記

各本 並 脫,據梁書增補,從李慈銘南史札記說。

면 武 帝舅也 「武帝」上梁書有「弘籍」二字。

嘗執四部書目曰若讀此畢可言優仕矣

「嘗」、「若」各本作「帝」、「君」,誤以纘語爲武帝語,據

梁書改 Ĭ, **5**

ゲ 造十郡 慰慰勞 梁譜及册府元龜六八九「遣」上有「停」字。

- 仍檢 括州府 庶事 「庶事」各本作「付度事」、據梁書改。

ス 用 人之本 梁書、册府元龜五一二無「之」字。

年元日」,館兄繼已爲僕射,此「四年」,疑有誤。 作「時」、「塗」,據梁書改。 舊 制僕射中丞坐位東西相當時綰兄纘爲僕射及百司就列兄弟導騶分趨兩陛 又按據梁書及本書張續傳,續 爲尙書僕射在大同五 年,此 「相」、「陛!各本 云「大同 匹

[] 安成人劉敬宮挾祇道至 進寇豫章 劉敬宮」武帝紀及王僧辯傅作「劉敬躬」,通鑑同。「 豫 章

各本作「豫州」,據梁書改。

尚 簡 文第十一 女定陽公主 「定陽公主」梁書作「安陽公主」。

梁文帝 爲 郢 州 辟爲主簿 按梁武帝紀敍文帝 歷官無爲郢州事 ,乃位終丹陽尹,疑此有誤。

毎痛至 一必叫 「痛」字各本並脫,據删府元龜七五七及通志補

- 徴爲左 一衞將軍 左 |衞將軍」梁書作「左將軍」。 又梁書載鄭紹叔卒後韶文稱 「右衞將軍」, 未 知
- 孰 是。
- 二吾 東平范人也 「東平范人」各本作 「東海范陽人」,據梁書改。 按宋書州郡志 兗州 東平郡 有范
- 縣,徐州東海郡領縣無范或范陽。
- 得補即令 文帝為豫州刺史以爲典籤帶蒙令 「即」各本作「卭」。 張森楷梁書校勘記:「卬、卬皆非縣名、不得有令。 按蒙縣屬豫州梁郡,然文帝又無爲豫州 事。

南郡有即縣,續漢志、晉志幷屬荆州,朱、南齊志屬雍州。 時高祖為雍州 僧珍從之,當補即令。」

據漢書地

選売

- 今從改
- 夜還秘書 「書」字各本並脫,據梁書補。
- 元帝承制 「元帝」二字各本並脫,據通志補。

勳臣。

克濟溫陶之功 |溫陶」各本作 |陶冶」 據梁書改。 按溫謂溫嶠 胸謂陶侃, 平定蘇峻, 爲晉

南史卷五十七

列傳第四十七

沈約 子旋 孫衆 范雲 從兄縝

子國 能業其官,宣汾洮,障大澤,以處太原。 今汝南平輿沈亭是也。 沈約字休文,吳興武康人也。 春秋之時,列於盟會。 昔金天氏有裔子曰昧,爲玄冥師,生子允格、臺駘。 帝顓 頊 嘉之,封諸汾川。 魯昭四年,晉使蔡滅沈,其後因國爲氏。 其後四國沈、姒、蓐、黃、沈

自茲以降,譜諜罔存。

戏。 内太守勗 唐,官至齊王太傅,封<u>數</u>德侯。 戎字 秦末有沈逞,徵丞相不就。[]漢初,逞會孫保封竹邑侯。 威卿 勗 生御史中丞奮,奮生將作大匠恪,恪生尚書關內侯賺,賺 仕 爲州 從事 ,說降劇賊尹良,漢光武嘉其功,封爲海昏縣侯,辭 遵生驃騎將軍達,達生尚書令乾,乾生 保子遵自本國遷居九江之壽 南陽 生濟陽太守靖, 太守 不受、因避 弘,弘 靖 生 地 生 河

列

傳第

四十

七

沈約

平五年 徙居會稽鳥 ,分<u>鳥程、餘杭爲永安縣,吳孫晧寶鼎二年,分吳郡爲吳興郡</u>。 程縣之餘不鄉,遂家焉。 順帝永建元年,分會稽爲吳郡, 復爲吳郡 晉太康三年,改永安 靈帝初

雖邦邑屢改,而築室不遷。

武康縣,印復爲吳興武康人焉。

長,潁川太守,始居縣東鄉之博陸里餘鳥村。 沙二郡太守,不就。太康末卒。子陵字景高,晉元帝之爲鎭東將軍,命參軍事。子延字思 辟,公車徵,並不屈,以壽終。子曼字元禪,四左中郎、新都都尉、定陽侯,才志顯於吳朝。 器,何遽逾制自取殄滅邪。」三年禮畢,殆至滅性,故兄弟並以孝著。」踰早卒。儀字仲則,篤 子矯字仲桓,以節氣立名,仕爲立武校尉、偏將軍。孫時,有將帥之稱。吳平,爲鬱林、長 學有雅才,以儒素自業。時海內大亂,兵革並起,經術廢弛,士少全行。 道不移,風操貞整,不妄交納,唯與族子仲山、叔山及吳郡陸公紀友善。州郡禮請,二府交 於成人。外祖會稽盛孝章,漢末名士也,深加憂傷,每撫慰之,曰:「汝並黃中英爽,終成奇 平,州舉茂才,亦有淸名,卒。子瑜、儀俱少有至行。 從 相,演之、慶之、曇慶、懷文其後也。仲高子鸞字建光,少有高名,州舉茂才,公府辟州別駕 (事史。時廣陵太守陸稠,鸞之舅也,以義烈政績顯名漢朝,復以女妻鸞,早卒。子直字伯 |戎子酆字聖通,位零陵太守,致黃龍芝草之瑞。第二子仲高,安平相, [m] 少子景河間 延子賀字子寧,桓沖南中郎參軍。 瑜十歲、儀九歲而父亡,居喪毁瘁,過 而儀淳深隱默,守

相 獨善之志,不亦高乎。」警曰:「使君以道御物,前所以懷德而至,旣 敬 爾。」還家積載,以素業自娛。 重 招致,不得已而應之。 **賀子警字世明,惇篤有行業,學通左氏春秋,家產累千金。** 警內足於財,爲東南豪士,無進仕意,謝病歸。 尋復謝去。子<u>穆</u>夫字彦和 前將軍王恭鎭京口,與警有舊好,復引爲參軍 ,少好學,通左氏春秋。 安固留不止,乃謂曰:「沈參軍 後將軍謝安命爲參軍 無用佐時,故遂飲啄之願 王恭命為前將 手書殷勤,苦

軍主簿,謂警曰:「足下旣執不拔之志,高臥東南,故屈賢子共事

,非更職嬰之也。」

敬。 之所破,穆夫見害。先是穆夫宗人沈預與穆夫父警不協,至是告警及穆夫弟仲夫、任夫、預 决、佩夫,並遇害。 唯<u>穆夫子深子、雲子、田子、林子、虔子獲全。 至田子、林子</u>知名。 年,思於會稽作亂,自稱征東將軍,三吳皆響應。穆夫在會稽,恩以爲餘姚令。及恩爲劉牢 警累世事道,亦敬事子恭。 初,錢唐人杜炅字子恭,通靈有道術,東土豪家及都下貴望並事之爲弟子,執在三之 子恭死,門徒孫泰、泰弟子恩傳其業,警復事之。隆安三

建成 子領偏師 將軍孫季高海道襲破廣州,還除太尉參軍、淮陵內史,賜爵都鄉侯。 十一年,從討司馬休之,除振武將軍、扶風太守。 十二年,武帝北伐,田子與順陽太守 田子字敬光,從武帝剋京城,進平建鄴,參鎭軍事,封營道縣五等侯。帝北伐廣固 與龍驤將軍孟龍符爲前鋒。 龍符戰沒,田子力戰破之。及盧循逼都,帝遣田子與 義熙八年,從討劉

列

時潰散,所殺萬餘人,得泓偽乘輿服御。 也。」便獨率所領,鼓譟而進。 後傾 |(専 不兩立,若使賊圍旣固,人情喪沮,事便去矣。及其未整,薄之必剋,所謂先人有奪人之志 ·彼衆我寡,難可與敵。」田子曰:「師貴用奇,不必在衆。」弘猶固執,田子曰:「衆寡相傾, 田子曰:「咸陽之平,卿之功也,卽以咸陽相賞。」卽授咸陽、始平二郡太守。 弘 之各 國 東 出。 領別軍,從武關入,屯據青泥。 乃率步騎數萬,奄至靑泥。 賊合圍數重,田子乃棄糧毀舍,躬勒士卒,前後奮擊,賊衆一 武帝表言其狀。長安旣平,武帝讌于文昌殿,舉酒 姚泓將自禦大軍,慮田子襲其後,欲先平田子,然 田子本爲疑兵、所領裁數百、欲擊之。 傅弘之曰:

足自 卒發狂易,不深罪 真。 |鎮惡家在||關中,不可保信,屢言之。帝曰:「今留卿文武將士、精兵萬人,彼若欲爲不善,政 連 關中反叛。 勃勃來寇,田子與安西司馬王鎭惡俱出北地禦之。初,武帝將還,田子及傅弘之等並以 長史王脩收殺田子於長安凜倉門外,是歲十四年正月十五日也。武帝表天子以田子 滅耳。勿復多言。」及俱出北地,論者謂鎭惡欲盡殺諸南人,以數十人送義眞南還,因據 大軍既還,桂陽公義眞留鎭長安,以田子爲安西中兵參軍、龍驤將軍、始平太守。 田子乃於弘之營內請鎮惡 也 計事,使宗人敬仁於坐殺之,率左右數十人自歸義 時勝

林子字敬士,少有大度,年數歲,隨王父在京口,王恭見而奇之,曰「此兒王子師之流

帝 應 批 從誅 致討 。」嘗與衆人共見遺寶,咸爭趨之,林子直去不顧。 林子 而 沈預 乃自歸陳情,率老弱 家甚强富, 志相 陷滅, 歸罪請命 林子兄弟沈伏山澤,無所投厝。 因流涕哽咽,三軍爲之感動。 年十三, 遇家 禍 旣門陷祆黨, 會孫恩屢出 帝甚奇之, 會稽 兄弟並 乃載 武

以

別船,

逐盡室移京口,帝分宅給焉。

堂。 討 據 尉 爲 子 從 爲 魯 武 軍 軌 陵 事 事 林子兄弟挺身直入,斬預首,男女無論 林 可領 о 於石城,軌 子博覽衆書、留心文義、從剋京城、進平都邑。 武 常被甲持戈, 復從討司 陵太守王鎭惡出 建熙令,封資中縣五等侯。 棄衆走襄陽,復追躡之。 馬休之。 至是林子與兄田子還東報讎。 奔。 武帝每征討, 林子 率軍討之, 斬亮之於七里澗而 從伐慕容超,平盧循, 林子輒推鋒居前。時賊黨郭亮之招集蠻、晉,屯 襄陽旣定,權留守 長幼悉屠之,以預 五 時年十八,身長七尺五寸。 月夏節日至, 並著軍功。 江陵 首祭父祖墓。 納鎭惡。 預政大集會 後從征劉毅,參太 及帝為揚州 武陵既平,復 沈預慮林 子弟盈

危 至 太 力屈 尹昭 武 億 帝 東 岩 伐 據蒲坂, 平公姚 使 姚泓,復參征 姚 紹 紹 林子 據 爭據潼 之, 於陝城 則難 西軍 關。 事,加 圖 與短 林子 也。 軍 建 謂道 及其未至, 當幷力爭之。 檀 武將軍,統軍爲前鋒, 道濟同 濟 曰:「潼關 攻浦 坂,龍驤 天 岨, 所謂 從汴 王 若潼關 鎭惡攻潼 形勝 入河。 事捷, 之地。 偽針州 關 尹昭 鎭 姚 悪 泓 刺 可 孤 史、河東 聞 不戰而 軍 大軍

列

傅

鋒 服 諸 乃 有 百 同 征 .業 將 所 或 道 無 艱 破 望於 犯 欲 戰 賊 難 濟 其 棄 皆 從之。 豊 卿 西 或 捐 多其首 荷 輜 北 也 미 復 恩 重 及 一還赴 老 增 紹 級 至 張 衆 極 紹 ,以此 武 虜獲,以示 而 小 林子 靡 帝 舉 關右 乘 退撓,亦 獻 林子 其 之 捷 誇 亂 書至, 衆 按 誕。 而 何 劍 設重 薄 以 日 毎 之, 昔 三 下 見 以實 魏 重 紹 相 尙 官 公 圍林子及 乃大 聞。 以 旗 今日 盈 潰 鼓 級 武 之事 邪。 帝 受罰,此 俘 道 問 *,自 虜 塞 濟 其故, 以千 井 頻惡 爲將 亦 焚舍 數, 林子 後 軍 乘 示示示 悉 辦 之良 日 之。 獲 無 道濟 紹 全 轍 夫 器 志 然 議 王 也 滅械資 欲 者之師 度 率 武 實 麾 河 君 帝 避 下 子 時 數 或 其

子 弘。 得 憑 坑 以 其 河 林子 釁 衆。 紹 固 初 齊 險 志 禦之, 紹 斧 節 紹 以 退走,還保 沈勇 復 爾 絕糧 遣 連 戰 撫軍 尋紹 林子 援。 皆 將軍 定城, 捷 疽 每 武 一發背 帝 戰 姚讚 復 留 輒 死 遣 偽 勝 將兵 林子 武衞將軍 白 武 武 屯 帝 、累戰 帝 河 以 上, 曰:「: 林子 姚 大 林子 破 鸞精兵守嶮, 姚紹 之驗 Ž, 連 卽 氣 破 蓋 乃 斬 之。 賜 伯 關 字,所 |林|子 書 右 紹 嘉 而 又遣 銜枚夜襲, 美 力 俘 之。 以 獲 長 勢屈 史姚 恋 於 以 是讚 但 郎屠 還紹 伯 湿凶 子 統 使 等 其城,劓 後 命 屯 軍 知 先盡 據 復 王 九泉, 襲 師之 不不 林 而

帝 慮 衆寡 帝 至 不 閿 敝 鄕 遣林子步自秦嶺 姚 泓 掃 境 内 兵 屯 以相 嶢 柳 接 援。 時田 此 子 至, 自 泓已破 武 關 北 走。 屯 軍 子 藍 欲窮 田 追 泻山 進 自 取 率 長安 大 衆 攻之。

止 之曰:「往取長安,如指掌爾。 復剋賊城,便爲獨平一國,不賞之功也。」田子乃止

領水 軍於石門以爲聲援。 長安旣平,姚氏十餘萬口西奔隴上,林子追討至寡婦水,轉鬭至槐里。 林子 威震關中,豪右望風請附。帝以林子、田子綏略有方,頻賜書褒美,幷令深慰納 還至彭城,帝令林子差次勳勤,隨才授用 大軍東歸,林子

深相 出 酬納。 乃以 文帝出鎭荆州, 王所以戒愼祗肅,非以崇威立武,實乃經國長甿。 林子 俄而 · 爲西中郞中兵參軍,領新興太守。 謝翼謀反,帝歎曰:「林子之見,何其明也。」 議以林子及謝晦爲蕃佐。 帝曰:「吾不可頓無二人,林子行則晦不宜 林子以行役久,士有歸心,乃深陳事宜 宜廣建蕃屏, 崇嚴宿衞。」武帝

卒 固 ,追贈征 諫。 文帝進 帝答曰:「吾輒當不復自行。」帝踐阼,以佐命功,封漢壽縣伯,固讓不許。 **心**號鎮 (西)隨府轉,加建威將軍、河東太守。 少子璞嗣。云 時武帝以方隅未靜,復欲親戎,林子 永初

左常侍,文帝引見,謂之曰:「吾昔以弱年出蕃,卿家以 之事,一以 異、以爲 璞字道真,童孺 主 相 簿。 委。 時 時神意閑審。文帝召見,奇璞應對,謂林子曰:「此非常見也。」初除南平 順陽范曄爲長史行州事,曄性頗疎,文帝謂璞曰:「范曄性疎,必多不 勿以國官乖淸塗爲罔罔也。」元嘉十七年,始興王濬爲揚州 親要見輔,今日之授,意在不薄。 刺 史,寵

列

傅

四

+

七

謗 行, 同, 贖 必 卿 **E** 從 腹 F ديار 璞有 所 出 力焉。 當 曄 政 密以在意。 謂 二十二年,范曄 聖明留察,故深更恭慎,而 彼行事 坐事 ,其實卿也。」璞以任遇旣 **,時濬 莫 雖 見其際也。 日 親 覽,州 深, 事一以付璞。 在 職 所懷輒 八 八年,神 以密啓, 州 濬 大 年旣長,璞 寧, 毎 至 施 無

三十 年,元凶 1 弑立, 選以 奉 迎之晚見殺。 有子曰約 其制自序大略 如 此。

固

求

辭

事

以璞爲濬始興國

大農,累遷淮南

太守。

善師 绺 而 善 生 之。 乏, 疾 鯯 常遣 及爲郢州 及 爲 而 減 荆州 遭家難,潛竄 油 一引為 滅火。 、又爲 安西外兵參軍 征 而 畫之所讀,夜 西 ,會赦乃殆。 記室,帶 ,兼記 厥西 輒誦 旣 [令。[公] 而 室。 之, 流 寓 興宗常 逐博 孤 貧 通 () 篤志 | 奉籍 謂 其 (諸子 好學, 善屬 日:「 畫夜 文。 沈記 濟 不 釋卷。 陽 室 蔡 人倫 與宗聞 母 師 恐其以 表,宜 其

琅 興 記 或 邪 直 不 可 得 王 齊 恒 永壽省 融 進 初 早 爲 陳郡 約 え
。 征 何 校 房記 以 謝 遷太子家 四 爲言。 朓 部 室 南 一,帶 圖 鄕 書。 令。 太子 襄 范雲、台 陽 時 後 令,所 曰:「吾 東宮多 爲 司 奉 樂安任 徒 生平嬾 一十、約 主 右 卽 長 防等皆游 齊文惠太子。 起, 特被 史、黄門 是卿 親遇, 焉。 侍 所 悉,得 郎 毎 當 太子入居東宮,爲步 旦入見, 時 世 卿 號 竟 談 陵王 爲 論 景斜 得 然 招 人。 土 後 方 一,納 忘 出 寢 與 兵校尉, 時 蘭 卿 王 陵 侯 欲 蕭 管書 我 到 夙 宮

隆昌 元年次 除吏部郎,出爲 東陽 太守。 齊 明帝卽位 ,徵爲五兵尚書 遷 國 子 祭酒。 明帝

崩 政 歸 冢宰,尚書令徐孝嗣使約撰定遺詔。 永元中,復爲司徒左長史,進號征虜將軍、南

清河太守。

皆 图 草 於 不 召 乃 以 約 日 以 扣 始始 同。 望 外 其 爾 **下** 建 來 其 一謂日 安 端 吾方思之。」約曰:「公初起兵樊、沔, 有 事 暗 初 尤 但 入 若不 之封 尺寸之功, 同 帝默 梁 궄 人便曰 爲彰著。 復 卵卵 約 武 有 咄 早定大業,稽天 生 乃 明 遺之子 然 在西邸,與約游舊。 人方 平 咄 出 早將休文 吾君。 而 懐 與 以保其 讖云,『行中水,作天子』。 不 更同 沈休文 中 孫。 約 應。 詔書 武王 出 公作賊。」帝然 (更來。) 若 福 佗 雲問 《羣居,不覺有異人處) 不違 禄。 天子還都, 人之望,脫 日又進曰:「今與古異、不可以淳 選置,帝 曰:「何以見 今童 雲出語約, 人意,亦 建康 見牧豎悉知齊祚之終, 之。 城平,引 一人立異, 公 初 無 卿在 此時應思。 無所 約出, 元處 [] 約 所 約 此 位 思。 日 改 叉 爲驃騎司馬。時帝勳業旣就,天人允屬 今日才智縱橫, 一。俄 歷 召范雲告之, 便損 則 公 舉 卿必 然 君 手 自至京邑, 而 今日王 在 (威德。 臣 向 雲 ?待我。」 記。 分 左, 一自外 定, 風 且 業已就, 雲笑日:「 天 且. 雲對略 來,至 期萬物。士大夫攀龍 雲 天 無復 ۱ŗ, 已移 人 可謂 許 文人事表革 不 非 諾 異圖。 一殿門 可違,人情 金 氣 同 何所 明 不 序, 識。」 石 約旨。 而 乖 不 復思。 約 時 得 君 此 所 雲曰:「公今知 先期 明 事 運之徵, 望 於 入, 帝 不可 於 難 周武 昔武 徘 **入** 上, 有 附 失。」帝 徊 高。約嘗 鳳者, 王伐 永元 帝 智者 遲 15.1 | 15.1 壽 臣 忠 光 令 印 速

約, 不 異約 今知 公。」帝曰:「我起兵於今三年矣, 功臣諸將實有其勞,然成帝業者乃卿二

人也。」

哭。 遷 光祿 事。 約 左 母: 謝為 大夫。 梁臺 遷尙 起爲 僕射。[10]天監二年,遭母憂,輿駕親出臨弔,以約年衰,不宜致毁,遣中書舍 書令, 鎭 建昌國太夫人。 一建,爲散騎常侍、吏部尚書,兼右僕射。 軍將軍、丹陽尹,置佐史。服闋,遷侍中、右光祿大夫,領太子詹事,奏尙 累表 陳讓,改授左僕射,領中書令。 奉策之日,吏部尚書范雲等二十餘人咸來致拜,朝 及受禪,爲尚書僕射,封建昌縣侯。 尋遷尙書令,領太子少傅。 野 以爲榮。 九 人斷 年,轉左 書 八 客節 叉拜 俄 條

素善 欲 謝 「遂以 事 初 小水 約 書陳情於勉,言己老病,「百日數旬,革帶常應移孔,以手握臂,率計月小半分」。 歸老之秩。 **外處端揆**,有志台司,論者咸謂爲宜。 勉爲言於帝,請三司之儀, 弗許,但加鼓 而帝終不用,乃求外出, 吹 而已。 又不見許。與徐勉

序 其 事 約 性 不 尋 加 飲酒,少嗜慾,雖時遇隆 《特進,遷中軍將軍、<u>丹陽</u>尹,侍中、特進 重,而居處儉素。 立宅 如 故。 東田 十二年卒官,年七十三,諡 , 矚望 郊阜,常爲郊居賦以

凹隱。

約 左目重瞳子,腰有紫志,聰明過人,好墳籍,聚書至二萬卷,都下無比。 少孤貧,約干

有之,然不能過也。 宗黨得米數百斛,爲宗人所侮,覆米而 是齊文惠宮人,自己帝問識座中客不。曰:「唯識沈家令。」約伏地流涕,帝亦悲焉,爲之罷 一官,輒殷勤請退,而終不能去,論者方之山濤。 約歷仕三代,該悉舊章,博物洽聞, 自負高才,昧於榮利,乘時射勢,頗累淸談。及居端揆,稍弘止足,每進 去。 當世取則。 及貴不以爲憾,用爲郡部傳。 用事十餘年,未常有所薦達,政之得失,唯 謝玄暉善爲詩,任彦昇工於筆,約 嘗侍宴,有妓婢師 兼而

唯而已。

約懼遂卒。 損 帝以其言不遜,欲抵其罪,徐勉固諫乃止。及疾,上遣主書黃穆之專知省視,穆之夕還,增 帝奇之,問栗事多少,與約各疏所憶,少帝三事。 起,猶坐如初。及還,未至牀,憑空頓於戶下,因病。夢齊和帝劍斷其舌,召巫視之,巫言如 足復論。」帝以爲的昏家相爲,怒約曰:「卿言如此,是忠臣邪!」乃輦歸內殿。 不即啓聞,懼罪,竊以赤章事因上省醫徐奘以聞,又積前失。帝大怒,中使譴責者數焉 乃呼道士奏赤章於天,稱禪代之事,不由己出。 初,武帝有憾於張稷,及卒,因與約言之。 有司諡曰「文」,帝曰「懷情不盡曰隱」,故改爲隱 約曰:「左僕射出作邊州刺史,已往之事,何 約出謂人曰:「此公護前,不讓即羞死。」 先此,約嘗侍宴,會豫州獻栗,徑寸半。 約懼,不覺帝

約 少時常以晉氏一代竟無全書,年二十許,便有撰述之意。 宋泰始初,征西將軍蔡興

宗 注。 周。 不 又撰梁武 好焉,嘗問周捨曰:「何謂四聲。」」捨曰:「『天子聖哲』是也。」然帝竟不甚遵用約也。 爲啓,明帝有敕許焉。 四 整譜; 永 五年春又被敕撰宋書,六年二月畢功,表上之。 明 (紀十四卷,又撰邇言十卷,諡例十卷,文章志三十卷,文集一百卷,皆行於世。 初 ·以爲「在昔詞人累千載而不悟,而獨得胸衿,窮其妙旨」。自謂入神之作。 遇盜,失第五帙。 自此踰二十年,所撰之書方就,凡一百餘卷。 又齊建元四年被敕撰國史, 永明二年又兼著作郎, 其所撰國史爲齊紀二十卷。 條流 雖舉,而採綴未 撰次起居 天監中, 武帝雅 叉

卒,子寔嗣。 終于南 子旋,字上規,襲爵,位司徒右長史,太子僕。 康內史,諡曰恭。 庭弟衆。 集注邇言,行於世。 以母憂去官,因蔬食辟穀,服除,猶絕粳 旋弟趨字孝鯉,亦知名,位黃門郞。 旋

陳郡 謝景 衆字仲師,好學,頗有文詞。仕梁爲太子舍人。時梁武帝制千文詩,衆爲之注解。日三與 同 !時召見于文德殿,帝令寒爲竹賦。 賦成奏之, 手敕答曰:「卿文體翩翩, 可謂無

忝爾祖。」

累遷太子中舍人,兼散騎常侍,聘魏,還爲驃騎廬陵王諮議參軍。 侯景之亂,表求還吳

甚整,景深憚之。 興召募故義部曲以討賊,梁武許之。 梁武於城內遙授太子右衞率。 及景圍臺城, 臺城陷,衆乃降景。 衆率宗族及義附五千餘人入援都, 景平, 元帝以爲司徒 軍容

左長史。魏剋江陵,見虜,尋亦逃歸。

於吳中賜死。 因忿恨,遂歷詆公卿,非毁朝廷。 計, 太極殿。 無所分遺。 陳武帝受命,位中書令。帝以衆州里知名,甚敬重之,賞賜超於時輩。 恒服布袍芒屬,以麻繩為帶,又囊麥飯铧以噉之,朝士咸共誚其所爲。 自奉甚薄,每朝會中,衣裳破裂,或躬提冠履。永定二年,兼起部尚書,監起 武帝大怒,以衆素有令望,不欲顯誅,因其休假還武康,遂 性吝嗇,財帛億 衆性狷急,

其姑 夫袁叔明讀毛詩,日誦九紙。 范雲字彥龍,南鄉舞陰人,晉平北將軍汪六世孫也。 陳郡殷琰名知人,候叔明見之,曰「公輔才也」。 祖璩之,宋中書侍郎。

郢。 時吳興沈約、新野庾杲之與抗同府,見而友之。 雲性機警,有識具,善屬文,自己下筆輒成,時人每疑其宿構。 災抗爲即府參軍,雲隨在

家野 孙 西曹書佐,轉法曹行參軍。 俄而沈攸之舉兵圍郢城,抗時爲府長流,入城固

列傳

守, 柳 目 世 留家 隆 卿 鱠魚 定可 屬居 三十 兒, 外。 且出 頭、皆去其首。 雲爲軍人所得,攸之召與語,聲色甚厲。 就舍。」明 旦又召雲令送書入城內,餉 城內或欲誅雲,雲曰:「 老 母 武陵王酒 雲容貌不變,徐 弱弟,懸命沈氏。 石, 犢 自陳說。 二頭; 若其 、違命 餉 攸 長 之 一禍 史 笑

必

親。

今日

就

戮,甘

心如

薺。

世隆

素與雲善,

乃発之。

賓。 感 此 識。 韻 日 應 何 ;又皆大篆,人多不識,乃夜 登秦望山 瑞 之 末問 自是寵 後 理 除 雲位 雲, 員 冠 外散騎 至此乎。」 雲曰:「下官嘗讀史記, 中最 乃命雲。 府朝。 後答, 郎。 王爲丹陽尹,復爲主 雲以山 齊建元 曰:「臣 取史記讀之令上口。 上有秦始皇刻 初,竟陵王子良 聞 王 見此刻石文。」乃進讀之如 ||者敬宗廟則白鳥 一簿,深相 石, 爲 會稽太守,雲爲府主簿。 此文三句 親任。 明 至。」 日 登 時進見齊高帝,會有 山, 時謁廟始畢, 韻 子良 流。三三子良 人多作 令賓僚讀之, 兩 帝 王未之知。 大悅, 旬 日 讀之, 獻白鳥 卿言是也 皆茫然 因 以 並 帝問 後 爲 不 剋 得 Ŀ 不

爲 百百 雲 有 求 子 餘 祿 良 齊 爲 紙。」帝索視之,言皆切 南 〔武帝 徐州 日 南兗州, 一聞范 雲諂 雲並隨府遷, 至 事 ,

咨嗟良久,

曰:「不意范雲 汝,政當 流之。」 每陳朝政得失於子良。 子良 對日 言雲之事 乃爾 一方令 尋除尚書殿 臣 · 動 鹓 汝。 相 箴 中郎。 諫 諫書 子良

子良爲司徒,又補記室。 時巴東王子響在荆州,殺上佐,都下匈匈,人多異志。 而 豫章

時 徒 與 王 一嶷鎮 雲俱 廷尉 亦 宜 鎭 爲 東府,多還私邸,動移旬日。 平 石頭 王植 子 良所禮。 爲齊武帝所狎,雲謂植曰:「西夏不靜, 卿入旣數,言之差易。」植因求雲作啓自呈之。 梁武 勸子良還石頭, 幷言大司馬宜還東府, 子良築第西郊,游戲而已。 ,人情甚惡,大司馬詎得久還私第?司 俄而二王各鎭一城。 而梁武帝時爲南郡王文學, 子良不納。 梁武 以告雲。

識就 勤 文 車握雲手曰:「不謂今日復 願 惠太子嘗幸東田觀穫稻,雲時從。 殿 下知稼 穡之艱 (難,無徇一朝之宴逸也。」文惠改容謝之。及出,侍中蕭緬先不相 見讜言。」 文惠顧雲曰:「此刈甚快。」雲曰:「三時之務,亦甚

公田 益 。[三彪笑謂 奉 永明 米之外,別雜調四千石。 十年使魏,魏使李彪宣命,至雲所,甚見稱美。 曰:「范散騎小復儉之,一盡不可復得。」使還,再遷零陵內史。 及雲至郡,止其半,百姓悅之。深爲齊明帝所知,還除正 彪爲設甘蔗、黃甘、粽,隨盡復 初,零陵舊政,

員

郎。

何 ." 深阬,見文惠太子先墜,次武帝,次文宣。 了,卿愼 時 高 、武王侯並懼大禍,雲因帝召次曰:「昔太宰文宣王語臣,言嘗夢在一高 勿向 人道 明帝流涕曰:「文宣此 惠亦難負。」於是處昭胄兄弟異於餘宗室。 望見僕射在室坐御牀,備王者羽儀, 山上,上有 不 知 此 是

雲之幸 於子良,江 祏 求雲女婚姻,酒酣,巾箱中取翦刀與雲, 目:且 以爲娉。」雲笑受

因出翦刀還之,而亦更姻他族。及而敗,妻子流離,每相經理。 至是而貴,雲又因酣曰:「昔與將軍俱爲黃鵠,今將軍化爲鳳皇,荆布之室,理隔華盛。」

之,若百日無主,依判送臺。又郡相承後堂有雜工作,雲悉省還役,並爲帝所賞。郡多豪猾 雲入境,撫以恩德,罷亭候,商賈露宿,郡中稱爲神明。 大姓,二千石有不善者,輒共殺害,不則逐之。邊帶蠻悝,尤多盜賊,前內史皆以兵刃自衞。 又爲始興內史, 舊郡界得亡奴婢, 悉付作, 部曲卽貨去, 買銀輸官。 雲乃先聽百姓誌

江而姨弟徐藝爲曲江令,而深以託雲。有譚儼者,縣之豪族,藝鞭之,儼以爲恥,至都訴雲, 遷廣州刺史、平越中郎將。至任,遣使祭孝子南海羅威唐頌、蒼梧丁密頓琦等墓。時

雲坐徵還下獄,會赦免。

之外,雲亦築室相依。梁武每至雲所,其妻常聞蹕聲。又嘗與梁武同宿顧暠之舍,暠之妻 方產,有鬼在外曰:「此中有王有相。」雲起曰:「王當仰屬,相以見歸。」因是盡心推事。及帝 事,寧俟多說。」雲曰:「此政會吾心,今羽翮未備,不得不就籠檻,希足下善聽之。」及入城, 之。伯翳曰:「今天文顯於上,災變應於下,蕭征東以濟世雄武,挾天子而令諸侯,天時人 起兵,將至都,雲雖無官,自以與帝素款,慮爲昏主所疑,將求入城,先以車迎太原孫伯翳謀 初、梁武爲司徒祭酒、與雲俱在竟陵王西邸、情好歡甚。永明末、梁武與兄懿卜居東郊

毗佐大業。 除 國子博士,未拜,而東昏遇弑。侍中張稷使雲銜命至石頭,梁武恩待如舊,遂參讚謨謀, 仍拜黃門侍郎,與沈約同心翊贊。俄遷大司馬諮議參軍,領錄事。

中參乘。 令以<u>余氏</u>賚茂,帝賢其意而許之。明日,賜<u>雲、茂錢各百萬。及帝受禪,柴燎南郊,雲以侍</u> 日愼一日。」帝善其言,卽日遷散騎常侍、吏部尙書。以佐命功,封霄城縣侯。 入臥內,雲叉諫,王茂因起拜曰:「范雲言是,公必以天下爲念,無宜留惜。」帝默然。 梁臺建,遷侍中。 禮畢,帝升輦謂雲曰:「朕之今日,所謂懍乎若朽索之馭六馬。」雲對曰:「亦願陛下 武帝時納齊東昏余妃,頗妨政事,雲嘗以爲言,未之納。 後與王茂同 雲便疏

「布衣時,嘗夢拜兩舊妾爲六宮,有天下,此嫗已卒,所拜非復其人,恒以爲恨。」 哀,乃不復敢言。今道爲羽林監、文德主帥,知管籥。」雲曰:「此乃天意令道發耳。」帝又云: 有王者。官應取富貴」。股齋中坐讀書,內處其言而外迹不得無怪,欲呼人縛之,道叩頭求 **雲言及舊事,云:「朕司州還,在三橋宅,門生王道牽衣云,『聞外述圖讖云,齊祚不久,別應** 主,此禮旣革,汝宜代我呼陀爲兄。」二王下席拜,與雲同車還尚書下省,時人榮之。帝嘗與 三歲,嘗侍宴,帝謂臨川王宏、鄱陽王恢曰:「我與范尙書少親善,申四海之敬。今爲天下 雲以舊恩,超居佐命,盡誠翊亮,知無不爲。帝亦推心仗之,所奏多允。雲本大武帝十

其年,雲以本官領太子中庶子。 二年,遷尙書右僕射,猶領吏部。 頃之,坐違 詔 用 人,

列

僔

発吏部,猶爲右僕射。

營晗,招復如禮,時人以爲難。 士或以此少之。 所壅滯,官曹文墨,發擿若神,時人咸服其明贍。 王咳善,雲起宅新成,移家始畢,咳亡於官舍,屍無所歸,雲以東厢給之。 雲性篤睦,事寡嫂盡禮,家事必先諮而後行。 初,雲爲郡號廉潔,及貴重,頗通饋遺,然家無蓄積,隨散之親友。 及居選官,任寄隆重,書牘盈案,賓客滿門,雲應答 性頗激厲,少威重,有所是非,形於造次, 好節尚奇,專趨人之急。少 移屍自門入,躬自 與領軍長史 如流,無

覆之。 禮官請諡曰宣,敕賜諡曰文。 卽 |時愈,政恐二年不復可救。」|雲曰:「朝聞夕死,而況二年。」|文伯乃下火而壯焉,CIK]重衣以 武帝九錫之出,雲忽中疾,居二日半,召醫徐文伯視之。 有頃,汗流於背即起。日之二年果卒。 有集三十卷。 子孝才嗣。 帝為流涕,即日興駕臨殯,詔贈侍中、衞將軍 文伯曰:「緩之一月乃復,欲速

貧常映雪讀書,清介,交游不雜。 孫伯翳,太原 人,晉秘書監盛之玄孫。 伯翳位終驃騎鄱陽王參軍事 曾祖放,晉國子博士、長沙太守。 父康,起部郎,

雲從父兄縝。

縝字子真。 父濛,奉朝請,早卒。 **縝少孤貧**, 事母孝謹。 年未弱冠,從沛國劉瓛學,瓛

弟 問,聊無 甚奇之, 蕭琛善、琛名曰口辯、每服縝簡詣。 恥 親爲之冠。 愧。 及長,博通經 在瓛門下積年,恒芒屬布 術, 尤精 三禮。 年二十九,髮白皤然,乃作傷暮詩、白髮詠以自 性質直,好危言高論,不爲士友所安。 衣,徒行於路。 蹴門下多車 馬貴游, 唯與外 縝 嗟。 在 其

仕齊位尚書殿 中郎。 永明

琅邪顏幼明、河東裴昭明相繼將命,皆著名鄰國。

先 出,朝 從之。」其險詣皆此類也。 刀也,刀之名非利也,然而捨利無刀,捨刀無利。 其 雖復殊途,因果竟在何處。」子良不能屈,然深怪之。退論其理,著神滅論。 於茵席之上,自有 問 也,形即 祖 用,形之與神,不得相異。 曰:「君不信因果,何得富貴貧賤。」與答曰:「人生如樹花同發,隨風 神 時竟陵王子良盛招賓客,縝亦預焉。嘗侍子良,子良精信釋敎,而縝盛稱無佛。 野諠 靈所在。」 神也,形存則神存,形謝則神滅。 譁。 欲杜縝後對。 子良集僧難之而不能屈。 關籬牆落於糞溷之中。 子良使王融謂之曰:「神滅既自非理,而卿堅執之,恐傷名教。 神之於質,猶利之於刀,日己形之於用,猶刀之於利。 **緘又對日**:「 墜茵席者,殿下是也;落糞溷者,下官是也。 形者神之質,神者形之用。 嗚呼 太原王琰乃著論譏旟曰:「嗚呼范子 王子! 未聞刀沒而利存,豈容形亡而神在。」 知其祖先神靈所在,而 是則形稱其質, 而墮, 自有 以爲:「神 不 能殺 拂簾 曾不 利之名非 身以 貴賤 知 此 神言 幌 子良 刨 論 形 以 其 墜

列

傳

第

卿之大美,江西何患不至中書郎, 而故乖刺爲此, 取

官,已至令僕矣,何但 中 書 郞 邪

後爲宜都太守。 性 不 信 神 鬼、時夷陵有伍相廟、唐漢三神廟、胡里 神廟,縝乃下教斷不

祠。 後以 母憂 去 職。 居于 南州

卒。 滿,亦怏怏, 齊 守,在郡淸約,資公祿而已。 時,與亮同 文集十 梁武 至,縝墨縗來 五 故 臺 卷。 私 爲郎,舊相友愛。 相 親結, 迎。 以 武帝 矯於時。 遷尙書左丞,及還,雖親戚無所遺,唯餉前尙書令王亮。 與縝有西邸之舊, 至是亮擯棄在家,縝 竟坐亮徙 廣 例。 見之甚悅。 自以首迎武帝, 在南累年, 及建康城平,以縝爲晉安 追爲 志在權軸, 中書 郎 國子 而 所 博 懷 縝 未 在

子脣字長才,傳父業,位國子博士,有口辯。 大同中、常兼主客郎、應接北使、卒於鄱陽

內史。

結龍潛, 論 日 沈約情深惟舊,並以茲文義,首居惟 齊德將 謝、昏 虐君 臨, 喋喋黔黎, 幄, 命懸 追蹤亂傑, 晷刻。 梁武 各其時之遇也。 撫茲 歸 運, 嘯召風 而 約以高才博 雲。 范雲 恩

洽,名亞懂、遷、末迹爲躓,亦鳳德之衰乎。

校勘記

非也。

[1] 秦末有沈逞徵丞相不就 張森楷南史校勘記:"『相』下當有脫字,世固無以丞相徵之事也。」

[]] 晉太康三年改永安爲武康縣 「三」宋書作「二」,州郡志謂永安更名在太康 元年。

第二子仲高安平相 「仲高」宋書作「滸字仲高」、此唐人避李虎嫌名而行其字。

23 子曼字元禪 宋書作「子憲字元禮」。

五. 唯穆夫子深子雲子田子林子虔子獲全 「深子」宋書作「淵子」,此避唐諱改。

マベ 少子璞嗣 宋書:「子邵嗣、邵子道輝卒、子侃嗣、侃卒、子整應襲爵、齊受禪、國除。」是漢未嘗

嗣林子封爵。

4 人無謗黷 「人」各本作「叉」。 按宋書作「民」,此避唐諱作「人」而譌爲「又」,今改正。

一大 し 又爲征西記室帶厥西令 「厥西」各本作「關西」。李慈銘南史札記:「按厥西縣,宋齊皆屬荆州

闕 南義陽郡。 爲厥之誤,更由闕譌關。」今從改。 梁書作闕西。 考齊雖有闕西縣屬司州隨郡。 約為荆州掾屬,不應帶司州縣令也

列 傳 第 四 + 七 校 勘 記

- [九]南鄉范雲 「南鄉」各本作「南郡」、振梁書改。
- [10] 俄遷左僕射 「左」各本作「右」,據梁書改。
- 嘗侍宴有妓婢師是齊文惠宮人 「師」各本作 「帥」,據梁書及册府元龜九五三改。 按梁書無

一婢」字。

舊唐書經籍志。 時梁武帝制千文詩衆爲之注解 此云『梁武帝制迁文詩』,則凡三本矣。 顧炎武日知錄:「千字文有二本,一蕭子範撰,一周興嗣撰, 隋志載興嗣千字文 國子祭酒蕭子雲 見

注,而梁書蕭子範傳又謂子範作之,記室蔡遠注釋,今又有沈衆注,亦彼此互異。」

- 雲性機警有識具善屬文 並作「具」」「識具」常用詞、今據改。 「具」各本作「且」,屬下爲句。按太平御覽六○○引,册府元龜八五○
- 乃進讀之如流 「乃進」各本作「進乃」,據册府元龜七一八乙正。
- (1五) 隨盡復益 「復」各本作「絕」,據太平御覽八五一引改。
- 文伯乃下 火而 壯焉 「壯」各本作「牀」、據太平御覽七二三、七三八引改。 按針灸以艾柱 爲壯。
- [4] 汗流於背即起 「背」各本作「此」。 按「此」爲「背」之爛文,太平御覽七三八引作「背」、今據改。
- 神之於 質猶 利之於刀 據范縝神滅論原文「刀」應作「刃」、下同
- [1元] 以卿之大美 「大美」通志作「才美」。

南史卷五十八

列傳第四十八

章叡 兄纂 闡 叡子放 孫粲 放弟正 正子載 鼎 正弟稜 稜弟黯

裴邃 邃子之禮 兄子之高 之髙弟之平 子忌 之高弟之横

以太尉掾徵,不至。伯父祖征,宋末爲光祿勳。 章叡字懷文,京兆杜陵人也。 世爲三輔著姓。 父祖歸,寧遠長史。 祖玄,避吏隱長安南山。 宋武帝入關,

富饒,往者多以賄敗,叡雖幼,獨以廉聞。 並 學識當過之。 有鄉里盛名、祖征謂叡曰:「汝自謂何如憕、惲。」叡謙不敢對。 叡事繼母以孝聞。 然幹國家,成功業,皆莫汝遠也。」外兄杜幼文爲梁州刺史,要叡俱行。 祖征累爲郡守,每攜叡之職,視之如子。時叡內兄王燈、姨弟杜惲 祖征曰:「汝文章或小減, |梁土

列傳第四十八 幸叡

,求爲上庸太守。

義 成郡 宋 永 ,故免顗之禍 光 初, 袁顗爲雍州刺史,見而異之,日引爲主簿。 累遷 齊興太守,本州別駕,長水校尉, **顕到州**, 右軍 將軍。 與鄧琬起兵,叡求出為 齊末多故,欲還 鄕

將, 日 兵 見君之面,今日 起檄至,叡 非高 饿 而 人才,崔頗更事,儒而 太尉陳顯達、護軍將軍崔慧景頻逼建鄴,人心惶駭。 率郡人伐竹爲筏,倍道來赴, 見君之心、吾事就 不武。 矣。」師剋野、魯,平加湖,叡多 天下 眞人, 殆 有衆 二千,馬二百匹。 興吾州矣。」乃遣其二子自結 西土人謀之,叡曰:「陳雖 帝見叡甚悦,無 建策,皆見用 於 梁武。 几日一位 舊 及

皆積 以爲 江夏 屍於 大軍 牀 太守 發郢 下 , 而 行行 ,謀留守將,上難其 生者 郢州 寢處其上,每 府 事。 初,郢城之拒守也,男女垂十萬,閉 人。久之,顧叡曰:「棄騏驥 屋盈滿。 叡料簡隱 **卹,咸爲營理,百姓賴之。** 而 不 **壘經年,疾疫死者十七八,** 乘,焉遑遑而 更索。」卽日

刺 史,領 梁臺 歷陽 建 一、徴爲 太守。 大 魏遣 理。 衆來 武帝 伐,叡率州兵擊走之。 即位,遷廷尉,封都梁子。 \equiv 天監二年, 改封永昌, 再遷豫州

巡行 闡 叡曰:「魏城中二千餘人, 圍 匹 年 棚 侵魏,詔叡都督衆軍 魏 城中忽 出 數 百人 閉門堅守, 陳於門外, 叡遣 長史王超宗、梁郡太守馮道根攻魏 足以自保。 叡 欲 擊 之。 諸 今無战出 將皆 日 [:||向 人於外, 本輕 小峴城、未能拔。叡 必其驍勇, 來,請還授 若能 甲 丽 挫 後

之,其城自拔。」衆猶遲疑,叡指其節曰:「朝廷授此,非以爲飾, 章叡之法,不可犯也。」乃進

兵、魏軍敗、因急攻之、中宿而城拔。遂進討合肥。

軍。 城。 此是也。」乃堰肥水。 且吾求濟師,彼亦徵衆。『師克在和』,古人之義也。」因戰,破之,軍人少安。 旣而魏援將楊靈胤帥軍五萬奄至,衆懼不敵,請表益兵。 先是右軍司馬胡景略至合肥,久未能下,叡案行山川,曰:「吾聞『汾水可以灌平陽』,卽 頃之堰成水通,舟艦繼至。 魏初分築東西小城,夾合肥。至叡先攻二 叡曰:「賊已至城下,方復求

叡以將 無所 勸叡退還巢湖,諸將又請走保三义。叡怒曰:「將軍死綏,有前無却。」因令取繖扇廳幢樹之 軍却,因築 **隄下**,示無動志。 私 初,肥水堰立,使軍主王懷靜築城於岸守之,魏攻陷城,乘勝至叡隄下。四軍監潛 帥 不和, 壘於堤以自固。 初,胡景略與前軍趙祖悅同軍交惡,志相陷害,景略一 將致患禍, 酌酒自勸景略曰:「且願兩武勿復私關。」 (三) 故終於 | 叡素贏,每戰不嘗騎馬,以板輿自載,督勵衆軍。 起鬭艦高與合肥城等,四面臨之。 城潰,俘獲萬餘,所獲軍實, 怒,自齧其齒,齒皆流血 魏兵鑿堤,叡親 此 役 與爭。魏 得 靈祐 無

所 |頓舍修立,館宇藩籬墉壁皆應準繩。 叡 每畫接客旅,夜算軍書,三更起張燈達曙,撫循其衆,常如不及,故投募之士爭歸之。

合肥 旣 平 一,有 韶 班 師,去魏軍 旣近,懼爲所躡 。叡悉遺輜 重 居 前, 身 乘 小 輿殿 後,魏 人服

叡 威 名,望之不 敢 逼, 全軍 ·而還。 於是遷豫州 於 合 肥

矣。」 陽。 地 叡緩行。 征北 水 「諸將有 底, 日 一是何 將軍 叡於景宗營前二十里,夜掘長塹,樹鹿角, 初, 五. 得達東 年 不用命者斬之。」叡自合肥 帝敕景宗曰:「 魏中 曹景宗拒之。 叡 神也 日 城。 Щ 鍾離 一景宗慮城中危懼,乃募軍士 城中戰守日苦,始知有援,於是 王 元英攻北徐州 今鑿穴而 韋叡 次邵陽 卿 鄕 處,負戶而 洲 望, ,築壘相守,未 徑陰陵 圍刺 宜善敬之。」景宗見叡 史昌 汲,車 大 澤 義 言文達、洪騏驎等齎敕入城, 截洲為 之於鍾 敢進。 馳卒奔,猶恐 過澗谷,輒 人百其勇 城, 離,衆 帝怒, 比 甚 飛 曉而 謹。 詔 其後,而況緩 橋 兵百萬,連城 以 叡 營立。 帝聞 濟 會 師 焉, 日 賜 元英 二二將和 人畏魏 四十 乎。」旬日 以 使固 龍 大驚 環 餘。 ... 軍 御 -盛,多 以以 師 武 而 刀, 帝 潛行 杖 必 至 日 勸 濟 邵

叡 衆 雨 以 集。 來 强 戰,叡乘素 魏 叡子 將 弩二千一 楊 黯 大眼 請 木 時 將萬 下 東、執 俱 城 以 發, 餘騎來戰,大眼 避箭 白角 洞甲穿 叡不 如 意以 7中,殺 許。 **心**麾軍, 以 傷 軍 勇冠三軍 者 中 衆。 驚,叡於 日 數合, 矢貫 ,所向皆靡。 大眼 城 英甚 E 属 右臂,亡魂 憚 聲 共强。 叡結 IIII 之 乃定。 車 魏軍 面 爲 走。 陣, 又夜 大眼 明 來 且 攻 一,元英 聚騎 城, 圍之。 飛矢 自 恋

魏 人先於邵陽洲 兩岸為 兩橋,樹棚數百步 ,跨淮 通道。 叡裝大艦,使梁郡 太守馮道根、

廬江 於軍門,捨觀之,謂叡曰:「君此獲復與熊耳山等矣。」以功進爵爲侯。 之,義之且悲且喜,不暇答,但叫曰「更生! 更生」,帝遣中書郎周捨勞軍於准上。 以小船載草,灌之以膏,從而焚其橋。 遁走。 橋棚盡壞。 太守裴邃、秦郡太守李文釗等爲水軍。 魏軍趨水死者十餘萬,斬首亦如之,其餘釋甲稽顙乞爲囚奴猶數十萬。 道根等皆身自搏戰,軍人奮勇,呼聲動天地,無不一當百。 風怒火盛,敢死之士拔栅斫橋,水又漂疾,倏忽之間, 會淮水暴長,叡卽遣之, **鬭艦競發**,皆臨賊 魏人大潰,元英脫身 叡遣報昌義 叡積所獲

躡,三關擾動。 詔罷軍。 示弱,叡曰:「不然,爲將當有怯時。」是時,元英復追仙碑,將復邵陽之恥,聞叡至乃退,帝亦 七年,遷左衞將軍,俄爲安西長史、南郡太守。會司州刺史馬仙琕自北還軍,爲魏 韶叡督衆軍援焉。 叡至安陸,增築城二丈餘,更開大塹,起高樓。 衆頗 護其 人所

所惜,士大夫年七十以上,多與假板縣令,鄕里甚懷之。 叡,^[K] 叡還爲州,雙光道候。 十三年,爲丹陽尹,以公事免。 。叡笑曰:「若從公言,乞食於路矣。」餉耕牛十頭。 十四年,為雍州刺史。 初,叡起兵鄉中,客陰雙光泣 叡於故舊無 止

忤視,武帝甚禮敬之。 十五年,拜表致仕,優詔不許。 性慈愛,撫孤兄子過於已子,歷官所得祿賜,皆散之親故,家無餘財。 徵拜護軍, 給鼓吹一 部, 入直殿省。 居朝廷恂恂,未嘗

列傳第

後為護軍、居家無事、慕萬石、陸賈之爲人,因畫之於壁以自玩。 銳意釋氏,天下咸從風 第三子凌尤明經史,世稱其洽聞。 而化。 叡自以信受素薄,位居大臣,不欲與衆俯仰,所 叡每坐使陵說書,其所發擿, 時雖老,暇 稜猶 弗 之逮。 日猶 行 略 課諸 如 武帝方 佗 日。 見以

日臨哭甚慟,贈車騎將軍、開府儀同三司,諡曰嚴。 普通元年,遷侍中、車騎將軍,未拜,卒於家,年七十九。 遺令薄葬, 斂以時服。 武帝

刨

裴邃俱爲梁世名將,餘人莫及。 舍,井竈未成,亦不先食。 叡雅 有曠世之度,涖 人以愛惠爲本,所居必有政績。 被服必於儒者,雖臨陣交鋒,常緩服乘輿,執竹如意以麾進止,與 將兵仁愛,士卒營幕未 立,終不肯

叡徐擲得盧,遽取一子反之,曰「異事」,遂作塞。 不尙勝率多如是,世尤以此賢之。 初,邵陽之役,昌義之甚德叡,請曹景宗與叡會,因設錢二十萬官賭之。 景宗時與羣帥爭先啓之捷,「計」叡獨居後, 景宗擲 得雉,

同 .時,其學非臣輩也。」闡爲<u>建寧縣,所得俸祿百餘萬,還家悉委伯父處分,鄉里宗事之</u>。 叡兄纂、闡,並早知名。 纂仕齊位 司徒記室、特進,沈約嘗稱纂於上曰:「恨陛 下不 與此

位通直郎。

叡子放字元直,身長七尺七寸,腰帶八圍,容貌甚偉。襲封永昌縣侯,位竟陵太守。

郡和理,爲吏人所稱。

王元昭、大將軍李獎、乞伏寶、費穆等五萬人來援,放大破之。渦陽城主王緯以城降。四魏 死爾。」乃免冑下馬,據胡牀處分。士卒皆殊死戰,莫不一當百,逐北至渦陽。魏又遣常山 軍,洵馬亦被傷不能進,放胄又三貫矢。衆皆失色,請放突去。 放厲聲叱之曰:「今日唯有 費穆帥衆奄至,放軍營未立,麾下止有二百餘人。放從弟洵驍果有勇力,單騎擊刺,屢折魏 棄諸營壘,一時奔潰。衆軍乘之,斬獲略盡,禽腿弟超幷王緯送建鄴,還爲太子右衞率。 大通元年,武帝遣兼領軍曹仲宗等攻渦陽,又以放爲明威將軍,總兵會之。魏大將軍

中大通二年,徙北徐州刺史。卒於鎮、諡曰宜侯。

岐娶率女,又以女適率子,時稱放能篤舊。子燦。 遺嗣孤弱,放常贈卹之。及爲北徐州,時有貴族請昏者,放曰:「吾不失信於故友。」乃以息 之三姜。初,放與吳郡張率皆有側室懷孕,因指爲昏姻。其後各產男女,未及成長而率亡, **做性弘厚篤實,輕財好施,於諸弟尤雍穆。 每將遠別及行役初還,常同一室臥起,時比**

殿,須 推。」 侍 騎常侍。 席 以 爲 舊恩 太子 疾,內外咸云帝崩。 厲色謂 外 故 兵參軍 長梯以復也。 · |粲 出 ,任寄綢密,雖居職累徙,常留宿衞。 「爲衡州 自記室遷步兵校尉,入為東宮領直,後襲爵永昌縣侯, 兼 中兵。 刺史。 帝後聞之,怒曰:「宣粲願我死。」有司奏推之,帝曰:「各爲其主,不足 時潁川 皇太子出餞新亭,執燦手曰:「與卿不爲久別。」久之,帝復召還爲散 庾仲容、吳郡張率前輩才名,與粲同府,並忘年交好。 頗擅權誕倨,不爲時輩所平。 帝嘗不豫,一 日暴劇, 累遷左衞率,領直 皇太子 右衞朱异嘗於 以爲 大大行 以下 (01) 及王 幸 並 前 酒 粲 爲 入

流 九 酒。 儀 日二 任重 弟警 日 賊 卽 還 至 馳 ,當須應接,不可闕鎭。 爲 已度江, 必 馬 前 廬陵,聞侯景作逆,便簡閱部下,倍道赴援。 如 此 軍 出 ,當有敕,安可 部 便逼宫闕, 粲 分將發。 馳往 見大心曰:「上游蕃鎭,江州 水陸阻斷, 會江州刺史當陽公大心遣使 輕信單使,妄相驚動。 今宜張軍擊勢,移鎭盆城 何暇有報, 假令無敕, 豈得自安。 或恐不然。」時孝儀置酒,疑怒以杯 去都最近, 至豫章,即就內史劉孝儀共謀之。 要粲,粲 遺偏將賜隨,於事便足。」大心然 殿下 乃分麾下配第八弟助、第 ·情計, 實宜 韋粲 在先。 今日 何情飲 但 抵 中 地

史柳仲禮亦帥步騎萬餘人至橫江。 之, 遣中兵柳昕帥兵二千隨聚。 **燦悉留家累於江州,以輕舸就路。** 至南洲,粲外弟司州刺 士。

持 爾。 榮,自應帥先士卒,顧恨衰老,不能効命,企望柳使君共平凶逆。前謂衆議已定,無俟老夫 應復挾私以阻大計。 捍邊疆,先爲侯景所憚。 且士馬精銳,無出其前。 若論位次, 柳在燦下,語其年齒,亦少於 復 寫 展 至 一鞭板。」累日不決。

桑乃抗言於衆曰:「今同赴國難,義在除賊,所以推柳司州者,政以久 大都督,報下流衆軍。裴之高自以年位高,恥居其下。乃云:「柳節下已是州將,何須我 公洲,待上流諸軍。至是,之高遣船度仲禮,與粲合軍進屯新林王游苑。 晚各解歸 若必有疑,當剖心相示。」於是諸將定議,仲禮方得進軍。次新亭,賊列陣於中興寺,相 先是,安北鄱陽王範亦自合肥遣西豫州刺史裴之高與其世子嗣帥江西之衆赴都,屯于 **粲請爲諸君解釋之。」乃單舸至之高營切讓之。** 之高泣曰:「吾荷國 裴公朝之舊齒,豈 **粲建議推仲禮**

宜 慮 ·棚壘未立,賊爭之,頗以爲憚,謂仲禮曰:「下官才非禦侮,〔三〕直欲以身徇國,節下善量其 是夜,仲禮 可致有虧喪。」仲禮曰:「青塘立營,迫近淮渚,欲以糧儲船乘盡就迫之。 入粲營部分衆軍,旦日將戰,諸將各有據守。令粲頓靑塘,當石頭中路。 此事大,非兄

列

高馮 過半) 不可。 唯在章公,如何不幸,先死行陣。」詔贈護軍 死者數百 子諒 牽粲避賊,粲不動,兵死略盡,遂見害。 壘棚至曉未合。 若疑兵 ,以學業爲陳始興王叔陵所引,爲中錄事參軍兼記室。 人。 賊傳粲首闕下,以示城內。 少,當更差軍相助。」粲帥所部水陸俱進。 景登禪靈寺門,望粲營未立,便率銳卒來攻。 一將軍 簡文聞之流涕,謂御 **粲子尼及三弟助** 元帝 平侯景, 時昏霧,軍 警、 追諡 史中丞蕭愷 叔陵敗、伏誅。 構、從弟昂皆戰 人失道,比 忠貞 軍敗, 乘勝 及青塘,夜已 社 放弟正。 入營,左右 死, 稷所寄, 親戚

鄎。 人莫不 子儎。 正字敬直,位襄陵太守。 傾意,正獨澹然。 及僧孺擯廢,正復篤素分,有踰曩日, 初,正與東海王僧孺善,及僧孺爲吏部郎, 論者稱焉。 參掌大選, 卒於給事黃門侍 賓友故

應 無疑滯。 載字德基,少 及長,博涉文史,沈敏 , 聰慧, 篤志 好學。 有器局。 年十二,隨叔父稜見沛國 仕梁 爲 尚書三公郎 劉 顯, 顯問漢書十事 ,載

歷位琅邪、義興太守。陳武帝誅王僧辯,乃遣周文育襲載,載嬰城自守。載所屬縣卒,並陳武 侯景 之亂,元帝承制,以 爲 中 書侍 郎。 尋爲 尋陽 太守,隨都督王僧辯 東討 侯景。 景平,

幷奉梁敬帝敕,敕載 中者死。」每發輒中,所中皆斃,相持數 舊兵,口己多善用弩,載收得數十人,繫以長鎖,令所親監之,使射文育軍。 解兵。 載得書,乃以衆降。 旬。 陳武 陳武帝引載恒置左右,與之謀議 帝聞文育軍不利 ,以書喻

載以誅王僧辯意, 約日:「十發不兩

路、略地東境、則時事去矣。今可急於淮南即 糧運,使進無所虜,退無所資,則齊將之首,旬日可致。」帝從之。 徐嗣徽、任約等引齊軍 一濟江, 據石 頭城, 帝問計於載。 侯景故壘築城,以通東道轉輸,別令輕兵絕其 |載曰::「齊軍若分兵先據|三吳之

白山 ,至是遂築室而居,屏絕人事,吉凶慶弔, 永定中,位散騎常侍、太子右衞率。 天嘉 元年,以疾去官。 無所往來,不入籬門者幾十載。 載有田十餘頃,在江乘縣之 卒於家。 載

弟|鼎。

於京口 竊異之,往視 父憂,水漿不入口者五 鼎字超盛,少通曉,博涉經 戰死,鼎負屍出,寄于中興寺, 乃新棺 也, 日,哀毁過禮, 因以 充 斂。 史,明陰陽逆刺,尤善相 元帝聞之,以爲精誠 求棺 殆將滅性。 無所得。 服闋, 鼎哀憤慟哭,忽見江中有物流至鼎所 術。 爲邵陵王主簿。 所 感 仕梁起家湘東王法曹參軍。 侯景之亂,鼎兄昂 遭

侯景平, 司 徒 王僧辯以爲戶曹屬。 累遷中書侍郎。 陳武帝在南徐州,鼎望氣知其當

列

遂寄孥焉。 因謂陳武帝曰:「明年有大臣誅死, 後四歲,梁其代終。 天之曆數, 當 歸 舜

乃是乎。」武帝陰有圖僧辯意,聞其言大喜,因而定策。 後。 昔周滅殷氏,封嬀汭于宛丘,其裔子孫,因爲陳氏。 及受禪,拜黃門侍郎。 僕觀明公, 天縱 神武 太建 繼 絕統 中,以廷 者 無

尉卿爲聘周使,加散騎常侍。後爲太府卿。

吾與爾當葬長安,期運將及,故破產爾。」 至德初, 鼎盡貨田宅, 寓居僧寺。 友人大匠卿毛彪問其故,答曰:「江東王氣, 盡於此

述。 曰:「不肯顯言乎?」 |鼎,鼎曰:「瑒當封侯,而無貴妻之相,述亦 氏譜七卷示之,歡飲十餘日乃還。 |鼎曰::「世康與公遠近?」對曰::「臣宗族南徙,昭穆非臣所知。」帝曰::「卿百代卿 焉。 也。」命官給酒肴,遺世康請鼎還杜陵。鼎乃自楚太傅孟以下二十餘世, 天,老夫當委質,願深自愛。」及陳亡,驛召入京,授上儀同三司,待遇甚厚,每公宴, 性簡貴,雖爲亡國之臣,未嘗俯仰當世。 上叉問鼎,諸 初,鼎之聘周也,嘗遇隋文帝,謂曰:「觀公容貌,不久必大貴, 兒誰爲嗣位。 答曰:「至尊皇后所最愛者,當與之, 時蘭陵 通顯,而守位不終。」上曰:「位 公主寡,上爲之求夫,選親衞 時吏部尚書韋世康兄弟顯貴,隋文帝從容謂 貴則天下一 非臣敢預知也。」上笑 柳述 曲 並考論 我 爾。」 及蕭場等 家。 昭穆,作韋 族, 遂以主降 豈忘本 |鼎 歲 以示 恒 周 預

之,曰:「此客實姦,而不殺也。乃某寺僧該妾盜物,令奴殺之,贓在某處。」卽放此客,遣人 殺。 掩僧,幷獲贓物。 懼,卽自首伏。 軌,常爲劫盜。 主家知客與妾通,因告客殺之。縣司鞫問,具得姦狀,因斷客死。獄成,上於鼎,鼎覽 開皇十三年,除光州刺史,以仁義敎導,務弘淸靜。州中有土豪,外修邊幅,而內行不 又有人客游,通主家之妾,及其還去,妾盜珍物,於夜逃亡,尋於草中爲人所 鼎於都會時謂之曰:「卿是好人,那忽作賊。」因條其徒黨姦謀逗遛,其 自是部內肅然,咸稱其神,道無拾遺。尋追入京,頃之,而卒于長安,年七 八人驚

位終光祿卿。

訓三卷。二三稜弟黯。

十九。

正弟稜。

四 軍。 土 山, 時景於城外起東西二土山,城內亦應之,簡文親自負 醫字務直,性强正,少習經史,位太府卿。 晝夜苦戰。 以功授輕車將軍,加持節,卒於城內。 侯景濟江,黯屯六門,尋改爲都督城西面諸 土,哀太子以下,躬執畚 鍤。 黯守

初, 黯爲 太僕卿,而兄子、燦爲左衞率,歸以故常怏怏,曰問謂人曰:「韋粲已落驊騮前,朝

廷是能用才不了識者頗以此闚之。

裴邃字深明,自己河東聞喜人,魏冀州刺史徽之後也。 祖壽孫,寓居壽陽,爲宋武帝前

軍長史。父仲穆,驍騎將軍。

|邃求邊境自効,以爲廬江太守。 光敗、邃還壽陽、會刺史裴叔業以壽陽降魏、邃遂隨衆北徙。魏宣武帝雅重之。 太守。魏遣王肅鎭壽陽,邃固求隨肅,密圖南歸。 邃十歲能屬文,善左氏春秋。 齊東昏踐作,始安王蕭遙光爲揚州刺史,引邃爲參軍。遙 梁天監初,自拔南還,除後軍諮議參軍。 仕魏爲魏郡

甚雨,淮水暴溢,邃乘艦徑造橋側,進擊,大破之。以功封夷陵縣子。 五年,征邵陽洲,魏人爲長橋斷淮以濟,邃築壘逼橋,每戰輒剋,於是密作沒突艦。

守、開置屯田、公私便之。再遷西茂校尉、北梁秦二州刺史、復開創屯田數千頃、倉廪盈實、 「昔阮咸、顏延有二始之歎,吾才不逮古人,今爲三始,非其願也,將如之何」後爲竟陵太 多大言,有不臣跡。」由是左遷始安太守。|邃志立功邊陲,不願閑遠,乃致書於呂僧珍曰: 遷廣陵太守,與鄕人共入魏武廟,因論帝王功業。其妻甥王篆之密啓梁武帝云:「裴邃

省息邊運,人吏獲安。 乃相率餉絹千餘匹, 邃從容曰:「汝等不應爾, 吾又不可逆。」納其二

匹而已。入爲大匠卿。

平。

除豫

州刺史,加督,鎮合肥。

入 魏 境,出其不意。 普通 二年,義州刺史文僧明以州入魏,魏軍來援,以邃爲信武將軍,督衆軍討焉。 魏所署義州刺史封壽據檀公峴,邀擊破之,遂圍其城。 壽請降,義州 邃深

間,所 軍 甄 自 方爲謝玄所笑。」乃爲四 蔡秀成失道不至,邃以援絕拔還。 爲黃袍騎,先攻拔狄丘、甓城、黎漿,又屠安成、馬頭、沙陵等戍。こ以明年,略地至汝、潁 一發,魏衆大敗,斬首萬餘級。 四 在響應。 年 ·,大軍北侵,以<u>邃督征討諸軍事,先襲壽陽,攻其郛,</u>斬門而入,一日戰九合,爲後 魏壽陽守將長孫承業、河間王元琛出城挑戰、邃臨淮歎曰:「今日 甄以待之。 承業奔走,閉門不敢復 令直閣將軍李祖憐偽遁 於是邃復整兵,收集士卒, 出。 以引承業,承業等悉衆追之,四 **令諸將各以服色相別。** 不 破 河間, 邃

在 軍 疾篤,命衆軍守備,送喪還合肥。 **蕁卒,贈侍中、左衞將軍,進爵爲侯,諡**

邃 沈深有思略,爲政寬明,能得士心,居身方正,有威 重。 將更憚之,少敢犯法。 及卒,

淮、肥間莫不 流涕,以爲邃不死,當大闢土宇。 子之禮嗣

|寺西,堂宇弘敞,松柏鬱茂。 「范爲已死,裴爲 之禮字子義 更生。」大同 ,美容儀,能言玄理。爲西豫州刺史。 初, 范雲廟在三橋,蓬蒿 都下旱蝗,四 籬 門外桐 不 翦 母憂居喪,唯食麥飯。日刊邃廟在光宅 梁武 栢凋 帝 盡,唯邃墓犬牙不 南郊,道經 二廟,顧 文, 而 當時異 歎曰

以之禮爲壯 武帝設 無遮 勇 が將軍 會,儛象驚,排突陛衞,王公皆散, 、北徐州 刺史,盾兼 中領軍 將 軍 唯之禮與散騎常侍臧盾不動。 帝壯之, 之。

歷位黃門侍郎

之禮卒於少府卿、諡曰壯。 子政,承聖中位給 事黃門侍郎。 魏剋江陵,隨例入長安。

之高字如山, 邃兄中散大夫髦之子也。 頗讀書, 少負意氣, 常隨叔父邃征 討, 所在

功,甚爲邃所器重,戎政咸以委焉。

來附, 壽陽之役,邃卒於軍 敕之高應接, 仍除 潁州 所, 之高隸夏侯夔平壽陽,仍除梁郡 刺史。 父憂還都, 起爲光遠將軍, 太守,封都城 令討平陰陵盜 縣 男。 以爲 時 魏 譙州 汝

軍 諸 軍事,頓張公洲。 之亂,之高 為西豫州 柳仲禮至橫江,之高遣船舸迎致仲禮,與韋粲等俱會青塘。 刺 史,率衆 入援。 南豫州 刺 史鄱陽嗣王 範 命之高 總督江右援 及城陷,

之高還合肥,與鄱陽王範西上。一元帝遣召之,以爲侍中、護軍將軍,到江陵。

高 竟無言,直云:「賊自殺賊,非之高所聞。」元帝深嗟其介直。承制除特進、金紫光祿大夫。 時之高第六弟之悌在侯景中。 或傳之悌斬侯景,元帝使兼中書舍人黃羅漢報之高,之

子臘,官至太子右衞率。覷剋江陵,力戰死之。

卒,諡曰恭。

子 中,有終焉志。天康元年卒,諡曰僖子。 詹事。 之高第五弟之平字如原,少倜儻有志略,以軍功封費縣侯。承聖中,累遷散騎常侍、太 陳文帝初,除光祿大夫、慈訓宮衞尉、日己並不就。 乃築山穿池,植以卉木,居處其

吳郡。 部 征 討 下精兵,自錢唐直趣吳郡,江西夜至城下,鼓譟薄之。 忌字無畏,少聰敏,有識量,頗涉史傳,爲當時所稱。侯景之亂,招集勇力,乃隨陳武帝 陳武 及陳武帝誅王僧辯,僧辯弟僧智舉兵據吳郡,陳武帝遣黃他攻之,不能剋。 帝嘉之,表授吳郡太守。 僧智疑大軍至,輕舟奔杜龕, 命忌 忌入據 勒

天嘉 五 年,累遷衞 尉 卿,封東興縣侯。 及華皎稱兵上流,宣帝時為錄尚書輔政,盡命衆

列傅

第四十八

裴

邃

年,卒於長安,年七十三。 進 督 軍 軍 出 衆 彭 . 討 北 沙沙沙沙 伐,詔 委忌 以忌爲都督, 忌 總 知 以本官監 中外城防諸軍事。 明徹 與明徹 之高第十二弟之横。 軍 倶 淮 進。 宣帝卽位 南 平, [10]呂梁軍 授 豫州 ,改封樂安縣侯。 刺史。 敗, 見囚于周,授上開府。 忌善於綏撫,甚 歷位都官尚 得 人和 書。 隋 開 及吳明 皇十四 及 明 徹 徹

文在 之横 東宮 歎 之横字如岳,少好賓游, 日... 聞而 大丈夫富貴,必作百幅被。」 要之,以爲河東王常侍。 重氣俠,不事產業。 遂與僮屬數百 遷直 一閤將軍 之高以其縱誕,乃爲狹被蔬食以激厲之。 人於鬥陂大營田 墅,遂致殷積。

奔,僧辯 尉 <u>7</u> 遣 叉 密要 任 破 卿 約 武 侯景 河 逼 廖 大心製盆 東 命 王 之亂, 晉 之横 內史,隨王 熙,範令之横 於峽口 與杜崱入守臺城。 隸 城, 鄱 0 陽王 之横 僧辯拒 還除吳興太守,乃作 下授。 範討景,景濟江 斬 思立 侯景。 未及至,範薨,之横 而 及陸 景退, 拒大心。 納 一,仍與範世子 百 據 遷東徐 湘 幅被以成 大心 州 叛, 以 州 乃還。 刺 州降侯景, 又隸僧辯 其志 嗣 吏, 入援臺城。 封豫 時 尋 南 寧侯。 陽王 之横 大心 與兄之高 城陷,退還合肥。 斬納將李賢明,平之。 又隨僧辯破景,景東 在 江 歸 州 元帝 範 副 位 梅 侯景 廷 思

魏 剋江陵, 齊遣上黨王高渙挾貞陽侯明攻東關 晉安王承制, 以之横爲徐州刺史,都

督 衆軍、出守蘄城。 之横營壘未周,而齊軍大至,兵盡失窮,遂於陣沒。 贈司空、諡曰忠壯

子鳳寶嗣。

門有將」,斯言豈曰妄乎。 自 魁 梧 | 効邊疆,盛績克舉,其志不遂,良可悲夫。 之傑,然 論韋、裴少年勵操,俱以學尙自立,晚節驅馳,各著功於戎馬。 而 形甚羸瘠,身不跨鞍,板輿指麾,隱如敵國,其器分有在 二門子弟,各著名節,與梁終始,克荷隆構。「將 一、隆名豈虛 觀叡制勝之道,謂 得乎。 邃

校勘記

- 宋永 宋書 及本 光初袁顗爲雍州刺史見而異之 書袁顗傳載顗之死在宋明帝秦始二年,其爲雍州 「永光」各本作「永元」,據梁書改。 應在 泰始之前、當作永光。 按永元為齊 東昏年號,
- = 封都 梁子 都 |梁」各本互倒爲「梁都」。 按南齊書州郡志都梁屬湘州 邵 陵郡,今乙正。
- 魏 初 分 築 東西 小 城 夾 合肥 「合」字各本並脱,據梁書及册府元龜三六八、四 四四 補。
- 29 魏 攻 陷 城 乘 勝 至 叡 隄 下 「隄下」各本作「城下」,據梁書及册府元龜三六八、四一九改。 按下

列

|因令取繖扇麾幢樹之隄下]示無動志」]則作「城下」誤。

- /\ J£ 且願 兩武勿復私關 「兩武」即「兩虎」,此避唐諱改。
- ベリ 客陰雙光泣止叡 「陰雙光」梁書作「陰儁光」。
- ----景宗時與羣帥爭先啓之捷 通志「捷」上無「之」字。
- 渦陽 城主王緯以 城降 「王緯」各本作「王偉」,據册府元龜三五二及陳慶之傳改。 下同
- 八九山 累遷左衞率領直 粲字長倩 「倩」梁書作「蒨」。
- (0)「
 上」之
 譌。 「左」各本作「右」,據梁書改。 按章點傳「而兄子聚爲左衞率」,是「右」爲
- 下官才非禦侮 「侮」各本作「武」、據梁書改。
- 載所屬縣卒並陳武舊兵 「卒」字各本並脱,據陳書補。
- 著漢書續訓三卷 「三」各本作「二」,據梁書陵傳附為源及册府元龜六〇六改。 按隋書經籍志

亦作「三卷」,云「梁北平諮議參軍韋稜撰」。

- 黯以故 常 怏怏 「故」字各本並脫,據通志 補。
- 二吾 裴邃字深明 「深」梁書作「淵」、此避唐諱
- 又屠安成馬頭沙陵等戍 「安成」當依梁書武帝紀普通五年十一月作「安城」。

記

宅寺西」云云、疑「母」當作「父」。

慈訓宮衞尉 「衞尉」上衍「徵」字`據陳書删。 按陳書之平見其子裴忌傳。

命忌勒部下精兵自錢唐直趣吳郡 按通鑑梁紀紹泰元年胡注:「陳霸先自義興還建康, 遣裴忌

助黃他攻吳郡。自錢唐直趣吳郡,非路也。錢唐必誤。」

以忌爲都督與明徹俱進「忌」各本作「明徹」,誤,據陳書改。

南史卷五十九

列傳第四十九

江淹 任昉 王僧孺

梁伯鸞之爲人,不事章句之學,留情於文章。早爲高平檀超所知,常升以上席,甚加禮焉。 江淹字文通,濟陽考城人也。父康之,南沙令,雅有才思。淹少孤貧,常慕司馬長卿、

起家南徐州從事,轉奉朝請。宋建平王景素好士,淹隨景素在南兗州。廣陵令郭彦文

得罪、辭連淹、言受金、淹被繫獄。自獄中上書曰:

義士伏死而不顧者以此也。 不廢卷流涕。何者。士有一定之論,女有不易之行。信而見疑,貞而爲戮,是以壯夫 昔者,賤臣叩心,飛霜擊於|燕地; 庶女告天, 振風襲於|齊臺。下官每讀其書,未嘗 下官聞仁不可恃,善不可依,謂徒虛語,乃今知之。 伏願

列傳第四十九 江淹

大王暫停左右,少加矜察。

質佩 忘歸, 所天。 實,亦當鉗口吞舌,伏匕首以殞身,何以見齊魯奇節之人,燕趙悲歌之士 名於 乏鄉曲之譽,然嘗聞君子之行矣:其上則隱於簾肆之間,臥於巖石之下,次則結綬 虧名為辱,虧形次之,是以每一念來,忽若有遺,加以涉旬月,迫季秋,天光沈陰, 之庭,高議雲臺之上,退則虜南越之君,係單于之頸。 無色,身非木石,與獄吏爲伍。此少卿所以仰天搥心,泣盡而繼之以血者也。 日 之末,競錐 者 不義。 荆卿黃金之賜,竊感豫讓國士之分矣。 ,

復爲門下之賓,備鳴盜淺術之餘,豫三五賤伎之末。 ,史遷下室,至如下官,當何言哉。 ,謬得升降承明之闕,出入金華之殿,何嘗不局影凝嚴,側身扃禁者乎。 方今聖歷欽明,天下樂業,青雲浮洛,樂光塞河,西洎臨洮、狄道,北距飛狐、陽原, 子陵閉 不圖 ·官本蓬戶桑樞之人,布衣韋帶之士,退不飾詩書以驚愚, 刀之利哉!下官聞積毁銷金,積讒摩骨,遠則直生取疑於盜金,近則伯魚被 彼之二才,猶或如是,況在下官, 一小人固陋,坐貽謗缺,迹墜昭憲,身限幽圄,履影弔心,酸鼻痛骨。 關於東越, 仲蔚杜門於西秦, 夫以魯連之智,辭祿而不反,接輿之賢,行歌 亦良可知也。 常欲結纓伏劍,少謝萬一,剖心摩踵,以報 焉能自免? 俱啓丹册,並圖靑史。 昔上將之恥,絳侯幽 若使下官事非其虚, 大王惠以恩光, 進不買聲名於天下。 乎。 顧以顏色, 寧爭 竊慕大王 獄 下官雖 下官聞 罪得其 ",名臣 分寸 金馬 左 而 右

塻 不 ·寖仁沐義,照景飮醴,而下官抱痛圜門,曰含憤獄戶,一物之微,有足悲者。 仰惟

大 王 少垂 明白,則梧丘 一之魂不愧於沈首,鵠亭之鬼無恨於灰骨。

素覽書,即日出之。 尋舉南徐州秀才,對策上第,再遷府主簿

柳 機 進 世隆。 諫 將發,乃贈詩十五首以諷 景素 景素 為荆州 淹 不納。 固求之,景素大怒,言於選部,黜爲建安吳興令 淹從之鎭。 及鎭京口 焉。 ,淹爲鎭軍參軍,領南東海郡 少帝卽位,多失德,景素專據上流,咸勸因此舉事。 會東海太守陸澄 丁艱,淹自謂郡丞應行郡事,景素 丞。 景素與腹心日夜謀議,淹 淹每從容 用 司馬 知 禍

懷 叛 武 辱, 帝 **須逆,五** 四四 謂 有奇略,一勝也;寬容而仁恕,二勝也;賢能 紹終為 淹 及 敗 齊高帝輔 曰:「天下紛紛若是, 也 勝 也。 奔北之虜,此所謂『在德不 懸 兵數千里、而無同 彼 政,聞其才,召爲尙書駕部郎、驃騎 志銳 而 器小,一敗也; 君謂 何如。一个百二十一有强 惡相 在鼎』, 濟,五敗也。 有威 無恩,二敗也,曰士卒解體,三敗也,搢 公何疑哉。」帝曰 畢力,三勝也,人望所歸,四勝也,奉天 参軍 雖豺 而 劉弱, 事。 狼 十萬,而 俄而 袁 衆而曹寡,羽 荆州 |終爲我獲焉。」帝笑曰: 我言之。」淹 刺史沈攸之作亂,高 卒 受一劍之 曰:「公雄 子 ,而伐 神不

桂 陽 之役,朝 廷 周 章,詔檄久之未就。 齊高帝引淹入中書省,先賜酒食,淹素能飲啖, 君談

過矣。

食鵝炙垂 盡, 進酒數升訖, 文誥亦辨。 相府建, 補記室參軍。 高帝讓九錫及諸章 表,皆流

製也。齊受禪,復爲驃騎豫章王嶷記室參軍。

不行。 謂富貴卿自取之,但問年壽何如爾。」淹曰:「不悟明公見眷之重。」 拜中書侍郎,王儉嘗謂曰:「卿年三十五,已爲中書侍郎,才學如 建元二年,始置史官,淹與司徒左長史檀超共掌其任,所爲條例,並爲王儉所駁, 淹任性文雅, 不以著述在懷, 所撰十三篇竟無次序。 又領東武令,參掌詔策。[三後 此,何憂不至尚書金紫。 所

識字體,亦不能諳,直云似是科斗書。 永明三年,兼尚書左丞。 時襄陽 人開古冢,得玉鏡及竹簡古書,字不 淹以科斗字推之,則周宣王之前也。[四] 簡殆 可識。 王僧虔善 如新

嚴明 奏收 爾。」於是彈中書令謝朏、司徒左長史王績、護軍長史庾弘遠,並以託疾不預山陵公 折衷。今爲南司,足以振肅百僚也。」淹曰:「今日之事,可謂當官而行,更恐不足仰 太守庾曇隆及諸郡二千石幷大縣官長,多被劾,內外肅然。 前 中丞,君今日可謂近世獨步 少帝初,兼御史中丞。 益州 刺史劉悛、梁州刺史陰智伯,並贓貨巨萬,輒收付廷尉。 明帝作相,謂淹曰:「君昔在尚書中,非公事不妄行,在官寬猛 明帝謂曰:「自宋以來,不復有 臨海太守沈昭略、永嘉 事 稱 明旨 叉 能

累遷秘書監,侍中,衞尉卿。 初,淹年十三時,孤貧,常采薪以養母,曾於樵所得貂蟬

具, 將鬻以供養。 其母曰:「此故汝之休徵也,汝才行若此, **豈長貧賤也**, 可留待得侍

之。」至是果如母言。

永元中,崔慧景舉兵圍都,衣冠悉投名刺,淹稱疾不往。 及事平,時人服其先見。

曰憲。 旣立,正欲歸身草萊耳。」以疾遷金紫光祿大夫,改封醴陵伯,至 卒。 今之忝竊,遂至於此。平生言止足之事,亦以備矣。人生行樂,須富貴何時。 天監元年, 東昏末,淹以祕書監兼衞尉,又副領軍王瑩。 爲散騎常侍、左衞將軍,封臨沮縣伯。淹乃謂子弟曰:「吾本素宦,不求富 及梁武至新林,淹微服來奔,位相國 武帝爲素服舉哀,諡 吾功名 石長

景陽,謂曰:「前以一匹錦相寄,今可見還。」淹探懷中得數尺與之,此人大恚曰:「那得割截 世; 之。 都盡。」顧見丘遲謂曰:「餘此數尺旣無所用,以遺君。」自爾淹文章躓矣。又嘗宿於冶亭,夢 一丈夫自稱|郭璞,謂庵曰:「吾有筆在卿處多年,可以見還。」庵乃探懷中得五色筆一以授 嘗欲爲赤縣經以補山海之闕,竟不成。子蔭嗣。 爾後為詩絕無美句,時人謂之才盡。 **淹少以文章顯,晚節才思微退,云爲宣城太守時罷歸,始泊禪靈寺渚,夜夢一人自稱張** 凡所著述, 自撰爲前後集,幷齊史十志,並行於

謹,位御史中丞、金紫光祿大夫。〔云〕永明中,遐以罪將徙荒裔,遙懷名請訴,言淚交下,齊武 任昉字彥升,樂安博昌人也。父遙,齊中散大夫。遙兄遐字景遠,少敦學業,家行甚

帝聞而哀之,竟得免。

稱其小名曰:「阿惟,吾家千里駒也。」昉孝友純至,每侍親疾,衣不解帶,言與淚幷,湯藥飲 悟。 相爲喜之。所謂百不爲多,一不爲少。」由是聞聲藉甚。年十二,從叔晷有知人之量,見而 入懷中,心悸因而有娠。占者曰:「必生才子。」及生時, 身長七尺五寸, 幼而聰敏, 早稱神 四歲誦詩數十篇,八歲能屬文,自製月儀,辭義甚美。 遙妻河東裴氏,高明有德行,嘗畫臥,夢有五色采旗蓋四角懸鈴,自天而墜,其一鈴落 褚彦回嘗謂遙曰:「聞卿有令子,

防因定數字。 **險每見其文,必三復殷勤,以爲當時無輩,曰:「自傅季友以來,始復見於任子。** 用,其入室升堂。」於是令防作一文,及見,曰:「正得吾腹中之欲。」乃出自作文,令防點正, 初爲奉朝請,舉兗州秀才,拜太學博士。 檢拊几歎曰:「後世誰知子定吾文!」其見知如此。 永明初,衞將軍王儉領丹陽尹,復引爲主簿。 若孔門是

食必先經口

後爲司徒竟陵王記室參軍。 時現邪王融有才儁,自謂無對當時,見昉之文,怳然自失。

遭繼 榔 卿 以 之寶 父喪去官,泣血三年,杖 以 母憂, 爲 亦 常 诗 **助先以毁瘠**, 餌 才 ,臨終嘗求之, 可 惜。 宜深 每一 而 剖 相 後起。 慟 全 百許口 絕, 一譬。」遐使 戊 齊武帝謂防伯遐曰「聞訪哀瘠過禮,使人憂之,非直 不 久乃蘇, 得好者,助亦所嗜好,深 進飲食, 因 廬 當時勉 於墓側, 勵 以終喪禮。 口 以 卽 爲 歐 恨, 出。 哭泣 遂終 防父遙本 之地 身 不 嘗 ,草爲不 性 [檳榔 重 檳

公 廢 一,使昉! 鬱林 齊 明 具草。 一,始 帝 深 爲 加器異,欲 侍 帝 惡其 中、中 、辭斥, 書監 大相 甚慍 一、驃騎 擢 引 一,
助
亦 大將 爲愛憎所白,乃除太子步兵校尉,掌東宮書記。 由 軍 · 開 是終建武 府 儀 同三司、揚州 中位不 過 列 校 刺 史、 錄尙 書 事, 封 宣 齊明帝 城 郡

生。

昉

素

强

壯

一,腰帶甚

充

,服闋後不

復

可

識

沈約 亮 日 防 尤 卿 代 辭 長 宜 宗 謝 爲 深 筆, 梅 が那 所 頗慕傅亮才思 推 忽 謝我。」

助 担。 永元 中,行 慚 無 而 窮 退。 意 當 於梅蟲兒, 末為 時王 一公表 司 徒 東昏 右 奏 無 長 史。 中旨 不 請 焉。 用 爲 中 肪 起 書 草即 郎。 謝 成, 尙 書 不 加 點竄 Ī

被 急召 梁 武 帝 防 剋建 出 而 鄴 約在 霸 一,是後 府 初 開 文筆, 以 納 爲 參 驃 騎 製 記 室 一参軍 專主 文翰 每制書草、沈約 輒 求 同署

登 始 一事,當 梁 武 與 以 防 卿 遇 爲 竟陵 騎 兵 王 西邸,從容 以帝 善騎 也 謂 防 至 目 $\stackrel{:}{\neg}$ 是引防符昔言焉。 我 登三府 一當以 卿爲 防奉牋 記 室。」助亦戲 云:「昔承清宴 帝 曰:「我 屬 有

列

傳

第

四

+

九

任

眆

緒言, 提挈之旨, 形 乎善謔。 **豈謂多幸,斯言不渝。**」 蓋爲此也。 梁臺 一建,禪讓文誥, 多叻

所 具。

班 之親 奉 世 戚,即日 叔父母不異嚴親,事兄嫂恭謹。 便盡 性通 脱,不 事 儀形,喜慍未嘗形於色,車服 外氏貧闕,恒營奉供養。 亦 禄奉所收,四 不 鮮 明 方餉遺,皆

Щ 三千 田 澤 奉 游。 餘 秩 武 帝 人。 八 及被代登舟,止 百餘石,防五 踐 時產子者不舉,防嚴其制,罪同殺 作,歷給事黃門侍郎,吏部 一分督 有絹 一,餘者悉 七匹,米五 鄎 原,兒妾食麥而已。 石。 出為義 至都無衣,鎭軍 人。 孕者供其資費, 興太守。 友人彭 歲荒民散 將軍 一沈約遣 城到溉、溉弟洽從 濟者千室。 以私奉米豆爲粥,活 裙衫 迎之。 在 郡 所 昉 得 共 公

部 ,篇卷紛雜,昉手 重 除 吏部 郎 參掌 自讎校,由 ·大選,居職 是篇目定焉 不稱。 尋轉: 御史中丞、 秘書監。 自齊永元 以來, 秘閣 四

哭之甚慟。 投 棺 省, 浣浣 之於盤, 吏人便之。 出 衣 爲 爲 新安 悲不 斂。 追贈太常,諡 太守,在郡不 ·自勝 闔 卒於官,唯有桃花米二十石,無 境痛 情, 因 日 屈 百姓共立祠堂於 一敬子 事 指 邊幅,率然曳杖,徒行 「助少時常恐不滿五十,今四十九,可謂知命。」即日 、城南, 以 爲斂。 歲 :邑郭。 時 祠之。 遺言 人通辭訟者,就路決焉。 不許 武帝聞問,方食 以新安 物還都 西苑 綠 雑 爲 舉哀, 沈 政清 木爲 瓜,

年八十以上者,遣戶曹掾訪其寒溫。嘗欲營佛齋,調楓香二石,始入三斗,便出敎長斷,曰: 吏人咸以百餘年未之有也。爲家誡,殷勤甚有條貫。陳郡<u>殷芸與建安太守到溉書曰:「哲</u> 「與奪自己,不欲貽之後人。」郡有蜜嶺及楊梅,舊爲太守所采,昉以冒險多物故,卽時停絕, 交好,坐上客恒有數十。時人慕之,號曰任君,言如漢之三君也。在郡尤以淸潔著名,百姓 助好交結,獎進士友,不附之者亦不稱述,得其延譽者多見升擢,故衣冠貴游莫不多與

人云亡,儀表長謝。元龜何寄,指南何託。」其爲士友所推如此。

可以厚人倫,能使貪夫不取,懦夫有立」。 其見重如 之,以爲「過於董性、揚子。」助樂人之樂,憂人之憂,虛往實歸,忘貧去吝,行可以厲風俗,義 縱 之談矣。博學、於書無所不見、家雖貧、聚書至萬餘卷、率多異本。及卒後、武帝使學士賀 轉 亦以叔則,不知我者亦以叔則。」旣以文才見知,時人云「任筆沈詩」。 共沈約勘其書目,官無者就其家取之。所著文章數十萬言,盛行於時。東海王僧孺嘗論 ·好著詩,欲以傾沈,用事過多,屬辭不得流便,自爾都下士子慕之,轉爲穿鑿,於是有才盡 助不事生產,至乃居無室宅。 時或譏其多乞貸,亦隨復散之親故,常自歎曰:「知我者 此。 **助聞甚以爲病。晚節**

收 卹。 有 西華冬月著葛帔練裙,道逢平原劉孝標,泫然矜之,謂曰:「我當爲卿作計。」乃著廣 東里、西華、南容、北叟,並無術業,墜其家聲。兄弟流離不能自振,生平舊交莫有

列傳

第四十九

任助

六

絕交論以譏其舊交日

豺虎。 草蟲鳴則 息流波之雅引,范、張款款於下泉,尹、班陶陶於永夕。 於塤篪。 以王陽登則貢公喜,罕生逝而國子悲。 知,心計莫能測。 客問主人曰:「朱公叔絕交論,爲是乎,爲非乎。」主人曰:「客奚此之問。」客曰:「夫 蒙有猜焉,請辯其惑。」 聖賢以此鏤金板而鐫盤盂,書玉牒而刻鍾鼎。 阜螽躍,彫虎嘯而淸風起,故氛氳相感,霧涌雲蒸,嚶鳴相召,星流電激。 而朱益州汨彝敍,粤謨訓,捶直切,絕交遊,視點首以鷹鸇,媲人靈於 且心同琴瑟,言鬱郁於蘭茝,道叶膠漆,志婉 駱驛從橫,烟霏雨散,巧歷所不 若乃匠石輟成風之妙巧,伯牙 是

戀

之微旨。 溪谷不能踰其險,鬼神無以究其變,競毛羽之輕,趨錐 輟其音,霜雪零而 組織仁義,琢磨道德,歡其愉樂,恤其陵夷,寄通靈臺之下,遺跡江湖之上,風雨急 天下蚩蚩,鳥驚雷駭。 人握金鏡,闡風烈,龍驤蠖屈,從道汙隆。 主人听然曰:「客所謂撫弦徽音,未達燥濕變響,張羅沮澤,不睹鴻雁高飛。 若五音之變化,濟九成之妙曲,此朱生得玄珠於赤水,謨神睿以爲言。 不渝其色,斯賢達之素交,歷萬古而一遇。 然利交同源,派流則異,較言其略,有五 日月連璧,贊亹亹之弘致,雲飛雷薄,顯棣 刀之末。 逮叔世人訛,狙詐 一術焉 於是素交盡,利交興, . 飈起, 至夫 蓋 而 菲 聖

傳第四十九 任昉

71]

陽

舒

陰

慘

」, 生 靈

大情,

憂

合歡

離,

品

物

恒性。

故魚以泉涸

而

呴沫,鳥

因將

死

而

嗚

起

開 域 流流 聳 其 水 風 接軫 其 塵,四海疊其熏灼。 ·寵均蘆、石,權壓梁、竇,彫刻百工,鑪錘萬物,吐嗽興雲雨,呼噏下霜露,九 ,皆願摩頂至踵,隳膽抽腸。 靡不 望影星奔,藉響川鶩。 約同 一要離焚妻子,誓殉荆卿湛 雞 人始唱,鶴蓋 七 成陰,高門 族。 是日 勢 且

交,其流

一也

之 有 稻 窮 粱,霑玉斝之餘瀝。銜恩遇,進款誠,援青松以示心,指白水而旌 巷之賓,繩樞之士,冀宵燭之末光,邀潤屋之微澤。 「富埓陶、白,貲巨程、羅,山擅銅陵,家藏金穴,出平原而聯騎,居里閈而鳴鐘。 魚貫 鳧踊,颯 沓鱗 信。 萃, 是 日 分雁 肺交, 喬 則

流

世。

類, 於 飛沈 涕 雲閣 陸 睡 出 大夫宴喜西都,郭有道人倫東國,公卿貴其籍甚,搢紳羨其登仙。 流 攀 其 沫, 顧 ,其鱗翼,丐其餘論 騁黃馬之劇談, 指,榮辱定其一言。 ,附騏驥之旄端 縦碧雞 於是有弱冠王孫,綺紈 之雄辯。 軼 敍溫燠則寒谷成 歸鴻於碣石 公子。 是 道 暄,論嚴苦 日談 不 挂 交,其流 於 加 通 IJ 春 以頗 入, 三也。 、頭蹙 聲未 叢 零

哀。 於苫蓋 同 病 是以 相 憐 伍 綴 員 河上之悲曲, 濯漑於宰嚭、張王撫翼於陳相。 恐懼置懷, 昭谷風 之盛典,斯 是日窮交,其流 則 斷 金 四 由於湫 也。 隘 刎 頸

雖共工 若衡 黻 膏翠羽 河 漢 不能 馳鶩之俗,澆薄之倫,無不操權衡,執纖纊,衡所以揣其輕重,續所以屬其鼻息。 一之蒐慝,驩兜之掩義,南荆之跋扈,東陵之巨猾,皆爲匍匐委蛇,折枝舐痔。 謀而後動,芒豪寡忒。 將其意,脂韋便辟導其誠。 `,視若游塵,遇同土梗,莫肯費其半菽,罕有落其一毛。 舉,續不能飛,雖顏、冉龍翰鳳鶵,曾、史蘭薰雪白,舒、向金玉泉海,卿、雲黼 是日量交,其流五 故輪蓋所游,必非夷、惠之室,包苴所入,實行脹、霍 也。 若衡 重錙銖,擴微影撇, 金

若波瀾 衰相 羞, 以隙 有旨 釁 末 襲,或前 凡斯五交,義同賈鬻,故洹譚譬之於闤闠,行林回諭之於甘醴。 此 敗德 哉! 則 樂而 有旨 徇 · 殄義,禽獸相若,一釁也,難固易攜,讎訟所聚,二釁也;名陷饕餮,貞介所 可 古人 知 利 哉 矣。 之情未嘗異,變化之道不得一。 後悴,或始富而終貧,或初存 知三釁之爲梗,懼 而翟公方規規然勒門以箴客, 五交之速尤,故王丹威子以榎楚,朱穆昌言 而 末亡, 由是觀之,張、陳所以凶終,蕭、朱所 何所見之晚乎?然因 或古約而今泰。循 夫寒暑遞進,盛 環翻 此 五交,是 覆, 而 示 迅

邁,聯衡許、郭。 近 世 有樂安任 類田文之愛客,同鄭莊之好賢。 助,海內髦傑,早綰銀黃,夙昭人譽。遒文麗藻,方駕曹、王,英時俊 見一善則盱衡扼腕,遇一才則揚眉抵

掌。 豈云慚絕。 友,曾無羊舌下泣之仁,寧慕郈成分宅之德。嗚呼!世路嶮巉,一至於此!太行孟門, 輪之賓。 庶羊、左之徽烈。及瞑目東粤,歸骸洛浦,繐帳猶懸,門罕漬酒之彥,墳未宿草,野絕動 長鳴,彩組雲臺者摩肩,趨走丹墀者疊跡。莫不締恩狎,結綢繆。 蹈其閫閾,若升闕里之堂,入其隩隅,謂登龍門之坂。至於顧眄增其倍價,翦拂使其 雌黃出其脣吻,朱紫由其月旦。於是冠蓋輻湊,衣裳雲合,輜朝擊轉,坐客恒滿。 藐爾諸孤,朝不謀夕,流離大海之南,寄命瘴癘之地。自昔把臂之英,金蘭之 是以耿介之士,疾其若斯,裂裳裹足,棄之長鶩。獨立高山之頂,歡與麋鹿 想惠、莊之淸塵,公

到漑見其論,抵几於地,「亞」終身恨之。

同羣,曒曒然絕其雰濁,誠恥之也,誠畏之也。」

防撰雜傳二百四十七卷,地記二百五十二卷,文章三十三卷。 東里位尚書外兵郎。

王僧孺字僧孺,東海郯人也。 魏衛將軍肅八世孫也。 曾祖雅,晉左光祿大夫、儀同三

司。 祖準之,宋司徒左長史。[10]父延年,員外常侍,未拜卒。

僧孺幼聰慧,年五歲便機警,初讀孝經,問授者曰:「此書何所述。」曰:「論忠孝二事。」

列傳第四十九 王僧孺

僧 孺 日 七 若 歲 爾 能 願常讀之。」又有餽其父冬李,曰:先以 讀 十 萬言,及長篤 愛 **漬籍**。 家貧 常傭 書以養 與之,僧孺 母,寫 不 **畢**諷 受, 誦 日 亦了 大 人未見,不

燭。 御。 止。 日三 侍 殿 孫 司 並 御 徒 唯子 史,出 (三)其 以善 百行 竟 劉 會 仕 略 陵 薨,出爲 齊 之首 解 見知 班 王 爲 爲士 爲 藻游 {藝, 子 太 錢 良 唯 學博 晉安郡 友 虞 立 唐 焉。 開 志尚 推 余 令。 人斯著 士 西 重 知 邸 而 **金銀** 子 丞,仍除候官 如 初 僧孺 ,招文學,僧孺 尙書僕射 ,觀行 此 僧 伊 子之有之, 孺 ,昔有 與高 與樂安 視言, 平 懷 王晏深 徐夤 令。 任助 要終 交 誰 與太學生虞 相 毁 建武 俱 相 遇於竟陵 猶 欣 誰 賞好。 爲 勗。 譽。 始。 學林。 初 舉 下帷 敬之重之, 修 義、丘 士,爲始安王遙光 晏爲丹陽 王 名旣 文惠太子欲以爲宮僚, 西邸,以文學會友,及將 無倦, 國賓、 立, 尹 升高 老 如蘭 蕭文琰、 至 召補 有 何 如 屬, 歪, 乃所薦, 遽, 功 曹 丘令楷、江洪 嘉 誰 形 除儀 應影 爾 其 使撰 乃召入直 晨 之縣,防 執 登, 鞭, 隨, 曹 東宮新記 郎 曩行 惜 吾 、劉孝 ||崇明 余夜 爲 遷 贈 子 今 書

孫 僧 而 者,不 刨 孺 至便 梁天 賣 在越裝。」並無所取 其 禁斷 監 利 初 數 除 倍, 叉 臨 外 歷 Щ 或 政 王 舶 後 以 物 軍 爲 視 常 高涼 記 室, 事二歲,聲績有聞。 僧 生 待詔 儒 口 歎 歲數 文 曰:一昔 〈德省。 至, 皆外 人 出 爲 爲 韶徵將還, 國賈 蜀 南 部 海 長 人以通 太守。 史,二三終 郡中道俗六百 貨易。 南海俗 身 無蜀 舊 殺牛, 時 人指 物 州 郡 ,吾欲遺子 曾 闕請留 就 無 र्गा 限 忌, 回

不許。 丞。僧孺幼貧,其母鬻紗布以自業,嘗攜僧孺至市,道遇中丞鹵簿,驅迫墜溝中。 至,拜中書侍郎,領著作,復直文德省。撰起居注、中表簿,遷尙書左丞,俄兼御史中 及是拜

日

,引騶淸道,悲感不自勝。 頃之卽眞。

湯道愍所糾,逮詣南司,坐発官,久之不調。友人廬江何炯猶爲王府記室,僧孺乃與炯書以 孺妾媵之數,對曰:「臣室無傾視。」及在南徐州,友人以妾寓之,行還,妾遂懷孕。 東部郎,參大選,請謁不行。 出爲仁威**南康王長史、蘭陵太守,行府、州、國事**。 見其意。後爲安成王參軍事,鎭右中記室參軍。 時武帝制春景明志詩五百字,敕沈約以下辭人同作,帝以僧孺爲工。 歷少府卿,尚書 初,帝問僧 爲王典籤

石。』郭璞云:『可以爲砭針。』春秋:『美疢不如惡石。』服子愼注云:『石,砭石也。』季世無復 人當以石爲針,必不用鐵。說文有此砭字,許愼云:『以石刺病也。』東山經:『高氏之山多針 僧孺工屬文,善楷隸,多識古事。侍郎全元起欲注素問,訪以砭石。〔回〕僧孺答曰:「古

佳石,故以鐵代之爾。」

有東西二庫。 亂,文籍無遺。 轉北中郎諮議參軍,入直西省,知撰譜事。先是,尚書令沈約以爲「晉咸和初,蘇峻作 此籍旣並精詳,實可實情,位宦高卑,皆可依案。 宋元嘉二十七年,始以七條 後起咸和二年以至于宋,所書並皆詳實,並在下省左戶曹前廂,謂之晉籍,

列

傳第

24

十九

王僧孺

國。 令史固自忘言。 辨 徴 郎令史以掌之。 年 發,旣立此科,人姦 號,不識官階。 元興唯有三年, 競行姦貨,以新 臣謂宋、齊二代,士庶不分,雜役減闕, 或注隆安在元興之後,或以 而猥稱四、五, 互起, 偽狀 換故 巧籍、歲月滋廣。 詔書甲子,不與長曆相應。 ,昨日 卑細,今日 義熙在寧康之前。 以至于齊,患其不 便成士流。 職 由 於此。 校籍諸 凡此姦 此時無此 實, 竊以晉籍 郎亦 窍, 於是東堂校籍,置 府, 並 所不覺, 所餘,宜 出 此時 愚下,不 不 無 加 此 寶

陽張 始撰 世傳 卷。 郎||平陽||賈|||篤好簿狀, 其業。 等九族 百家 凡諸 以 大品,略無遺闕,藏在 助銓 以代雁門解等九姓。 太保王弘、 一序,而傷於寡略。 領軍將軍 乃廣集衆家, 一祕閣,副在左 劉湛 其東南諸族 齊衞將軍王儉復加去取,得繁省之衷。 大搜羣族, 並好其書。 戶。 別爲一 所撰十八州一百一十六郡,合七百 及朔子太宰參軍 弘日對千客,不犯一人之諱。 部,不在 百家之數焉。 匪之、匪之子長水校尉深 普通 僧孺 湛爲 二年卒。 之撰,通范 一 十 二 選曹)

愛」。武帝以是留意譜籍,州郡多離其罪,

因詔僧孺改定百家譜。

始晉太元

中,員外散騎侍

{抄 不 十五 覩 ,其文麗逸,多用新 僧孺! 好墳籍,聚書至萬餘卷,率多異本, 東南譜集抄十卷,文集三十卷,兩臺彈事不入集,別爲五卷,及東宮新記並 事,人所未見者,時重其富博。 與沈約、任昉 集十八州譜 家書埓。 七百一十卷,百家譜集 少篤志精力,於書無 所

於世。

愆於內,而髮變於外。」當時稱之。 有。」乃與合楷、江洪等共打銅鉢立韻、響滅則詩成,皆可觀覽。 人,有學行。 父榮祖位祕書監,嘗有罪繫獄,旦日原之,而髮皓白。 而仕多不遂,常歎曰:「古人或開一說而致卿相,立談問而降白璧,書籍妄耳。」徐夤,高平 士,刻燭爲詩,四韻者則刻一寸,以此爲率。|文||琰曰:「頓燒一寸燭,而成四韻詩,何難之 書以譏揚雄。 虞羲字士光,會稽餘姚人,盛有才藻,卒於晉安王侍郎。 蕭文琰,蘭陵人。丘令楷,吳興人。江洪,濟陽人。竟陵王子良嘗夜集學 丘國賓,吳興人,以才志不遇, 劉孝孫,彭城人,博學通敏, 齊武問其故,曰:「臣思

碩學,而中年遭躓,非爲不遇,斯乃窮通之數也。 而淹實先覺,加之以沈靜,助乃舊恩,持之以內行。 論曰:二漢求士,率先經術,近代取人,多由文史。 其所以名位自畢,各其宜乎。 觀江、任之所以効用、蓋亦會其時 僧孺

校勘記

而下官抱痛圜門 列 四 + 九 校 「而」下各本有「已」字,據梁書、册府元龜八七五刪。 勘 記

- 有威無恩二敗也 與下「士卒解體」、「搢紳不懷」敗因相合,今乙正。 「威」、「恩」各本互倒。 按梁書、册府元龜七一一及通志並作「有威而無恩」,
- \subseteq 其祿 又領東武令參掌詔策 不赴任,南史改『帶』爲『領』,未確。」 「領」梁書作「帶」。 王鳴盛十七史商權:「若淹以記室帶東武令 當是食
- 當有 陽古冢實爲一事。 字。宣王時,史籀作大篆,此簡旣非大篆,故以爲宣王以前之簡耳。」按時雍州鎭襄陽,雍州與襄 有盜發古冢,得竹簡以示僧虔,云是科斗書考工記,周官所闕文也。、江淹傳,襄陽人開古冢得竹 則周宣王之前也 · 則周宣王之簡也。旣是科斗書,僧虔何以不識其爲考工記。淹傳『周宣王』下疑脫『以前』二 「以前」二字,示所得古書之字更在科斗、大篆之前。據是,則元大德本作「之前 「之前」從元大德本,其他各本作「之簡」。王懋竑讀書記疑:「王僧虔傳,雍州 記疑意謂王僧虔善識字體,不容不識傳世之科斗文與大篆,故以爲「之簡」上
- EE. 憲」梁書作「諡曰憲伯」、明此「侯」爲「伯」之譌、今改正。 改封醴陵伯卒 「伯」各本作「侯」。按淹原封臨沮縣伯,此改封,非進封,不應爲侯。下「諡曰
- , ,へ ~ 故桓譚譬之 位御史中丞金紫光祿大夫 於 闄 闄 文選李善注:「譚集及新論並無以市喻交之文。 各本「光祿大夫」下有「始興」二字,通志無,此當爲衍文,今删 戰國策譚拾子謂孟嘗君

曰:『富貴則就之,貧賤則去之,請以市喻。』疑『拾』誤爲『桓』,遂居『譚』上耳。」

- $\bigcap_{i \in I} \bigcap_{j \in I} \bigcap_{i \in I} \bigcap_{j \in I} \bigcap_{j \in I} \bigcap_{j \in I} \bigcap_{j \in I} \bigcap_{i \in I} \bigcap_{j \in I} \bigcap_{i \in I} \bigcap_{j \in I} \bigcap_{j \in I} \bigcap_{i \in I} \bigcap_{j \in I} \bigcap_{i \in I} \bigcap_{j \in I} \bigcap_{j$ 想惠莊之淸塵 「惠莊」各本作「慧莊」。 按惠謂惠施、莊謂莊周、今改正。
- <u>へ</u> た ∪ 到溉見其論抵几於地 「几」北監本、殿本作「之」,其他各本作「几」。
- 祖準之宋司徒左長史 張森楷梁書校勘記:「宋書范泰傳言王準之爲司徒左長史在晉隆安時,

則非宋也。 符瑞志有義興太守王準之,則非宋司徒左長史也。」今按晉書王雅傳:「雅長子準之

散騎侍郎。」疑「宋」爲「晉」之譌。

猶可得之。若李則不能保存至冬,且亦不聞有冬李之名。疑當作「柰」。 叉有餽其父冬李 「冬李」太平御覽五一八引作「柰」。按柰一名頻婆,今稱蘋果,秋結實, 冬日

[15] 嘉爾晨登惜余夜燭 「晨登」梁書作「晨燈」。

昔人爲蜀部長史 「蜀部」各本作「蜀郡」。按郡無長史之官。 魏景元後,益州鎭成都,故益州

以蜀部爲稱,據梁書改。

侍郎全元起欲注素問訪以砭石 「全」各本作「金」,據册府元龜七八〇改。 ·赤素問八卷,全元越注。」元起、元越,當是一人,然「起」、「越」未詳孰是。 按隋書經籍志:

南史卷六十

列傳第五十

范岫 傅昭 弟映 孔休源 江革 子德藻 徐勉

許懋 子亨 殷鈞 宗人芸

范岫字懋賓,濟陽考城人也。 高祖宣,晉徵士。 父羲,宋尚書殿中郎,本州別駕。 竟陵

圧誕反, 羲在城中,事平遇誅。

州 引爲主簿。及蘇將卒,以岫貧乏,遺旨賜錢二十萬,固辭拒之。 岫幼而好學,早孤,事母以孝聞。 外祖顏延之早相題目,以爲中外之寶。 蔡興宗臨荆

約,而名行爲時輩所與。博涉多通,尤悉魏、晉以來吉凶故事。約常稱曰:「范公好事該博, 仕齊爲太子家令。

文惠太子之在東宮、沈約之徒以文才見引、岫亦預焉。 岫文雖不逮

列傳第五十 范岫

胡廣 無以加。」南鄉范雲謂人曰:「諸君進止威儀,當問范長頭。」以岫多識前代 舊 事 也

|鄴,承制徵爲尚書吏部郎,參大選。|天監五年,爲散騎常侍、光祿大夫,侍皇太子,給扶。 朝廷亮其哀款,得終喪制。出爲安成內史,創立鈞折行倉,公私弘益。 遷祠部尙書,金紫光祿大夫。卒官。 中丞,吏將送一無所納。永元末,爲輔國將軍、冠軍晉安王長史,行南徐州事。 於界首,故以岫氣淮陰長史迎焉。入爲尚書左丞。丁母憂,居喪過禮。 遷國子博士。 岫長七尺八寸,姿容奇偉。 永明中,魏使至,詔妙選朝士有辭辯者,接使 徵黃門侍郎, 兼御史 朝廷頻起,並不拜 梁武帝平建

文集、禮論、雜儀、字訓行於世。二子廖、偉。 城令時,有梓材巾箱,至數十年,經貴遂不改易。 岫恭敬儼恪,進止以禮,自親喪後,蔬食布衣以終身。每所居官,恒以廉潔著稱。 在晉陵唯作牙管筆一雙,猶以爲費。 爲長 所著

傳昭字茂遠,北地靈州人,晉司隸校尉咸七世孫也。 祖和之,父谈,善三禮,知名宋世。

淡事宋竟陵王誕,誕反坐誅。

昭六歲而孤,哀毁如成人,爲外祖所養。十歲,於朱雀航賣曆日,雍州刺史袁顗見而奇

明帝 之。 及 時 王 愿宗 爾 休 顕嘗 崩,燥造哀策文,乃引昭定其所製,昭有其半焉。 遘遺芳。」太原王延秀薦昭於丹陽尹袁粲,深 . 聞 人通之在坐,並當 來昭 而 悅 之, 所, 固欲致昭 昭 讀 魯自 時名流 若,神色不改。 昭以宋氏多故, 通之貽昭詩曰:「英妙擅 I 顕 斯 曰 遂不 見禮,辟爲郡主簿, 往。 一、此見 | 樂每經昭戶,輒歎曰:「經其戶寂若無 或有稱昭 神 山東,才子 情不 於廷尉 凡, 使諸子從昭受學。 傾洛陽,清 必成佳器。」司 虞愿,乃遣車 塵誰 徒建安 能 迎 昭 嗣, 會

率陋 之物。」累遷尚 罹 王 侍 禍 齊永 讀。 身安粗 明 帝踐阼,引 明 王 嗣 中,累遷 櫔 帝位, 書 [左丞 常插 昭 尚書儀曹郎。先是御史中丞劉休薦昭於齊武帝, 故時臣隸 爲中書通 燭板牀,明帝聞之,賜漆合燭盤,敕曰:「卿有古人之風, 爭求權寵, 事 舍人。時居此職者,皆權傾天下,昭獨 唯昭及 南陽宗夬保身而 已,守正無所參入, 永明 廉靜無所干豫,器服 初, 故賜卿古人 以昭為 竟不 南 郡

披其帷其

(人斯在,[]] 豈非名賢。] 尋爲

總明學士、奉朝請

犯。 昏 尙 旦間 書 乃騰 梁武 參選事 人鬼 帝素 虚 而 相觸, 去。 重 四年 昭,梁臺建, 有 卽 在 頃 任 真。 風 上者鮮 雨總至,飄郡聽事入隍中, 歷位左戶尚 以爲給 以吉終。 事 ,黃門侍郎,領著作, 書,安成 及昭至, 內史。 有人夜 自是郡遂無患, 郡 見 自宋 兼御 甲兵出, 來,兵亂 史中丞。 曰:「傅公善 咸 相接,府舍稱 以 天監三年, 昭 貞 正 一所致。 不可侵 兼五 凶 兵 郡 每

昭曰:「人不害猛獸,猛獸亦不害人。」乃命去檻穽,猛獸竟不爲害。 溪無魚,或有暑月薦昭魚者,昭旣不納,又不欲拒,遂餧于門側。 郡多猛獸爲害,常設檻穽,

之囿 年,爲散騎常侍、金紫光祿大夫。 「與百姓共之,大可喻小,乃敎勿封。 歷秘書監,太常卿,遷臨海太守。 郡有蜜巖,前後太守皆自封固,專收其利。 縣令嘗餉栗,置絹于薄下,昭笑而還之。 昭以周文 普通五

道,人人自以爲不逮。卒,諡曰貞。 則犯法,告之則不可。取而埋之。」其居身行已,不負闇室,類皆如此。 而論之,無所遺失,世稱爲學府。 日端居,以書記爲樂,雖老不衰。博極古今,尤善人物,魏、晉以來,官宦簿閥,姻通內外,舉 昭所莅官,常以淸靜爲政,不尙嚴肅。 性尤篤慎,子婦嘗得家餉牛肉以進昭,昭召其子曰:「食之 居朝廷,無所請謁,不畜私門生,不交私利。 後進宗其學,重其

長子謂,位尙書郎,湘東王外兵參軍。 醑子,準有文才,梁宣帝時,位度支尚書。

監中,位鳥程令,卒於太中大夫。子弘。 之,賓主俱歡,日暮不反。映以昭年高,不可連夜極樂,乃自往候接,同乘而歸。兄弟並已 斑白,時 昭弟映字徽遠,三歲而孤。兄弟友睦,修身勵行,非禮不動。始昭之守臨海,陸倕餞 人美而服焉。及昭卒,映喪之如父,年踰七十,哀戚過禮,服制雖除,每言輒慟。 天

孔休源字慶緒,會稽山陰人,晉尙書沖之八世孫,沖卽開府儀同三司愉之世父也。 曾

祖遙之,宋尚書水部郎。父佩,齊通直郎。曰

善,乃薦之於司徒意陵王,爲西邸學士。 泣。 曰:「董仲舒、華令思何以尙此,可謂後生之準的也。觀此足稱王佐之才。」琅邪王融雅相友 後就吳興沈麟士受經,四路通大義。州舉秀才,太尉徐孝嗣省其策,深善之,謂同坐 **|**休源十一而孤,居喪盡禮,每見父手所寫書,必哀慟流涕不能自勝,見者莫不爲之垂

還家。 及至,命取其常膳,止有赤倉米飯,蒸鮑魚。 霧,驗之今日。」後雲命駕到少府,澄便拂筵整帶,謂當詣已,備水陸之品。 ,商略文義。 曾以祠事入廟,侍中范雲一與相遇,深加褒賞,曰:「不期忽觀清顏,頓祛鄙吝,觀天披 梁臺建,與南陽劉之遴同爲太學博士,當時以爲美選。休源初到都,寓於宗人少府孔 登深以 爲愧。尚書令沈約當朝貴顯,軒蓋盈門,休源或時後來,必虛襟引接,處之坐 其爲通人所推如 此。 **雲食**休源食, 不舉主人之饌。 高談盡 雲駐筯命休源, 日,同載

武帝嘗問 列 傳 第 吏部 Ŧi. + 尚書徐勉求一有學藝解朝儀者,爲尙書儀曹郎, 扎 休 源 勉曰:「孔休源識見清 四七

一四七二

改作, 通 一,詳 練故 毎逮訪 事 ,自晉、宋起居注,誦略上口。」武帝亦素聞之, 前 事,休源卽以所 誦 記 隨 機 斷 決,曾 無疑滯。 東部郎任昉常謂之爲「孔 卽日除兼尚 . 書儀曹郎。 時 獨 多 誦 所

舍人。 采, 休源所有奏議, 咸預 遷 後爲尚書左丞,彈 建康 獄 正,平反辯析, 編 肅禮聞,雅允朝望。 錄。 時罕冤 再 遷長 人。 兼 御史中丞,正色直繩,無所回避,百僚憚之。 後有 時 選 周 人為獄 捨撰禮疑義,自漢、魏至于齊、梁, 司 者, 帝常引休源以勵之。 除 並皆搜 中 書

績,平 以 坐」,人莫 當 行南徐 毎事 十歲兒委卿,善匡翼之,勿憚周昌之舉也。」乃敕晉安王曰:「孔休源 後爲晉安王長史、南郡太守,行荆州 心決斷 師之。」 州 得預 事 o 门請託 焉,其 休源累佐名蕃,甚得人譽,王深相倚仗, 尋始興王憺代鎮荆州, 弗行。 (見敬 如 帝深嘉之。 此。 歷都官尚書。 復爲膽府長史,太守、行府 歷秘 府 書監,復爲晉安王府長史、 州 事。 帝謂曰:「荆州 常於中齋別施 事 總 如 上 故。 入 流 南蘭 榻,云「此是 倫 衝 在州 儀 要,義高 陵太守, 表, 累政 汝 分陝,今 年尙幼, 甚有 心孔長史 别 敕 政 事

行佐,及王 曰:「朕已得 普通 七 薨 年,揚 人,孔休源 而 管州 州 任,時論 刺 史臨 識 通 JII 樂之。 敏, 王宏薨,武帝 實應此選。」乃授宣 神州都 會,簿領殷繁,休源 與 羣臣議代居 一惠將軍 州任 · 監 剖 者,時貴戚 揚 斷 州 如 流 事 傍 王公咸望 休源 無 私 初 爲 遷授。帝 JIJ

中大通二年,加金紫光祿大夫。 在州畫決辭訟,夜覽墳籍。 每車駕巡幸, 常以 軍 或 事

蔬菲 委之。 卿珥貂插筆奏決於休源前,休源怡然無愧,時人名爲兼天子。 而已。 昭明太子薨,有敕夜召休源入宴居殿與羣公參定謀議,立晉安王綱爲皇太子。自公 帝爲之流涕,顧謝舉曰:「孔休源居職淸忠,方欲共康政道,奄至隕沒,朕甚痛 四年,卒,遺令薄葬, 節朔薦

休源 風範强正,明練政體,常以天下爲己任。」武帝深委仗之。 累居顯職,性縝密,未嘗 之。」舉曰:「此人淸介强直,臣竊爲陛下惜之。」諡曰貞子。

言禁中事。 聚書盈七千卷,手自校練。凡奏議彈文勒成十五卷。

長子|雲章頗有父風,[四] 位|東揚州別駕。少子|宗範聰敏有識度,[四] 位中書郎。

郎,有孝行,以母憂毁卒。 江革字休映,濟陽考城人也。 祖齊之,宋都水使者,尚書金部郎。父柔之,齊尚書倉部

閒。 行 艱 還過候革,時 革幼 服闋,與觀俱詣 ,與第四弟觀同生,少孤貧,傍無師友,兄弟自相訓勗,讀書精力不倦。 而 聰敏,早有才思,六歲便解屬文。 大寒 雪,見革弊絮單席,而耽學不倦,嗟歎久之,乃脫其所著襦,幷手割半氈 太學,補 國子生,舉高第。 柔之深加賞器,曰:「此兒必興吾門。」九歲丁 齊中書郎王融、吏部郎謝脁雅相 十六喪母,以孝 欽重。 朓

與革充臥具而去。司徒意陵王聞其名,引爲西邸學士。

經國,命參掌機務,詔誥文檄皆委以具。 汎,便以革代之。 獨以智発。 弱冠舉南徐州秀才。 除尚書駕部郎。 僕射江祏深相引接,而爲太子詹事,啓革爲丞。 時豫章胡諧之行州事, **革防杜形迹**,外人不知。 王融與諧之書令薦革。 | 而誅, |而時權傾朝右, 賓客皆罹其罪,革 諧之方貢琅邪王 以革才堪

吳興沈約、樂安任昉與革書云:「比聞雍府妙選英才,文房之職,總卿昆季,可謂馭二龍於長 途, 騁騏驥於千里。」途次江夏, 觀卒。 參軍,帶中廬令。 義典雅,帝深賞歎之,令與徐勉同掌書記。 中興元年、梁武帝入石頭、時吳興太守袁昂據郡拒義不從、革製書與昂,於坐立成,辭 與弟觀少長共居,不忍離別,苦求同行。 革在雍州,爲府王所禮,款若布衣。 建安王爲雍州刺史,表求管記,以革爲征 以觀爲征北行參軍,兼記室。 北記 時 室

度,新人不如故。」遷御史中丞,彈奏豪權,一無所避。 長史、尋陽太守,行江州府事。徙廬陵王長史,太守、行事如故。 事,多傾意於籤帥,革以正 後爲建康正,頻遷秣陵、建康令,爲政明肅,豪强憚之。歷中書舍人,尚書左丞,晉安王 以琅邪王曇聰代爲行 事。 一直自居,不與典籤趙道智坐。 南州土庶爲之語曰:「故人不道智,新人佞散騎,莫知度不 道智因還都啓事,面 以清嚴爲屬城所憚。 陳革墮事 時少

後 爲 鎭北豫章王長史、廣陵太守。 時魏徐州刺史元法僧降附,革被敕隨府王鎭彭城

才名, 宴,舉 縶 H 屈 扑,革厲色曰:「江革行年六十,不能殺身報主,今日得死爲幸,誓不爲人執筆。」延明 廷。」延明聞之,乃令革作文八寺碑并祭彭祖文,革辭以囚執旣久, 城 乃止。 旣 始 延明使随作欲器漏刻銘, 失守,革素不 見蘇武之節。」於是以爲太尉臨川王長史。 ·酒勸革曰:「卿那不畏延明害。」對曰:「臣行年六十,死不爲夭,豈畏延明。」帝曰:「今 厚加接待。 日給脫粟三升,僅餘性命。 便馬。汎舟而還。 **革稱脚疾不拜,延明將害之,見革辭色嚴正** |革唾駡||晒日:「卿荷國厚恩,已無報答, 途經 會魏帝請中山王元略反北,乃放革及祖暅還朝。 下邳, 為魏人所執 魏徐州刺史安豐王延明聞革 一,更加敬重。 無復 乃爲 心心思。 **虜立銘** 時祖唯 延明將 知知 孤 同 被拘 加籤 負朝 不可

貴 **詩** 遊。」(云) 五. 百 時 [字,云:「唯當勤精進,自强行勝修,豈可作底突, 帝 惑於佛教,朝賢多啓求受戒。革精信因果,而帝未知,謂革不奉佛法,乃賜革覺意 又手敕曰:「果報不可不信,豈得底突如對元 延明邪。」革因乞受菩薩 如彼 必死囚。 以此告江革 丁,幷及諸

餉 郡 丞,行 畤 容獨 武陵王紀在 當故 府 州 事。 人筐篚。」至鎮 東州,頗驕縱,上以 革門生故 反東家 唯資公俸,食不氣味。 多在 滅盾 東, 性弱,不能 聞 革 應 至,並賷持緣道 郡境殷廣,辭訟日數百,革分判辯析, 医正,召<u>革</u>慰遣,乃除<u>武陵</u>王 迎候。 革日:「我通不受 長史、會

刷

侍讌, 給 曾 日 :「革果稱職。」乃除都官尙書。 無疑 舸。 言論 滯 舸艚 必以詩、 人安 偏欹,不得安臥。 吏畏,百城**震**恐。 書, 王因此耽學好文。 或請 將還,贈遺一 琅邪王騫爲山陰令,贓貨狼籍,望風 濟江徙重物以迮輕艚,革旣無物, 典籤沈熾文以王所制詩呈武 無所受,送故依舊訂舫,革並不納,唯 自解。 乃於西陵岸取石十 帝, 帝謂: 府王憚之。 僕 乘 射 徐勉 臺所 毎

革 反省游 尋監吳郡 軍尉,日百姓逾恐。 ,時境內荒儉,劫盜 革乃廣施恩惠,盜賊靜息。 一公行。 革至郡唯有公給仗身二十人,百姓皆懼不能靜寇,

餘片以實之。

其清貧如

此

衣冠 表革 以 一十卷行 此 長子行敏早卒,日之次子德藻 爲 士子翕然 同 武 陵王 行。 權 於世。 貴所疾。 除南 出鎭江州,乃曰:「我得江革文,得革清貧,云 : 歸之。 革歷官 中郎長史、尋陽太守。 乃謝病還家,除光祿大夫,優游閑放,以文酒自娛。 時尚書令何敬容掌選,序用多非其人。 八府長史,四王行事,三爲二千石,傍無姬侍, 徵入爲度支尚書。 **豈能一日忘之,當與其** 好獎進闆閻, 革性强直, 家徒壁立,時以 卒,諡 爲後生延譽, 毎朝宴恒有 日 温子。 同飽。」乃 褒貶, 以此高 由是 有集

德藻字德藻,好學,美風儀,身長七尺四寸。 性至孝, 事親盡禮。 與異產昆弟居,

甚 篤 涉獵 經籍 善屬文。 仕梁爲尚書比部郎, 以父憂去職。 服闋後, 容貌毀瘠, 如居

時

自 與 中 求 書 宰 及 縣 郎 陳武帝受禪,爲祕書監,兼尙書左丞。 補 劉 師知使齊,著北 新 渝 令。 政尚 恩惠,頗有異績。 征道里記三卷。 還除太子中庶子。 尋以本官兼中書舍人。 卒於官, 文帝贈散騎常侍。 遷御史中丞,坐公 天嘉中,兼散騎常侍, 文筆十五卷。 事

多。 後

亂 德藻弟從簡 ,爲任約所害。 ,少有文情,年十七,作采荷調以刺何敬容,爲當時所賞。位 子燥叩頭流血,乞代父命,以身蔽 刃,遂俱見殺,天下痛之。 司徒從事中郎。 椿

亦善屬文,位尚

書右

丞。

常目送之,日:「 之。 孝 嗣 勉 徐 幼 勉字脩仁,東海郯 年 見 之 孤 十八,召爲 歎 貧 早 曰:「此 此 子 勵清節 國 非常器也。」每稱有宰輔 所謂 子生,便 人也。 人中之騏 年六歲,屬霖雨 下帷專學,精 祖長宗、宋武帝霸府行參軍。 驥、必 能 家 之量 致 力 無 千 人 里。 祈 怠 射策甲科,起家 霽,率爾 同 叉嘗謂 時 濟輩 爲 諸 文,見稱 **父融**,南昌 肅 子 日 III 王國 敬 潜宿 · 之。 此 侍 人 相。 郎 祭酒 師 補 也 及長好學,宗 太學博 爾 王 儉 等則 每 而

刷

行

人

時 毎有議定, 勉 理證明允,莫能貶奪,同官咸取 則焉。

焉。 勉謂 遷 臨 海 所 親 王西中郎田曹行參軍,俄徙署都曹。 曰:「王郎名高望促,難可輕斃衣裾。」融後果陷 時現 邪王融 一時才傷, 於法,以此 見推 特相 識 慕悦, 鑒。 累 嘗請交 、遷領

使管書記。 初 與 長沙宣武王游,梁武帝深器賞之,及武帝兵至建鄴,勉於新林謁見,帝甚加恩禮, 及帝 即位,拜中書侍 郎,進領中 書通 事舍人,直內省。 遷臨川王後 軍 諮 議 尙 書

左

丞。

自掌

,樞憲,多所糾舉,時論以

爲 稱

職

軍

長史。

塡委。 至於此。 天監三年,[10]除給事黃門侍郎 勉參掌軍書、劬勞夙夜, 若吾亡後,亦是傳中一 動經數旬,乃一 事。 ,尚書· 更部. 還家。 郎, 參掌大選。 羣犬驚吠,勉歎曰:「吾憂 遷侍中。 時師方侵魏, 國忘家, 候驛

功

以 監 雕 有 虞暠 財貨取通,守道淪退者以貧寒見沒矣。 初,官名互有省置,勉撰 文案塡 六年,除給事中、五兵尚書,遷吏部 求詹事 積,坐客充滿,應對 五官。 勉正色答云…「今夕止可 立選簿奏之,有詔施用。 如流,手不停筆。 尚書。 談風 勉居選官,彝倫有序。 叉該綜 月, 其制閉九品爲十八班,自是貪冒苟進者 百氏,皆避其諱。 不宜及公事。」故時 既閑尺牘,衆善辭 嘗與 人服 闸 其 人 無 夜集, 私。 令, 客

寒 弗許,然後 士,而 稷 詢 一、柳憕 謀。 後 爲 子 嘗於 左 就 、王陳爲侍講。 與王志 一衞將軍,領太子中庶子,侍東宮。 焉。 殿 講孝經,臨川王宏、尚書令沈約備 舊揚、徐首迎主簿,盡 子同迎,偃王以來未之有也。」勉恥以其先爲戲,答旨不恭,由是左遷散騎 時 選極 親賢,妙盡 一選國華中正,取勉子崧充南徐選首。 八譽。 昭明太子尚幼,敕知宫事,太子 二傅, 勉陳讓數四,又與沈約書,求換侍講,詔 勉與國子祭酒張充為執 帝敕之曰:「卿 禮之甚重,每 經,王瑩

常侍,領游

擊將軍

不遵 速。 沒 各 且. 念休反。 蓮 人 子 斯 勉 ,三日大斂。 濫,使萬有其一,怨酷 後 Ŀ 爲 承衾之時,志懣 制 疏 太子詹事,又遷尚書右僕射,詹事如故。 送終之禮,殯以春 故屬纊纔畢,灰釘已具。 曰:「禮記問喪云:『三日而後斂 如 其不 心絕,喪事所資, 奉,加 已多,豈若緩其告斂之辰,口己申其望 日。 以 糾繩。」 潤 屋豪家, 忘狐鼠 悉關 詔 者,以俟其生 可 之顧步 他手。 乃或半晷。 其 奏。 時人間喪事多不遵禮,朝終夕殯,相尙以 ′ ,娘燕雀 愛憎深淺,事 也。 衣 衾棺槨,以速爲榮。 之徊 三日而 生之冀。 翔,傷情 實 難原。 不生,亦不 滅理, 請自今士庶宜悉 如 覘 生矣。』頃· 莫此 視 親 或 戚 (爽) 存 徒 隸,

此 職,常參掌衡 叉 除 尙 書 僕射 石 甚 中 得 衞 土 將 小 軍 禁省中事,未嘗漏泄,每有表奏,輒焚藁草。 勉以舊 恩,繼 升 重 位,盡 心 奉上,知 無不 為。 博 爱自小選迄于 通經史,多識

列

傳

第

前載。

齊世

王儉居職已後,莫有逮者。

朝儀國典、昏冠吉凶,勉皆預圖

初,勉受詔知撰五禮,普通六年功畢,表上之曰:

散略,百有餘篇。 旅不 革之風,是則未暇 禮 命叔孫於外野,方知帝王之爲貴。 有周,憲章尤備,因殷革夏,損益可知。 豆斯輟 大壞,王道旣衰,官守斯文,日失其序。 祭不以禮,則不齊不莊,喪紀不以禮,則背死忘生者衆,賓客不以禮,則朝覲失其儀,軍 千,其大歸有五,卽宗伯所掌典禮,吉爲上,凶次之,賓次之,軍次之,嘉爲下也。 ,荀顗制之於前,摯虞删之於末。 以 夫禮以安上化人,弘風訓俗,經國家,利後嗣者也。 禮,則致亂於師律,冠昏不以禮,則男女失其時。 方領矩步之容,事滅於旌鼓,蘭臺石室之典,用盡於帷蓋。 雖寫以尺簡,而終闕平奏。 末葉紛綸、遞有興毀。及東京曹褒、南宮制述、集其 旣而中原喪亂,罕有所遺,江左草創,因循 暴秦滅學,掃地無餘。漢氏鬱興,日不暇給, 雖復經禮三百,曲禮三千,經文三百,威儀三 其後兵革相尋,異端互起,章句旣淪, 爲國修身,於斯攸急。 唐、虞、三代,咸必由之。 至乎晉氏,爱定新 训 泊周室 已。釐 故祠 在乎 俎 猶

於業定。 伏惟陛下睿明啓運,先天改物,三三撥亂惟武,經俗以文。 伏尋所定五禮,起齊永明二年,太子步兵校尉伏曼容表求制一代禮樂。 作樂在 乎功成,制禮 于時 弘

鎭 遷官,以五 總參其事。 賀瑒掌賓 右軍 人相 事。 於此 建武 年,猶 中書侍 議 年,佟之啓審省置之宜,敕使外詳。 定,以爲 參議,置 軍 测撰。 將軍 助,抄撰其中。 遇 記室參軍 時 四 未克就 郎周捨、庾於陵二人復豫參知。 禮局住在國子學中門外, 禍,又多零落。 年,胤還東山,齊明帝敕委尚書令徐孝嗣,舊事本末,隨在南第。 永準。」於是尚書僕射沈約等參議,請五禮各置舊學士一人,人各自舉學士 新舊學士十人,止 丹陽 、禮,征虜記室參軍陸璉掌 欲且省禮局,併還尚書儀曹。 經博士繆昭掌凶 佟之亡後, 明山賓掌吉禮,中軍騎兵參軍嚴植之掌凶 尹 及文憲薨, 沈約、 有疑者依 太常 當時鳩集所餘, 以鎭北諮議參軍伏暅代之。 修五 遺文散逸,又以事 卿 禮。 張充 前漢石渠、後漢白虎,隨源以聞,請旨斷決。 禮,諮票衞將軍丹陽 復以 東昏之時, 丁軍禮, 及 時尚書參詳,以天地 禮儀深廣, 臣 權付尚書左丞蔡仲熊、 三人同 若有疑義,所掌學士當職先立議, 韶旨云:「禮壞樂缺, 右軍 頻有 付國子祭酒何胤, 參軍事司馬褧掌嘉 '參厥務',臣又奉別敕總知其 記載殘缺, 軍火,其所散失, 尹王儉, 後又以暅代嚴植之掌 一禮,中軍田曹行參軍 初革,庶務權輿,宜俟隆平,徐 宜須博論, 故國 學士亦分住郡 驍騎將軍 經涉九 [異家殊, 禮,尚書右 叉踰 共盡其致,更使 載, 太半。 何佟之共掌 永元 中, 乃 以 。 事。 通諮五禮舊 凶 實宜以時 猶 禮 丞 籴 中, 復未畢。 太太常 舊學 末 何 天監元 制 佟之 文 孝嗣 作 順 使 土 修 丞 其 歷

學士 之能擬,豈孝章之足云。 莫不網羅經誥,玉振金聲。 一及參知各言同異,條牒啓聞,決之制旨。疑事旣多,歲時又積,制旨裁斷, 凡諸奏決,皆載篇首,具列聖旨,爲不刊之則。 其數不 寧孝宣

帙,一千一百七十六卷,八千一十九條。 月十七日上尚書,合四十有七帙,五百一十四卷,五千六百九十三條。大凡一百二十 尚書,合十有七帙,一百三十三卷,五百四十五條。 |普通五年二月始獲洗畢。 十日上尚書,合二十有六帙,二百二十四卷,一千五條。巡禮儀注以天監十一年十一 日上尚書,合十有八帙,一百八十九卷,二百四十條。 書,合十有二帙,一百一十六卷,五百三十六條。 五禮之職,事有繁簡,及其列畢,不得同時。 又列副秘閣及五經典書各一通,繕寫校定,以 賓禮儀注以天監六年五 嘉禮儀法以天監六年五月七日上尚 軍禮儀注以天監 吉禮儀注 以天監 九 干一 年十 月 · 月二 年十一月 二十月 一十九 上

周,永言慚惕,無忘寤寐。 隨事 庸識,謬司其任,淹留歷稔,允當斯責。 ·附益。 竊以撰正履禮,歷代罕就,皇明在運,厥功克成。 質文相變,故其數兼倍,猶如八卦之爻,因而重之,錯綜成六十四也。臣以 自今春輿駕將親六師,搜尋軍禮,閱其條章,靡不該備,可以 兼勒成之初,未遑表上,實由才輕務廣,思力不 周代三千,舉其盈數,今之八千,

懸諸日月,頒之天下者矣。

詔有司案以遵行。

脚轉劇,久闕朝觀,固陳求解,自己詔許疾差還省。 尋加中書令,勉以疾求解內任,詔不許,乃令停下省,三日一朝,有事遣主書論決。

患

|勉雖居顯職,不營產業,家無畜積,奉祿分贍親族之貧乏者。 門人故舊或從容致言,|勉

乃答曰:「人遺子孫以財,我遺之淸白。子孫才也,則自致輜輧,如不才,終爲佗有。」嘗爲書

戒其子崧日:

致,亦令貨殖聚斂。若此衆事,皆距而不納。非謂拔葵去織,且欲省息紛紜。 貴以來,將三十載,門人故舊,承薦便宜,或使創闢田園,或勸興立邸店,又欲舳艫運 經」。詳求此言,信非徒語。吾雖不敏,實有本志,庶得遵奉斯義,不敢墜失。 慶,故臻此爾。古人所謂「以清白遺子孫,不亦厚乎」。又云「遺子黃金滿籯,不如一 逢, 遂至今日, 尊官厚祿, 可謂備之。 每念叨竊若斯, 豈由才致, 仰藉先門風範 吾家本淸廉,故常居貧素。 至於產業之事,所未嘗言,非直不經營而已。 所以顯 及以福 薄躬遭

際閑曠,終可爲宅,儻獲懸車致事,實欲歌哭於斯。 中年聊於東田開營小園者,非存播藝以要利,政欲穿池種樹,少寄情賞。 慧日、十住等旣應營昏,又須住止。 叉以郊

有所收穫,汝可自分贍內外大小,宜令得所,非吾所知,又復應霑之諸女爾。汝旣居 汝所買湖熟田地,甚爲鳥鹵,彌復可安,江於所以如此,非物競故也。雖事異寢丘,聊可 且釋氏之敎,以財物謂之外命。外典亦稱「何以聚人曰財」。況汝常情,安得忘此。聞 華樓逈榭,頗有臨眺之美,孤峯叢薄,不無糾紛之興。 瀆中並饒苻孲,口鬥湖裏殊富芰 得,何以至此?由吾經始歷年,粗已成立,桃李茂密,桐竹成陰,塍陌交通,渠畎相屬。 途而輟,郊間之園,遂不辦保,貨與韋黯,乃獲百金。 成就兩宅,已消其半。 近修東邊兒孫二宅,乃藉十住南還之資,其中所須,猶爲不少。旣牽挽不至,又不可中 **休沐**,用託 第,連闥洞房,宛其死矣,定是誰室。但不能不爲培塿之山,聚石移果,雜以花卉,以娛 幅,意亦謂此逆旅舍爾,何事須華。 吾清明門宅無相容處,所以爾者,亦復有以。 雖云人外,城闕密邇,韋生欲之,亦雅有情趣。追述此事,非有吝心,蓋是事意所 物之與我,相校幾何哉。此直所餘,今以分汝營小田舍,口思親累旣多,理亦須此。 孔子曰:「居家理事,可移於官。」旣已營之,宜使成立,進退兩亡,更貽恥笑。 若 憶謝靈運山家詩云:「中爲天地物,今成鄙夫有。」吾此園有之二十載,今爲天地 性靈。 隨便架立,不存廣大,唯功德處小以爲好,所以內中逼促,無復房宇。 常恨時人謂是我宅。 前割西邊施宣武寺,旣失西廂, 古往今來,豪富繼踵,高門甲 尋園價所 不復方

長,故有此及。

常以待終,不宜復勞家間細務。汝交關旣定,此書又行,凡所資須,付給如別。自茲以 後,吾不復言及田事,汝亦勿復與吾言之。假使|堯水|陽旱,豈如之何。若其滿庾盈箱, 事資產,暨立墅舍,似乖舊業,陳其始末,無愧懷抱。 兼吾年時朽暮,心力稍單,牽課奉 其身而身先。」若能爾者,更招巨利。汝當自勗,見賢思齊,不宜忽略以棄日也。棄日 今且望汝全吾此志,則無所恨矣。 爾之幸遇,如斯之事,並無俟令吾知也。[1世]記云:「夫孝者善繼人之志,善述人之事。」 負杖躡履,逍遙陋館,臨池觀魚,披林聽鳥,濁酒一杯,彈琴一曲,求數刻之暫樂,庶居 公,略不克舉,其中餘暇,裁可自休。或復冬日之陽,夏日之陰,良辰美景,文案間隟, 乃是棄身,身名美惡,豈不大哉,可不愼歟!今之所敕,略言此意。政謂爲家以來,不 凡爲人長,殊復不易,當使中外諧緝,人無間言,先物後己,然後可貴。老生云:「後

吳聲、西曲女妓各一部,並華少,賚勉,因此頗好聲酒。祿奉之外,月別給錢十萬,信遇之 第二子悱卒,痛悼甚至,不欲久廢王務,乃爲答客以自喻焉。普通末,武帝自算擇後宮

深,故無與匹。

中大通中,又以疾自陳,移授特進、右光祿大夫、侍中、中衞將軍,置佐史,餘如故。日日

及范雲,亦不阿意苟合,後知政事者莫及,梁世之言相者稱范、徐云。 舉哀朝堂。 遂停輿駕。 增親信四十人。 有司奏諡「居敬行簡曰簡」,帝益「執心決斷曰肅」,因諡簡肅公。 及卒,帝聞而流涕。 兩宮參問,冠蓋結轍。有敕每欲臨幸,勉以拜伏有虧,頻啓停出,詔許之, 卽日車駕臨殯,贈右光祿大夫、開府儀同三司。 勉雖骨鯁不 皇太子亦

撰會林五十卷。凡所著前後二集五十卷,又爲人章表集十卷。日己 卷、左丞彈事五卷。在選曹、撰選品三卷。齊時撰太廟祝文二卷。以孔、釋二教殊途同歸, 善屬文,勤著述,雖當機務,下筆不休。常以起居注煩雜,乃撰爲流別起居注六百六十 大同三年,故佐史尚書左丞劉覽等詣闕陳勉行狀,請刊石紀德,即降詔立碑於墓焉。

坊者歷稔。以足疾出爲湘東王友,俄遷晉安內史。

中、「同日著作郎、桂陽太守。父勇慧、齊太子家令、冗從僕射。 許懋字昭哲,高陽新城人,魏鎭北將軍尤九世孫也。五世祖詢,晉徵士。祖珪,宋給事

懋少孤,性至孝,居父憂執喪過禮。篤志好學,爲州黨所稱。十四入太學,受毛詩,旦

領 師說,晚 而 覆講, 坐下聽者常數十百人, 因撰風雅比興義十五卷,三三盛行於時。 尤明故

事,稱爲儀注學。

聞 而召之,侍講於崇明殿。後兼國子博士,與司馬褧同志友善。 起家後軍豫章王行參軍,四三轉法曹。 舉秀才,遷驃騎大將軍儀同中記室。 僕射江祏甚推重之, 文惠太子 號爲

拜中庶子。 政有能名。 議,嘉納之,由是遂停。十年,轉太子家令。凡諸禮儀,多所刊正。 經史笥。 時有請會稽封禪者,武帝因集儒學士草封禪儀,將行焉,懋建議獨以爲不可。帝見其 是歲卒。撰述行記四卷,有集十五卷。子亨。 加散騎常侍,轉天門太守。中大通三年,皇太子召與諸儒錄長春義記。 以足疾,出爲始平太守, 四年,

參軍。 掌書記,府政朝務,一以委之。晉安王承制,授給事黃門侍郎。 梁太淸初,爲西中郎記室,兼太常丞。 侯景之亂,避地郢州。 會梁邵陵王自東至,引爲諮議 亭字亨道,少傳家業,孤介有節行。 王僧辯之襲郢州、素聞其名、召爲儀同從事中郎。遷太尉從事中郎,與吳興沈炯對 博通羣書,多識前代舊事,甚爲南陽劉之遴所重

列

屍,於方山同坎埋瘞,至是無敢言者,亭以故吏抗表請葬之。 陳武帝受禪,爲太中大夫,領大著作,知梁史事。 初僧辯之誅也,所司收僧辯及其子頠 與故義徐陵、張種 、孔奐等相

帝,宣帝問序,亨勸勿奉詔。 光大中,宣帝入輔,以亨貞正有古人風,甚相欽重,常以師禮事之。 宣帝卽位,拜衞尉卿。 卒於官。 及到仲舉之謀出宣

率以家財營葬,凡七極,皆改窆焉。

筆六卷。子善心,位尙書度支侍郞。 序初撰齊書幷志五十卷,遇亂亡失。後撰梁史,成者五十八卷。 梁太清之後, 所製文

叡妻琅邪王奐女,與爲雍州刺史,啓叡爲府長史。與誅,叡亦見害。 族衰悴,誠不如昔,若此旨爲虚,故不足降,此旨爲實,彌不可聞。」仕齊歷司徒從事中郎。 之得発。 元素娶尚書僕射琅邪王僧朗女,生子寧早卒,寧遺腹生子叡,亦當從戮,僧朗啓孝武救 殷鈞字季和,陳郡長平人,晉荆州刺史仲堪五世孫也。會祖元素,宋南康相,坐元凶 叡有口辯,司徒褚彦回甚重之,謂曰:「諸殷自荆州以來無出卿。」叡斂容答曰:「殷

鈞九歲以孝聞,及長,恬靜簡交游,好學有思理,善隸書,爲當時楷法。 南鄉范雲、樂安

校定祕閣四部書,更爲目錄。又受詔料檢西省法書古迹,列爲品目。 任 助並稱美之。 梁武帝與叡少故舊,以女永興公主妻鈞,拜駙馬都尉。 累遷侍中,東宮學士。 歷祕 書丞, 在職啓

先滿壁爲殷叡字,鈞輒流涕以出,主命婢束而反之。 自宋、齊以來,公主多驕淫無行,永興主加以險虐。 **鈞不勝怒而言於帝,帝以犀如意擊主 鈞形貌短小,爲主所憎,每被召入,**

碎於背,然猶恨鈞。

德,劫盜皆奔出境。嘗禽劫帥,不加考掠,和言誚責。 爲善人。郡舊多山瘧,更暑必動,自鈞在任,郡境無復瘧疾。 自侍中出爲王府諮議,後爲明威將軍、臨川內史。 劫帥稽顙乞改過,鈞便命遣之,後遂 鈞體羸多疾,閉閣 臥理,而百姓化其

改領中庶子,後爲國子祭酒。卒,諡貞。二子構、渥。鈞宗人芸。 母憂去職,居喪過禮,昭明太子憂之,手書誡喻。 服闋,爲散騎常侍,領步兵校尉,侍東

憲見之,深相歎賞。 芸字灌蔬,倜儻不拘細行,然不妄交游,門無雜客。 天監中,位祕書監、司徒左長史。後直東宮學士省,卒。 勵精勤學,博洽羣書。 幼而廬江何

序懷道好古,以博覽歸譽,其所以折議封禪,求葬僧辯,正直存焉, 光日月、致位公輔、提衡端執、時無異議、爲梁氏宗臣、信爲美矣。 之以文采、其所以取高時主、豈徒然哉。 「仁者有勇」,斯言近之。 論 日 范懋賓之德美,傅茂遠之淸令,孔休源之政事,江休映之强直,並加之以學植,飾 殷鈞德業自居,又加之以政績,文質斌斌,亦足稱也。 徐勉少而勵志,發憤忘食,修身愼行,運屬興王,依 許懋業藝, 豈唯文義而已。 以經笥見推, 古人云

校勘記

- 披其帷其人斯在 「帷」各本作「室」,據梁書改。 按室不可以言披、通志亦作「帷」。
- Cヨン父佩齊通直郎「佩」梁書作「珮」、冊府元龜七五三同。
- 後 就吳興 沈麟士受經 麟 士」梁書作「驎士」。 按南齊書有沈驎士傳、麟、麟本一字。
- 【四〕長子雲章頗有父風 「雲章」梁書作「雲童」。
- (五) 少子宗範聰敏有識度「宗範」梁書作「宗軌」。
- ベレ 以此告江革幷及諸貴遊 「江」、「幷」二字據梁書補。 按上「乃賜革覺意詩五百字」,則此末二句

不應四字爲句也。

[4] 革反省遊軍尉 「反」各本作「乃」,據梁書改。

- 我得江革文得革清貧 南、北監本、殿本、局本「文」作「又」;大德本、汲古閣本作「文」。 按梁書
- 云:「我得江革,文華清麗。」疑此有誤脫。
- [九] 長子行敏早卒 「行」字各本並脫,據梁書、通志補。
- [10] 天監三年 「三年」梁書、通鑑作「二年」。
- 豈若緩其告斂之辰 「若」各本作「不」,據梁書、册府元龜五七九改。
- 先天改物 「先」各本作「光」、據梁書、册府元龜五六三改。
- ハゴノ・夏は、万宝さからと、「いっと、みずまって以る」の

「陳」、「求」各本誤倒,據梁書、册府元龜四六一乙正。

固陳求解

- [18] 瀆中並饒苻茷 「苻夜」梁書作「茲蔣」。
- [15] 此直所餘今以分汝營小田舍 「直」梁書、通志作「吾」。
- 聞汝所買湖熟田地甚爲层鹵彌復可安 「湖熟」、「可」、梁書作「姑孰」、「何」。
- 如斯之事 並無俟令吾知也 「並」上各本衍「過」字,據梁書删。
- 二八〕餘如故 「餘」各本作「扶」,據梁書改。
- 章表集」梁書作「又爲婦人集」。 凡所著前後二集五十卷又爲人章表集十卷 「五十卷」 梁書作「四十五卷」,通志同。 「叉爲人
- 10〕宋給事中 「中」字各本並脫,據梁書及陳書許亨傳補。

列

傳

第

五.

+

校

勘

記

口己 起家後軍豫章王行參軍 「後軍」各本作「後爲」,據梁書、通志改。

四九二

南史卷六十一

列傳第五十一

陳伯之 陳慶之 子昕 喧 蘭欽

船、三船人斫之,獲其左耳。後隨鄉人車騎將軍王廣之,廣之愛其勇,每夜臥下榻,征伐常 進, 田 將自隨。 主所見,呵之曰:「楚子莫動」」伯之曰:「君稻幸多,取一擔何苦。」田主將執之。 曰:「楚子定何如」]田主皆反走,徐擔稻而歸。及年長,在鍾離數爲劫盜,嘗授面 陳伯之,濟陰睢陵人也。 頻以戰功,累遷驃騎司馬,封魚復縣伯。 年十三四,好著獺皮冠,帶刺刀,候鄰里稻熟,輒偸刈之。嘗爲 因拔 覘 刀而 人

及 平,武帝使說伯之,即以爲江州刺史。子武牙爲徐州刺史。[三]伯之雖受命,猶懷 其猶豫逼之,伯之退保南湖,然後歸附,與衆軍俱下。 梁武起兵,東昏假伯之節,督前驅諸軍事、豫州刺史,轉江州, 建康城未平,每降人出,怕之輒喚 據尋陽以拒梁武。 兩端 郢城

列

卿,須卿降, 與耳語。 帝疑其復懷翻覆,會東昏將鄭伯倫降,帝使過伯之,謂曰:「城中甚忿卿,欲遣信誘 當生割卿手脚。 卿若不降,復欲遣刺客殺卿。」伯之大懼, 自是無異志矣。 城

平,封豐城縣公,遣之鎭。

伯之不識書,及還江州,得文牒辭訟,唯作大諾而已。 有事,典籤傳口語, 與奪決於

主者。

州 見親狎。及伯之鄉人朱龍符為長流參軍,並乘伯之愚闇,恣行姦險 詎非爲我出。今者一行,事若無成,入魏,何減作河南郡。」於是投伯之書佐王思穆事之,大 天下草創,喪亂未可知。陳伯之擁强兵在江州,非代來臣,有自疑之意。且復熒惑守南斗, 不好欄,堅拒之。網益怒,私語所知曰:「建武以後,草澤底下悉成貴人,吾何罪而見棄。今 用繕爲別駕,承忠爲記室參軍。河南褚緭,都下之薄行者,武帝卽位,頻造尚書范雲。雲 伯之與豫章人鄧繕、永興人戴承忠並有舊,「『」繕經藏伯之息免禍,伯之尤德之。及在

忠等每贊成之。伯之謂繕:「今段啓卿,若復不得,便與卿共下。」使反,武帝敕部內一郡處 於是日夜說伯之云:「臺家府庫空竭,無復器仗,三倉無米。此萬世一時,機不可失。」緭、承 別駕鄧繕,伯之並不受命,曰:「龍符健兒,鄧繕在事有績。 伯之子武牙時爲直閤將軍,武帝手疏龍符罪親付武牙,武牙封示伯之。帝又遣代江州 臺所遣別駕,請以爲中從事。」繕

殺牲以盟。 見力運糧速下。 同 心 ,<u>臨川內史王觀,僧虔之孫,人身不惡,可召爲長史,以代元沖。」伯之從之,仍以</u>緭爲專 伯之於是集府州佐史、謂曰:「奉齊建安王教,率江北義勇十萬已次六合,見使以江州 伯之先歃,長史以下次第歃。 我荷明帝厚恩,誓以死報。」使網詐為蕭寶寅書以示僚佐,於聽事前為壇 網說伯之:「今舉大事,宜引人望。 程元沖不與人

戴元 徑至聽事前。 則爲內應。怕之每旦常作伎,日晡輒臥,左右仗身皆休息。元沖因其解弛,從北門入, 豫章太守鄭伯倫起郡兵拒守。 伯之聞叫,自率出盪。 程元沖旣失職,於家合率數百人,使伯之典籤呂孝通、 元沖力不能敵,走逃廬山。

陽太守,承忠輔義將軍,龍符豫州刺史。

伯之爲使持節、散騎常侍、都督淮南諸軍事、平南將軍、光祿大夫、曲江縣侯。 能禁,反見殺。」武帝遣王茂討伯之,敗走,間道亡命出江北,與子武牙及褚緭俱入魏。 伯之遣使還報武牙兄弟、武牙等走盱眙、盱眙人徐文安、莊興紹、張顯明邀擊之、「图〕不 魏以

天監四年,韶太尉臨川王宏北侵,宏命記室丘遲私與之書曰:

鵠以 也! 高翔。 如 陳將軍足下,無恙,幸甚,幸甚。將軍勇冠三軍,才爲世出。 何一 旦爲奔亡之虜,聞鳴鏑而股戰,對穹廬以屈膝,又何劣邪。尋君去就之際, 昔因機變化,遭遇時主,立功立事,開國稱孤,朱輪華轂,擁旄萬里,何其壯 棄燕雀之毛羽,慕鴻

列

非有他故,直以不能內審諸己,外受流言,沈迷猖蹙,以至於此。

並刑馬作誓,傳之子孫。將軍獨靦顏借命,驅馳氈裘之長,寧不哀哉! 屈法申恩,吞舟是漏。將軍松栢不翦,親戚安居,高堂未傾,愛妾尚在。 將軍無昔人之罪,而勳重於當代。夫迷塗知反,往哲是與,不遠而復,先典攸高。主上 何可言。當今功臣名將,雁行有序,佩紫懷黃,讚帷幄之謀,乘軺建節,奉疆埸之任。 一二談也。昔朱鮪涉血於友于,張繡傳刃於愛子,漢主不以爲疑,魏君待之若舊。 聖朝赦罪責功,棄瑕錄用,推赤心於天下,安反側於萬物,此將軍之所知, 悠悠爾心,亦 非假僕

巢於飛幕之上,不亦惑乎! 漢舊邦,無取雜種。北虜僭號中原,多歷年所,惡積禍盈,理至焦爛。況僞孽昏狡,自 相夷戮,部落攜離,質豪猜貳。方當係頸蠻邸,縣首藁街。 夫以慕容超之强,身送東市,姚泓之盛,面縛西都。故知霜露所均,不育異類,姬 而將軍魚游於沸鼎之中,燕

登陴, 豈不愴恨。 所以廉公之思趙將, 吳子之泣西河, 人之情也, 將軍獨無情哉。 想早 暮春三月,江南草長,雜花生樹,羣鸎亂飛。見故國之旗鼓,感生平於疇日, 撫絃

當今皇帝盛明,天下安樂,白環西獻,楛矢東來,夜郎、滇池解辨請職,朝鮮、昌海

勵良規,自求多福

蹶角受化;唯北狄野心,掘强沙塞之間,欲延歲月之命耳。 中軍 臨]]] 殿 下,明德茂親,

總茲戎重,方弔人洛汭,伐罪秦中,若遂不改,方思僕言。 聊布往懷,君其詳之。

伯之得書,乃於壽陽雜衆八千歸降。武牙爲魏人所殺。

伯之既至,以爲平北將軍 、西豫州刺史、永新縣侯。 未之任,復爲驍騎將軍, 又爲太中

大夫。久之,卒於家。其子猶有在覷者。

是,不知非昔非。」魏人怒,出爲始平太守。 褚網在魏, 魏人欲用之。 魏元會,網戲為詩曰:「帽上著籠冠, 日日行獵,墮馬而死 袴上著朱衣, 不知是今

寐,唯慶之不寢,聞呼卽至,甚見親賞。 陳慶之字子雲,義興國 山人也。 幼隨從梁武帝。 從平建鄴, 稍爲主書,散財聚士,恒思立效。 帝性好基, 每從夜至旦不輟, 等輩皆 除奉

朝詩。

明、臨淮王元彧率衆十萬來拒。 率諸軍應接。 普 通中, 魏徐州刺史元法僧於彭城求入內附,以慶之爲武威將軍, 還除宣猛 將軍、文德主帥,仍率軍送豫章王綜入鎭徐州。 延明先遣其別將丘大千觀兵近境,慶之擊破之。 與胡龍牙、成景儁 魏遣安豐王元延 後豫章王

棄軍奔魏,慶之乃斬關夜退,軍士獲全。

長 鈞 別築兩城相拒,慶之攻拔之,憲力屈遂降,慶之入據其城。 普通七年,安西將軍元樹出征壽春,除慶之假節、 總知軍 事。 轉東宮直閣 魏豫州刺史李憲遣其子

徐州。 戰,若欲班師,慶之別有密敕。」仲宗壯其計,乃從之。魏人掎角作十三城,慶之陷其四壘。 援兵復欲築壘於軍後。 仲宗等恐腹背受敵,謀退。 慶之杖節軍門,曰:「須虜圍合,然後 恐。慶之還共諸將連營西進,據渦陽城,與魏相持,自春至冬,各數十百戰。 十里。韋放曰:「賊鋒必是輕銳,戰捷不足爲功,如不利,沮我軍勢,不如勿擊。」慶之曰:「 九城兵甲猶盛,乃陳其俘馘,鼓譟攻之,遂奔潰,斬獲略盡,渦水咽流。 人遠來,皆已疲倦,須挫其氣,必無不敗之理。」於是與麾下五百騎奔擊,破其前軍,魏人震 大通 衆軍乘勝前頓城父。武帝嘉焉,手詔慰勉之。 元年, 隸領軍曹仲宗伐渦陽,魏遣常山王元昭等來援,「己前軍至駝澗,去渦陽 韶以渦陽之地置西 師老氣衰,魏之 與 四 魏

帝號,授慶之前軍大都督。自銍縣進,遂至睢陽。 大通初,魏北海王元顥來降,武帝以慶之爲假節、飇勇將軍,送顥還北。 魏將丘大千有衆七萬,分築九壘以拒。 顥於渙水即魏

慶之自旦至申,攻陷其三,大千乃降。「私」

時魏濟陰王元暉業率羽林庶子二萬人來救梁、宋、「も」進屯考城。 慶之攻陷其城,禽暉

業,仍趣大梁。 顥進慶之徐州刺史、武都郡王、 [<]仍率衆而 四。

獲発。 踰堞而入,遂剋之。 羆據虎牢。 復將至,先遣其驃騎將軍爾朱兆、騎將魯安等援楊昱,又遣右僕射爾朱世隆、西荆州 **法駕迎顥入洛陽宮,御前殿,改元大赦。** 十餘萬。 魏左僕射楊昱等率御仗羽林宗子庶子衆七萬據滎陽拒顥,兵强城固,魏將元天穆 進赴虎牢,爾朱世隆棄城走。 今日之事,義不圖存,須平其城壘。」一鼓悉使登城,壯士東陽宋景休、義興魚 時滎陽未拔,士衆皆恐。慶之乃解鞍秣馬,宣喻衆曰:「我等纔有七千,賊衆四 俄而魏陣外合,慶之率精兵三千大破之。魯安於陣乞降,天穆、兆單騎 魏孝莊出居河北。 顥以慶之爲車騎大將軍。 其臨淮王彧、安豐王延明率百僚備 刺 天愍 史王 大軍

大將莫自牢,千兵萬馬避白袍。」自發銍縣至洛陽,十四旬平三十二城,四十七戰,所向 掩襲, 並降, 天穆與十餘騎北度河。慶之麾下悉著白袍, 所向披靡。先是洛中謠曰:「名軍 魏上黨王元天穆又攻拔大梁,分遣王老生、費穆據虎牢,刁宣、刁雙入梁、宋,慶之隨方

無前。

淮計將背梁,以時事未安,且資慶之力用。慶之心知之,乃說顯曰:「今遠來至此,未伏尙 ,宜啓天子,更請精兵,<u>并勒諸州有南人沒此者,悉須部送。」顯欲從之,元延明說顯日,</u> 初,魏莊帝單騎度河,宮衞嬪侍無改於常。 願旣得志,荒于酒色,不復視事,與<u>安豐、臨</u>

列

傅

第

五十一

時。」慶之不從。,顥前以慶之爲徐州刺史,因求之鎭,顥心憚之,遂不遣。 賞,震主身危,二事旣有,將軍豈得無慮?今將軍威震中原,聲動河塞,屠顯據洛,則千載 之,乃密啓武帝停軍。 「慶之兵不出數千,已自難制,今更增其衆,寧肯爲用?」魏之宗社,於斯而滅。」願由是疑慶 洛下南人不出一萬,魏人十倍。軍副馬佛念言於慶之曰:「勳高 不

落鬚髮爲沙門,問行至豫州,州人程道雍等潛送出汝陰。 敗,走至臨潁被禽,洛陽復入魏。慶之馬步數千結陣東反,榮親自來追,軍人死散。 天文人劉靈助謂榮曰:「不出十日,河南大定。」榮乃爲栰濟自硤石,與顯戰於河橋。 日,凡所得城一時歸魏,慶之度河守北中郎城。三日十一戰,傷殺甚衆。 魏將爾朱榮、爾朱世隆、元天穆、爾朱兆等衆號百萬,挾魏帝來攻顥。 至都,仍以功除右衞將軍,封永 樂將退還,時有善 顥據洛陽六十五 慶之乃 |顥大

之,「心攻陷北徐州。 出為 北兗州刺史、都督緣淮諸軍事。 詔慶之討焉。慶之斬伯寵、僧强,傳其首。 會有祆賊沙門僧强自稱爲帝,土豪蔡伯寵起兵應

揚州刺 陽鎭兵,停水陸轉運,江湘諸州並得休息。 中大通二年,除南北司二州刺史,加都督。慶之至鎮,遂圍縣瓠,破魏潁州刺史婁起、 史是云寶於溱水。[10]又破行臺孫騰、豫州刺史堯雄、梁州刺史司 開田六千頃,二年之後,倉廩充實。 馬恭於楚城。 **叉表省南司** 罷 義

州,復安陸郡,置上明郡。

景 棄輜重走。是歲豫州饑,慶之開倉振給,多所全濟。州人李昇等八百人表求樹碑頌德, 大同二年,魏遣將侯景攻下楚州,執刺史桓和。 景仍進軍淮上,慶之破之。 時大寒雪,

詔許焉。 五年卒,諡曰武。

慶之性祗愼,每奉詔敕,必洗沐拜受。儉素不衣紈綺,不好絲竹。 射不穿札,馬非所

便,而善撫軍士,能得其死力。長子昭嗣。

梁世寒門達者唯慶之與兪藥,藥初爲武帝左右,帝謂曰:「兪氏無先賢,世人云『兪錢』,

非 、君子所宜,改姓喩。」薬曰:「當令姓自於臣。」歷位雲旗將軍,安州刺史。

慶之第五子町字君章,七歲能騎射。十二隨父入洛,遇疾還都,詣鴻臚卿朱异。

北間事,断聚土畫城,指麾分別,异甚奇之。

慶之在縣瓠、魏驍將善雄子寶樂特爲敢勇、自己求單騎校戰,昕躍馬直趣寶樂,雄即潰

散。後爲臨川太守。

乃板町爲雲騎將軍代質,未及下渚,景已度江,爲景所禽。 太清二年,侯景圍歷陽,敕召町還。町啓云:「采石急須重鎭,王質水軍輕弱, 令收集部曲將用之,断誓而 恐虜必

列傳

之。遂立盟射城中,遣断夜縋而入。武帝大喜,敕卽受降。 景使其儀同范桃棒嚴禁之,断因說桃棒令率所領歸降,襲殺王偉、宋子仙。 簡文遲疑,累日不決。 外事泄, 桃棒許

五〇二

断弗之知,猶依期而下。 景邀得之,逼断令更射書城中,云「桃棒且輕將數十人先入」。 景欲

兄子秀常憂之,致書於暄友人何胥,冀以諷諫。暄聞之,與秀書曰: 少弟暄,學不師受,文才俊逸。尤嗜酒,無節操,偏歷王公門,沈湎諠譊,過差非度。 其

吾見張時, 伊已六十, 自言引滿大勝少年時。 吾今所進亦多於往日。 子不聞斯言。 與張季舒耳。 旦見汝書與孝典,陳吾飲酒過差。吾有此好五十餘年,昔吳國張長公亦稱耽嗜, 吾方與此子交歡於地下,汝欲夭吾所志邪。昔阮咸、阮籍同遊竹林,宣 王湛能玄言巧騎,武子呼爲癡叔。何陳留之風不嗣,太原之氣巋然,翻 老而彌篤,唯吾

歸

完

汝以飲酒爲非

,

吾以不飲酒爲過

。

昔

周伯仁度

江唯三日醒

,

吾不以爲少

, 飲三百盃,吾不以爲多。然洪醉之後,有得有失。成厮養之志,是其得也,使次公之 吾旣寂漠當世,朽病殘年,產不異於顏原,名未動於卿相,若不日飲醇酒,復欲安 鄭康成

列傳第五十一 陳慶之

道」。 江公,可 也, 杓,二三汝寧與 「丘也 丘,吾將老焉。 是其 兵 。若斯 口 失也。 千 與 、志意, 茍 共 H 有過,人必知之」。 論 而 何同日 爾 **豈避南征之不復,賈誼之慟哭者哉。** 酒 不 吾常譬酒之猶水, 亦可以濟舟, 亦可以覆舟。 無 矣。 用,不可一日而 多言,非爾所及。 而醒,與吾同 汝驚吾墮馬侍中之門, 吾生平所願,身沒之後,題吾墓 不備。 H 而 醉乎? 酒 可 陷池 千日 政言其醒可及,其醉不可及也。 武陵 丽 何水曹眼不 不飲,不可一飲而 之第,偏 故江諮議有言:「酒獪兵 云「陳故酒徒 布朝 識盃鐺,吾 野, 不 . 醉 自言焦悚 陳君 口 速 不 美 營糟 之神 離 哉 瓢

之士 不 占皆 暄 嚮慕焉。 以 命吏持下。 落 魄不爲 喧 以玉 中正所品, 久不得調。 暄 徐步 一帽簪插髻,紅絲 而 出,舉止自若, 布 裹頭、袍拂踝、靴 陳天康中,日司徐陵爲吏部尚書,精簡人物,縉紳 竟無作容。 作書謗陵,陵甚病之。 至膝,不 陳爵里,直上陵 坐。 陵

縣于 尙 不 宴,謂爲 能 書 容後 袁 梁 後主 權 臨 狎 之在 ·· 、 侍 客。 之 遂 摶艾爲 以 中 東宮、引 王瑳、金紫光祿 刃 暄 ',命' 素 帽 通脫,以俳 使作 一, 加 爲 學士。 一賦,仍 于其首,火以爇之,然及於髮,垂泣 優 大夫陳褒、御史中丞 限 及卽位、遷通 自居,文章諧謬,語言不 以晷 刻。 暄援筆卽 直散騎常侍,與義陽王叔 一沈瓘、散騎常侍 成, 不以 節, 水哀、聲聞 後主甚 為病, 王儀等恒 mi 親 達、尙 于外 慠 昵 而 弄 轉甚。 入禁 而 輕 書 弗 侮 孔 之。 中陪 範、度支 後主 侍 嘗 倒 游 稍

衞 愆,伏待刑憲。」後主素重莊,意稍解,敕引喧出,命莊就坐。 尉卿柳莊在 坐,遽起撥之,拜謝曰:「陳暄無罪,臣恐陛下有翫人之失,輒矯赦之。 經數日,暄發悸而 造次之

者,所至皆平。 **槖駝。[1三後子雲還南,梁天監中以軍功至冀州刺史。 蘭欽字休明,中昌魏人也。[18]幼而果決,趫捷過人。 欽兼文德主帥,征南中五郡諸洞反** 宋末隨父子雲在洛陽, 恒於市騎

縣男。日代以累遷都督、梁南秦二州刺史,進爵爲侯。 **|飲有謀略,勇決善戰,步行日二百里,勇武過人。** 善撫馭,得人死力。 以軍功封安懷

結鄰好。 州刺史杜懷寶來請救,飲乃大破魏軍,追入斜谷,斬獲略盡。 征梁、漢,事平,進號智武將軍。改授都督、衡州刺史。 **欽百日之中再破魏軍,威振鄰國。** 韶加散騎常侍,仍令述職。 未及述職,會西魏攻圍南鄭,梁 魏相安定公遣致馬二千疋,請

經廣州,因破俚帥陳文徹兄弟,並禽之。 至衡州,進號平南將軍,改封曲江縣公。

有惠政,吏人詣闕請立碑頌德,詔許焉。

後爲廣州刺史。 前刺史新渝侯映之薨,南安侯恬權行州事,冀得卽眞。 及聞欽至嶺,

厚貨厨人,塗刀以毒,削瓜進之,飲及愛妾俱死。帝聞大怒,檻車收恬,削爵士。

非虚受,終逢鴆毒,唯命也夫。 洛。前無强陣,攻靡堅城,雖南風不競,晚致傾覆,其所剋捷,亦足稱之。 不已,卒得其死,亦爲幸哉。慶之初同灩雀之游,終懷鴻鵠之志,及乎一見任委,長驅伊、 論曰: 陳伯之雖輕狡爲心,而勇勁自立,其累至爵位,蓋有由焉。 蘭欽戰有先鳴,位 及喪亂旣平,去就

校勘記

- 嘗授面覘人船 「授」各本作「援」,據梁書改。
- 子武牙為徐州刺史 「武」本字「虎」、此避唐諱改。 下同。
- =: 伯之與豫章人鄧繕永與人戴承忠並有舊 「承忠」梁書作「永忠」。
- . 24 ... 盱眙人徐文安莊興紹張顯明邀擊之 「徐文安」梁書作「徐安」。
- Œ 列 魏遣常山王元昭等來援 「來」各本作「東」、據梁書、通志改。

ッマ <u>_</u>/ 慶之自旦至申攻陷其三大千乃降 「申」、「降」各本作「中」、「退」、據梁書、通鑑改。 張森楷南史

校勘記:「按魏書孝莊紀,大千被執,則『降』字是。」

- 了. 记. . 時魏濟陰王元暉業率羽林庶子二萬人來救梁宋 「暉業」各本作「徽業」、據魏書改。 下同。
- ヘハム 顥進慶之徐州刺史武都郡王 「武都郡王」梁書作「武都公」。
- [九] 土豪蔡伯寵起兵應之 「伯寵」梁書作「伯龍」。
- 破魏潁州刺史婁起揚州刺史是云寶於溱水 「是云寶」各本作「是玄寶」,據梁書、魏書改。
- 二〕魏驍將堯雄子寶樂特爲敢勇 「子」梁書作「兄子」。
- (三) 吾口不離瓢杓 「瓤杓」太平御覽八四六引作「觚杓」。
- 陳天 康 中 「天康」各本作「太康」。 按天康陳文帝年號,今改正。
- 中昌魏 人也 錢大昕廿二史考異:「按齊魏二志未見中昌魏之名。」
- 〇三 恒於市騎豪駝 「騎」各本作「騙」,據通志改。
- [145] 以軍功封安懷縣男 「安懷」梁書同,通志作「懷安」。

商史卷六十二

列傳第五十二

賀瑒 子革 弟子琛 司馬褧 冼 异 顧 劢 徐 摛 子陵

陵子儉 份 儀 陵弟孝克 飽 眾 鮑行卿 行卿弟客卿

工歌女人病死,為筮之,曰:「此非死也,天帝召之歌耳。」乃以土塊加其心上,俄頃而蘇。 賀場字德璉, 會稽山陰人,晉司空循之玄孫也。 世以儒術顯。伯祖道養工卜筮、經遇 祖

道力善三禮,有盛名,仕宋爲尚書三公郎,建康令。 **父損亦傳家業。**

「此生將來爲儒者宗矣。」薦之爲 瑒 少聰敏,齊時沛國劉瓛爲會稽府丞,見瑒深器異之。 ?國子生,舉明經。 後爲太學博士。 嘗與俱造吳郡張融,指陽謂曰:

梁天監初,爲太常丞, 有司舉修賓禮,召見說禮義。 武帝異之, 韶朝朔望, 預華林講。

列傳第五十二 賀瑒

四 博士議數百篇,印資禮儀注一百四十五卷。 所建議 年,初開五館,以陽兼五經博士。 多見施行。 七年,拜步兵校尉,領五經博士。 別韶爲皇太子定禮,撰五經義。 卒于館。 所著禮、易、老、莊講疏,朝廷 時武帝方創定禮樂,瑒

陽於禮尤精,館中生徒常數百, 弟子明經對策至數十人。二子革、悸,弟子琛,

場業。

革哭之,因遘疾而卒。 得俸秩,不及妻孥,專擬還鄉造寺,以申感思。子徽,美風儀,能談吐,深爲革愛,先革卒。 所懷。 令。王於州置學,以<u></u> 草領儒林祭酒,講<u> 三禮,荆楚</u>衣冠聽者甚衆。 前後再監<u>南平郡,爲人</u>吏 (標) 為兼太學博士。長七尺八寸,雍容都雅,吐納蘊藉。 敕於永福省爲邵陵、湘東、武陵三 王講禮。後爲國子博士,於學講授,生徒常數百人。出爲西中郎湘東王諮議參軍,帶江陵 思義未達,則橫臥其上,不盡其義,終不肯食。通三禮。及長,徧治孝經、論語、毛詩、左 革字文明,少以家貧,躬耕供養,年二十,始輟耒就父受業, 🗀 精力不怠。 尋兼平西長史、南郡太守。 革至孝,常恨食祿代耕,不及爲養。 在荆州歷爲郡縣,所 有六尺方

季亦明三禮,位中書黃門郎,兼著作。

列傳第五十二 賀場

貴。 場場 琛 卒後 字 國實, |琛 家貧,常往還諸暨販 幼 孤,伯父瑒授其經業, 粟以養母。 聞 便通義理。 雖自執 舟 、機、閑 陽異之,常曰:「此兒當以 則 習業,尤精三禮。 明經致

餘,陽之門徒稍從問道。

之聽受,回

終日

不疲

之際,茅茨 初,瑒 數間,年將三十,便事 於 鄕 里聚徒教授,四方受業者三千餘人。 ·講授。 旣世習禮學,究其精微,占述 場天監中亡,至是復集,琛乃築室郊 先儒,吐言辯絜,三 郭 坐

肥 理 上佐忽來,莫不傾動。 該 之王,請補 膽。 湘東 王 **漑嘆曰:「通** 一幼年 郡 ·臨郡 功曹 彭城 儒碩 琛說 史。 學, 琛辭以母老,終於固 經 到概爲行事,聞琛美名,命駕相造。 無輟,曾不降意。 復見賀生。 今且還城, 漑 執 下 車, 欣 尋當 相 然 温。 就 席 會踩正講, 琛了不 便 申問難,往復 ·酬答, 學侶滿 神 筵, 從 用 頹 旣 聞

授。 誻 俄 生 遭 一營救,稍 母憂,廬 稍 於 習 墓 業 所。 服闋, 猶未還舍,生徒復從之。 琛哀毀積年,骨 立 而 已, 未堪

術, 召見文德殿 普 通 中 大太 尉 與 臨 語 Ш 悦之,謂僕射徐勉曰:「踩殊有 王 宏 臨州,召補祭酒從事 深 年 門業。」 已四 仍補王國 十餘,始應辟 侍 郎,稍 命。 武帝聞 逻 兼 中 書 其 通 有 學

舍 人,參禮 儀事。[三] 累遷尚書左丞, 韶琛撰新諡法, 便卽施用。 時皇太子議大功之末,可以

冠子嫁女。琛駁議曰:

不得 若謂 功自 益明。 冠 須 子冠 大 文,非關唯得爲子,己身不得也。小功之末旣得自嫁娶,[刊]而亦云「冠子娶婦」,其義 嫁冠之禮,本是父之所成。 父 功服 ,是琛之所惑 得 自 嫁。 冠 小功之文,言己可娶,大功之文,不言已冠,故 令旨以「大功之末,可得冠子嫁女,不得自冠自嫁」。[k] 推以記文,竊猶致惑。 之矣。 爲 重 冠 故先列二服,每明冠子嫁子,結於後句,方顯自娶之義。 竊謂. 自 ,故不得自嫁自冠者,則小功之末,非明父子服殊,不應復云「冠子嫁子」也。 其冠嫁。 嫁? 蓋是約言而 有服 也。 若自 若父於大功之末可以冠子嫁子,是於吉凶禮 不行嘉禮,本爲吉凶不可相干。 冠 見旨。 自 1嫁於 無父之人,乃可自冠,故。罷稱大功小功,並以「冠子嫁子」爲 若謂緣父服大功,子服小功,小功服輕,故得爲子冠嫁 事 有 礙, 則冠子嫁子寧獨 知身有大功,不得自行嘉禮,但得爲 子雖小功之末,可 可 通? 旣明小功自娶,即 無礙; 今許其冠子 得行冠嫁, 吉凶 禮無礙、豈 而塞其自 知大 猶 應

服 大功不可冠子嫁子,則降服小功亦不可自冠自嫁,是爲凡厥降服大功小功皆不得冠 · 令旨推「下殤小功不可娶婦,則降服大功亦不得爲子冠嫁」。伏尋此旨,若爲降

乃明 **朞降大功,大功降爲小功,止是一等,降殺有倫,服末嫁冠,故無有異。唯下殤之服特** 則 服 明不娶之義者,蓋緣以幼弱之故。天喪情深,旣無受厚他姓,又異傳重彼宗,嫌其年幼 出嫁出後,或有再降,出後之身,於本姊妹降爲大功,若是大夫服士父,又以尊降,則成 冠 小 不得通於中上,語小功又不兼於大功。若實大功小功降服皆不冠嫁,上中二殤亦不 輕 功,其於冠嫁義無以異。 《者,記不得直云「下殤小功則不可」。恐非文意,此又踩之所疑 不娶。其義若此,則不得言大功之降服皆不冠嫁也。且記云「下殤小功」,言下殤 [,

「つ」頓成殺略,故特明不娶,以示本重之恩。是以凡厥降服,冠嫁不殊,唯在下殤, 記文應云降服則不可,寧得唯稱下殤。今不言降服,的舉下殤,實有其義。 此服 雖降,彼服則隆。昔實朞親,雖復再降,猶依小功之禮,可冠可娶。若夫 所以然者,出嫁則有受我,出後則有傳重,並欲使薄於此 也。

遂 從琛 加員外散騎常侍。 舊尚書南坐無貂,貂自琛始也。遷御史中丞,參禮儀如先。

性貪嗇,多受財賂,家產旣豐,買主第爲宅,爲有司奏,坐発官。後爲通直散騎常侍,

琛

領 尙 書左丞, 參禮儀事。 曰:「上殿不下有賀雅。」琛容止閑雅,故時人呼之。 踩前後居職,凡郊廟諸儀多所創定, 遷散騎常侍,參禮儀 毎進見武帝, 與語常移晷刻 如故。

故省中語

時 帝 年高,任職者緣飾姦諂,深害時政。踩啓陳事條封奏,大略:其一事曰,曰了一今北

列

雕飾之物不入於宮,此亦人所共知。受生不飲酒,受生不好音聲,所以朝中曲宴未嘗奏樂。 正,雖令不從」。殷絕房室三十餘年,不與女人同屋而寢亦三十餘年,於居處不過一牀之地, 導之以節儉』。又云『至道者必以淳素爲先』。此言大善。 夫子言『其身正,不令而行,其身不 居,牧守之過」。但大澤之中有龍有蛇,縱不盡善,不能皆惡。卿可分明顯出其人。卿云『宜 年,公車讜言,日聞聽覽。自己每苦倥偬,更增惛惑。卿珥貂紆組,博問洽聞,不宜同於關茸, 足妨人,則終年不止矣」。書奏,武帝大怒,召主書於前,口受敕責琛曰:「朕有天下四十餘 省其事而息其費,事省則養人,費息則財聚。若言小費不足害財,則終年不息矣,以小役不 其四事曰,「自征伐北境,帑藏空虚,今天下無事,而猶日不暇給者,良有以也。[1]夫國弊則 其三事曰,「斗筲之人,詭競求進,運挈瓶之智,徼分外之求,以深刻爲能,以繩逐爲務,長弊 嚴爲禁制,導之以節儉,貶黜雕飾,糾奏浮華,使衆皆知變其耳目,改其好惡,則易於反掌」。 止 增姦,實由於此。今誠願責其公平之効,黜其殘愚之心,[10]則下安上謐,無徼倖之患矣」。 貪殘,罕有廉白者,良由風俗侈靡使之然也。 欲使人守廉隅,吏尙清白,安可得邪? 今誠宜 邊稽服,政是生聚敎訓之時,而天下戶口減落,誠當今之急務。國家之於關外,賦稅蓋微, 乃至年常租調,動致逋積,而人失安居,寧非牧守之過」。其二事曰,「今天下宰守所以皆尙 |取名字,言我能上事,恨朝廷不能受。 卿云 『今北邊稽服, 政是生聚教訓之時, 而人失安

不守,踩 射 呈 不発居九品之下。『不令而行』,徒虛言耳。 妄說。為誰爲之?救物故也。書云,『股肱惟人,良臣惟聖』。向使朕有股肱,可得中主,今乃 夜、無有定時,疾苦之日,或亦再食。 朕三更出理事,隨事多少。 事或少,中前得竟,事多,至日昃方得就食。 旣常一食,若晝若 古人云,『專聽生姦,獨任成亂』。何者是宜,具以奏聞。」踩奉敕但謝過而已,不敢有所指斥。 王克、領軍朱异,勸開城納賊。 一事,於義可否?以噎廢飡,此之謂也。 太清二年,爲中軍宣城王長史。 逃歸 郷里。 其年,賊寇會稽,復執琛送出都,以爲金紫光祿大夫。 克等讓之,涕泣而止。 侯景陷城,踩被創未死,賊求得之,輿至闕下,求見僕 昔腰過於十圍,今之瘦削,裁二尺餘。 若斷呈事,誰尸其任。專委之人,云何可得。 卿又云『百司莫不奏事、詭競求進』。今不許外人 賊復輿送莊嚴寺療之。 卒。 舊帶猶存,非爲 琛所撰三禮 明年,臺城 是故

司 馬褧字元表,二三河內溫人也。 曾祖純之,晉大司農高密敬王。 祖讓之, 員外常侍。

엧變,善三禮,仕齊位國子博士。

講疏

、五經滯義及諸儀注凡百餘篇。

子翊,位巴山太守。

褧少傳家業,强力 專精,手不 釋卷。 沛國劉瓛爲儒者宗、嘉其學、深相賞好。 與樂安任

列

傳第

者,皆取決焉。

累遷御史中丞

樂,褧所建議,多見施行。 防善, 助 亦推重之。梁天監初,詔通儒定五禮,有舉褧修嘉禮,除尚書祠部郎。 **兼中書通事舍人,每吉凶禮,當時名儒明山賓、** 賀瑒等疑不能斷 時創定禮

注一百一十六卷。[] 殿長名問訊,不限日。 十六年,出爲宣毅南康王長史,行府國幷石頭戍軍事。 遷晉安王長史,卒。王命記室庾肩吾集其文爲十卷。 **睽雖居外官**,有敕預文德、武德 所撰嘉禮儀

相論 興沈顗聞而歎曰:「弟死於孝,兄殉於義,孝友之節,萃此一門。」巽之字處林,有志節,著辯 武帝嘉其義,慮相報復,乃遣謙之隨曹武西行。將發,幼方子懌於津陽門伺殺謙之。謙之 兄巽之,即异父也, CIKJ又刺殺懌。有司以聞。武帝曰:「此皆是義事,不可問。」悉赦之。吳 便哀感如持喪,自己長不昏娶。齊永明中,手刃殺幼方,詣獄自繫。 年數歲,所生母亡,昭之假葬於田側,爲族人朱幼方燎火所焚。同產姊密語之,謙之雖小, 朱异字彥和,吳郡錢唐人也。祖昭之,以學解稱於鄉。叔父謙之字處光,以義烈知名。 幼時,顧歡見而異之,以女妻焉。 仕齊官至吳平令。 縣令申靈勗表上之。齊

蒱 日 二十,出 自 博 業, 天下 頻頗 异 年 都詣 爲 寫 唯 數歲,外祖顧歡撫之,謂其祖昭之曰:「此兒非常器,當成卿門戶。」年十餘,好羣 畢 鄕 有文義棊書,卿一時將去,可謂不廉也。」尋上書言建康宜置 黨 尚書令沈約,面試之,因戲异曰:「卿年 便 所 誦 患。 編覽 及長,乃 五經,尤明禮、易。 /折節 從 師。 梁初開 涉獵 文史,兼通雜藝,博弈書算,皆 五館,异服膺於 少,何乃不 廉。」异逡巡未達其旨,約 博 士 明 獄 山 司 賓。 此 其所長。 居 廷尉。 貧,以 聚 敕 乃 年 傭

付

尙

書詳

議

從之。

構, 觸 之士 舍 器字弘深, 仍 召 召直 人。 見, 一, 五. 普通 舊 使 響 後除 迺 制 鏗鏘 }經 說孝經、周易義,甚悅之,謂 年 五. 博 神 中書 年, 俄 表 士 二十五 遇采便 明 峰 兼太學博 郎,時秋 大 峻。 Щ 舉 賓 方得釋褐, 發。 北 表 金 侵, 日 士。 Щ 薦异:「年時尙少,德備老成, 觀 ,始拜,有 萬 魏 其信行,非唯十室所稀, 其年,帝自講孝經,使异 丈,緣陟未登;玉 徐 時异適二十一,特敕擢爲揚州議曹從事史。 州 刺 左 飛蟬正 史元法 右 曰:「朱异實異。」後 集异 僧遣使請 海 武冠上,時咸謂 千尋, 若使負 執 在獨 舉 窺映 讀。 地 內 無散逸之想, 見 重 不 遷尙 屬 明 測。 遙途, 蟬珥 Щ 書儀 詔 賓 加 有 之兆 必有千 曰:「卿 以 曹郎 司 珪 處 議 璋 遷 闇 其 所 里之用。」 入 尋 新 虚 太子 有 兼 舉 有韶 琢, 實 對賓之色。 中 殊 右 書 得 錦 求 异 衞 武 異能 人。 組 通 率 日 帝 事 初

自 王 師 北 討 剋 獲 相 繼 ,徐州地轉削弱, 咸願歸罪。 法僧懼禍, 其降必 非 僞 也。」帝仍遣异

列

傳

報法僧,並敕衆軍應接,受异節度。 及至,法僧遵承朝旨,如异策焉。 遷散騎常侍。

謀謨,方鎭改換,朝儀國典,詔誥敕書,並典掌之。 於前,异屬辭落紙,覽事下議,縱橫敏贍,不暫停筆,頃刻之間,諸事便了。 异容貌魁梧,能舉止,雖出自諸生,甚閑軍國故實。 每四方表疏,當局簿領, 自周捨卒後,异代掌機密, 諮詳請斷, 其軍 塡 旅

人,爲一時之盛。 遷右衞將軍。 時城西又開士林館以延學士,异與左丞賀琛遞日述武帝禮記中庸義。 啓求於儀賢堂奉述武帝老子義,敕許之。 及就講,朝士及道俗聽者千餘

太子又召异於玄圃講易。

車中必齎飴餌。 所驅,薰灼內外,產與羊侃相埓。 貴皆恃枯骨見輕,我下之,則爲蔑尤甚。 酣飲其中。 不肯進賢黜惡。 大同八年,改加侍中。 每迫曛黄,慮臺門將闔, 四方餉饋,曾無推拒,故遠近莫不忿疾。 而輕傲朝賢,不避貴戚。 异博解多藝,圍碁上品,而貪財冒賄,欺罔視聽,以伺候 好飲食,極滋味聲色之娛,子鵝炰鰌不輟於口,雖朝謁,從 乃引其鹵簿自宅至城,使捉城門停留管籥。 我是以先之。」 人或誨之,异曰:「我寒士也,遭逢以至今日。 起宅東陂, 窮乎美麗, 晚日來下, 旣而聲勢 人主意,

敏洽,曲營世譽,二人行異而俱見倖。 自 [徐勉、周捨卒後,外朝則何敬容,內省則异。 异在內省十餘年,未嘗被譴。 敬容質慤無文,以綱維爲己任,异文華 司農卿傅岐嘗謂异曰

「今聖上委政於君,安得每事從旨。 頃者外聞殊有異論。」异曰:「政言我不能諫爭耳。

天子聖明,吾豈可以其所聞干忤天聽。」

書與 容受, 缺,承 其 家 上 等以爲 年六 事 應蒼玄,北土遺黎,誰不慕仰,爲無機會,未達其心。 (异餉金二百兩,又致書於制 乎。」專而 少夢,夢必有實。」异曰:「此宇內方一之徵。」及侯景降, 初 、恐絕後來之望。」帝深納异言,又感前夢,遂納之。 平若此,今便受地,詎是事宜。脫至紛紜,悔無所及。」异探帝微旨,答曰:「聖 月,遣 ,景謀反,合州 不可許。 二年,爲 建康令謝挺、通直郎徐陵使北 貞陽自魏遣使述魏相 武帝欲納之,未決, 中領軍,舍人如故。 刺史鄱陽王範、司 局監周石珍令具 高澄欲 嘗夙 初, 州刺 武帝夢中原盡平,舉朝稱慶,甚悅,以語异曰:「吾 與至武德閣口,獨言:「我國家 通好。 申 史羊鴉仁並累有 和睦。敕有司定議。异又議 申聞。 時侯景鎭壽春,疑懼,累啓請 今侯景分魏國太半,遠歸聖 及貞陽侯敗沒,帝憂曰:「 异納其金 敕召羣臣 :啓聞。 而 异以景 不停 一廷議, 以和 **猶若金甌,無** 北使,景遂反 孤 尙 爲 立寄命,必不 . 書僕 允,帝從之。 絕 今勿作晉 和,及致 朝 明御宇, 射 ?;若不 謝 傷 舉

列傳第五十二 朱异

思

玉

先至

求

見於上,上

召

問

之,

思玉紿稱

反賊,請閒

陳

事。

上將屛

左

右,舍人高

善寶

思

何言

玉

從

賊中來

情

僞

難

測

安可

'使其獨在殿上。」時异侍坐,乃曰:「徐思玉豈是刺客邪?

應

爾

乃謂

使

日:「鄱陽王遂不許

國家有一客」

並

不

爲

聞

奏。

及賊

至板

橋,使前

壽州

司

馬徐

討异 未 之, 加 晚。 屠 簡 戮。 及 善善 文 一帝乃 陸 曰:「贼特以异等爲名耳, 寶 陛 驗 止 下 爲 日 三思 誅 异等, 名。 及景至 玉 已將臨賀入北 臣 斂 城 総 轡 北 下,又射 歸」。 今日殺异, 啓言 帝問 朱异等蔑弄朝 簡文曰:「有 無救於急,適足貽笑將來。 是乎?」 權 思玉果出賊啓, 輕輕 對 作 威 日 I.「然」。 福 臣 岩酥. 帰 大 慚 。 . 爲 帝 讒 氛旣息,誅之 召 臣 有 所 賊 司 陷, 將 逐 誅 欲 以

願 舊 曰::「 壨 鼎 一,萬 尙 得 食 書官 愍彼 執 而 四 异 邦 郊 之 法 乘 以之 方 肥。 不 多 阪 俸, 帝 以 壘 田 未經。 一、嗟斯 升紫 因 爲 誰之罪 在 贈,及异 其 朝莫不 宿 霄之丹 問 氛霧。 志 豺 歟 特 卒 ...? 狼 側目,雖 地, 謀之不 ·) 武 其何 有 异流 排玉 此 帝悼惜 贈 者? 汗 殿 臧,褰我王 皇太子亦不能平。 不 訪 之金扉。 ·能對, 之,方議贈 虺蜴 之為 慚 度。 陳謀謨之啓沃,宣政刑之福 憤 誰 事 發 |又製園: 方左 ご並 (病卒) 至是城內咸尤异,簡文爲四言愍亂詩 右 以 有善异者 城賦,末章云:「彼高 時年六十七。 指异。 叉帝登 乃啓 日.... 南 詔 威。 贈 樓 异生 尙 望 冠及 四 書 贼, 郊 平所 右 厚履,並 顧謂异 以之多 僕射

翫好. 右 衞 率 异 每暇日與賓客遊焉 至 居 領 權 軍 要 ·, 四 三十 職 餘年,善承 並 驅 鹵 簿 四方饋遺,財貨充積, 上旨, 近代未 故特被 之有 寵 也。 任 0 异及 性吝嗇, 歷官自員 諸 子 自潮 未嘗有散施。 外常侍至侍中,四 溝 列 、宅至 一青溪, 厨下珍羞 官 其 皆 中 珥 恒腐爛 有 貂, 臺 自 池

每月常棄十數車,雖諸子別房亦 不分贍。 所撰禮' 、易講疏及儀注文集百餘篇。

子廟,位國子博士,次閮,司徒掾。並遇亂卒。

流。」永歎息曰:「顧氏興於此子。」及長好學,以精力稱。外氏諸脹多賢達,有識鑒, 尤推重焉 大夫張永嘗攜內外孫姪游虎丘山,協年數歲,永撫之曰:「兒欲何戲。」協曰:「兒政欲枕 顧協字正禮,吳郡吳人,晉司空和六世孫也。曰也幼孤,隨母養於外氏。 外從祖 **地右光祿** 內弟率 石漱

所部新安令。日日未至縣遭母憂,刺史始興王厚資遣之,送喪還。 廷 [尉正。太尉臨川王聞其名,召掌書記,仍侍西豐侯正德讀。 初爲揚州議曹從事,舉秀才。 尚書令沈約覽其策而數曰:「江左以來,未有斯作。」爲兼 正德爲巴西、梓潼郡,協除 於峽江遇風,同旅皆漂溺,

唯協一舫觸石得泊焉。咸謂精誠所致。

協 爲兼太學博士。 張率嘗薦之於帝,問協年,率言三十有五。帝曰:「北方高凉,四十强仕,南方卑濕,三 如協 便爲已老,但其事親孝,與友信, 累遷湘東王參軍,兼記室。 亦不可遺於草澤。 卿便稱敕喚出。」於是以

列

本罰惡龍,二彰脫之有過。 霆擊大航華表然盡。 中,有詔舉士,湘東王表薦之,卽召拜通直散騎侍郎,兼中書通事舍人。大通三年 建康縣馳啓,協以爲非吉祥,未卽呈聞。 協掩惡揚善,非曰忠公。」由是見免。 後帝知之,曰:「霆之所擊,一 後守鴻臚卿,員外散騎常

武帝悼惜之,爲舉哀。贈散騎常侍,諡曰溫子。 自爲近臣,便繁幾密,每有述製,敕前示協,時輩榮之。卒官無衾以斂,爲士子所嗟歎。

侍,Clan卿、舍人並如故。

卒無胤嗣 女,未成昏而協母亡,免喪後不復娶。年六十餘,此女猶未他適,協義而迎之。晚雖判合, 潤屋,協在省十六載,器服飲食不改於常。有門生始來事協,知其廉潔,不敢厚餉,止送錢 口,謂人曰:「我願解身上襦與顧郎,顧郎難衣食者。」竟不敢以遺之。及爲舍人,同官者皆 二千,協發怒,杖二十,因此事者絕於饋遺。自丁艱憂,遂終身布衣蔬食。 協少清介,有志操,初爲廷尉正,冬服單薄,寺卿察法度欲解襦與之,憚其淸嚴,不敢發 少時將娉舅息

協博極羣書,於文字及禽獸草木尤稱精詳,撰異姓苑五卷,瑣語十卷,文集十卷,並行

於世。

徐摛字士秀,東海郯人也,一字士績。 祖憑道,宋海陵太守。父超之,梁天監初位員外

散 騎常侍。

小 總 捨 兼管記,尋帶領 戎 日 若不勝衣,而堪此選。」帝曰:「必有仲宣之才,亦不簡貌。」乃以摛爲侍讀。 [::「爲 北侵,以搁無寧蠻府長史,參贊戎政,敎命軍書,多自摛出。 摛 **[幼好學,及長,偏覽經史,屬文好爲新變,不拘舊體。** 《我求一人,文學俱長,兼有行者,欲令與晉安游處。」捨曰:「臣外弟徐摛,形質陋 晉安王綱出戍石頭,武帝謂周 王入爲皇太子, 轉家令, 大通 初,王

直

安太守。 宫, 對 欲之,乃 横,應答 明 獑 敏,辭義 摛 來 文體旣別,春坊盡學之,「宮體」之號,自斯而始。 召摛曰:「新安大好山水,任昉等並經爲之,卿爲 見逼,我須早爲之所。」遂承閒白帝曰:「摛年老,又愛泉石,意在一 如響,帝甚加歎異,更被親狎,寵遇 爲 政清靜,敎 可觀,乃意釋。 人禮義,勸課農桑,春月風俗便改。 因問五經大義,次問歷代史及百家雜記,末論 日隆。 領軍朱异不悦,謂所親曰:「徐叟出 我臨 帝聞之怒,召擒將加誚貴,及見,應 秩滿,爲中庶子。 此郡。」中大通三年,遂出 郡 釋教。 自養。」帝謂 **摛商較從** 爲 入 新 摛 兩

時 臨 城 公納夫 人王氏,卽簡文妃姪女。晉、宋以來,初昏三日,婦 見舅姑,衆賓皆列觀,

列

傳

第

Ŧi.

之儀, 引春秋義 儀 謂 據 見舅姑,兄弟姊妹皆立於堂下。』政言婦是外宗,未審嫺令,所以舅延外客, 此皆云「宜依 應可略。」簡文從其議。 以備盛禮。 云丁 舊 丑,夫人姜氏至。 觀」。簡文問擒,摛議 近代婦於舅姑本有 除太子 戊寅、公使大夫宗婦觀用幣」。戊寅即丁 左衞 1.戚屬, 曰:「儀禮 率 不相瞻者。 云:『質 明贊見婦於舅姑。』 夫人乃妃姪女, 有異他姻,覿見之 <u>i</u>: 姑率內賓,堂下 雜記 之明日,故禮官 叉云 7 婦

授左 徐謂景曰:「侯公當以禮 事,諡貞子。 一衞將軍,固辭不 及侯景攻陷臺城,時簡文居永福省。 長子陵,最知名。 ·拜。 見, 簡文被閉、摛不獲朝謁、因感氣疾而卒,年七十八。 何得如 此。」凶威 賊衆奔入,侍衞走散,莫有存者。 逐折, 侯景 乃拜。 由是常憚摛。 **搁獨侍立不** 贈侍中、 簡 文 嗣 位,進 動,

蠻 屬文,十三通莊、老義。 門 府軍事。 釋實誌 陵字孝穆。 寶誌摩其頂曰:「天上石麒麟也。」光宅寺慧雲法師 王立爲皇太子,東宮置學士,陵充其選。 母臧氏,嘗夢五 及長,博涉史籍, 色雲化爲 從橫有口辯。 鳳,集左肩上,已而 稍遷尙書度支郎 父摛爲晉安王 毎嗟陵 誕陵。 早就,謂之 年數歲,家 諮議,王 顏 人攜 又引陵參寧 回 以 候 八 歲 沙

出爲上虞令。 御史中丞劉孝儀與陵先有隙,風聞劾陵在縣贓汚, 因 坐免。 久 之, 爲通

直散騎侍郎。 梁簡文在東宮,撰長春殿義記,使陵爲序。 又令於少傅府述已所製莊子義

暑。」收大慚。 日 之熱,當由徐常侍來。」陵卽答曰:「昔王肅至此,爲魏始制禮儀,今我來聘,使卿復知寒 太清二年,兼通直散騎常侍使魏,魏人授館宴賓。 齊文裹爲相,以收失言,囚之累日。 是日甚熱,其主客魏收謝陵曰:「今

禪,梁元帝承制於江陵,復通使於齊。陵累求復命,終拘留不遣,乃致書於僕射楊遵彥,不 爲尚書左丞。 仍進討章載,而任約、徐嗣徽乘虛襲石頭,陵感僧辯舊恩,往赴約。約平,武帝釋陵不問,以 書,皆陵辭也。及明入,僧辯得陵大喜,以爲尚書吏部郎,兼掌詔誥。 及魏平江陵,齊送貞陽侯明爲梁嗣,乃遣陵隨還。 及侯景入寇,陵父摛先在圍城之內,陵不奉家信,便蔬食布衣,若居哀恤。 太尉王僧辯初拒境不納,明往復致 其年陳武帝誅僧辯, 會齊受魏

朝野。 引王下殿。 不可犯、爲斂容正坐。陵進讀奏狀、時安成王殿上侍立、仰視文帝、流汗失色、陵遣殿中郎 五. 兵尙書,領大著作。六年,除散騎常侍,御史中丞。時安成王項爲司空,以帝弟之尊,權傾 紹泰二年,又使齊。 直兵鮑僧叡假王威風,抑塞辭訟,大臣莫敢言,陵乃奏彈之。文帝見陵服章嚴肅,若 自是朝廷肅然。 還除給事黃門侍郎,祕書監。陳受禪,加散騎常侍。天嘉四年,爲

特不目色范悌。』宋文帝亦云:『人豈無運命,每有好官缺,輒憶羊玄保。』此則淸階顯職,不 亦為 府庫空虛 有冒進求官,馳競不已者,乃爲書宣示之,曰:「永定之時,聖朝草創,干戈未息,尙無條序。 由選也。 何可猶作舊意,非理望也。所見諸君多踰本分,猶言大屈,未諭高懷。若問梁朝朱領軍异 、外常侍,路上比肩,諮議參軍,市中無數,豈是朝章應其如此。 卿相,此不踰其本分耶?此是天子所拔,非關選序。梁武帝云:『世間人言有目色,我 遷 更部 旣忝衡流、諸賢深明鄙意。」自是衆咸服焉。時論比之毛玠 ,賞賜懸乏,白銀難得,黃札易營。權以官階,代於錢絹,義在撫接,無計多少。 尚書,領大著作。 陵以梁末以來,選授多失其所,於是提舉綱維,綜 今衣冠禮樂,日富年華, 覈名實。 致

僕射,抗表推周弘正、王勱等。帝召入內殿,曰:「卿何爲固辭而舉人乎。」陵曰:「弘正舊蕃 長史,王勸太平中相府長史,張種帝鄉賢戚,若選賢舊,臣宜居後。」固辭累日,乃奉詔 及宣帝入輔,謀黜異志者,引陵預其議。 宣帝即位,封建昌縣侯。〔三〕太建中,爲尚書左

聲曰:「非但明徹良將,忌卽良副也。」是日詔明徹爲大都督,令忌監軍事,遂剋淮南數十州 俗,將略人才,當今無過者。」於是爭論數日不能決,都官尚書裴忌曰:「臣同徐僕射。」陵應 及朝議北侵,宣帝命舉元帥,衆議在淳于量。陵獨曰:「不然。吳明徹家在淮左,悉彼風

地。宣帝因置酒、舉杯屬陵曰:「賞卿知人。」

詹事。[三]以年老累表求致事,宣帝亦優禮之,詔將作爲造大齋,令陵就第攝事。後主卽位, 所作。陵嗤之曰:「都不成辭句。」後主銜之,至是諡曰章僞侯。曰曰 遷左光祿大夫、太子少傅。 至德元年卒,年七十七,詔贈特進。初,後主爲文示陵,云他人 七年,領國子祭酒,以公事免侍中、僕射。 尋加侍中,給扶。十三年,爲中書監,領太子

送米至水次,親戚有貧匱者,皆召令取焉,數日便盡。陵家尋致乏絕。府僚怪問其故,陵 云:「我有車牛衣裳可賣、餘家有可賣不。」其周給如此。 陵器局深遠,容止可觀,性又淸簡,無所營樹,俸祿與親族共之。 太建中,食建昌戶,戶

者已傳寫成誦,遂傳于周、濟,家有其本。後逢喪亂,多散失,存者三十卷。陵有四子:儉、 講筵商較,四坐莫能與抗。目有靑精,時人以爲聰慧之相也。自陳創業,文檄軍書及受禪 之時,國家有大手筆,必命陵草之。其文頗變舊體,緝裁巧密,多有新意。每一文出,好事 詔策,皆陵所製,爲一代文宗。亦不以矜物,未嘗詆訶作者。其於後進,接引無倦。文、宣 少而崇信釋教,經論多所釋解。後主在東宮,令陵講大品經,義學名僧,自遠雲集,每

險一名輯, Clan 幼而修立, 勤學有志操。

汝南周弘直重其爲人, 妻之以女。Clan 梁元帝召 列 第五 + = 徐 五二五五

鄴,累遷中書侍郎

爲尙書金部 郎中。 常侍宴賦詩,元帝歎賞之,曰:「徐氏之子,復有文矣。」魏平江陵, 還建

將軍、將軍成敗不在於儉。幸不見留。」総於是遺儉。 以儉監昭達軍。 城、置儉於孤園寺。 太建初,廣州刺史歐陽紇舉兵反,宣帝令儉持節喻旨。、紇見儉,盛列仗衞,言辭不恭 **紇平,爲兼中書通事舍 総嘗出見儉**, 檢謂曰:「將軍業已舉事,儉須還報天子。 人。 從間道馳還。 宣帝乃命章昭達討紇, 懼儉沮衆,不許 儉之性命雖在

丞。 **儉公平無所阿附,尚書令江總望重一時,爲儉所劾,後主深委任焉。** 後主立,累遷尋陽內史,爲政嚴明,盜賊靜息。 遷散騎常侍,襲封建昌侯。 **顧明二年卒。** 入為御史中

績。 疾豁然而愈,親戚皆謂份孝感所致。 入爲太子洗馬。 份 少有父風。 九歲爲夢賦,陵見之,謂所親曰:「吾幼屬文亦不加此。」 性孝弟、陵嘗疾篤、份燒香泣涕、跪誦孝經、日夜不息、如是者三日、陵 先陵卒。 爲海鹽令, 有政

儀 一少聰警,仕陳位尚書殿中郎。 陳亡,隱于錢唐之赭山。 隋煬帝召爲學士,尋除著作

許之。 脫,當歸供養。」孝克默然無答。於是歸俗,更爲夫妻。 孝克又剃髮爲沙門,改名法整,兼乞食以充給焉。臧氏亦深念舊恩,數私致饋餉, 孝克乃謂曰:「今饑荒如此,供養交闕,欲嫁卿與富人,望彼此俱濟,[三]於卿如何。」臧氏弗 道。 絕。後景行戰死,臧氏同孝克於途中,累日乃見,謂孝克曰:「往日之事,非爲相負,今旣得 梁末,侯景寇亂,孝克養母,饘粥不能給。 陵弟孝克, 時有孔景行者,爲侯景將,多從左右逼而迎之,臧氏涕泣而去,所得穀帛,悉以遺母。 有口辯, 能談玄理。 性至孝, 遭父憂殆不勝喪。 妻東莞臧氏,領軍將軍盾女也,甚有容色。 事所生母陳氏, 盡就養之 故不乏

₹禮 傳,道俗受業者數百人。天嘉中,除剡令,非其好,尋去職。 乃旒 後東遊,居錢唐之佳義里,與諸僧討論釋典,遂通三論。 食長齋,持菩薩戒,晝夜講誦法華經。 宣帝甚嘉其操行。 毎日二時講, 太建四年,徵為秘書丞,不 旦講佛經,晚講

斌 管斌 以啓,宣帝嗟歎良久,乃敕自今宴享,孝克前饌,並遣將還,以餉其母。 後 寫 斌 國子祭酒。 自是伺之,見孝克取珍果納紳帶中。 孝克每侍宴,無所食噉,至席散,當其前膳羞損減。帝密記以問中書舍 斌當時莫識其意, 後尋訪, 方知其以遺母。 時論

列

傳

第五

+

徐

此省。 故有聲光,或見人著衣冠從井中出,須臾復沒,或門閤自然開閉。 東西跨路,通于朝堂。 元年,入爲都官尙書。 至德中,皇太子入學釋奠,百司陪列。 孝克代確,便卽居之,經兩載,祇變皆息,時人咸以爲貞正所致。 其第 自晉以來,尚書官僚,皆攜家屬居省。 一卽都官省,西抵閣道,年代久遠,多有鬼怪。 孝克發孝經題, 後主詔皇太子北面致敬。 省在臺城內下舍門中,有閣 居多死亡,尚書周確卒於 毎夜昏之際, | 順明 無 道

能常辦。母亡後,孝克遂常噉麥,有遺粳米者,孝克對而悲泣,終身不復食焉。 孝克性清素,好施惠,故不免飢寒。後主敕以石頭津稅給之,孝克悉用設齋寫經,隨盡。 二年,爲散騎常侍,侍東宮。 陳亡,隨例入長安。 家道壁立,所生 母患,欲粳米爲粥,不

開皇十二年,長安疾疫,隋文帝聞其名行,召令於尚書都堂講金剛般若經。 尋授國子

博士。 後侍東宮,講禮 傳。

九年,以疾卒,年七十三。 臨終政坐念佛,室內有非常香氣, 鄰里皆驚異之。 子萬

職,位太子洗馬。

鮑泉字潤岳,東海人也。

父幾字景玄,[云]家貧,以母老詣吏部尚書王亮干祿,

亮

見

,舉爲舂陵令。 後為明山賓所薦、爲太常丞。以外兄傅昭爲太常、依制總服不得相臨、

改爲尚書郎、終於湘東王諮議參軍。

之, 遣逼車問:「鮑通直復是何許人, 而得如此」都下少年遂爲口實, 見尙豪華人, 相戲曰 玩甚精。 早見擢任,謂曰:「我文之外無出卿者。」後爲通直侍郎。常乘高幰車, · 鮑通直復是何許人,而得如此」,以爲笑謔。 泉美鬚髯,善舉止,身長八尺,性甚警悟。 道逢國子祭酒王承,承疑非舊貴,遣訪之,泉從者答曰「鮑通直」。承怪焉,復欲辱 博涉史傳,兼有文筆。 從數十左右,繖蓋服 少事元帝爲國常侍,

言,泉默然不繼。一元帝大怒,於是械繫僧辯,時人比泉爲酈寄 兵一萬不可以往。 將安出。」泉曰:「事等沃雪,何所多慮。」僧辯曰:「君言文士常談耳,河東少有武幹、「計」非精 及元帝承制,累遷至信州刺史。方等之敗,元帝大怒,泉與王僧辯討之。 意陵甲卒不久當至,猶可重申。欲與卿入言之。」

泉許諾,及僧辯如向 僧辯曰:「計

似蝟毛,徒勞繞喙。」乃從獄中起王僧辯代泉爲都督,使舍人羅重歡領齋仗三百人與僧辯 賊不足平矣。」乃拂席坐而待之。<u>僧辯入,乃背</u>泉而坐曰:「鮑郎,卿有罪, 及至 泉既專征長沙,久而不剋。一元帝乃數泉二十罪,爲書責之曰:「面如冠玉,還疑木偶,鬚 |長沙, 遭通泉曰:「羅舍人被令送王竟陵來。」泉愕然, 顧左右曰: 「得王竟陵助我經 令旨使我鎖

列傳

卿, 復其任,令與僧辯等東逼邵陵王於郢州。 師, 卿勿以 罪乃甘分,但恐後人更思鮑泉之憒憒耳。」僧辯色甚不平,泉乃啓陳淹遲之罪。 故意見期。」命重歡出令示泉,鎖之牀下。 泉顏色自若,了無懼容, 曰:「稽緩王 元帝尋

賊執方諸及泉送之景所。 用, 使泉伏牀騎背為馬, 方諸與泉不恤軍政,唯蒱酒自樂,云「賊何由得至」。旣而傳告者衆,始命闔 郢州平,元帝以世子方諸爲刺史,泉爲長史,行州府事。 書其衣作其姓名, 由是州府盡相欺。 後景攻王僧辯於巴陵不剋,敗還,乃殺泉於江夏,沉其屍於黃 方諸見泉和弱,每有諮陳未嘗 侯景密遣將宋子仙、 門。 任約襲 城陷,

十卷行於世。 初,泉夢落朱衣行水上,及死,舉身帶血而沉于江如其夢。 泉於儀禮尤明,撰新儀三

如此。 {銘 ,武帝發詔褒賞。 時 有集二十卷。撰皇室儀十三卷,乘興龍飛記二卷。 又有鮑行卿以博學大才稱,位後軍臨川王錄事,兼中書舍人, 好韻語,及拜步兵,面謝帝曰:「作舍人,不免貧,得五校,實大校。」例皆 遷步兵校尉。 上玉璧

信,利非象齒,焚如棄如,於是乎得。」君子以此知湘東王不仁。檢爲湘東鎭西府中記室,使 王恨之。及建鄴城陷,正爲尚書外兵郎,病不能起。景雜於死屍焚之。王聞之曰:「忠非紀 無日不適人,人爲之語曰:「無處不逢烏噪,無處不逢鮑佐。」正不爲湘東王所知,獻書告退。 弟客卿位南康太守。客卿三子,檢、正、至,並才藝知名,俱爲湘東王五佐。 正好交遊,

蜀,不屈於武陵王,見害。

馬褧其得之矣。而异遂徼寵倖,任事居權,不能以道佐時,苟取容媚。及延寇敗國,實异之 由,禍難旣彰,不明其罪,亦旣身死,寵贈猶殊。罰旣弗加,賞亦斯濫。夫太淸之亂,固其宜 顧協清介,足以追蹤古人,徐摛貞正,仁者信乎有勇。孝穆聰明特達,締構興王,獻替 論曰:夏侯勝云,「士患不明經術,經術明,取青紫如拾地芥耳」。於賀瑒、賀琛、朱异、同

校勘記

朝廷博士議數百篇 「博士議」梁書、册府元龜六〇六並無「士」字。

列傳第五

+ =

校勘

記

- 始輟 **耒就父受業** 「父」各本作「文」,據太平御覽七〇六、八二三引及通志改。
- 占述先儒吐言辯絜 「占述」各本作「古述」。按占述有口授義,故下云「吐言辯絜」,古述無義,
- 坐之聽受

太平御覽六一五誤引爲「占術」今改正。又通志作「祖述」,亦可通。

- 「聽受」各本作「聽授」,據太平御覽六一五引改。
- 工 **参禮儀事** 各本作「參軍禮事」,據梁書改。按下有云「參禮儀如先」。
- へない 不得自冠自嫁 「得」字各本並脫,據梁書、册府元龜五七九補
- 小功之末旣得自嫁娶 「嫁」字各本並脫,據梁書、册府元龜五七九補。
- 嫌其年幼服輕 「服輕」二字各本並脫,據梁書補。
- へたし 其一事日 「事」字據梁書、册府元龜四七一補。
- 點其殘愚之心 「殘愚」梁書、册府元龜四七一並作「讒愚」。
- 而猶日不暇給者良有以也 「者」字據梁書、册府元龜五二九補。
- 日聞聽覽 梁書作「日見聽覽」。通鑑作「日關聽覽」,疑作「關」是。
- 司馬褧字元表 「元表」梁書作「元素」。
- 所撰嘉禮儀注一百一十六卷「六」各本作「二」,據梁書徐勉傳改。

「哀感」南齊書孝義朱謙之傳作「哀戚」,疑是。

便哀感如持喪

- 謙之兄巽之即异父也 「謙之」二字據南齊書孝義朱謙之傳補。 按傳「巽之」作「選之」。 惠棟松
- E筆記二:「選、巽字相似,故譌爲巽。」
- [19] 晉司空和六世孫也 「六世孫」梁書作「七世孫」。
- 正德爲巴西梓潼郡協除所部新安令 「新安」梁書作「安都」。按南齊書州郡志,巴西、梓潼二郡

屬縣俱無新安縣及安都縣。

- 後守鴻臚卿員外散騎常侍 「員外散騎常侍」上,王懋竑讀書記疑謂疑有「遷」或「轉」字。
- 宣帝即位封建昌縣侯 「宣帝」各本作「廢帝」,今訂正。按陳書作「高宗纂曆,封建昌縣侯」。高

宗宣帝廟號。

- 十三年爲中書監領太子詹事 「十三年」各本作「十二年」,據陳書改。按宣帝紀亦作「十三年」。
- 至是諡曰章偽侯 <u>錢大昕廿二史考異:「按陳書諡曰章,無『僞』字。周書諡法篇亦無以『僞』爲</u>

諡者、恐未足信。」

- [11] 儉一名報 「報」梁書作「衆」,是。
- 汝南周弘直重其爲人妻之以女 「周弘直」陳書作「周弘正」。
- 欲嫁 卿與富 人望彼此俱濟 「富人」各本作「當世人」,據陳書改。 張森楷南史校勘記:「此蓋誤

『富』爲『當』〕校者以不可通,而又誤讀下『望』斷句,於是妄添『世』字。

列傳第五十二 校勘記

丽

不知當世人望何能濟

一五三四

之。且孔景行不過富耳,何嘗爲人望也。」按脹說是。「世」爲唐諱,李延壽亦不可能改「富人」

爲「當世人」。

[三六] 父幾字景玄 「幾」梁書作「機」。

[1] 河東少有武幹 「河東」各本作「江東」,據梁書王僧辯傳改。

按河東指河東王學。

南史卷六十三

列傳第五十三

王神念子僧辯 羊侃 羊鴉仁

州郡 侍中、中書令,改諡忠公。 南城縣侯。 必禁止淫祠、時靑州東北有石鹿山臨海、先有神廟祆巫、欺惑百姓、遠近祈禱、糜費 及神念至,便令毀撤,風俗遂改。 王神念,太原祁人也。少好儒術,尤明內典。 歷安成、武陽、宣城內史,皆著政績。 後徵爲右衞將軍,卒於官,諡曰此。 後爲靑、冀二州刺史。 仕魏位潁川太守,與子僧辯據郡歸梁,封 神念性剛正,所更 及元帝初,追贈 極

眼 爲魏名將。 時復有楊華者,能作驚軍騎,亦一時妙捷,帝深賞之。 神念少善騎射,及老不衰。嘗於武帝前手執二刀楯,左右交度,馭馬往來,冠絕羣伍 華少 有 勇力,容貌鑲偉,魏胡太后逼幸之。 華懼禍,及大眼死, 華本名白花,武都仇池 擁部曲, 載父 父|大

列

傳第

五十

 \equiv

王神

念

屍, 、改名華, 來 降 胡太后追思不已,爲作楊白花歌辭, 使宮人晝夜連臂踢 蹄歌之, 聲甚:

斷。 華後位 .太子左衞 率,卒於侯景 軍 中

神念 長子遵業,位太僕卿。 次子僧辯。

其軍 者必 之氣。 金 龜 一、敬躬 報, 一將銷之,龜生光照室,敬躬 僧辯字君才,學涉該博,尤明左氏春秋。 元帝 遂謀作亂, 走安成,僧辯禽之。 爲 江州 刺 遠近響應。 史, 僧辯隨府為中兵參 又討平安州 以爲 元帝命中直兵參 神 而 禱 反蠻,由 軍。 之。 言辭辯捷,器宇肅然, 軍曹子郢討之, 所請 時 有安成 是以 多驗,無賴者多依之。 勇略 望族劉敬躬 稱 使僧辯襲安成。 雖射不 者, ·穿札, 田 平 間 生 得 有 白 子 而 郢 德 蛆 有 旣 化 陵 有 破 怨 爲

賊邪 言。 總 辯 兼行,西就 督 以 元帝 竟 |舟師 ? 元帝除 今唯 陵 問 間 元帝。 萬赴援。 荆州 僧辯 死耳。」僧辯對曰:「今日就戮甘心,但恨不見老母。」帝自斫之, 部下皆勁勇,猶 僧辯 元帝承制,以爲領軍 僧辯爲貞毅府諮議參軍, 及至,臺城陷沒, 以 情 未盡 對。 元帝 來,意欲待 性忌,以 將軍。 侯景悉收其軍 集 代柳 然後 為遷延不 及荆、湘疑貳,元帝令僧辯及 仲禮 上 頓。 實 爲 去,大怒厲 竟陵 而厚 與泉俱入,使泉先言之,泉入不 太守。 加 綏 撫 聲 及侯景反, 目 遣 歸 卿憚行拒 鮑泉討之。 竟陵 中其髀, 元帝 於是倍 命, 流血 命 伯辯 時 欲 政 [::] 僧 道

故 地 而 鮑泉 不 悶絕, 死 力 不 會 **外之方蘇**。 能 岳 陽 剋 長沙 軍 襲 ,帝命僧辯代之。 江陵,人情 卽送廷 一尉,幷收其子姪並繫之。 搔 擾。 僧辯仍部分將帥, 元 帝遣就 獄出僧辯以 其母脫簪珥待罪,帝意解 **幷力攻圍**, 為 城 內都督。 遂平湘土。 俄 而 賜 岳 還復 陽 災 良藥, 奔退, 領 軍

將

州 棚, 下 緣 H 賊 江 賊 風 此 屯 侯 城 乃 衆 不 · 戍望 景 濟江 引 自 便 浮江 當 退。 風 自 一輕騎 非 請服。 西寇,軍次夏首。 焚而 礙。 元 帝 退。有 僧辯 至城下,謂 叉 僧辯並沉 个命平北! 流 百 星 口 將軍 在 墮 公私 城 一其營中,賊徒大駭,相顧失色。 僧辯爲大都督,軍次巴陵。 人掌握,豈得 中日:「語王 胡僧 船於水,分命衆 **祓率兵援僧辯。** 便降。」 一領軍, 軍乘城固守,偃旗 景軍 何不早降。」 是日, 肉 薄苦攻,城 景旣陷郢城,將進寇荆州 賊復 賊帥任約又為陸法 僧辯使答曰:「大軍 攻城不剋, 臥 內同時鼓躁,矢石 鼓, 安岩 又爲 無 和 火 人。 但 所禽, 艦 向 於是 燒 荆 翌 ায়

計景 蹙 散。 求 有 元 輸 帝 攻 醋 郢 拔 以 自 城 僧 城 魯 身還 辯 出 Щ · ; 五 爲 仍 就 征 色光 攻 景。 東將 郢 曜 卽 僧 軍 , 工開府 辯 入 入 偽許 城 羅 前 儀同 城。 之。 鵬 鵡 三司、江 叉 子仙 洲 有 水 大 謂爲 中。 星 州 如 信然, 刺 景 車 史,封長 聞 輸 之, 浮舟將發, 墜 賊 倍道 營 寧縣公, 歸 去 建鄴 地 僧辯 命即 + 丈 命杜龕 率巴陵 賊 變 帥 成 宋 火, 鼓 子 諸 課 仙 軍 掩至,

景

乃燒營夜

遁

一旋

軍

夏首

等困

時

碎

沿

流

列

傳

第

五

+

Ξ

王

胂

念

大破之,禽子仙、丁和等送江陵。 元帝命生釘和舌臠殺之。

郢州旣平,僧辯進師尋陽。 軍人多夢周何二廟神云:「吾已助天子討賊。」 自稱征討大

將軍,並乘朱航。 俄而反曰:「已殺景。」同夢者數十百焉。

元帝加僧辯侍中、尚書令、征東大將軍。僧辯頻表勸進,並蒙優答。 於是發江州直指建

|鄴;乃先命||南兗州刺史||侯瑱襲||南陵、||鵲頭等戍,並剋之。

先是,陳武帝率衆五萬出自南江,前軍五千行至盆口。 陳武名蓋僧辯,僧辯憚之。 旣

發鵲頭,中江而風浪,師人咸懼。 風息,若鼎命中淪,請從此逝。」言訖風止,自此遂泛安流。 至盆口,與僧辯會于白茅洲爲盟。 僧辯再拜告天曰:「僧辯忠臣、奉辭伐罪, 社稷中興, 於是升壇歃血,共讀盟文,辭氣慷慨,皆淚下霑衿。 有羣魚躍水飛空引導,賊望官軍 當使

上有五色雲,雙龍挾艦,行甚迅疾。

之功,而馭下無法,軍人鹵掠,驅逼居人。都下百姓父子兄弟相哭,自石頭至于東城,被執 之。景走朱方,僧辯命衆將入據臺城。其夜軍人失火燒太極殿及東西堂。 縛者、男女裸露、衵衣不免。 緣准號叫、翻思景焉。 景自出戰於石頭城北,僧辯等大破之。盧暉略聞景戰敗,以石頭城降。 僧辯雖 僧辯引軍入據 有 滅 贼

僧辯命侯瑱、裴之橫東追景,僞行臺趙伯超自吳松江降侯瑱,瑱送至僧辯,僧辯謂曰:

卿 前 荷 廷 稱 國 歎 重 功德 恩, 知 有 遂復 僧 趙 辯戄 伯 同逆, 超 然 一) 世 乃漻 蔵 今日之事 王 僧辯 答 曰:「此 , 乎 將欲 乃聖 社 如何。」因 稷 上 旣 威德、羣 傾 命送江 爲 我 帥 所 用 復, 陵。 命 人之 伯 老夫雖濫 超 興 旣 一廢, 出, 亦 居 僧辯 復 戎 何 顧 坐客 何 力之 賓客 日

有

於

是逆寇悉平。

水 嚴 繖 焉 子 名 爲 稱 徒 蓋 日 位. 都 助 時 軍 百 討 先 尋 兀 黨 鼓 王 ٠, 言 帝 姓 m 是 西 納 勇銳 吹 百 艦 减 洪 下 蕭 刨 天監 姓 雅 諸 者 仰 羽 氏 位 旣 蒙蒙 竊 當 一,授鎭 降 面 儀 軍 而 邵 中沙 言 悉備 目 衝 納 滅, 朝 事 陵王 知 之,父老或聚 鬭 廷未達 納 李氏 (衛將) 菛 其 翼 艦 先是,陳武 河 以 釋 敗 一一三 爲 代興。 從 軍 寶 也。 其 東王 水 應 入 誌 心,韶 司 長 符,於是 陵 \equiv 一、桂陽 爲讖云:「太歲龍 徒,加 Щ 讓都 及 而 沙 月 悲 城 徴 湘 庚寅, 竊 僧辯 嗣 時 班劍二十人,改封永寧郡公,侍中、尚 督 州 共議拜 王 天 時 於 賊 相 僧辯 三人並爲元帝所害,故立其 有 納 陸 日 就 謂 納等攻 清 等據 宜 兩 洪雅 日 豐侯 明 龍 · ; 僧辯 車輪 將 自 地 初 爲 無理 城 循 破 龍 大 無雲霧 不 西江 衡 南 夾岸 將軍 已 受, 州 征 去 中 一,爲 蕭 刺 為城、 ·) 算事 故元帝 國 軍 史丁 經 騰 都 其 霜 發 躍 督東 公 子。 」 道貴 之 升 爲 , 士 分 草 際, 一卒皆 天 主。 像 爲 Ŀ 應 一 於艦 東 諸 忽 五 死 初 洪雅 百 書 西 李 軍 色 然 戰 祭 洪雅 一令如 都 事 納 分 餘 風 之 乘 督 明, 造 人 雨 餘 以 平 又自 故。 以 而 散, 大 器器 太牢,加 肩 遙 時 陳 俱 艦 大 南 零 映 甲 武 人 輿, 精 江 討 帝 陵

列]

傳

蚁 紀 賢 视。 僧辯 並 共 朝 績 擁 高 節 衆 十五. 蓋 賊 因 賊 上流, 知 其 77 乃退 丈,選: 儀 無備 不 設備,其黨吳藏、李賢明等蒙楯直進, 鼓 歸 內外駭懼。 吹, 其 親 中尤 初,陸納作逆,以王琳爲辭,云「若放琳則 執旗 毎 戰 勇健. 輒 鼓以 祭 元帝乃遣琳和解之, 乏以 者乘 誠進止, 水福 之。 僧辯 羣賊 又造二艦,一日青龍 大敗, 憚 之, 湘州 稍作連城以逼 歸保 僧辯 乃平。 長沙。 尙 據胡 自服」。 因被詔 艦,一 僧辯 牀 焉。 不 乃命築 時 爲 會衆軍 日 賊 之動, 衆軍未之許,而 白 不 虎 敢交鋒, 壘 一西討。 艦, 指 圍 之, 皆 衣 並 尋 而 以 懷 武 而 自 牛皮, 懈 武 陵王 遂斬 出 怠 臨

徴 宿 吳郡 即詔 是時,齊遣郭元建 僧辯急下赴援。 太守張彪、吳興太守裴之橫 謀襲建鄴,又遣其大將東方老等繼之。 僧辯次姑孰 會與而 ",即留 I 鎭 焉。 大敗之。 先命豫州 僧辯 振 旅 刺史侯瑱築壘於 歸 陳武帝聞之, 建 鄴 東關以拒 馳報 江 北 元

於 綏接,家門內外莫不懷之。 承 聖三年二月,詔 以僧辯爲太尉、車騎大將軍。 初,僧辯下獄,母流淚徒行,將入 頃之丁母憂。 謝罪,元帝不 母 姓 魏氏, 與相見。 性甚 安 和 時貞 善

愍悼 雖 惠 世 剋 子 ,且以僧辯勳重,故喪禮 復 舊都, 有 寵,母詣閣 功蓋宇 宙, 自 陳無訓 母 恒自 加焉。 涕 1謙損 泗 嗚咽,衆並 命侍中、謁者監護喪事、諡 ,不以富 貴 驕 **矜之。及僧辯罪免,母深** 物,朝野稱之,謂爲明哲婦人。 日貞敬太夫人。 相責厲 靈柩將歸建 一辭色俱 及亡,甚見

康,又遣謁者至舟渚弔祭。

未至,而荆州已滅。 中外諸軍 其年十月,魏遣兵及梁王營合衆將襲江陵,元帝徵僧辯於建鄴, 事、錄尙書。 及敬帝初卽梁王位,僧辯預援立功,承制進驃騎 與陳武帝參謀討伐。 大將軍、中 爲大 、都督、 書監、 荆 州 刺史。 都督

僧辯 遣吏部尚書王通送啓,因求以敬帝爲皇太子。 明報書許之。 擁 衞士三千。 故 櫼中流,不敢就岸,末乃同會于江寧浦。 之禮。 不納。及貞陽與齊上黨王高渙至東關,散騎常侍裴之横軍敗,僧辯遂謀納貞陽,仍書定 時齊文宣又納貞陽侯明以爲梁嗣,與僧辯書,并貞陽亦頻與僧辯書,論還國繼統 僧辯慮其爲變,止受散卒千人而已,幷遣龍舟法駕往迎。 因遣第七子顯、顯所生劉幷弟子珍往充質,遣左戶尚書周弘正至歷陽迎明。 明踐位,授僧辯大司馬,領太子太傅、揚州牧,餘 僧辯遣使送質于鄴,貞陽求度 貞陽濟江之日,僧辯 之事

防 陳 已踰 武 備 。」僧辯曰:「委公北門,何謂無備?」是夜,及子頗俱被絞殺。 縦 城北而入,南門又白有兵來。 陳 武 火焚之,方共頠下就執。 帝 時爲司空、南徐州刺史,因自京口 陳武謂曰:「我有何辜,公欲與齊師賜討。」又曰:「何意全無 僧辯與子頠遽走出閣, 舉兵襲之。 僧辯常處石頭城,是日視事,軍人 計無所出,乃據南門樓拜請求哀。

51

械。 兵 順 后 H 我 大 作 所 但 謂 舉 生 賊 陳 初 主至 女,未 武 乃敢進,遂剋之。 江 事 壽春 肝 宿 辯 勢已成, 徴 有 昏 平 兵打 圖 建 而 僧辯 僧辯謂齊軍 僧辯母亡,然情好 **| 鄴,遣陳武守京口,推以赤心,結廉、藺之分。** 生死 北。 志 安都 須決,在後欲何所望? 時壽 及聞 舟艦將趣石頭,陳武 一必出江 命、留 春竟無齊軍 肝城 甚密,日 表, 因遣 中,銜枚 ,又非陳武 其長子顗 記室參軍 若敗 、控馬未 m 俱 進。 之譎,殆天 死,後期得 江町 屢 進 。 知謀者唯侯安都、 諫 以 不 安都 事 . 聽 。 授也。 報 発 矿 且爲第三子頗許娶陳武章 大懼,乃追 陳武,三 至是,會江淮 頭邪 ? 周文育 陳武 陳武 仍使整舟艦 人報 賜曰:「今 m 云「齊 已,外 安都 器

及 陳 平淮 顗 承 聖 南 初位 殺 琳 頭聞 一侍中,魏剋江陵,隨王琳 之,乃出郡 城 南 登 入齊, 高冢 上,號哭一慟 爲竟陵 郡守。 而 絕。 齊遣王琳鎭壽春,將圖江左

顗 弟 頒 少有 志 節 ",恒 |隨梁元帝。 及荆 州 覆滅 入于魏

僧 辯 旣 亡,弟僧 智得就任 約。 約 敗走,僧 智肥 不 能行,又 遇害。

僧愔 徐 精 嗣 誠有 徽 不平 僧 等 智弟僧 挾 密 感,當得道路,誓不受辱人手。」拔刀將自刎 齊 召侯瑱 悟位 軍 攻陳。 譙州 見禽。 刺 軍 史,征 敗,竄 僧 愔 以 蕭 逸荒野 名 勃 義 ,及聞兄 了 莫 知 **貴**塡, 所之, 死 瑱 。 引 乃委罪於 軍 仰天 ,聞空中催令急去, 還。 嘆曰:「讎恥 將羊鯤 時 吳州 斬 刺 之。 史羊亮隸 不 雪, 僧愔 僧 愔 未 異 復 在 欲 之, 得 身 僧 奔齊, 膏野 悟 勉力馳 **F** ,與 與

進,行一里許,顧向處已有陳人。 踰越江山,僅得歸齊。

帝授為 徐州 嗣徽 結 甥,復爲比丘慧暹藏,得脫俱還。 爲 南 羅 豫州 墮馬 之亡,任秦州 州 徐 儀 嗣 刺 徽,高 一嗣宗援兄見害。 史,及弟嗣宗、 同, 刺 史任約 命將應赴。 平 刺 人,父雲伯 與僧辯故舊,圖 史。 嗣產 及石 嗣產先在建鄴,嗣宗自荆州 嗣 自青 並有武 產 頭敗退,復請兵於齊,與任約 爲 及僧辯見害,兄弟抽 部 陳武帝。 陳武軍所禽,辭色不撓而 用。言 南 歸,位終新蔡太守。 嗣徽從征巴丘,以功爲太子右衞 帝遣江旰說之,嗣徽 滅亡中逃得 刀裂眦,志在 王曄 侯景之亂, 死。 席皐 執町 至都。 任約、王曄 立功,俱 送鄴乞師焉。 嗣徽 同 從弟嗣先卽僧辯之 心 歸荆 得北 度江。 逃就兄 率、 監 州 嗣徽、密 南 及戰敗 齊文宣 元帝以 荆州

皮乎? 生據 史。 潰。 州 羊侃 弱 試 冠 以 反 功 隨 字 作虎狀。」侃 ,仍遣其弟天生 爲 父在 祖 忻, 征 梁州 東 泰 大將軍 山梁父 立 因伏,以 一功,初 文陷 、東道行臺,領泰山 人 手 岐 爲 11 州 抉殿沒指 尙 寇 書 **父**祉, 郎, 雍州 以力聞。 北史有傳。 魏帝 太守,進爵鉅平侯 侃 爲 壯之, 偏 魏帝常謂 將, 侃少而 賜以 隸 蕭 珠 日 寶寅 褒偉, -劍。 郞 往 官謂 身長 討之, 正 光 七尺 中 卿 , 射 爲 八八十, 秦州羌莫 殺 虎, 天生, 豊 羊 雅 其 質 愛文 折 衆 虎 念

列

担侃 懷土,幸適去留。」各拜辭而 夜,乃出 暉率衆十萬及高歡、爾朱陽都等相繼 之,使授侃驃騎大將軍、司徒、泰山郡公,長爲兗州刺史。 侃 初,其 |魏境。 乃率精兵三萬襲之,不剋,仍築十餘城以守之。 至渣口,衆尙萬餘人,馬二千匹。 恒 使侃南歸,侃至是將舉濟、河以成先志。 去。 而 至。 棚中矢盡,南軍不 將入南, 梁朝賞授一 侃斬 士卒竟夜悲歌, 侃乃謝曰:「 其從兄兗州 其使。 進,乃夜潰圍 與元法 魏人大駭, 刺史敦 僧 而 密知之,據州 出。 同。 令僕射于 魏帝 卿等 日 聞

登樹。 候,累遷太子左衞率,**侍中**。 風,英賢不絕。」是日詔入直殿省,啓尙方仗不堪用。 宴詩三十韻示 餘緒,帝寵之踰於他者,謂曰:「朕少時捉矟,形勢似卿, 尺,圍一尺三寸。 侃以大通三年至建鄴,授徐州刺史,併其兄獸及三弟忱、給、元皆拜刺史。 帝曰:「此樹必爲侍中折矣。」俄而果折,因號此稍爲折樹稍。 侃,侃即 帝因 賜侃 席 上應詔。 河南國紫騮令武之。 車駕幸樂游苑,侃預宴。 帝覽曰:「吾聞仁者有勇, 侃執矟上馬,左右 上大怒,坐者非一。 時少府奏新造 今失其舊體,殊覺不奇。」上又製 今見勇者有仁, 可謂鄒、 撃刺, 北人降者,唯侃是 兩刃矟成, 及侯景作逆。果弊 特盡: 侃封高 其 長二丈 妙。 魯遺 衣 昌 觀 四 (武) 冠 縣

後遷都官尚書,尚書令何敬容用事,與之並省,未嘗游造。 左衞蘭欽同侍宮宴,詞色少

於仗粗

華林 更置 交, 侃於坐折 法 拜! 會 欽 欽從之。 拜 之曰:「小子 謝 於省中。 宦者張 ! 王 汝 僧胤嘗候侃,侃曰:「我牀非閹 一鈴謂 以銅鼓買朱异作父, 欽 曰:「卿能 屈 膝廉公, **韋粲作兄,何敢無宜適。」朱時在席。** 爾見盡美,然羊公意猶未釋,容能 人所坐。」竟不前之。 時論美 後 其

陽侯 明 太清 乘 水 元年,爲侍中,會大舉北侵,以侃爲冠 攻彭 城 不見納。 旣 而 魏援 大至, 侃 軍 頻言 將軍,監作寒山 乘 其遠來可 堰事。 撃, 旦 Ħ 堰立,侃 叉 勸 出 戰 並不 |神貞

貞正

令邵 從。 都,遂寢其策。 陵王襲取 侃 二年,復爲 乃率所 壽春, 領 令王質往。 都官尚書。 頓堰上。 使景進不得前, 及衆軍敗,侃結陣徐 侃曰:「今茲敗矣。」乃令侃率千餘騎頓望國 侯景反,攻陷 退失巢窟, 歷陽,帝問 還 烏合之衆, 侃討景之策。

自然瓦解。

議者謂景未敢

便逼

門。

景至新林,追

侃求以二千人急據采石

入

副宣城

王

都

督城內諸軍

事

入 中唯有侃 在 位 武 门 及 庫 時景旣卒至,百姓競入,公私 閭 自 及 里 取器甲,所司 柳津 士大夫莫見兵甲。 韋黯。 不能禁, 津年 老且疾、黯懦而無謀、軍旅指撝、一決於侃、 侃命 賊至卒迫,公私 混 亂,無復次序。 斬 數 人方得止。 駭 震。 侃乃區分防擬,皆以宗 是時梁興四 時宿 將 已盡,後進 十七年, 膽 小 室 境內 力 年 間 並 俱壯,簡文深 之。 出 無 在 事 軍 ,公卿 外, 人 城

列

傅

仗之。

東掖門、縱火甚盛。 兩、銀萬兩、絹萬匹賜戰士。 及賊逼城,衆皆兇懼,侃爲稱得外射書,云「邵陵、西昌侯已至近路」,衆乃少安。 侃以水沃滅火,射殺數人,賊乃退。 侃辭不受,部曲千餘人並私加賞賚。 加侍中、軍師將軍。 有 韶送金五千 贼攻

俄盡。 倒,衆皆服焉。 登城樓車,[四]高十餘丈,欲臨射城中。侃曰:「車高塹虛,彼來必倒,可臥而觀之。」及車動果 賊爲尖頂木驢攻城,四天石所不能制。 贼又東西起二土山以臨城,城中震駭。 侃作雉尾炬,施鐵鏃,以油灌之,擲驢上焚之 侃命為地道,潛引其土山,不能立。 賊又作

死者太半。 利,門隘橋小,必大致挫衄。」不從,遂使千餘人出戰。 城,旣不能下,故立長圍,欲引城中降者耳。今擊之,出人若少,不足破賊,若多,則一旦失 贼旣頻攻不捷,乃築長圍。 朱异、張綰議出擊之。 帝以問侃,侃曰:「不可,賊多日攻 未及交鋒、望風退走、果以爭橋赴水、

了。 不以 爾而生進退。」因引弓射之。 幸早殺之。」數日復持來,侃謂鸞曰:「久以汝爲死,猶在邪。吾以身許國,誓死行陣,終 初,侃長子鸞爲景所獲,執來城下示侃。 賊以其忠義,亦弗之害。 侃謂曰:「我傾宗報主,猶恨不足,豈復計此

臣 兵,豈有人臣 宜啓朝 景 遣儀同 廷 [而至於此。吾不能妄受浮說,開門揖盜。」士哲曰:「在北之日,久挹風猷,願去 ·。」侃曰:「侯將軍奔亡之後,歸命國家,重鎭方城,懸相 ·傅士哲呼侃與語,曰:「侯王遠來問訊天子,何爲閉拒不時進納? 任寄,何所患苦,忽致稱 尚書國家大

於 城內築城,賊不 後大雨,城內土山崩,賊乘之垂入,苦戰不能禁。侃乃令多擲火,爲火城以斷其路,徐 能進。 尋以疾卒於城內、贈侍中、護軍將軍。 子球嗣

戎服,得一相見。」侃爲**免胄,士哲瞻望**久之而去,其爲北人所欽慕如此

律,自造采蓮、棹歌兩曲,甚有新致。 器皆金玉 水 玉 簪。 <u>ئ</u>. ,橫行得七跡。 觀者塡咽。 侃 其醉醒 敕資歌人王娥兒,東宮亦賚歌者屈偶之,並妙盡奇曲,一時 儛人張淨琬腰圍一尺六寸,時人咸推能掌上舞。又有孫荆玉能反腰帖地,衛得席上 少雄勇,膂力絕人,所用弓至二十石,馬上用六石弓。 通 雜寶,奏三部女樂。 梁 水齋,飾以珠玉,加之錦績,盛設帷屏,列女樂。 大同 泗橋有數石人,長八尺,大十圍。 中,魏使陽斐與侃在北嘗同學,有詔命侃延斐同宴。 至夕,侍婢百餘人俱執金花燭。 姬妾列侍, 窮極奢靡。 侃執以相擊,悉皆破碎。 嘗於兗州堯廟蹋壁,直上至五 有彈筝人陸太喜著鹿角爪,長 乘潮解纜,臨波置酒,緣塘傍 侃不飲酒而好賓游,終日獻 無對。 賓客三百餘人,食 初赴衡州,於 性豪侈,善音 兩 艖

酬

同

所 燔 金帛不可勝數。 性寬厚,有器局。 侃聞聊不挂意,命酒不輟。 嘗南還至漣口置酒,有客張孺才者,醉於船中失火,延燒 孺才慚懼自逃,侃慰喻使還,待之如 七十餘艘,

驚。問岸上,云「郭元建猶在廣陵」。景大喜,將依之。

鵑拔刀叱海師使向京口。

鵑與王元 以稍入刺殺之。景僕射索超世在別船,葳蕤以景命召之,斬于京口。 非天乎。 今就王乞頭以取富貴。」 景欲透水, 鵖抽刀斫之。 景乃走入船中, 以小刀抉船。 禮、謝答仁弟葳蕤,並景之昵也,三人謂景曰:「我等爲王百戰百勝,自謂無敵,卒至於此,豈 爲庫眞都督。 會景畫寢,鵾語海師:「此中何處有蒙山,汝但聽我處分。」遂直向京口,至胡豆洲,景覺,大 第三子鵾字子鵬,隨侃臺內,城陷,竄於陽平。侯景以其妹爲小妻,呼還待之甚厚,以 及景敗、鵾密圖之,乃隨其東走。景於松江戰敗,惟餘三舸,下海欲向蒙山。

蕭勃於嶺表,聞僧辯敗,乃還,爲侯瑱所破,遇害,年二十八。 破郭元建於東關,遷東晉州刺史。承聖三年,西魏圍江陵,鵾赴援不及。從王僧悟征 元帝以鹍爲青州刺史,封昌國縣侯,又領東陽太守。征陸納,加散騎常侍,除西晉州刺

羊鴉仁字孝穆,泰山鉅平人也。 少驍勇,仕郡爲主簿。 普通中,率兄弟自魏歸梁,封廣

和之、 晉侯。 於 渦陽 仁州 魏 征伐 軍 刺史湛海珍等趣縣瓠 漸 逼 鴉仁恐糧運不繼 應接。) 遂還北 景 至, 北司州刺 司 仍爲都 上表 督、司 陳謝。 史。 及侯景降,韶鴉仁督土州 像 帝大怒鴉仁,鴉仁懼,頓 三州 刺 史, 鎭 縣 瓠 會侯 刺 軍 於 景 史 淮 敗

城 陷 ,景以爲五 太清二年,景旣背盟, 兵尚 書。 鴉仁常思 鴉仁乃與趙伯超 奮發,謂 所 及南康王會理共攻賊於東府城, 親 吾以 凡流,受 龍朝 廷, 竟 反爲賊敗。 無報 以

日

及侯景反,鴉仁

一率所

部入援。

重 恩。 今若以此終,沒有餘責。」 |因泣 下 ·,見者傷焉

共 棺棺 因 焚之,半骨 三年,出 而 泣下。 奔江 雜 後 西,將赴江 鴉仁 他骨,作五袋盛之,銘袋上曰 兄子海珍 陵,至東莞,爲故北徐州 知之, 掘晷父伯道弁 「荀晷 祖父母某之骨」。 刺史荀伯道子晷所害。 祖 及所生母 合五 喪, (1) 臨 各分其半骨, 死以報效不

|鴉||仁 子亮, 侯景 亂後移至吳州 刺史,隨王琳,以名將 子 見禮甚隆 爲 人 /多酒 無賴,酒醉

爲 閹 豎所殺。

論 列 日 傳 第 神 Ŧî. 念 + Ξ 侃 羊 羊鴉仁 鴉 校 勘 自北 記 徂 南, 咸受寵任。 旣 而侃及鴉仁 晚 遇 屯 剝。 侃則

元宰,內有奧主而外求君,遂使尊卑易位,親疎貿序,旣同兒戲,且類弈棊。 才,而逢茲酷濫,幾致隕覆。 臨危不撓,鴉仁則守義以殞。 於此,喪國傾宗,爲天下笑。 豈天將啓陳,何斯人而斯謬也,哀哉! 幸全首領,卒樹奇功,事人之道,於斯爲得。 古人所謂「心同鐵石」,此之謂乎。 僧辯風格秀舉, 有文武奇 及時 延敵開釁,實基 鍾交喪,地居

校勘記

- (一) 然情好甚密 「然」上各本衍「雖」字,今删。
- 因遣記室參軍江旰以事報陳武 諸本改作「江盱」。按北齊書文苑傳有江畔,則字當作「旰」,今改回。下出「盱」字幷改。 「江旰」各本作「江旴」,大德本作「江旰」,百衲本影印時,誤從
- 及弟嗣宗嗣產並有武用 嗣產」二字,據通志補。 「嗣產」各本並無。按下「嗣產先在建鄴」,「俱逃就兄嗣徽」,明此脫
- (四) 賊爲尖頂木驢攻城 「尖頂」各本誤「尖項」,據梁書改。
- 珥. 賊 又作登城樓車 「車」字據梁書及册府元龜三九九補。 按下「車高塹虛」,明當有「車」字。
- 「六」頓軍於淮上「於」各本作「入」,據梁書改。
- 十 掘晷父伯道幷祖及所生母合五喪 其伯。伯道乃其父名。 「道」字各本並脫,據通志補。下「茴晷祖父母某之骨」,不及

南史卷六十四

列傳第五十四

江子一 胡僧祐 徐文盛 陰子春子壁

杜崱 兄岸 弟幼安 兄子龜 王琳 張彪

江子一字元亮,自濟陽考城人,晉散騎常侍統之七世孫也。 父法成,奉朝請。

帝許之,有敕直華林省。 奉朝請。 子一少慷慨有大志。家貧,以孝聞,苦侍養多闕,因終身蔬食。 上書言事,爲當軸所排, 其姑夫左衞將軍朱异權要當朝,休下之日,賓客輻湊。 乃拜表求入北爲刺客。 武帝異之。 仕梁起家為王 、 又啓求觀書秘閣,武 异不爲物 國侍郎、

津校尉。

議所歸,欲引子一爲助,子一未嘗造門,其高潔如此。

列傳第五十四 江子

爲遂昌、曲阿令,皆著美績。後爲南

少 得失,武帝甚善之, 詔曰:「屋漏在上, 知之在下, 其令尚書詳擇, 子四乃據地不受。帝怒亦歇,乃釋之,猶坐免職。 ·府丞顧璵嘗奏事不允,帝厲色呵責之。 弟子 四 歷尚書金部郎。 大同初,遷右丞。 子四乃趨前代炯等對, 兄弟性並剛烈。 對甚激切。 施於時政。」左 子四自右丞上封事,極言 帝怒呼縛之, 戶郎沈炯、

旋。」乃줲冑赴敵,子四矟洞胸死,子五傷脰,還至塹一慟而絕。 騎, 生。 及 不得其死,今日之事,何所復惜。不死闕前,終死闕後耳。」及城被圍,開承明門出戰。 功 弟尚書左丞子四、東宮直殿主帥子五並力戰直前,賊坐甲不起。 《退還南洲,收餘衆步赴建鄴,見於文德殿。帝怒之,具以事對,且曰:「臣以身許國,常恐 諡義子,子四黃門侍郎,諡毅子,子五 衆並縮。 詔 及侯景攻陷歷陽,自橫江將度,子一帥舟師千餘人於下流欲邀之,其副董桃生走,子一 子一續黃圖及班固「九品」,并辭賦文章數十篇,行於世。 贈子一給事黃門侍郎,子四中書侍郎,子五散騎侍郎。 子一刺其騎,騎倒 1.稍折,賊解其肩,時年六十二。 弟曰:「與兄俱出,何面 中書侍郎,諡烈子 贼義子一之勇,歸之,面 侯景平,元帝又追贈子一侍 子一引稍撞之,贼縱突 子一 獨 如

胡 僧祐字願果,南陽冠軍人也。 少勇決,有武幹。 仕魏位銀青光祿大夫。 以大通三年

北。 避 爾 朱氏 中大通元年,陳慶之送魏北海王元顥入洛陽,僧祐又歸梁,除南天水、天門二郡太守, 之難歸梁。<a>[三 頻上封事,武帝器之,拜文德主帥,使戍項城。<a>[三 魏剋項城,

有 善政。 性好讀書,愛緝綴,然文辭鄙野,多被謝謔,而自謂實工,矜伐彌甚。

晚 事梁元帝。 侯景之亂,西沮蠻反,元帝令僧祐討之,使盡誅其渠帥。 僧祐諫忤旨,

下獄。

令援 也。」元帝聞 羽 侯景聞之遂遁。 儀,公名望隆重,不宜若此。」答曰:「我性愛之,恒須見耳。」或出游亦以自隨,人士笑之。 僧辯。 大寶二年,景圍王僧辯於巴陵,元帝乃引僧滿於獄,拜爲假節、武猛將軍,封新市縣侯, 而壯之。前至赤沙亭,會陸法和至,乃與幷軍,大敗景將任約軍, 將發泣下 後拜領軍將軍,厚自封殖。 以所加鼓吹恒置齋中,對之自娛。 吉則 、由朱, 禽約送江陵。 人曰:「此是 凶則由白

承 聖二年,爲車騎將軍、開府儀同三司。 及魏軍至,以僧滿爲都督城東諸軍事。 俄中

流矢卒,城逐潰。

仍 統 其衆 文盛字道茂,彭城 ,稍立功績。 大同末,為寧州刺史。 人也。 家本魏將。 父慶之,梁天監初自北歸南,未至道卒。 州在僻遠,羣蠻劫竊相尋, 前後刺史莫能制 文盛

文盛推心撫慰,夷人感之,風俗遂改。

盛 盛無以答,遂死獄中 府大怒,下令數其十罪,除其官爵。

文盛私懷怨望,帝聞之,乃以下獄。時任約被禽,與文 陷郢州,軍中懼,遂大潰,文盛奔還荆州。一元帝仍以爲城北面大都督,又聚斂贓汙甚多,元 文盛不許。文盛妻石氏先在建鄴,至是,景載以還之。文盛深德景,遂密通信使,都無戰 持。景聞之,率大衆西上援約,至西陽。 心,衆咸憤怨。杜幼安、宋簉等乃率所領獨進,大破景,獲其舟艦以歸。 史王珣等會之,[2] 並受文盛節度。 大敗約於貝磯。約退保西陽,文盛進據蘆洲,又與相 東下至武昌,遇侯景將任約,遂與相持。 同禁。 太清二年,聞國難,乃召募得數萬人來赴,元帝以爲秦州刺史,加都督,授以東討之略 文盛謂約曰:「何不早降、今我至此。」約曰:「門外不見卿馬跡、使我何處得降。」文 諸將咸曰:「景水軍輕進,又甚飢疲,擊之必大捷。」 元帝又命護軍將軍尹脫、平東將軍杜幼安、巴州刺 會景密遣騎間道襲

智伯 人臣 **₩** 與梁武 陰 子春字幼文,武威姑臧人也。 天下方亂,安蒼生者其在君乎。」帝曰:「幸勿多言。」於是情好轉密,帝每有求,如 (帝鄰居,少相善,嘗入帝臥內, 晉義熙末,曾祖襲隨宋武帝南遷,至南平,因家焉。 見有異光成五色, 因握帝手曰:「公後必大貴,非

外府焉。

及帝踐阼,官至梁、秦二州刺史。

朱衣 子春 Щ 心 祈 禱 間 人相聞,辭謝云:「得君厚惠,當以一州相報。」子春心喜,供事彌勤。 記之。 夢見人通名詣子春云:「有人見苦,破壞宅舍。旣無所託,欽君厚德,欲憩此境。」子春 一糜費,毀神影,壞屋舍。 子春雖無佗才行,臨人以廉潔稱。 子春仕歷位朐山戍主、東莞太守。 一諜前知,子春設伏摧破之,詔授南青州刺史,鎭朐山。 經二日而知之,甚驚,以爲前所夢神。 當坐棟上有一大蛇長丈餘,役夫打撲不禽,得入海水。 時青州石鹿山臨海,先有神廟,刺史王神念以百姓 閨門混雜,而身服垢汙,脚數年一洗,言每洗則失財 因辦牲醑請召,安置一 又遷都督、梁秦二州刺史。 處。數日,復夢一 經月餘,魏欲襲朐 爾夜,

敗 事,云在梁州,以洗足致梁州敗。

與 左 衛將軍徐文盛東討景,至 太清二年,徵爲左衞將軍,遷侍中。 |貝磯與景遇,子春力戰,恒冠諸軍。 屬侯景亂,元帝令子春隨王僧辯攻平邵陵王。 會郢州陷沒,軍遂退,卒

於 江 凌。 子 鏗。

列

绑

第

Ŧi. + 74

徐 文

盛

陰 子

春

味,非人情也。」及侯景之亂,鏗嘗爲賊禽,或救之獲免。[E] 鏗問之,乃前所行觴者。 賓友宴飲,見行觴者,因回酒炙以授之,衆坐皆笑。|鏗曰:「吾儕終日酣酒,而執爵者不知其 鏗字子堅,博涉史傳,尤善五言詩,被當時所重。 爲梁湘東王法曹行參軍。 初鏗嘗 與

集三卷行於世。 賦新成安樂宮。 陳天嘉中,爲始興王中錄事參軍。文帝嘗宴羣臣賦詩,徐陵言之,帝卽日召鏗預宴,使 有文

纒稍長二丈五,同心敢死士百七十人。每出殺傷數百人,敵人憚之,號爲杜彪。 騎而上,馳以歸。處膂力絕人,便馬善射,一日中戰七八合。所佩霜明朱弓四石餘力,斑絲 第三子嶷帥二百人與魏前鋒戰於光道寺,流矢中其目, [K] 失馬, 敵人交矟將至, 嶷斬其一 節,梁天監中累有軍功,後又立功南鄭,位梁、秦二州刺史。大同初,魏軍復圍南鄭,懷寶命 杜崱,京兆杜陵人也。 其先自北歸南,居於雍州之襄陽,子孫因家焉。父懷寶少有志 懷寶卒於

州、諡曰桓侯。

嶷位 .西荆州刺史,時讖言「獨梁之下有瞎天子」, 元帝以嶷其人也。 會嶷改葬父祖,帝

敕圖墓者惡爲之,逾年而嶷卒。

史,封枝江縣侯,令隨領軍王僧辯東討侯景。至巴陵,景遁。 追景至石頭。 元帝與則兄岸有舊, [4] 密書邀之。 則乃與岸、弟幼安、兄子竈等夜歸元帝,以爲武 崱,嶷弟也。 景敗,崱入據臺城。景平,加散騎常侍、江州刺史。 幼有志氣,居鄉里以膽勇稱,後爲新興太守。太淸三年,隨岳陽王來襲別 加侍中,進爵爲公,仍隨僧辯 州刺

帝徵崱與王僧辯討之。及納等戰于車輪,大敗之。後納等降,崱又與王僧辯西討平武陵王 於陝口。〔八〕旋鎭遘疾卒,諡曰武。 元建衆却, 崱因縱兵大破之, 元建遁。 是月,齊將郭元建攻秦州刺史嚴超達於秦郡,王僧辯令則赴援,陳武帝亦自歐陽來會。 時元帝執王琳於江陵,琳長史陸納等於長沙反。元

顷兄弟九人,兄嵩、岑、嶷、岌、巚、岸及弟嵸、幼安並知名。

於是夜遁歸襄陽。 岸請以五百騎襲襄陽,去城三十里,城中覺之。 岸字公衡,太清中,與崱隨岳陽王營攻荆州,同歸元帝。 岸等知營至,遂奔其兄南陽太守臟於廣平。〔云〕營遣將尹正、薛暉等攻拔 營夜知其師掩襄陽,以岸等襄陽豪帥, 帝以爲北梁州刺史,封江陵縣

列

傳 第

之,獲獻、岸等幷其母妻子女,幷斬於襄陽北門。 墳墓,燒其骸骨,灰而揚之,幷以爲漆髐。及建鄴平,圓兄弟發安寧陵焚之,以報漆髐之酷, 殺汝叔,乃枉殺忠良。」營命拔其舌,臠殺而烹之。盡誅諸杜宗族親者,幼弱下蠶室,又發其 **營母龔保林數岸於衆,岸曰:「老婢教汝兒**

元帝亦不責也。

幼安 大敗,幼安降景,景以其多反覆,殺之。 **叱羅子通** 僧辯討河東王譽於長沙,平之。又令助徐文盛東討侯景,至具磯,大破景將任約,斬其儀同 與衆軍大敗之。會景密遣騎襲陷郢州,執刺史方諸,人情大駭,文盛由漢口遁歸,衆軍 幼安性至孝寬厚,雄勇過人,與兄崱同歸元帝,帝以爲西荆州刺史,封華容縣侯。與王 (湘州刺史趙威方等。仍進軍大舉口、[10]別攻拔武昌。景度蘆洲上流以壓文盛、

逆戰,龕與陳武帝、王琳等擊之,大敗子鑒,遂至石頭。景親會戰,龕與衆軍大破之。 等守巴陵。 僧辯討平河東王譽。又隨僧辯下,繼徐文盛軍至巴陵。聞侯景陷郢州西上將至,乃與僧辯 **愈,岑之子也,少驍勇,善用兵,與諸父歸元帝,帝以爲鄖州刺史,封中廬縣侯,**[三]與王 景至圍之數旬,不剋而遁。遷太府卿、定州刺史。 及衆軍至姑孰、景將侯子鑒 論功

爲最,授東揚州刺史。又與王僧辯降陸納,平武陵王。

及 魏平 江陵,後齊納貞陽侯明以紹梁嗣, 以龕爲震州 刺史、吳興 太守,遷南豫州刺

封溧陽縣侯,又加散騎常侍、鎭南大將軍。

前 求 勇而 捨。 斬之。 和 無略, 武 竉 因 帝銜之切齒。 ,僧辯婿也,始爲吳興太守,以陳武 出 王氏 部將杜泰私通 私 因 財 截髮出家,杜氏一 賞募,復大敗文帝軍 及僧辯敗,龕乃據吳興以拒 於文帝、說龕降文帝、龕 門覆矣。 後杜泰 一帝既非素貴,及爲之本郡,以法繩其宗門,無所縱 降文帝, 然之。 之,頻 龐尙醉 敗陳文帝軍 其妻王氏曰:「霸先讎隙 不覺, 龕好 文帝遺人負出項 飲酒,終日 如 此 ,何可 恒醉, 公王寺

冠 輕 舸 得 還 在 E 琳字子珩, 左 荆 右。 稍 遷 少 好武 岳 會稽 陽 內 山陰 遂爲 史,以 人 將 也。 軍 帥 功 封 太清 本兵家。 建 二年 寧縣侯。 ,帝遣琳獻 元帝居蕃,琳姊妹 侯景遣將宋子 米萬石 ,未至,都城 並 仙 入後庭 據 郢 州 見幸, 陷 琳攻剋之, 万中 淋由 江 此 沈 未弱

仙。又隨王僧辯破景。後拜湘州刺史。

琳 巣 勁 絕 叉能 傾身下 所得賞物不以入家,麾下萬人, 多是江 淮羣 盜 平景之

列

陸納等及軍人並哭對使者,莫肯受命。 之。」咸曰「請死」。 勳 如 、讎,故納等因人之欲,抽其腸繫馬腳,使繞而走,腸盡氣絕,又臠割備五刑而斬之。
(三) 與杜龍 令長史陸納 俱爲 第 率部曲前赴湘 相泣 0 恃寵縱暴於建鄴,王僧辯禁之不可, 而 別。及至,帝以下吏,而使廷尉卿黃羅漢、太舟卿張載宣喻琳軍。 州 身輕上江陵陳謝。 乃繁黃羅漢,殺張載。 將行謂納等曰:「吾若不反, 懼將爲 職性刻、爲帝所信、荆州疾之 亂, 啓請誅之。 子將 琳亦疑 安

琳入, 戰,會琳至,僧辯升諸樓車以示之。納等投戈俱拜,舉軍皆哭,曰:「乞汪郎入城卽出。」乃放 懼 人有異圖。 元帝遣王僧辯討納,納等敗走長沙。 納等乃降。 納啓申琳無罪,請復本位,求爲奴婢。元帝乃鎖琳送僧辯。日司時納出 湘州平,仍復琳本位,使担武陵王紀。 是時湘州未平,武陵王兵下又甚盛,江陵公私恐 紀平,授衡州 刺史。 兵方

里,一口 胁 有 書 李膺, 刺 萬 一不虞,安得琳力。忖官正疑琳耳,琳分望有限,可得與官爭爲帝乎? 元帝性多忌,以楙所部甚盛,又得衆心,故出之嶺外。 ·有變,將欲如何 使鎭武寧。 帝所 任遇,琳告之曰:「琳蒙拔擢,常欲畢命以報國恩。今天下未平,遷啉嶺外,如 |琳自放兵作田,爲國禦捍, 若警急動靜相 琳非願長坐荆南,政以國計如此耳。」膺然其言而不敢啓,故遂率 又授都督、廣州刺史。 知。 孰若遠棄嶺南, 何不以琳為雍 其友人主 相 去 萬

衆鎭嶺南。

長沙蕃王蕭韶及上游諸將推琳主盟。 不受指塵,琳遣將討之,不剋。 爲元帝舉哀,三軍縞素。 元帝 爲魏圍逼,乃徵琳赴援,除湘州刺史。 遣別將侯平率舟師攻梁,琳屯兵長沙,傳檄諸方,爲進趣之計。 又師老兵疲不能進,乃遣使奉表詣齊,幷獻馴象,又使獻款 侯平雖不能度江,頻破梁軍。 琳師次長沙,知魏平江陵,已立梁王詧,乃 又以琳兵成不接,翻 更 時

|琳將張平宅乘一艦,每將戰勝,艦則有聲如野猪,故琳戰艦以千數,以野猪爲名。 建鄴 武, 琳遣李孝欽、樊猛與余孝頃同討之。 三將軍敗, 並爲迪所囚。 白水浦。 將侯安都、周文育等討琳,仍受梁禪。安都歎曰:「我其敗乎,師無名矣。」逆戰於沌口。 安都、文育、置琳所坐艦中,令一閹豎監守之。琳乃移湘州軍府就郢城,帶甲十萬, 乘平肩輿,執鉞而麾之,自四禽安都、文育,其餘無所漏,唯以周鐵武一人背恩,斬之。自三銷 于魏求其妻子,亦稱臣于梁。 陳武帝旣殺王僧辯,推立敬帝,以侍中、司空徵琳。 琳巡軍而言曰:「可以爲勤王之師矣,溫太眞何人哉!」南江渠帥熊曇朗、 不從命,乃大營樓艦, 安都、文育等 將圖義 陳武帝遺 盡逃 練兵於 周迪 還 懷 琳

立,出質于濟,請納莊爲梁主。 初,魏剋江陵之時,永嘉王莊年甫七歲,逃匿 齊文宣遣兵援送,仍遣無中書令李駒縣册拜琳爲梁丞相、都 人家。 後琳迎還湘中,衛送東下。 及敬帝

大將

軍

中中

書

監

改封

安成

郡

公,

其餘

並依

齊朝

前

命

賜 中 外 琳 諸 乃遣 軍 兄子 錄 尙 叔 - 書事 寶率所部 0 叉遣 十州刺 中書舍人辛慤、 史子弟赴 鄴 游 詮之等齎璽書江 奉 莊 纂梁 祚 於 郢 表宣 州 勞 莊 自琳以下 授 琳 侍 中 皆 使 有 頒

琳 遣 風 因 ', 爲 兵放 東 安 至 急 州 及 陳軍 陳 火燧以 刺 琳謂 陳 文帝 史吳明 所 遣 殺 得 太 擲 立,琳 尉 天 殆 與船. 徹江 侯瑱 盡 道 乃輔 中 者 將 皆 夜 司 直 莊 上,將 空 取 反 次 揚 侯安都等 焼 子 州 濡 其 襲 船。 盆 須 侯 城 口 **塡等徐出** 拒 琳船 之。 琳 齊 艦 遣 遣 **塡等** 潰 揚州 巴陵 蕪湖 亂 以 太守 道 兵 躡 琳 行 土 其 軍 任忠 臺 透 後 方盛, 慕容儼率衆臨江,爲 水 大敗 死 此 者 引 及 之, 兵 十二三。 軍 交,西 明 入 燕湖避之。 徹 僅 南 其餘皆 以 風 身免 其聲援。 形物 爲 棄船 時 瑊 琳 西 用 上 南 兵 陳

歴陽 師 艦 稽 壐 郡 書 孝 分 ||令鎭 公。 初 昭 遣 又送 琳 委 招 壽 叉 命 琳 募 壽 陽 增兵秩 左 陽 與行 淮 長 其 南 史袁 部 琳 臺 傖 下 楚, 尋 左 兼給鐃吹。 泌 將 派 與 皆願 帥 、御史中丞 盧潜 莊 悉 同 聽 勠 入齊 率 以 力。 兵 琳水陸 從, 應 劉 齊孝 陳 赴。 乃除琳 仲威 合 一戒嚴 昭 州 沈 同 帝 刺 吟 膘 典兵侍衞 史裴景 遣 不 騎 將 琳 決 觀 大 出 學 將 景暉 暉, 合 而 莊, 軍 肥 動 林 及軍 懼 開 兄 鳩 事 屬 府 集 珉 泄 敗 **國陳氏結** 儀 之壻 義 |泌 同 挺 故 身歸 逐 也 好 司 降 更 請 齊。 圖 陳。 於 揚 齊 進 以 州 齊孝 仲威 私 取 刺 便琳 屬 史, 昭 導 床 以 非 賜 引 更 封 乃 聽 琳 齊 會 繕 投

史。 皆患腫,死病相枕。 之,堰肥水灌城。而齊將皮景和等屯於淮西,竟不赴救。明徹晝夜攻擊,城內水氣轉侵,人 北二十里,時年四十八。 於門外之池,雲霧起,晝晦。會陳將吳明徹寇齊,齊帝敕領軍將軍尉破胡等出援秦州,令琳 又謂破胡曰:「吳兵甚銳,宜長策制之,愼勿輕鬭。」破胡不從。戰,軍大敗。琳單馬突圍,僅 共爲經略。 而 獲免。 後以琳爲特進、侍中。 琳在壽陽,與行臺尚書盧潛不協,更相是非,被召還鄴。 還至彭城,齊令便赴壽陽,幷許召募。 |琳謂所親曰:「今太歲在東南,歲星居牛斗分,太白已高,皆利爲客,我將有喪。」 從七月至十月,城陷被執,百姓泣而從之。吳明徹恐其爲變,殺之城東 哭者聲如雷。有一叟以酒脯來至,號酹盡哀,收其血懷之而去。 所居屋脊無故剝破,出赤蛆數升,落地化爲血,蠕動。日於有龍出 又進封琳巴陵郡王。 齊武成置而不問,除滄州刺 陳將吳明徹進兵圍

琳故吏梁驃騎府倉曹參軍朱陽致書陳尚書僕射徐陵求琳首,曰

傳首建康,懸之於市。

洛濱 (遺老,當塗已謝,馬字稱魏室忠臣。用能播美於前書,垂名於後世。 餘胄,沂川舊族,立功代邸, 竊 以朝市遷貿,時傳骨鯁之風,歷運推移,間表忠貞之迹。故典午將滅,徐廣爲晉 効績中朝。 當離亂之辰,總蕃伯之任。 梁故建寧公琳, 爾乃輕躬殉

終遘莫弘之眚。 懷客卿之禮。 生平之志,原野暴骸,會彼人臣之節。 以身許國,實追蹤於往彦,信踵武於前修。 **感茲知己,忘此捐軀。** 洎王業光啓,鼎祚有歸,於是遠跡山東,寄命河北。 至使身沒九泉,頭行萬里。 然身首異處,有足悲者。封樹靡卜,良可愴焉。 而天厭梁德,尚思匡 誠復馬革裹屍,遂其 |繼,徒蘊包胥之念, 雖輕旅 臣之歎,猶

顏, 萬之人,滄洲島上,獨有悲田之客。 域,自己孫叔云亡,仍內吃而植楸櫃。自己由此言之,抑有其例。不使壽春城下,唯傳報 雖芻賤,竊亦有心。琳經莅壽陽,頗存遺愛,曾游江右,非無舊德。比肩東閤之吏,繼 踵西圍之賓,願歸彼境,還修窀穸。庶孤墳旣築,或飛銜土之灩,豐碑式樹,時留墮淚 回腸疾首,切猶生之面。伏惟聖恩博厚,明韶爰發,赦王經之哭,許田橫之葬。陽 陽早簉末僚,預參下席,降薜君之吐握,荷魏公之知遇。是用霑巾雨袂,痛可識之 近故舊王綰等已有論牒,仰蒙制議,不遂所陳。 昧死 陳耐、伏待刑憲 昔廉公告逝,卽肥川而建坐

智勝 廖 于 淮 嘉 等五 南,權整八公山 其志節,又明徹亦數夢琳求首,並爲啓陳主而許之。 人密送喪柩達于鄴,贈十五州諸軍事、揚州刺史、侍中、特進、開府、錄尚書事、諡 側,義故會葬者數千人。陽等乃間道北 仍與開府主簿劉韶慧等持其首還 歸,別議 迎接。 尋有 揚州人茅

忠武王,葬給輼輬車。

吏、爭來致請、幷相資給、明徹由此忌之、故及於難。 不遂,齊人亦以此重之,待遇甚厚。 其 姓名。 |琳體貌閑雅,立髮委地,喜怒不形於色。 刑罰 不濫,輕財愛士,得將卒之心。 及敗爲陳軍所執,吳明徹欲全之,而其下將領多琳故 少爲將帥,屢經喪亂,雅有忠義之節。 雖無學業,而强記內敏,軍府佐史千數,皆識 當時田夫野老,知與不知,莫不爲之獻 雖本圖

大業初,卒於渝州刺史。 |琳十七子,長子||敬在||齊襲王爵,||武平末通直常侍。 第九子桁,隋開皇中開府儀同三司

欷流泣。

觀其誠信感物,雖李將軍之恂恂善誘,殆無以加焉。

邪山 禮遇甚厚。 爲盜,頗有部曲。 張彪不知何許人,自云家本襄陽,或云左衞將軍、衡州刺史蘭欽外弟也。少亡命在苦 及侯景將宋子仙攻下東揚州,復爲子仙所知。後去子仙,還入若邪舉義,八五征 臨城公大連出牧東揚州,彪率所領客焉。 始為 防閣,後爲中兵參軍,

子仙不捷,仍走向剡。

出 血 自歃,彪信之,亦取刀刺血報之。 趙伯超兄子稜爲侯景山陰令,去職從彪。 刀始至心,稜便以手案之,望入彪心,刀斜傷得不深。 後懷異心,僞就彪計,請酒爲盟,引刀子披心

列

帝

甚嘉之。

右 稜 韓武 重 取 入視,彪 刀刺 彪 頭頭 面 被傷 細聲謂曰:「我尙活,可與手。」於是武遂誅陵。 頓絕。 稜謂 已死。 因出外告彪諸將、言已殺訖、欲與求富貴。 彪不死,復奉表元帝 彪左

楊氏 還 申進密與泰相 出 還 謝 揚 州 入 彪 岐 孙 居守。 去。 助 刺 及侯景平,王僧辯遇之甚厚,引爲爪牙,與杜龕相似,世謂之張、杜。 復城守。 岐保城。 史, 邪 **猶左** Щ **幷給鼓吹。室富於財,** 中。 會僧辯見害,彪不自展拔。 「右數人追隨,彪疑之皆發遣,唯常所養一犬名黃蒼在彪前後,未曾捨離。 知,因又叛彪,彪復敗走,不敢還城。據城之西山樓子,及暗得與弟崑崙 沈泰說陳文帝曰:「彪部 彪後至,泰等反與岐迎陳文帝入城。 晝夜樂聲不息。 時陳文帝已據震澤,將及會稽,彪乃遣沈泰、吳寶眞 曲家口並在香巖寺,可往收取。」遂往盡獲之。 **剡令王懷之不從,彪自征之。[10]留長史** 彪因其未定,踰城而入。陳文帝遂走 貞陽侯踐位,為東 彪 將 乃

中 [先殺鄕里然後就死。]楊引頸受刀,曾不辭憚。 喉 劫 沈 泰 日 刨 「官不肯去,請就 說 陳文帝遣章昭達領千兵重購之,幷圖其妻。 彪拔 刀逐之,映火識之,曰:「何忍舉惡。 平地。」彪知 不 免, 謂妻楊呼爲 彪不 彪眠未覺,黃蒼驚吠劫來,便嚙一 下刀,便相隨下嶺到平處。 卿 郷里 須我者但可 曰:「我不忍令鄉里落佗處, 取 頭,誓不 生 謂劫 見陳

名 日 中,若有哀 未 卿 立 須 猶 我 望鬼 頭,我身不去也。」呼妻與訣, 道 相逢。」劫不能生得,遂殺彪幷弟,致二首於昭達。 曰:「生死從此而別, 若見沈泰、申進等為語曰 黄蒼 號叫彪屍 側,宛轉 功功

皿

狀

苦日 帝聞之,歎息不已, 火 溫 燎 久,請暫過 肥 達 乃蘇 既畢,黃蒼又俯伏冢間 進軍,迎 ",復起投 宅莊飾。」昭 |彪妻便拜,稱陳文帝教迎爲家主。 遂許 於火 爲尼。 達許之。 後陳武帝軍 號 叫不肯離。 楊 入屋,便以刀割髮毁 人求取之,楊投 楊還 楊便改啼爲笑,欣然意悅,請昭達殯彪 經彪宅,謂昭達 并決命。 面,哀哭慟絕,誓不更行。 曰:「婦 時寒,比出 人本在容貌,辛 之垂死,積 陳文

曒 削 吳 之女 昌門為詩 彪 也。 始 起於若邪 有 一絕 容貌, 日二 興於若邪, 先爲 田横感義 河 東 裴仁林妻, 終於若邪。 士,韓王報主 因亂 及妻犬皆爲時 臣 爲 彪所 ,若爲留 納。 |意氣 所 彪友 重 異。 持寄 人 吳 楊氏,天水 禹川 中陸 Щ 才 嗟泰 人,散騎常侍 等翻

清之季,名宦 論 目 忠義 蓋 微。 之道 ,安有常哉。 江 則 自致亡 軀 善言 胡亦期之殞命,然則貞 者 不 必能行,蹈 之者 恒在 勁之節 所忽。 歲歲 寒自 江子 有性 也。 胡 僧 文盛 祐, 克 太

列

傳

終有鮮,詩人得所誠焉。 義難弘濟,斯則大廈落構,豈一木所能支也。 致覆亡,亦云圖墓之咎。吉凶之兆,二者豈易知乎。王琳亂朝忠節,志雪仇恥,然天 子春戰乃先鳴,幽通有助,及乎梁州之敗,而以濯足爲尤。 張彪一遇何懷,死而後已,唯妻及犬,義悉感 方相陳, 杜氏終

校勘記

人,記傳所陳,何以加此,異乎

/ I 】 江子一字元亮 「元亮」梁書作「元貞」。

以大通三年避爾朱氏之難歸梁 「三年」、册府元龜二一五、四四四同。 梁書作「二年」。

[II] 使戍項城 「使」上各本衍「歸」字,今刪。

巴州刺史王珣等會之 「王珣」各本作「王徇」,據梁書、册府元龜二〇〇改。

35. 鏗嘗爲賊禽或救之獲免 「嘗」各本作「當」,據陳書、太平御覽八四四引改。

C < \(\) 流矢中其目 「流矢」各本作「溪矢」、據通志改。</p>

[1] 元帝與崱兄岸有舊 「有」字各本並脫,據梁書、通志補。

崱又與王僧辯西討平武陵王於硤口 「硤口」各本作「硤石」、據梁書、通鑑改。 胡注:「峽口 巫

峽之口也。」按頭史於巴峽之「峽」每易作「硤」。

- *ታ*ъ 遂 奔其兄南陽太守嶽於廣平 「廣平」梁書作「南陽」, 云「遂走依其兄獻於南陽」 蘇時為南陽 太
- 守」。按廣平、南陽並爲雍州領郡。
- IJ 進軍大舉 口 「大舉口」各本作「大舉漢口」, 據通鑑改。 按胡注云。「水經注,江水東過料縣
- 封中 南 ,東逕白虎磯北,又東逕貝磯北,北岸烽火洲 廬 縣侯 中 ·廬」各本作「中盧」,據通志 改。 則 按南齊書州郡志 舉洲 也,北 對舉口。 中廬 爲雍州襄陽郡 屬縣。
- 叉臠 割 備 五. 刑 而 斬之 「備五 刑」各本作「被五刑 」,據册府元龜六六三改。 按北齊書、通志 並作
- 「備五刑」。
- 元帝乃 鎖琳 送僧辯 「僧辯」二字各本並脫、據册府元龜 五 補
- 琳 乘 平 肩 輿 執 鉞 而 麾之 平 ·肩輿」各本作「平輿」,據北齊書 (通志 補
- 二 唯 以 周 鐵 武 人背 恩 斬 之 鐵 [武]北齊書作「鐵虎」,此避唐諱改。
- 出 赤 蛆 數 升 落 地 化 爲 血 蠕 動 「落地」上各本有「汁」字,據北齊書、太平御覽 九 五. 引
- 口出 建定 昔廉 {廉 公告逝 頗傳 頗 即 肥 卒 Ш 葬於 而 建 壽春。 烾 域 }清 一 域」各本作「營域」,據北齊書改。按廉公間 統志 廉 頗 墓 在 鳳臺 縣八公山下。 廉 頗 肥]]] 則 肥水。
- 陂, 孫叔 周 云 百二十許里,在 亡仍芍陂 而 植 壽 楸 春縣南 檟 孫叔」各 八十里,言楚相孫叔敖所造。」水經注 本 作「叔 孫 一,今乙 Ē 按孫叔 謂 又云:「陂水北 孫叔敖。 水經肥水注:「 逕孫叔敖 繭 芍

列

傅

第

五

+

四

校

勘

記

下。」植楸欖,言祀孫叔敖。

二九 剡令王懷之不從彪自征之 還入若邪舉義 「舉義」各本互倒,據通志乙。 王鳴盛十七史商権六三"陳書文帝紀作臨海太守王懷振。

按東揚

州即會稽也,臨海相距遠,故往征之而留岐居守。若剡則會稽屬縣、且其時僧辯尚在、屬令未必

敢爲梗,何至舍郡城而往圍一縣乎?當從陳書。」

南义卷六十五

列傳第五十五

陳宗室諸王

永脩侯擬 遂興侯詳 宜黄侯慧紀 衡陽獻王昌 子伯信

南康愍王曇朗 子方泰 方慶 文帝諸子 宣帝諸子 後主諸子

絽 泰二年,除員外散騎常侍、明威將軍,以雍州刺史資,監南徐州事。 永脩侯擬字公正, 陳武帝之疎屬也。 少孤貧,質直强記。 武帝南征交阯,擬從焉。

梁

建城 封豫寧縣侯,门 縣侯,吳封上饒縣侯。 武帝踐作,廣封宗室,韶從子監南徐州擬封永脩縣侯,北徐州刺史廢封鍾陵縣侯,晃封 青州刺史詳封遂興縣侯,貞威將軍慧紀封宜黃縣侯, 從孫明威將軍討封虔化縣侯,吉陽縣侯諠仍前封,信威將軍 敬雅封寧都縣侯 祏 敬

列

傳

南 史 卷 六 +

泰 《封平固 縣 侯

文帝| 嗣位,擬除丹陽尹, 坐事以白衣知郡,尋復本職。 卒,諡曰定。 天嘉二年,配享武

帝 廟庭。 子黨嗣。

馬、從定建鄴。 以所統失律,無贈諡。 **遂興侯詳字文幾,少出家爲沙門。** 永定二年,封遂興縣侯。 子正理嗣。 善書記,談論清雅。 天嘉三年,累遷吳州刺史。 武帝討侯景,召令還俗,配以兵 五年,計周迪,戰敗,死

宜黃侯慧紀字元方,武帝之從孫也。 涉 獵書史, 負材任氣。 從武帝平侯景。 及帝踐

阼,封宜黄縣侯,除黄門侍郎。

同三司。

刺史。 太建十年,吳明徹北侵敗績,以慧紀爲緣江都督、兗州刺史。 及梁安平王蕭巖、晉熙王蕭瓛等詣慧紀請降,慧紀以兵迎之。以應接功,位開府儀 至德二年,爲都督、 荆州

太守呂肅將兵據巫峽,回以五條鐵鎖橫江,肅竭其私財以充軍用。 隋將楊素奮兵擊之, 遣南 四

十餘戰,爭馬鞍山及磨刀澗守險。 **隋軍死者五千餘人,陳人盡取其鼻,以求功賞。** 旣而

軍屢捷,獲陳之士,三縱之。 肅乃遁保延洲。 別帥廖世寵領大舫詐降,欲燒隋艦,更決一死

於是有五黃龍備衆色,各長十餘丈,驤首連接,順流而東,風浪大起,雲霧晦冥,陳人震

駭,不覺火自焚。 慧紀時至漢口,爲隋秦王俊拒,不得進。 隋軍乘高艦,張大弩以射之,陳軍大敗,風浪應時頓息。 聞肅敗、盡燒公安之儲,爲引兵東下,因推 肅收餘衆東走。 湘

史畢實並慟哭俱降。 州 王廣遣一使以慧紀子正業來喻,又使樊毅喻羅睺,其上流城戍悉解甲。 刺史晉熙王叔文爲盟主。 慧紀入隋,依例授儀同三司,卒。 水軍都督問羅睺與郢州刺史尚法尚守江夏。 子正平,頗有文學。 於是慧紀及巴州 及建鄴 平,隋晉

吳興。 衡 陽 及武 獻王昌字敬業,武帝第六子也。 一帝東討侯景,昌與宣后、文帝並爲景囚。 梁太清末,武帝南征李賁,命昌與宣后隨沈恪還 景平,拜長城國世子,吳興太守,時年

又遣吳郡 昌 容 貌 偉麗, 杜之偉授昌 神 情秀朗, 以 經 雅 性 昌 一聰辯, 讀 書 覽便 明習政事 誦 ", 明 於 武帝遣陳郡謝哲 義 理 剖 析 如流 濟陽蔡景歷輔昌 尋 與宣帝 俱 往 荆 臨

州。魏剋荆州,又與宣帝俱遷長安。

假 緣 等 諡 黄 率 百 道 日 不 ·得還, 鉞 獻 迎 武 僚 帝 接。 、都督中 無子 卽 上 居于 表 位 丙 文帝 子 安陸 外諸 頻 請以昌 濟江 遣 以第 使 軍 小於 請 王 事 爲 中流 琳 湘 宣帝 七皇子伯信 、太宰、揚 平後 州 及昌 牧 殞之,使以 「 下 天 封 州 |周 衡 嘉 牧, 嗣 人許 陽 元 年 溺 郡 葬送之儀, 告。 王 而 二月,昌 未遣。 四 韶 月 日 一發 可可。 庚 及武 自安陸, 寅 依 帝崩, 漢 喪柩至都 東平 三月甲戌 由 乃遣之。 憲王 魯山齊 上親 、齊豫章文獻王 入境, Z. 時王琳作 臨哭。 詔 而 令主 巴陵 乃下 梗 書 王 中流 故 詔 舍 蕭 沇 贈 人

伯 信 字学之, 位 西 衡 州 刺 史。 及隋 詗 濟江 ,與臨汝侯方慶 並 爲 東衡州刺 史王 勇所害

深 被 知 南 遇 康 為 愍王 文德 曇 朗 主 帥 武 頃 帝 母 (之卒 一弟忠壯 敬 王休先 帝 卽 位 之子 追贈 也。 南 徐 休先 州 刺 少 史, 倜 儻 封 有 武 大 康 志, 縣 公。 梁簡 武 文 帝 之在 受禪, 東宮, 贈

司

徒

封

南康郡王、諡

日

忠壯

曇 朗 少孤,尤爲 武 帝所愛。 有膽 力,善綏御。 侯景 平後,起家著作郎。 武帝 誅王僧辯,

留曇期鎭京口,知留府事。

約,造 **令**隨 嘉二年 時 時 衆 |陳 議 四 方 聘使江 與 紹 蕭軌 乃決 齊絕, 州 泰 齊人結好,始 郡 元 遣 等隨徐嗣 德藻迎 年 曇朗 並 弗之知。 ٠, 多未實,本 除中 曇朗 徽 恐曇朗 書 知 武帝 度江。 侵侍郎, 喪柩,三年春 其亡,文帝詔 根虛弱 憚行, 踐 作,猶 監南徐州。 武 帝大破之, 或當奔竄, 糧 以 運不 贈開 、量朗 至都 繼,在朝 二年,齊兵攻逼 府儀 襲封南康 虜蕭 乃 自 同三司、南 軌 文武 率步騎往京口 、東方老等誅之,齊 郡 王,奉忠壯王 咸願 建鄴, 徐州刺 與 因請 齊 迎之,三使質於齊。 史,諡 和 祀 和, 親 人亦害曇朗丁晉陽。 禮秩 日 武帝難之, 求 愍。 武帝 同 功 子姪為質 遣 皇子。 兼 而 齊背 郎 重 中 違 天

亦 同 .'得還。 初 曇 朗 未質於齊,生子方泰、方慶,及將 適 <u>)齊,以二妾自隨,在北又生二子方華、方曠,</u>

爲 爲 南 有 司 康 方 奏 泰 \pm 趸。 世 少 子 粗 六年 o 獷 ()與諸 及 ·, 授 聞 曇朗 豫章 惡 少年 薨,於是襲爵 內史,在郡 ·羣聚, 游 不修政 逸 南 無 康王 度, 事 文帝以南 太建 秩滿之際,屢放部 四 年,爲都督、廣 康 王故,特寬宥之。 曲 州 爲 劫, 刺 史。 又縱火延燒邑 天嘉 爲 政 一年,以 殘暴,

列

傳

方泰 往 觀,集衆軍 御 百出於瓜步江。 八月,宣帝幸大壯觀,因大閱武。 中 史中丞 丞宗元饒所劾,觅官,以王還第。 ,因行暴掠,驅錄富人,徵求財賄。 人間,淫淳于岑妻,爲州 獄 徐君整奏請解方泰所居官,下宗正削爵土,上可 方泰初承行淫, 一,振旅 而還。 上登玄武 時方泰當從,啓稱所生母疾,不行。 不 長流 門觀, 承拒格禁司。 所錄。 宴羣臣 命都督任忠領步騎十萬,陣於玄武湖,都督陳景領 十一年,起爲寧遠將軍,直殿省。 代至,又淹留不還。 又率人仗抗拒,傷損禁司,爲有 以觀之。至因幸樂游苑,設絲竹會。 上曰:「不承則 其奏。 上測。 至都,以爲宗正卿。 因與亡命楊鍾期等二十人微行 方泰 尋加散騎常侍。 乃投列承引。 司所奏。 未拜、爲御史 仍重 上大怒,下 幸大 複艦 於是兼 其年 壯 五

禎 明 初,爲侍中。 陳亡,與後主俱入長安。 隋大業中,為掖縣令。

方慶 少淸警,涉獵書傳。 及長有幹略。 天嘉中,封臨汝縣侯。 至德二年,累遷智武將

軍、武州刺史。

襲靖。 初 |靖 | 誅 廣州 ,進號宣毅將軍。 刺 ,史馬靖久居嶺表,大得人心,士馬强盛,朝廷疑之,以方慶爲廣州刺史,以兵 方慶性清謹,甚得 人和

禎 明三年,隋師濟江,都督、東衡州刺史王勇徵兵於方慶,欲與赴援臺城。 時隋行軍總

豐州 管章洸帥兵度嶺,宣隋文帝敕云:「若嶺南平定,留勇與豐州刺史鄭萬頃且依舊職。」方慶閉 韓修華生武 準 之,恐勇賣己,且欲觀變,乃不從。」勇使高州刺史戴智烈斬方慶於廣州,而收其兵。 信出繼衡陽王昌。 周武帝時,爲司城大夫,出爲溫州刺史。 文帝踐阼,常思還北。 生新安王伯固 刺史。 鄭萬頃,紫陽 侯景之亂,援臺中流矢卒。 始興王伯茂字鬱之,文帝第二子也。 文帝十三男:沈皇后生廢帝、始興王伯茂。 陵王伯禮。 在州甚有惠政,吏人表請立碑,詔許焉。初,萬頃在周,甚被隋文帝知遇,及隋 人,梁司州刺史紹叔之始族子也。父旻,梁末入魏。萬頃通達有材幹, 劉昭華生衡陽王伯信。 及王勇殺方慶,萬頃乃率州兵拒勇降隋,隋授上儀同,尋卒。 江貴妃生永陽王伯智。 太平二年,贈南兗州刺史,封長城縣公,〔六〕諡曰 至德中,與司馬消難奔陳,拜散騎常侍、昭武將軍、 初,武帝兄始興昭烈王道談仕梁爲東宮直閤將 王充華生廬陵王伯仁。 孔貴妃生桂陽王伯謀。二男早卒,無名;伯 嚴淑媛生鄱陽王伯山、晉安王伯恭。 張修容生江夏王 昭烈。

一伯義。

潘容

列

武

帝 武 箾 文帝 帝 受禪 級。 以本宗乏饗,徙封宣帝爲安成王, 遙 以宣帝襲封始興嗣王, 重贈 舊制 太傅, 諸王受封未加戎號者,不置佐史。 改封始興郡王。 以奉 昭 道談生文帝及宣帝。 烈王祀。 封伯茂爲始興王,以奉昭烈王祀。 武帝崩, 於是尚書八坐奏加伯茂寧遠將軍,置 文帝入纂帝位 宣帝以梁承聖 末遷於長安, 時宣帝在周 賜天下爲父後 未還, 至是 佐 者

曇墓,大獲晉右軍 以 伯茂好古,多以賜 伯茂 性聰敏,好學,謙恭下士,又以太子母弟,文帝深愛重之。 將軍 之。 王羲之書及諸名賢遺 由是伯茂大工草隸 書,甚得右軍法。 跡。〔七〕事覺, 其書並沒縣官, 時軍人於丹徒盜發晉都 藏 于秘府。

史,除揚

州刺史。

伯茂 游 居之,宣帝遣盜殞之於車中,年十八。 下 務裕 處。 **令降伯茂** 勸 遷 成 東揚 與韓子高等謀反 時 之。 四 爲溫 海 州 之望 師 刺史、鎭東將軍 麻 知等誅後,宣帝恐伯茂扇動朝 侯。 ,咸歸宣帝 ,伯茂並陰豫其事 時六門之外有別館 ,伯茂深不 、開府儀同 三司。 平,數肆 光大 以爲諸王冠昏之所, 廷,乃進 廢帝 二年, 惑言。 時, し號中 皇太 宣帝 伯茂在都, 衛將軍 后令黜 以其 名爲昏第, 無能,不以爲 ,令入居禁中 廢帝 劉 師知等矯 爲 臨 至是命伯茂 海 意。 王, ,專與 詔 出 其 及 宣帝 一般帝 建 H 出 安 叉

將軍、阿徐州刺史。宣帝輔政,不欲令伯山處邊,光大元年,徙爲東揚州刺史。累遷征南將 草創,諸王受封,儀注多闕。及怕山受封,文帝欲重其事,天嘉元年七月丙辰,尚書八坐奏 鄱陽郡王,乃遣度支尚書蕭睿持節兼太宰告于太廟,又遣五兵尚書王質持節兼太宰告于 鄱陽王伯山字靜之,文帝第三子也。偉容儀,舉止閑雅,喜慍不形於色。 其年十月,上臨軒策命,策訖,令王公以下,並宴於王第。六年,爲緣<u>江都督、平北</u> 武帝時,天下

及發詔,顧明三年薨。 衞將軍,乃謂羣臣曰:「鄱陽王至性可嘉,又是西第之長,豫章已兼司空,其亦須遷太尉。」未 及遭所生憂,居喪以孝聞。後主嘗幸吏部尙書蔡徵宅,因往弔之,伯山號慟殆絕,因起爲鎭 伯山性寬厚,美風儀,又於諸王最長,後主深敬重之。每朝庭有冠昏饗宴,恒使爲主。 **尋屬陳亡,遂無贈諡。**

軍,護軍將軍,加開府儀同三司,給鼓吹幷扶。

幸,因召陳氏子弟盡還京師,隨才敍用,由是並爲守宰,偏於天下。 君範位溫縣令。 朝堂,使豫章王叔英總督之,又陰爲之備。六軍敗績,相率出降,因從後主入長安。隋文帝 並配隱右及河西諸州,各給田業以處之。大業二年,隋煬帝以後主第六女婤爲貴人,絕愛 長子君範,未襲爵而隋師至。時宗室王侯在都者百餘人,後主恐其爲變,乃並召入,屯

賜。 論。 聚,所得祿奉,用度無節。 性輕率,好行鞭捶。 天嘉六年,立爲新安郡王。 新安王伯固字牢之,文帝第五子也。 在州不知政事,日出田獵。 **酣醉以後,多所乞丐,於諸王中最爲貧窶。** 太建七年,累遷都督、南徐州刺史。 宣帝頗知之,遣使責讓者數矣。 生而龜胸,目通睛揚白,形狀眇小,而俊辯善言 或乘眠輿至於草間,輒呼人從游,公 伯固性嗜酒,不好積 宣帝每矜之,特加賞

苛,國學有墮游不修習者,重加檟楚,生徒懼焉,由是學業頗進。 十年,爲國子祭酒。 頗知玄理,而墮業無所通,至於擿句問難,往往有奇意。 爲政嚴

動至旬日。

所捕麞鹿,多使生致。

以庶人禮葬。子及所生王氏,並特宥爲庶人、〔10〕國除。 閉,不得出,因趣白楊道。臺馬容至,爲亂兵所殺,尸於東昌館門,日,時年二十八。詔特許 酸。及<u>叔陵奔東府,遣使告之,伯固單馬馳赴,助叔陵指</u>塵。 發冢墓,出游田野,必與偕行,於是情好大協,遂謀不軌。伯固侍禁中,每有密語,必報叔 意,乃共訕毀朝賢,歷詆文武,雖耆年高位,皆面折無所畏忌。伯固性好射雉,叔陵又好開 集,多引之。叔陵在江州,心害其寵,陰求瑕疵,將中以法。及叔陵入朝,伯固懼罪,諂 十三年,爲都督、揚州刺史。後主初在東宮,與伯固甚親狎。伯固又善潮謔,宣帝每宴 知事不捷,便欲走。 會四門已 求其

成州刺史、太常少卿。日日 政 事 ,官曹緝理。 晉安王伯恭字肅之,文帝第六子。 歷位尚書左僕射,後爲中衞將軍、右光祿大夫。 天嘉六年封。 尋爲吳郡太守。 陳亡入長安。 時年十餘歲,便留心 大業初,爲

子。二三陳亡,卒于長安。 **廬陵王伯仁字壽之,文帝第八子。** 天嘉六年立。 爲侍中、國子祭酒,領太子中庶

瓜州,道卒。 江夏王伯義字堅之,文帝第九子。 天嘉六年封。位金紫光祿大夫。陳亡入長安。 遷於

掠,後爲 入長安。 武陵王伯禮字用之,文帝第十子。 有司所刻。 大業中,爲 臨洮太守。 <u>-</u> 年,被代徵還,遂遷延不發, 天嘉六年立。 為御史中丞徐君整所刻 太建初,爲吳興太守。 , 免。三三陝亡 在郡 恣行暴

永陽王伯智字策之,文帝第十二子。 列 傳 第 Ŧi. + Ŧi. 陳 宗 室 諸 Ξ 少敦厚,有器局,博涉經史。 太建中立。江門累遷

尚書左僕射、CIEI後爲特進。 陳亡入長安。 大業中,為國子司業。

桂陽王伯謀字深之,文帝第十三子。 太建中立。江江位散騎常侍、薨。 子酆,大業中,

番禾令。

王叔虞。 王叔 其皇子叔叡、叔忠、叔泓、叔毅、叔訓、叔武、叔處、叔封八人,並未及封。 新 娅 新蔡王叔齊。 儀 興王 生西陽王叔穆。 生 雄 長沙王叔堅、宜都王叔明。 宣帝四十二 叔 純 吳姬 韋修容生湘 吳姬 生始興王 袁昭容生晉熙王叔文、義陽王叔達、新會王叔坦。 男: 生巴東王叔謨。 申婕妤生南安王叔儉、南郡王叔澄、岳山王叔韶、太原王叔匡。 東王叔平。 柳皇后生後主。 叔重。 徐姬生尋陽王叔嚴。 魏昭華生建安王叔卿。 施 劉姬生臨海 姬生臨賀王叔敖,沅 彭貴人生始 王叔顯。 興王叔陵。 淳于姬生岳陽王叔愼。 陵王叔興。 秦姬 錢貴妃生河 曹淑華生豫章王叔英。 生新寧王叔隆、新昌 王姬 曾姬生陽山王叔宣。 東王叔獻。 生淮 三子早卒,無名。 南王 王修華生武 一叔彪、 劉昭 王叔榮 袁姬 巴山 儀 何 生 昌 生 淑

始 興王 叔陵字子嵩,宣帝之第二子也。 梁承聖中,生於江陵。 魏剋江陵,宣帝遷關右,

罪,陷以重辟。 成,法成憤怨, 豫章內史錢法成詣府進謁,卽配其子季卿將領馬仗。 年十六,政自己出,僚佐莫預焉。 叔 ,機辯,狥聲名,强梁無所推屈。 陵 留留 穰城 宣帝之還,以後主及叔陵爲質。 自縊 而死。 州縣非其部內,亦徵攝案之。 性嚴刻,部下懾憚。 太建元年,封始興王,奉昭烈王祀。位都督、江州刺史,時 天嘉三年, 季卿慚耻不時至,叔陵大怒,侵辱法 諸公子姪及罷縣令長, 皆逼令事己。 隨後主還朝,封康樂縣侯。 朝貴及下吏有乖忤者,輒誣奏其 叔陵

案,非呼不得輒白。 皆入己,絲毫不以賞賜。徵求役使,無有紀極。夜常不臥,執燭達曉,呼召賓客,說人問細 `, 戲謔無所不爲。 其中脫有逃竄,輒殺其妻子。 四年,遷都 督、湘州刺史。 答罪者皆緊獄 性不飲酒,唯多置餚胾,晝夜食噉而已。自旦至中,方始寢寐。 諸州鎭聞其至,皆震恐股慄。 州縣無敢上言,宣帝弗之知。 ,動數年不省視。 瀟、湘以南,皆逼為左右,歷里殆無遺 叔陵日益横,征伐夷、獠,所得 曹局文

執 事 非常 之司,承 九 年 ·)除都督、揚州刺史。十年,至都,加扶,給油幢車。 志。 意順旨,卽諷上進用之。 叔陵修飾虛名,每入朝,常於車中馬上,執卷讀書,高聲長誦,陽陽自若。 微致違忤,必抵大罪,重者至殊死。 叔陵居東府,事務多關涉省閣, 道路藉藉,皆言

列

傳

第

五

+

逼

取 华 其石 奫 中,或自執斧斤, 誌、 古器幷骸骨肘脛, 爲沐猴百戲。 持為翫弄, 又好游冢墓間 藏之府庫。 `,遇有塋表主名可知者,輒命左右發掘, 人間 少妻處女, 微有色貌者, 並卽

卒, 稱 叔 上 聞。 刺 叔陵 血 ---- 宣 寫 | 啓求梅嶺葬之,乃發故太傅謝安舊墓,棄去安柩,以葬其母。 年,丁所生母彭氏憂, 帝責御史中丞王政以不舉奏,免政官。 涅槃經。 未及十旬,乃日進甘膳。 去職。 頃之,起爲本職。 又私召左右妻女,與之姦合,所作尤不軌,侵淫 又黜其 **、典籤、親事,仍加鞭捶。** 晉世王公貴人,多葬梅嶺,及彭氏 初喪日,僞爲哀毀,自 宣帝素愛

太后 馳 時 陵 凌 命 吳媼 了、奪去 車還 以 陵,不繩以法,但責讓 左 剉 右 及宣 側 藥 東府,呼其甲士斷青溪橋道。 取 已扶後主避賊,叔 其刀,仍牽就柱,以其褶袖 自後掣肘, 劍,左 刀斫後主中項。 帝不豫,後主諸王並 右不悟,乃取朝服所佩 後主 而已。服闋,又爲侍中、中軍大將軍。 因 堅求後主所在,將受命。 太后馳來救 一得起。 入侍疾。叔陵陰有異志,命典藥夷礪切藥刀。 縛之, 叔陵仍持後主衣,後主 放東城囚,以充戰士。 焉, 木劍以進,叔陵怒。 棄池 叔陵又斫太后數下。 水中,將殺之,問後主曰:「卽盡之,爲待也 叔陵 多力,因 自奮得觅。 又遣人往新林追所部兵馬。 及翌日小斂,後主哀頓俯伏,叔 奮袖得脫,口也突出 後主乳媼樂安君吳氏時在 長 沙王 及倉卒之際,又 叔堅 以手 雲龍門, 捡 仍 叔

位

陵太守,卒。

王伯固 自 1被甲, 著白帽, 登城 而 赴之。 叔陵聚兵僅得千人,欲據城保守。 一西門,招募百姓,散金銀以賞賜。 外召諸王將帥, 無有應者,唯新安

聞

甲潰 將 謝氏 寅 至 臺,斬於閣 日 至 :「須王 一白楊路,爲臺軍所邀。 于井中。叔陵有部下兵先在新林,於是率人馬數百,自小航度,欲趣新林,以舟艦入北。行 兵至府 散 之塋。」後主從所奏。 旦乃定。 時 摩訶馬容陳智深 衆 軍 西門。 心膂節將自來,方敢從命。」叔陵卽遺戴洫、 道下,持其首徇東城,仍懸於朱雀門。 一並緣江 尚書八坐奏:「請依宋世故事,流尸江 叔陵事急,遣記室韋諒送鼓吹與摩訶,謂曰:「事捷以公爲台鼎。」摩訶 防守,臺內空虛,叔堅白太后,使太子舍人司馬申急召右衞將軍蕭摩訶 伯固 迎刺叔陵,閹豎王飛禽斫之數十下,馬容陳仲華就斬首送臺。 叔陵諸子,即日並賜死。 見兵至,旋避入巷,叔陵拔 叔陵 一中,汙瀦其室,幷毀其所生彭氏墳廟,還 自知不濟,遂入沈其妃張氏及寵妾七 譚騏驎二人指摩訶。CICI摩訶執以送 刀追之,伯固 復還。 叔陵部下多葉 給報 自

豫 章王叔英字子烈,宣帝第三子也。 寬厚仁愛。 太建元年封。 後位司空。 隋大業中,

長 沙 王叔 堅字子成, 宣帝第四子也。 母本吳中酒家婢,相者言當生貴子。 宣帝微時,

因飲通焉,生叔堅。及貴,召拜淑儀。

叔堅少而嚴整,又頗使酒,兄弟憚之。 好數術, 卜筮、風角、鎔金、琢玉,並究其妙。 初

封豐城侯。太建元年封。累遷丹陽尹。

司、揚州刺史。尋遷司空、將軍、刺史如故。 陰有異志,叔堅疑之,微伺其所爲。及行逆,賴叔堅以免。以功進驃騎將軍、開府儀同三 分道而趨, 初,叔堅與始興王叔陵並招聚賓客,各爭權寵, 左右或爭道而關,至有死者。及宣帝不豫,叔堅與叔陵等並從後主侍疾。 甚不平。 每朝會鹵簿,不肯爲先後, 叔陵 , 必

堅囚于西省,將黜之,令近侍宣敕數之。 前 施機關,能拜跪,晝夜於星月下醮之,祝詛於上。又令人上書告其事,案驗令實。後主召叔 |州刺史。未發,尋以爲司空,實欲奪其權。 斌、施文慶等,並東宮舊臣,日夕陰持其短。至德元年,乃詔令卽本號用三司之儀,出爲江 功,乃赦之,免所居官,以王還第。後位中軍大將軍、開府儀同三司、荆州刺史。 時後主患創,不能視事,政無大小,悉決于叔堅,權傾朝廷,後主由是疎忌之。孔範、管 叔堅自陳爲佞人所構,死日慚見叔陵。 又陰令人造其厭魅,刻木爲偶人,衣以道士服 後主感其 秩滿

還都。

大業中、爲逐寧郡守、卒。

書監。 建安王叔卿字子弼,宣帝第五子也。 陳亡入隋。 大業中、爲都官郎、上黨通守。 性質直, 有材器, 容貌甚偉。 太建四年立。 位中

宜 |都王||叔明字子昭,宣帝第六子也。 儀容美麗,舉止和柔, 狀似婦人。 太建五年立。

位侍中。陳亡入隋。大業中,爲鴻臚少卿。

薨,贈司空,諡康簡。 加 東王叔獻字子恭, 宣帝第九子也。 子孝寬嗣,隋大業中,爲汶城令。 性恭 派謹,聰 敏好學。 太建五年立。 位南徐州刺

新蔡王 叔齊字子肅, 宣帝第十一子也。 風采明贍, 博涉經 史, 善屬文。 太建七年立。

位侍中。陳亡入隋。大業中,爲尚書主客郎。

州, 不忠,而方懷柔江表,遂授開府、宜州刺史。 懼 主至朝堂。文帝使內史令李德林宣旨,責其君臣不能相獨,以致喪亡。後主與其羣臣並愧 刺史陳慧紀及文武將吏赴漢口,秦王並厚待之。及至京,隋文帝坐于廣陽門觀,叔文從後 都 **拜伏,莫能仰視,叔文獨欣然有自得志。後上表陳在巴州先送款,望異常例。** · 督、湘州刺史。徵爲侍中,未還而隋軍濟江,隋

齊王至漢口。時

叔文自湘州還朝,至巴 乃率巴州刺史畢寶等請降,致書於秦王。王遣使往巴州迎勞叔文。 晉熙王叔文字子才,宣帝第十二子也。 性輕險,好虛譽,頗涉書史。 叔文與畢寶、荆州 太建七年立。 文帝嫌其 位

隋,卒于長安。 淮南王叔彪字子華,宣帝第十三子也。少 聰慧,善屬文。太建八年立。 位侍中。

談,其年立叔重爲始興王,以奉昭烈王後。 始興王叔重字子厚,宣帝第十四子也。性質朴,無伎藝。宣帝崩,始興王叔陵為逆, 位江州刺史。隋大業中,爲太府少卿

| 專陽王叔儼字子思,宣帝第十五子也。性凝重,舉止方正。後主卽位立。位侍中。

中,爲丹陽尹。 岳陽王叔愼字子敬,宣帝第十六子也。 時後主尤愛文章,叔愼與衡陽王伯信、新蔡王叔齊等,日夕陪侍賦詩,恒被 少聰敏,十歲能屬文。 太建十四年立。 至德

泰降書於**龐暉,叔愼伏甲待之。暉入,伏兵發,縛暉等以徇,皆斬之。**叔愼招士衆,數日中 仁恩救之。 共無成,猶見臣節,青門之外,有死不能。

今日後應者斬。」

衆咸許諾,乃刑牲結盟。

遣人詐 兵至五千人。隋遣內陽公薛冑爲湘州刺史,三三聞龐暉死,乃益請兵。隋又遣行軍總管劉 長史謝基伏而流涕。 略 地至湘州、州內將士、剋日請降。叔慎置酒會文武、酒酣、歎曰:「君臣之義、盡於此乎。」 顧明元年,出爲湘州刺史,加都督。及隋師濟江,淸河公楊素兵下荆門,日也遣將龐 未至,薛胄禽叔慎,秦王斬之漢口。 湘州助防遂興侯正理在坐,起曰:「主辱臣死,諸君獨非陳國臣乎。縱 暉

内史舍人, 絳郡 義 陽王叔達字子聰,宣帝第十七子也。 通守。 武 德中,位侍中,封江國公,歷禮部尚書,卒。 太建十四年立。 位丹陽尹。 入隋,大業中,爲

列傳

山王 叔雄字子猛,宣帝第十八子也。 太建十四年立。 入隋,卒于長安。

湘東王 武昌 叔平字子康,宣帝第二十子也。 叔虞字子安,宣帝第十九子也。 至德元年立。入隋,大業中,爲胡蘇 太建十四年立。 入隋,大業中,爲高苑令。 令。

臨賀王 叔敖字子仁,宣帝第二十一子也。 至德元年立。 入隋、大業中、位儀同三司。

陽 Щ 王 叔宣字子通,宣帝第二十二子也。 至德元年立。 入隋,大業中,爲涇城令

西陽王 叔穆字子和,宣帝第二十三子也。 至德元年立。 入隋,卒于長安。

南安王 叔儉字子約,宣帝第二十四子也。 至德元年立。 入隋,卒于長安。

南郡王 叔澄字子泉,宣帝第二十五子也。 至德元年立。 入隋,大業中,爲靈武令。

沅陵王 叔興字子推,宣帝第二十六子也。 至德元年立。 入隋,大業中,爲給事郎。

岳 山王 叔韶字子欽,宣帝第二十七子也。 至德元年立。 位丹陽尹。入隋,卒于長安。

新興王 叔謨 |叔純字子洪,(三)宣帝第二十八子也。|至德元年立。入隋,大業中爲河北令。 字子軌,宣帝第二十九子也。至德四年立。入隋,大業中,爲汧陽令。

新會王叔坦字子開,宣帝第三十一子也。 臨 海王 叔顯字子亮,公三宣帝第三十子也。 至德四年立。入隋,大業中,爲涉縣令。 至德四年立。 入隋,大業中,爲鶉觚令。

新寧王叔隆字子遠,宣帝第三十二子也。 至德四年立。 入隋,卒于長安。

太原王叔匡字子佐,宣帝第三十四子也。 新昌王 叔榮字子徹,宣帝第三十三子也。 顧明二年立。[三]入隋,大業中,爲內黃令。

儀 呂淑媛生永嘉王彦、邵陵王兢。襲貴嬪生南海王虔、錢唐王恬。 生東陽王恮。 後主二十二男:張貴妃生太子深、會稽王莊。 孔貴人生吳郡汪藩。其皇子總、觀、明、綱、統、沖、洽、縚、綽、威、辯十一 孫姬生吳興王胤。 張淑華生信義王祗。徐淑 高昭儀生南平王嶷。

人,並未及封。

敬焉。 閤 廢,後主乃立深爲皇太子。 以 母張貴妃故,特爲後主所愛。至德 而 坐,舍人孔伯魚侍。 太子深字承源,後主第四子也。少聰慧,有志操,容止儼然,左右近侍,未嘗見其喜慍 隋 大業· 中,爲枹罕太守。 隋軍排閤入,深使宣令勞之曰:「軍旅在道,不乃勞也」」軍人咸致 隋師濟江,隋將韓擒自南掖門入,百僚奔散,深時年十餘歲,閉 武德初,爲祕書丞,卒官。 元年,封始安王。位揚州刺史。禛明二年,皇太子胤

列傳

第五

+

Ŧī.

陳

宗

室

后哀 封永康公。後主卽位、爲皇太子。 而養之,以爲己子。後主年長未有嗣,宣帝命以爲嫡孫,詔爲父後者賜爵一級。 吳興王胤字承業,後主長子也。 太建五年二月乙丑,生於東宮。 母孫姬, 因產卒,沈皇 十年,

加侍中、中衞將軍。〔三〕入隋,卒于長安。 沈皇后無寵,日夜構成后及太子之短。孔範之徒,又於外合成其事。顧明二年,廢爲吳興王, 胤性聰敏好學,執經肄業,終日不倦,博通大義,兼善屬文。 時張貴妃、孔貴嬪並愛幸,

年立。位揚州刺史。 南平王嶷字承岳,後主第二子也。方正有器局,年數歲,風采舉動,有若成人。至德元 遷都督、郢州刺史。入隋,卒于長安。

永嘉王彥字承懿,後主第三子也。 至德元年立。 位都督、江州刺史。 入隋,大業中,爲

襄武令。

南海王虔字承恪,後主第五子也。 至德元年立。 位南徐州刺史。 入隋,大業中,爲

涿令。

信義王祗宇承敬,後主第六子也。 至德元年立。 位琅邪、彭城二郡太守。入隋,

中,爲通議郎。

邵陵王兢字承檢,後主第七子也。 **禛明元年立。** 入隋,大業中,爲國子監丞。

其面,或加燒蘷。性嗜酒,愛博。 會稽王莊字承肅,後主第八子也。 以母張貴妃寵,後主甚愛之。 容貌蕞陋。 性嚴酷、數歲時、左右有不如意、輒剟刺 至德四年立。三三位揚州刺

史。 入隋,大業中,爲昌隆令。

東陽王恮字承厚,後主第九子也。 **禛明二年立。入隋,大業中,爲通議郎。**

吳郡 王藩 字承廣,後主第十子也。 旗明二年封。 隋大業中,爲任城令。

錢唐王恬字承惔,後主第十一子也。 **禎明二年封。** 入隋,卒于長安。

于禛明,唯衡陽王昌特加禮命,至五千戶,自餘大國不過二千,小國則千戶云。 馬一人。次國置中、下二將軍。 江左承西晉,諸王開國,並以戶數相差爲大小三品。 小國置將軍一人。餘官亦準此爲差。武帝受命,自永定訖 大國置上、中、下三將軍,又置司

始終之迹,其殆優乎。 鄱陽、岳陽風迹可紀,古所謂維城盤石,叔愼其近之乎。 論曰:有陳受命,雖疆土日蹙,然封建之典,無革先王。永脩等並以疎屬列居蕃屏,慧紀 衡陽、南康,地皆懿戚,提攜以殞,惟命也夫! | 文、宣二帝,諸子不一,

校勘記

- 信威將軍而封豫寧縣侯 「信威」、「豫寧」陳書作「信武」、「豫章」。
- 遣南康太守呂肅將兵據巫峽 「仲」、避隋文帝父忠而改,此又省「忠」字作呂肅,亦避隋諱。 「呂肅」陳書作「呂忠肅」,隋書楊素傳作「呂仲肅」。 隋書「忠」作

- = 乃自 率步騎往京 口 迎之 各本無「往」字、據陳書補
- 29 乃 遣 兼郎中令隨聘使江德藻迎曇 朗 喪柩 郎 中 令」各本作「中郎令」,據陳書改。 按曇朗襲封

南 康 郡 王,國官有郎中令,見南齊書百官志。

珥. 上登玄武 門觀宴羣臣以觀之 上「觀」字殿本作「親」,其他各本作「觀」。 張元 濟南史校勘記:

今改正。」蓋以「親」屬下 讀。 今按「觀」、「親」並 通。 陳書各本或作「觀」,或作「親」。

按置

兩

觀以表宮門,見三輔黃圖

,疑門觀不

訛。

一蓋以「

觀」屬

上讀。

殿本考證

· 「親,

監

本

訛

一次 太平二年 贈南兗州 刺史封長城縣 公 「太平」、「長城」各本作「紹泰」、「義興」。 錢大 昕 廿二史考

按

贈

高

祖

兄道談散騎常侍、使持

節、

平北將

軍、

南兗州刺

史、長

城

縣

|公。 敬帝 高祖紀,梁太平二年韶 以紹泰 二年改元太平,始進 封 陳霸先 義興 郡 公 則 道談 贈官 必 在 太平以 後。 且 紀於 水

定元年 書 追 贈皇 兄長 城 縣公道談太尉,封始興 郡 压,似 無 追 封 義 興 郡 公之事。」 按錢氏 說是 今

從改。

 $\overline{}$ ス -6 輒 大 獲 呼 晉 人 右 從 游 軍 將軍 「人」陳書作「民下」、此 王羲之書及諸名賢遺迹 避 唐 ī諱改。 右 軍 將 軍」, 各本作「右將軍」」據晉書王羲之傳改。

. مالز السا 尸 於 東 昌 館門 「東」字各本並 一脱,據 ※陳書 補

((0) 子 及 所 生 王 氏 並 特 宥 爲 庶人 「王氏」前序作「潘容華」,必有 譌。

列 傳 第 五 + 五 校 勘 記

- [11] 為成州刺史太常少卿「太常少卿」陳書作「太常卿」。
- 爲侍中國子祭酒領太子中庶子 「中庶子」各本作「左庶子」,據陳書改。 按南齊書百官志東宮

職僚有太子中庶子,無左右庶子。

- [11] 爲御史中丞徐君整所劾免 「徐君整」陳書作「徐君敷」。
- 太建· 中立 按廢帝紀,伯智之立爲永陽王及下伯謀之立爲桂陽王,並在光大二年。
- 二吾 累遷 位之年三月乙巳,爲尚書僕射,不言爲尚書左僕射。 尚書左僕射 尚 書左僕射」 陳書本傳同,但陳書後主紀及南史陳 本紀 並 言伯智於後主即
- 太建 中 立 (陳書 本 ·傳同。 但 陳書廢帝紀及南史陳本紀,立伯謀爲桂陽王在光大二 年七月壬戌,
- 因 奮 袖 得 脫 「袖」字各本並脫、據陳書補。 按上云「以其褶袖縛之」,則當 有「袖」字。

不在

太建

中。

- 叔 陵 即 · 遣藏: 加 譚騏 驎 二人詣摩訶 퀧 洫 」陳書、通鑑 作「戴溫」、疑「洫」 爲 溫 」字之譌。
- 凊 河 公楊 素 兵下 荆門 淸 河」、「荆門」各本作「淸和」、「荆州」、據陳書改。 按隋 書楊 (素傳)素

清河郡公。

隋遣 陽 及中牟 內陽 事 公薛冑為 ,疑南史、陳書有譌。 湘 州 刺史 「內陽」陳書作「中 牟」。 按隋書薛冑傳, **青襲文城縣** 公, 無封

内

[11] 新興王叔純字子洪 「子洪」陳書作「子共」。

 \subseteq 臨海王叔顯字子亮 「臨海王」本書陳後主紀及陳書後主紀、 叔顯傳並作「臨江王」。 按陳皇子

皆以郡爲封。 時南豫州有臨江郡,治烏江,東揚州有臨海郡, 治章安。 後主至德世,江北已失,

臨江郡改屬周、隋,疑作臨海爲是。

[三] 禎明二年立「二年」各本作「三年」,據陳書改。

加侍中中衞將軍 「中衞將軍」各本作「衞將軍」,據陳書改。

呈 至德四年立 「四年」各本作「元年」,據陳書改。 按陳書後主紀,立莊爲會稽王在至德四年夏五

月丁巳。

南史卷六十六

列傳第五十六

杜僧明 周文育 子寶安 侯瑱 侯安都 歐陽頠 子紇

黄法竓 淳于量 章昭達 吳明徹 裴子烈

為新州 六七,衆並憚役潰散。 請待秋討之,廣州刺史新渝侯蕭映不聽,蕭諮又促之,子雄等不得已遂行。至合浦,死者十 州 反,逐刺史蕭諮,諮奔廣州。臺遣子雄與高州刺史孫冏討賁。 刺 史、南江督護、日」僧明與兄天合及周文育並爲安興所啓、請與俱行。 杜僧明字弘照,廣陵臨澤人也。形貌眇小,而有膽氣,善騎射。梁大同中,盧安興爲新 助防。 天合亦有材幹,預在征伐。 禁之不可,乃引其餘兵退還。 安興死,僧明 蕭諮啓子雄及問與賊交通,逗遛不進, 復副其子子雄。 時春草已生,瘴癘方起,子雄 及交州豪士李賁 頻征俚、燎有功,

列傳第

五十六

杜僧明

一五九九

梁武 以攻刺史蕭映。 矣。」衆咸慷慨曰:「是所願也,唯足下命之。」乃與周文育等率衆結盟,奉子雄弟子略爲主, 待遇我等亦甚厚矣,今見枉死而不能爲報,非丈夫也。 引爲主帥 至數萬。 百姓,誰敢不從。 帝敕於廣州賜死。 陳武帝時在高要,聞事起,率衆來討,大破之。殺天合,禽僧明及文育等,並釋之, 子略頓城南,天合頓城北,僧明、文育分據東西,吏人並應之,一日之中,衆 城破斬二侯,然後待臺使至,束手詣廷尉,死猶勝生。縱其不捷,亦無恨 子雄弟子略、子烈並豪俠,家屬在南江。 我弟僧明,萬人之敵,若圍州城,召 天合謀於衆曰:「盧公累葉

僧明頓西昌,督安成、廬陵二郡軍事。 康,陳武又令僧明與文育等拒之。相持連戰百餘日,卒禽遷仕,送于武帝。及帝下南康,留 讚石,以逼武帝。武帝遣周文育為前軍,與僧明擊走之。遷仕與寧都人劉孝尚幷力將襲南 始興破蘭裕,僧明爲前鋒,斬裕。又與察路養戰於南野,僧明馬被傷,武帝馳救之,以所乘 馬授僧明。 武帝征交阯及討元景仲,僧明、文育並有功。侯景之亂,俱隨武帝入援建鄴。武帝於 僧明上馬復進,殺數十人,因而乘之,大敗路養。 梁元帝承制,授新州刺史、臨江縣子。 高州刺史李遷仕又據大皐,入

隨東討。 <u>侯景遣于慶等寇南江,武帝頓豫章,命僧明為前驅,所向剋捷。</u>武帝表僧明爲長史,仍 軍至蔡洲,僧明率麾下燒賊水門大艦。及景平,除南兗州刺史,進爵爲侯,仍領晉

陵 威。 太守。 陳文帝卽位,追贈開府儀同三司, 及荆州覆亡,武帝使僧明率吳明徹等隨侯瑱西援, 配享武帝廟庭。 子晉嗣。 於江州病卒。 贈散騎常侍, 諡

奇之, 以遺之,文育不之省,謂弘讓 字,捨因 家,就其母請文育養爲己子,母逐與之。 能 反覆游 周 因 文育字景德,義興陽羨人也。 為立名爲文育, 召與語。 水中數里,跳高六尺,與羣兒聚戲,衆莫能及。義興人周薈爲壽昌浦口 文育對曰:「母老家貧,兄弟姊並長大,困於賦役。」一首哀之,乃隨文育 字景德。 曰:「誰能學此、取富貴但有大槊耳。」弘讓壯之、敎之騎射、文 命兄子弘讓教之書計。 少孤貧,本居新安壽昌縣,姓項氏,名猛奴。 及薈秩滿,與文育還都, 弘讓善隸書, 見太子詹事周捨, 寫蔡邕勸學及古詩 戍主,見而 年十一, 請制 名 至

九 育前鋒陷陣,勇冠軍中。 .創,創愈,辭請還葬,慶之壯其節,厚加賵遺而遣之。 司 州 水蠻。 刺史陳慶之與薈同郡,素相善,啓薈爲前軍 蠻謀執薈以入魏, **薈於陣戰死**,文育馳 事覺,薈與文育拒 取 其尸,賊不敢逼。 之。 軍主。四慶之使薈將五百人往新蔡 時賊徒甚盛,一 及夕,各引去。 日中戰數十合,文 文育身被

育大悅。

葬訖,會盧安興爲南江督護,啓文育同行。 累征有功,除南海令。 安興死後,文育與杜

僧明攻廣州、為陳武帝所敗、帝赦之。

配焉 勝之,得銀二千兩。 **卜者曰:「君北下不過作令長,南入則爲公侯。」文育曰:「足錢便可,** ·君須臾當暴得銀至二千兩,若不見信,以此爲驗。」其夕,宿逆旅,有賈人求與文育博,文育 後監州王勱以文育爲長流,深被委任。勵被代,文育欲與勵俱下。 旦辭勵,勵問其故, 文育以告, 勘乃遣之。 武帝聞其還,大喜,分麾下 誰望公侯。」ト 至大庾嶺,詣卜者, 人叉曰:

與杜僧明等相得,幷力復進,遂大敗之。 野,文育爲路養所圍,四面數重,矢石雨下,所乘馬死,文育右手搏戰,左手解鞍,潰圍而出。 武帝之討侯景,文育與杜僧明為前軍,剋蘭裕,援歐陽頗,皆有功。 武帝乃表文育爲府司馬。 武帝破察路養於南

稜築城於白口拒之。 元帝授文育義州刺史。 却,相持 文育據其城。 李遷仕之據大皐,遣其將軍杜平虜入纘石魚梁作城。 未解。 遷仕 會武帝遣杜僧明來援,別破遷仕水軍,遷仕衆潰,不敢過大辜,直走新淦。梁 聞平虜敗,留老弱於大皐,悉選精兵自將以攻文育。 文育頻出與戰,遂禽遷仕。 遷仕又與劉孝尚謀拒義軍,武帝遣文育與侯安都、杜僧明、徐度、杜 武帝命文育擊之, 文育 與戰, 平虜棄城走 遷仕稍

其 城 武 累 帝 功 發自 封 南 東遷 康,遣文育將兵五千,開 際侯。 武 帝 軍 至白茅灣, 通 江路。 命文育 侯景將王伯 與杜 僧 明常 醜 爲 據豫章 軍 文育擊走之,遂據 至 姑 孰 與與

將 侯 子 鑒 戰 破之。 景平,改封南移 縣侯,累遷散騎常侍

其 那 城 武 帝 及文帝 誅 王僧辯,令文育督衆軍 爲彪所襲,文育時頓城北 ,會文帝於吳興,圍剋杜龕。 香巖寺,文帝夜往趨 之。 又濟江襲會稽 彪又來攻,文育苦戰 太守張彪,得 遂

破

平

彪

育鼓 戰 城, 抽 跳 人 類上 入砰艦 功 度 適 最 課 江 武 與文育 一、據蕪) 進 臂 一馬而 帝以侯瑱 而 斬 發 進,衆軍 高昌 會。 砰, 湖 嗣徽等不能制。 擁據 仍 詔徵文育 「縣公,給鼓 將戰 牽其艦 隨 江州, 之, 風 急 還 風 而 命文育討之,仍除 都 吹 還, 亦尋轉, 武 至 賊衆 帝 旦,反攻嗣 部。 嗣 曰:「矢不 徽 殺 大駭。 等 傷數 遊列 徽, 逆風。」 百 因 南豫州 艦 留船 人。 嗣 於 徽 青墩 無湖 文育曰:「事急矣, 嗣徽 驍將: 刺 史,率兵襲盆 至于七磯 等移營莫府山,文育徙頓 鮑秤獨 自丹陽 以 步上。 ,以斷文育 小 城。 艦 當決 殿, 時 未 武 之, 文育 歸 ·剋,徐嗣 帝 路 何 拒 乘 對 用 嗣 單 及 古法。」 之。 徽 徽 夕 舴 於白 引齊 頻

孝 勱 守 及 郡 廣 城 孙 刺 自 史蕭 出 豫章, 勃 舉 兵踰 據于石頭。 嶺 韶文育 勃使其子孜將兵與孝頃 督 衆 軍 討 之。 時 新吳洞 和會, 主 余孝 又遣其別 頃 舉 兵 將 應勃 歐陽 造 頠 頓 其 軍 弟

列

傳

苦 育 遺軍 竹灘 主焦僧度、羊柬潛軍襲之,悉取 口城,以拒官軍。三 而歸,仍於豫章 官軍船少、孝頃有舴艋三百艘、 ·立棚 艦百餘乘在上牢,文

泰, 剋之。 軍 **뗄**,文育據其中間,築城饗士,賊徒大駭。<u>歐陽顧乃退入泥溪,作城自守</u>。 之大 書甚喜,許饋以糧 周 一歲武與長史陸山才襲頗,禽之。於是盛陳兵甲,與頠乘舟而宴,以巡傅泰城下, 喜,因不設備。 時官軍食盡,欲退還,文育不許。 O 文育由間道信宿達丰韶。 於是文育分遣老小,乘故船舫沿流俱下,燒豫章所立棚,偽退,孝 乃使人間行,遺周迪書,約爲兄弟,幷陳利害。 **学韶上流則歐陽頗、蕭勃,下流則傅泰、余孝** 文育遣嚴 成威將 頃望 因攻 迪得

吳 持 勃首以降。 廣州平。 蕭 勃 在南康、聞之、衆皆股慄。其將譚世遠斬勃欲降、爲人所害。世遠軍主夏侯明徹 文育還頓豫章,以功授開府儀同三司 蕭孜、余孝頃猶據石頭,武帝遣侯安都助文育攻之,孜降文育, 孝頃退走新

棚 琳 遣 是明徹爲水軍,配周迪運糧,自率衆軍入象牙江,築城於金口。 所 擾 執,後得逃歸,請罪,詔不問,復其官爵。 動 琳擁據上流,詔侯安都爲西道都督,文育爲南道都督,同會武昌。 南 土,武帝復遣文育及周迪、黃法與等討之。 及周迪破余孝頃、孝頃子公颺、弟孝勱猶 豫章內史熊曇朗亦率衆來會。 公颺偽降,謀執文育,事 與琳戰於沌口,為 文育 據 舊

覺,文育囚之送都,以其部曲分隸衆軍。 乃捨舟爲步軍,進據三陂。

|帝聞之,即日舉哀,贈侍中、司空,諡曰|忠愍。 撫之。」初,周迪之敗,棄船走,莫知所在。 勸令先之。文育曰:「不可。 等敗,文育退據金口。 王琳遣將曹慶救孝勱,分遣主帥常衆愛與文育相拒,自帥所領攻周迪、吳明徹軍。 熊曇朗因其失利,謀害文育以應衆愛。 我舊兵少,客軍多,若取曇朗,人皆驚懼,亡立至矣,不如推心 及得迪書,文育喜,齎示曇朗,曇朗害之於坐。」武 文育監軍孫白象頗知其事, 迪

天嘉二年,有詔配享武帝廟庭。 小兒啼,一市並驚,聽之在土下,軍人掘焉,得棺,長三尺,文育惡之。 初文育之據三陂,有流星墜地,其聲如雷,地陷方一丈,中有碎炭數斗。又軍市中忽聞 子寶安嗣 俄而迪敗,文育見殺。

文育本族兄景曜,因文育官至新安太守。

征敗 吳興太守。 食。 沒績,繫於王琳,寶安便折節讀書,與士君子游,綏御文育士卒,甚有威惠。 文育之爲晉陵,以征討不遑之郡,令寶安監知郡事,尤聚惡少年,武帝患之。 寶安字安人,四年十餘歲,便習騎射。以貴公子驕蹇游逸, 文育爲熊曇朗所害,徵寶安還,起爲猛烈將軍,領其舊兵,仍令南討。 好狗馬, 樂驅 文育歸,復除 馳, 及文育 靡衣婾 旭

文帝卽位,深器重之,寄以心膂,精卒多配焉。 及平王琳,頗有功。 周迪之破熊曇朗,

前軍。 寶安南入, 窮其餘燼。 異平,除給事黃門侍郎、衞尉卿。 天嘉二年,重拜吳興太守,襲封壽昌縣公。 再遷左衞將軍,領衞尉卿。 三年,征留異,爲侯安都 卒,諡曰成。

子䂮嗣,位晉陵、定遠二郡太守。至

萬 中 由 兵參軍 是 人,梁益州刺史鄱陽王蕭範命弘遠討之,弘遠戰死。 知名。 侯瑱字伯玉,巴西充國人也。 、晉康太守。 因 事範,範委以將帥之任。「尽」山谷夷、獠不附者, 範爲雍州刺史, 父弘遠,累世為西蜀 會豪。 **璵除馮翊太守。 與固請復讎,每戰先鋒,遂斬文蕚,** 範遷鎮合肥,與又隨之。 並遺瑱征之。 蜀賊張文蕚據白崖山,有衆 累 、功授 輕車府

盆 城。 侯景圍 俄 而 範 臺城,範乃遣 克 嗣皆卒, 與輔其世子嗣入援都。 **與領其衆,依于豫章太守莊鐵。** 及城陷, **뒞、** 鐵疑之,填懼 嗣同 退還合肥。 不自安, 仍隨範徙鎮 詐引 鐵謀

事,因刃之,據豫章之地。

及弟爲質,遺填隨慶平蠡南諸郡。 後 降於侯景將于慶。 慶送瑱 於景,景以與與已同姓,託爲宗族,待之甚厚。 及景敗巴陵,景將宋子仙、任約等並爲西軍所獲,與乃誅 留其妻子

景黨與以應義師,景亦誅其弟及妻子。 討景,恒爲前鋒。 既復臺城、景奔吳郡、僧辯使與追景、大敗之於吳松江。 梁元帝授與南兗州刺史、郫縣侯。 以功除南豫州刺 仍隨都督王僧辯

史,與姑孰。

恃德鎭夏首,與攻之,恃德食盡請和,與還鎭豫章。 康樂縣公。及司徒陸法和據郢州,引齊兵來寇, 未至而魏剋荆州。 及齊遣郭元建出濡須,僧辯遣與扞之,大敗元建。 <u></u> 填頓九江,因衞晉安王還都。 乃使與西討,未至而法和入齊。 承制以與爲侍中、江州刺史,加都督,改封 僧辯使其弟僧悟與與共討蕭勃,及陳武 魏攻荆州,王僧辯以與爲前軍赴援, 齊遣慕容

帝即位,進授太尉。 <u></u> 璵投齊,與以武帝有大量,必能容已,乃詣闕請罪,武帝復其爵位。 金玉、歸于武帝。 事,悉衆以攻孝頃,自夏迄冬弗能剋。廳與其部下侯方兒不協,方兒下攻癲,虜與軍府妓 守,及璵鎭豫章,乃於新吳縣別立城栅,與與相拒。與留軍人妻子於豫章, 是時與據中流,甚强,又以本事王僧辯,雖外示臣節,未肯入朝。 與旣失根本,輕歸豫章,豫章人拒之,乃趨<u>盆城,就其將焦</u>僧度。 王琳至栅口,又以瑱爲都督,侯安都等並隸焉 永定二年,進位司空。文 初, 余孝頃為豫章太 令從弟癲知後 僧度勸 妾

天嘉元年二月, 王琳引合肥 漢湖之衆, 舳艫相次而下。 與率軍進<u>獸</u>艦洲。[刊] 明日合

列

以鹿角繞岸,不敢復出。 戰,琳軍少却。 及夕,東北風吹其舟艦並壞。〔5〕夜中有流星墜于賊營。 時西魏將史寧躡其上流,與聞之,知琳不能持久, 及旦風靜、琳入浦、 收軍却據湖浦,

以待其弊。及史寧至,圍郢州,琳恐衆潰,乃率船東下,「弘去燕湖十里而泊。 明日,齊人遣

兵助琳,與令軍中晨炊蓐食,頓蕪湖洲尾以待之。將戰,有微風至自東南, 衆軍施拍縱火,

定州刺史章昭達乘平虜大艦中江而進,琳軍大敗,脫走以免者十二三,琳因此入齊。 其年,韶以與爲都督五州諸軍事,鎭盆城。周將賀若敦、獨孤盛等來攻巴、湘, 又以與

爲西討都督,大敗盛軍。 以功授湘州刺史,改封零陵郡公。二年薨,贈大司馬,諡曰壯肅

配亨武帝廟庭。 子淨藏嗣,尚文帝女富陽公主。

侯安都字成師,始興曲江人也,爲郡著姓。父捍,少仕州郡,以忠謹稱。 安都貴後,官

至光祿大夫、始興內史。

招集兵甲,至三千人。陳武帝入援臺城,安都引兵從武帝,攻蔡路養,破李遷仕,剋平侯景, 安都工隸書,能鼓琴,涉獵書傳,爲五言詩頗淸靡,兼善騎射,爲邑里雄豪。 侯景之亂

並力戰有功,封富川縣子。隨武帝鎭京口,除蘭陵太守。

長刀,軍人捧之,投於女垣內,衆隨而入,進逼僧辯臥室。 會之。安都至石頭北,棄舟登岸,僧辯弗之覺。石頭城北接岡阜,不甚危峻,安都被甲 武帝謀襲王僧辯,唯與安都定計。仍使安都率水軍自京口 武帝大軍亦至,與僧辯戰于聽事 趣石頭,武帝自從江乘羅落 ٠,

前,安都自內閣出,腹背擊之,遂禽僧辯。以功授南徐州刺史。

江,齊之餘軍猶據采石,守備甚嚴,又遣安都攻之,多所俘獲。 於中流斷賊糧 都閉門示弱, 令城中登陴看賊者斬。 曰:「昨至弟住處,得此,今以相還。」嗣徽等見之大懼,尋求和,武帝聽其還北。 將旦,賊騎至,安都與戰,大敗之,賊乃退還石頭,不敢逼臺城。及武帝至,以安都爲水軍。 武帝東討杜龕,安都留臺居守。徐嗣徽、任約等引齊寇入據石頭,游騎至于闕下。安 運。 又襲秦郡,破嗣徽栅,收其家口,得嗣徽所彈琵琶及所養鷹,遣信餉之, 及夕,賊收軍還石頭。安都夜令士卒密營禦敵之具。 及嗣徽等濟

逼。 犯其陣,曉被創墜馬,張纂死之。 賊騎至,救老,獲免。賊北度蔣山。安都又與齊將王敬寶戰於龍尾,使從弟曉、軍主張纂前 於耕壇南。 武帝與齊軍戰於莫府山,命安都自白下横擊其後,大敗之。以功進爵爲侯, 明年春,韶安都率兵鎭梁山以備齊。徐嗣徽等復入,至湖熟,武帝追安都還拒之,戰 安都率十二騎突其陣,破之,禽齊儀同乞伏無芳,[10]又刺齊將東方老墮馬,會 安都馳往救曉,斬其騎士十二人,取篡尸而還, 齊軍不敢 又進號平

六〇九

列

南將軍,改封西江縣公。

路,安都乃令軍士竪栅,引營漸進,頻致剋獲,政乃降。孝頃奔歸新吳,請入子爲質,許之。 夾水而陣。 題、傅泰等。 以功加開府儀同三司。 仍督水軍出豫章,助豫州刺史周文育討蕭勃。 安都至,乃銜枚夜燒其艦。文育率水軍,安都領步騎,登岸結陣。 唯余孝頃與勃子孜猶於豫章之石頭作兩城,孝頃與孜各據其一,又多設船艦 安都未至,文育已斬勃,幷禽其將歐陽 孝頃俄斷後

之,復其官爵。 僞以小船依鰨而釣,[ll]夜載安都、文育、敬成上岸,入深草,步投官軍。 置于榻下,令所親宦者王子晉掌視之。、琳下至盆城白水浦, 官軍據西岸,相持數日,乃合戰。 圍之。未剋,而王琳至弇口,安都乃釋郢州,悉衆往沌口以禦之,遇風不得進。琳據 兩將俱行,不相統攝,因部下交爭,稍不平。 墜水中。 仍率衆會武昌,與周文育西討王琳。將發,王公以下餞於新林,安都躍馬度橋,人馬俱 又坐榻內墜於櫓井,時以爲不祥。至武昌,琳將樊猛 安都等敗,與周文育、徐敬成並爲琳囚,總以一長鎖繫之, 軍至郢州,琳將潘純於城中遙射官軍,安都怒, 安都等甘言許賂子晉, 棄城走,文育亦自豫章至。時 還都自劾, 韶並赦 子晉乃 源岸,

尋爲丹陽尹,出爲南豫州刺史,令繼周文育攻余孝勱及王琳將曹慶、常衆愛等。

進軍 與 戦 宮亭湖 ,破之,禽炅、協 以 於禽奇 出 洲 松門,躡衆愛後。 破破 曹慶、常衆愛等,焚其船 孝勱弟孝猷 文育為熊曇朗所害 率部 下 四 艦 干家 衆愛奔廬山,爲村人所 、欲就 一安都回取 王琳,遇炅 大艦 敗,乃詣安都 遇 琳將周炅、 殺,餘衆悉平。 降。 周協南 安都 叉

太后 喪次。四三文帝即位,遷司 功天 下 叉 還 ,須共立之。 以衡陽王 軍 至 南皖 で一 故 、未肯 今日 武 帝崩,安都 下令, 之事 空,仍授南徐州 ,後應者斬。」 羣 隨文帝還朝, 臣不能 刺 決。 史,給扶 便按劍上殿,白太后出璽,又手解文帝髮,推 安都 乃與羣臣議, 曰:「今四方未定, 翼奉文帝。 何暇及遠。 時 帝 謙 讓 臨川 弗 、敢當, 王 就 有

齊, 安都 王 琳 進軍盆城 下至栅口 ,討琳餘黨,所向皆 大軍 出頓蕪湖 र् 時 侯瑱 爲 大都督, 而指麾經 略多 出安都。 及王琳入

從容 敢 奉 記。 仍別 m 言日 奉 因 自 :「太子將至,須 中旨,迎衡陽 迎昌 , 中流而 獻王 別 殺 之。 求 昌。 蕃,吾其 以功進爵淸遠郡公。 初昌之將 、老焉。」安都對曰:「自古豈有被代 入,致書於文帝,辭甚 自是威名甚 不遜。 重,羣臣 帝不懌, 無出 一天子, 其 召安都, 愚臣 不

城縣 紫 光 爲 祿 盧陽郡 大 夫 75拜 ,自己分衡州之始興、安遠二郡, 其母爲清遠國太夫人,仍 迎赴 都。 合三郡為東衡州 母 固 求停鄉 里 , 上 乃 下 以安都 從弟 詔 ,改桂 曉爲刺史。 陽 郡之汝

安都

父

捍

爲

始興

內史,卒於官,文帝徵安都

爲發喪。

尋起復本官,贈其父散騎常侍、金

列

都第三子脳年九歲,上以爲始興內史,並令在鄉侍養。 改封安都桂陽郡公。

績,詔許之。 **虜其妻子,振旅而歸。加侍中、征北大將軍,仍還本鎭。 吏人詣闕,表請立碑頌美安都功** 夏潦水漲,安都引船入堰,樓艦與異城等,放拍碎其樓雉。自四異與第二子忠臣脫身奔晉安, 軍自錢唐江上,安都乃步由會稽之諸暨,出永康。 安都躬自接戰,爲流矢所中,血流至踝。安都乘輿麾軍,容止不變。因其山隴爲堰。屬 王 琳敗後,周兵入據巴、湘,安都奉詔西捍。 及留異擁據東陽,又奉詔東討。 異大恐,奔桃枝嶺,處巖谷間,竪栅以拒 異本謂臺

妾於御堂歡會,帝雖許其請,甚不懌。明日,安都坐於御坐,賓客居羣臣位,稱觴上壽。 則 登,武士則蕭摩訶、裴子烈等,並爲之賓,齋內動至千人。部下將帥,多不遵法度,檢問收攝, 重雲殿災,安都率將士帶甲入殿,帝甚惡之,自是陰爲之備。又周迪之反,朝望當使安都討 不應。安都再三言之,帝曰:「此雖天命,抑亦明公之力。」宴訖,又啓便借供張水飾,將載妻 以 又啓某事。 奔歸安都。 詩筆,第其高下,以差次賞賜之。文士則褚玠、馬樞、陰鏗、張正見、徐伯陽、劉删、祖孫 自王琳平後,安都勳庸轉大,又自以功安社稷,漸驕矜。招聚文武士,騎馭馳騁,或命 及侍宴酒酣,或箕踞傾倚。嘗陪樂游禊飲,乃白帝曰:「何如作臨川王時。」帝 文帝性嚴察、深銜之。安都日益驕慢、表啓封訖、有事未盡,乃開封自書之、

之,帝乃使吳明徹討迪。 又頻遣臺使案問安都部下,檢括亡叛。 安都 內不自安。

安都 詔 又收其將 於 宥 石頭 謀反。 其妻子家口,葬以 天嘉三年冬,遣其別駕周弘實,自託於舍人蔡景歷,幷問省 帥 帝引安都宴於嘉德殿,又集其部下將帥 盡 帝慮其不受召,明年春,乃除安都爲征 奪馬仗 士 而 釋之。 禮 因 出景歷表於朝,乃下詔暴其罪,明 |南大將軍 會于尙書朝堂, て、江州 中事。 刺史。 於坐收安都 日於西省 景歷錄其狀奏之,稱 自京 口 賜死。 還 囚 于 都,部伍 "西省 尋有

而 心 並有所短。 過差,居危履 初 太建三年,宣帝追封安都陳集縣侯。 武帝嘗 杜公志大而 與諸 嶮,猜防不設。 將宴、杜僧明、周文育、侯安都爲壽,各稱功伐。 識暗,狎於下 侯郎傲誕 而 而 子亶爲嗣 驕於尊, 矜其 無厭,輕佻 而 (功不收) 肆志。 其拙 並非全身之道。」卒皆如言。 帝曰:「卿等悉良將也, 周侯交不擇 人, 而推

哀 毁甚 歐 至。 陽 頠 字靖世,長沙 家產累 積 悉 臨湘 讓諸 人也。 兄。 廬於麓 爲郡豪族。 山寺傍,專精 少質直,有 習業,博 思理,以 通 經 言行 史。 著於嶺 父喪,

年三十, 其 兄 逼 令從宦。 梁左衛 將軍蘭欽少與頠善, 故頗常隨欽 征 討。 欽南 征夷獠

復 禽 陳文徹 啓 頠 同 行。 所 獲不可勝計,獻大銅鼓,累代所無。[三願預其功, 欽度嶺 而卒,頗除臨賀 內史,啓乞送欽喪還都,然後之任。 還爲直閤將軍。 時湘、衡界五十餘 欽征 交州

不實,敕衡州

刺史韋粲討之。

| 粲委頗爲都督,悉皆平殄。

隆顯,莫非國恩,今應赴難援都,豈可自爲跋扈。」及陳武帝入援都,將至始興,頗乃深自結 史裕攻始興內史蕭昭基,日心奪其郡。以兄欽與頠舊,遣招之。 侯景構逆,聚自解還都征景,以頠監衡州。 臺城陷後,嶺南互相吞併,蘭欽弟前高州刺 頠不從,謂使曰:「 高州昆

史, 武帝之討蔡路養、李遷仕也,頗助帝平之。 封新豐縣伯 梁元帝承制以始興郡爲東衡州, 以頗爲刺

裕敗,武帝以王懷明爲衡州刺史,遷頗爲始興內史。

託。裕遣兵攻頠,武帝援之。

公正 不獲拜命。 ,本有匡濟才,恐蕭廣州不肯致之。」乃授武州刺史。 侯景平,元帝 尋授衡州刺史,進封始興縣侯。 福問朝宰, 使各舉所知, 羣臣未對。 元帝曰:「吾已得一人矣。 尋授郢州,欲令出嶺,蕭勃留之, 歐陽頹甚

陽監州 遣 兵襲頗,盡收其貲財馬仗。尋赦之,還復其所,復與結盟。 時蕭勃在廣州,兵强位重,元帝深患之,遣王琳代爲刺史。琳已至小桂嶺,勃遣其將孫 盡率部下至始興避琳兵鋒。 **顧別據一城,不往謁勃,閉門高壘,** 魏平荆州,頌委質於勃。及勃 亦不 ·拒戰。 勃怒,

度嶺出南康,以頗爲前軍都督,周文育破禽之,送于武帝,帝釋而禮之。

侯。 未至嶺,頗子紇已剋始興。 蕭勃死後,嶺南亂,頗有聲南土,且與武帝有舊,乃授安南將軍、衡州刺史, 及頗至,嶺南皆懾伏,仍進廣州,盡有越地。 改授都督交廣 封始興縣

王琳據有中流,頗自海道及東嶺奉使不絕。 永定三年,卽本號開府儀同三司。 文帝卽

位,進號征南將軍,改封陽山郡公。

等十九州諸軍事、平越中郎將、廣州刺史。

還之,時人莫不歎伏之。 矩,餘人弗之知。 初,交州刺史袁曇緩密以金五百兩寄願,令以百兩還合浦太守襲薦,こじ四 **頠尋爲蕭勃所破,貲財並盡,唯所寄金獨存,曇緩亦尋卒,至是, 頗並依信** 百兩付兒智

時傾合門顯貴,威振南土,又多致銅鼓生口,獻奉珍異,前後委積,頗有助軍國。

四年薨,贈司空,諡曰穆。子紇嗣。

疑之。 | 統字奉聖,頗有幹略,襲父官爵,在州十餘年,威惠著於百越。 太建元年,徵爲左衞將軍,其部下多勸之反,遂舉兵攻衡州刺史錢道戢。 宣帝以紇久在南服, 韶儀同章 頗

列傳第五十六 歐陽顏

昭達討禽之,送至都,伏誅。

子詢以年幼竟。

黃法與字仲昭,巴山新建人也。少勁捷有膽力,日步行二百里,能距躍三丈。 頗便書

疏,閑明簿領,出入州郡中,爲鄉閭所憚。

帝即位,改封新建縣侯。 行臺于慶來襲新淦,法熊敗之。梁元帝承制授交州刺史資,領新淦縣令,封巴山縣子。 鄴,李遷仕作梗中途,武帝命周文育屯西昌,法髡遣兵助文育。時法髡出頓新淦縣,景遣 侯景之亂,於鄉里合徒衆。太守賀詡下江州,法夷監知郡事。 陳武帝將踰嶺入援建

太平元年,割江州四郡置高州,江心以法夷為刺史,鎮巴山。蕭勃遣歐陽頠來攻,江心法

三將。以功授平南將軍、開府儀同三司。熊曇朗於金口害周文育,法與共周迪討平之。 永定二年,王琳遣李孝欽、樊猛、余孝頃攻周迪,且謀取法夷、日日以叛援迪,禽孝頃等

天嘉三年,周迪反,法與與吳明徹討平迪,法與功居多。廢帝卽位,進爵爲公。

堞,CED剋之,盡誅其戍卒。 進兵合肥,望旗降款。 法<u>興禁侵掠,躬自勞撫而與之盟,並放還</u> 太建五年,大舉北侵,法輕爲都督,出歷陽。於是爲拋車及步艦,竪拍以逼之,砲加其樓

北。 以功加侍中,改封義陽郡公。

為豫州 刺史,鎭 壽陽。 薨,贈司 空,諡 日威。 子玩 嗣。

善自 居處,偉姿容,有幹略,便弓馬。 淳于量字思明, 其先濟北人也。 梁元 世居建鄴。 帝 爲荆州 父文成, 刺 文成 仕|梁 分量 爲將帥, 一人馬, 位 令往 梁州 事 刺 量 少 軍

功封 廣晉縣男。

史。〔三及魏剋荆州 州 陳 其 武 將任約。 刺 帝 史。 侯景之亂,梁元帝凡遣五軍入援臺, 武帝 侯景 進攻郢州, 西上攻巴州, 受禪,進位鎮 量保柱州 獲宋 西大將軍、開府儀 字仙 元帝使都督 王 琳 仍隨僧辯 雅割湘、**郢**,累遣 王僧辯入據巴陵, 量預其一 平侯景。 同 司 0 臺城陷, 召量, 封謝沐縣侯。 量與僧辯幷力 量外雖與琳往 量還荆州。 尋出 (担景) 爲都 元帝承制以爲 來, 而 督、 大敗之, 別 遣 桂州 使 禽 巴

刺

帝 使 湘 天嘉 州 刺 五. 年,徵爲中撫軍 史 華皎 征衡州, 且以 大 將 兵迎 軍 量。 量所部 天康元年,至都,以在道 將率多戀本土, 並 一欲逃入· 淹留 山谷, ,爲有司 不 願 入朝。 発儀同, 文

餘 如 故

列

傳

횎

周 將長湖公元定等。 華皎構逆,以量爲征南大將軍、西討大都督,總率大艦,自郢州樊浦拒之。 以功授侍中、中軍大將軍、開府儀同三司,進封醴陵縣公。 皎平, 未拜,出爲 幷降

南徐州刺史。

太建元年,進號征北大將軍,給扶。 三年,就江陰王蕭季卿買梁陵中樹, 季卿坐免,

免侍中。尋復侍中。

贈司空。 及周獲吳明徹,乃以量爲都督水陸諸軍事、車騎將軍、都督、南兗州刺史。 吳明徹之北侵也,量讚成其事。 又遣第六子岑率所領從軍。 淮南剋定,量改封始安郡 十四年薨,

「未也。」侯景之亂,昭達率鄉人援臺,爲流矢所中,眇其一目。 須小虧,則當富貴。」梁大同中,昭達為東宮直後,因醉墮馬,鬢角小傷,昭達喜之,相者曰. 章昭達字伯通,吳興武康人也。 性倜儻,輕財尙氣。少時,遇相者謂曰:「卿容貌甚善, 相者見之,曰:「卿相善矣,不

久當富貴。」

臺城陷,昭達還鄉里,與陳文帝游,因結君臣分。侯景平,文帝爲吳興太守,昭達杖策

因 聚兵衆,以備杜龕,頻使昭達往京口禀承計畫。 一從文帝進軍吳興以討 謁。 文帝見之大喜,因委以將帥,恩寵超於儕等。 龕。 **龕平,又從討張彪於會稽,剋之。累功除定州刺史。** 僧辯誅後,杜龕遣其將杜泰來攻長城,昭達 陳武帝謀討王僧辯,令文帝還長城招 時留異擁

進,先鋒發拍,中賊艦。 詔 昭達便道征之。 嘉元年,追論長城功,封欣樂縣侯。 迪敗走,徵爲護軍將軍,改封邵武縣侯。 王琳平,昭達策勳第一。 尋隨侯安都拒王琳,昭達乘平虜大艦,中流而 二年,除都督、郢州刺史。 周迪 據臨川反,

據

東陽,武帝患之,乃使昭達爲長山令,居其心腹。

孝頃 與 戦 不利 畄 匹 自 年,陳寶應納周迪,共寇臨川, 海道,適至,因幷力乘之,遂定閩中,盡禽留異、寶應。 [據上流爲筏,施拍 其上,壞其水棚。 叉以 昭達爲都督討迪。 叉出兵攻其步軍。 迪走,昭達乃踰嶺討陳寶應。 以功授鎭軍將軍、開府儀同 方大合戰,會文帝遺余

何 以償夢 初 文帝嘗夢昭達升台鉉,及旦,以夢告之。 \^_]昭達對曰:「當效犬馬之用,以盡臣節,自餘無以奉償。」 邵陵郡公。 華皎之反,其移文並假以昭達爲辭,又頻遣使招之,昭達盡 至是,侍宴酒酣,顧昭達曰:「卿憶夢不? 尋出 爲都督、江州刺史。

執 其 使送 廢 帝 都。 卽 位,改封 秩滿 徴 爲 中撫大將軍。

列

用遏舟艦。 反,詔昭達都督衆軍征之。 宣帝卽位,進號車騎大將軍,以還朝遲留,爲有司所劾,降號車騎將軍。 昭達居其上流,裝艦造拍,以臨賊栅。又令人銜刀潛行水中,以斫竹籠,籠篾皆 歐陽紀據嶺南

解。 因縱大艦突之,大敗彪,禽之送都。廣州平,進位司空。 太建二年,征江陵。時梁明帝與周軍大蓄舟艦於青泥中,昭達分遣偏將錢道戢、程文

中病薨,贈大將軍。 昭達乃命軍士爲長戟,施樓船上,仰割其索。 季 乘輕舟焚之。周又於峽口南岸築壘,名安蜀城,於江上橫引大索,編葦爲橋,以度軍糧。 索斷糧絕,因縱兵攻其城,降之。三年,於軍

弗之廢也。 將 士亦 昭達性嚴刻,每奉命出征,必晝夜倍道,然其所剋,必推功將帥。厨膳飲食,並同羣下, 以此附之。 四年,配享文帝廟庭。 每飲會,必盛設女伎雜樂,備完、胡之聲,音律姿容,並一時之妙,雖臨敵

襲殺暈而反。 子 大寶、襲邵陵郡公、位豐州刺史。 尋被禽,梟首朱雀航,夷三族。 在州貪縱,百姓怨酷,後主以太僕卿李暈代之,乃

用 天 塋 未修, 自訴。 時有 吳 |明徹字通炤,Clino秦郡人也。 父樹,梁右軍將軍。 家貧 伊氏者,善占墓,謂其兄曰:「君葬日 居數日,有自田還者,云苗已更生, 無以取給,乃勤力耕種。時天下亢旱,苗稼焦枯,明徹哀憤,每之田 明徹疑其給己, ,必有乘白馬逐鹿者經墳,此是最小孝子大貴 明徹 幼狐, 及往如言, 性至孝。 秋而 年十四,感墳 大穫,足充葬 中號哭,仰

鄉 里共此。」於是計口平分,同其豐儉、羣盜聞而避焉,賴以存者甚衆。 及 侯景寇都,明徹有粟麥三千餘斛,而鄰里飢餧,乃白諸兄曰:「今人不圖久,奈何不與 之徵。」至

時果有應。

明徹即樹之小子

也

授 傳, 安南 就 陳武帝鎭京口 汝南周 將軍,與侯安都、周文育將兵討王琳。 弘正學天文、孤虛、遁甲、略通其術,頗以英雄自許,武帝亦深奇之。 ,深相要結,明徹乃詣武帝,帝爲之降堦,執 及衆軍 敗沒,明徹 手卽席。 自拔還都 明徹亦微涉書史經 及受禪,

以 五 年,遷吳興 迪。 文帝卽位,以本官加 明徹 〈太守。 雅 性 剛直,統內不 及引 右衞將軍。 辭之郡,帝謂 ·甚和,文帝聞之,遣安成王珥代明徹,令以本號還朝。 及周迪反,韶以明徹爲江州刺史,領豫章太守,總衆軍 曰:「吳興雖郡,帝鄉 之重,故以 相 授。

帝 也 廢帝卽 毛喜知: 位 其 · 授領軍將軍 ,尋遷丹陽 尹,仍詔以甲仗四十人出 明徹 曰:「嗣君諒闇、萬 入殿省。到 機 多闕。殿下親實周、 仲舉之矯令出宣

列

傅

第

五

+

六

吳

明

徹

史,仍與征南大將軍淳于量等討皎。一鮫平,授開府儀同三司,進爵爲公。 召,德冠伊、霍,願留中深計,愼勿致疑。」及湘州刺史華皎陰有異志,詔授明徹都督、湘州刺

郡降。 州。 卒二十萬,陳旗鼓戈甲,登壇拜受,成禮而退。 將 躬 腫,死者十六七。會齊遣大將皮景和率兵數十萬來援,去壽春三十里,頓軍不進。諸將咸 齊兵退據相國城及金城。 衆 曰:「計將安出。」明徹曰:「兵貴在速,而彼結營不進,自挫其鋒,吾知其不敢戰明矣。」於是 軍 軍 擐 授征北 、豫州刺史,增封幷前三千五百戶。遣謁者蕭淳就壽陽授策,曰即徹於城南設壇,士 甲胄,四面疾攻,城中震恐,一鼓而禽王琳等送建鄴。景和懼而遁走。 十餘萬發都,緣江城鎭,相續降款。 太建五年、朝議北征、公卿互有異同、明徹決策請行。 詔加侍中、都督征討諸軍事, 宣帝以秦郡明徹舊邑,詔具太牢,令拜祠上冢,文武羽儀甚盛,郷里榮之。進剋仁 大將軍,進封南平郡公。進逼壽陽,齊遣王琳拒守,明徹乘夜攻之,中宵而潰。 明徹令軍中益修攻具,又遏肥水灌城,城中苦濕,多腹疾,手足皆 軍至秦郡,齊大將軍尉破胡將兵爲援,破走之,秦 韶以爲車騎大

六年,自 八年,進位司空,給大都督鈇鉞、龍麾。 i壽陽 入朝,輿駕幸其第,賜鐘磬一部。 尋授都督、南兗州刺史。 七年,進攻彭城,軍至呂梁,又大破齊

及周滅齊,宣帝將事徐、兗。九年,詔明徹北侵,令其世子慧覺攝行州事。 軍至呂梁

柩 軍 帥 傾 路 下 周 皆潰。 徐州總管梁士彥率衆拒戰,明徹頻破之。 歸 馬 倒 岢 軍數千前還,明徹仍自決其堰,乘水力以退軍。 周 諸將聞之甚恐,議欲破堰拔軍 遣 至德元年,韶追封邵陵侯,以其息慧覺嗣 |可得乎?不如前遣馬出。」適會明徹苦背疾甚篤, ŀ 明徹窮蹙,乃就 大將軍王軌教之。 執。 周 | 軌輕行自清水入淮 封懷德郡公,位大將軍。 ,以舫載馬。 仍迮淸水以灌其城,攻之甚急,環列舟艦於城 馬明戌裴子烈曰:[云][君若決 口,行三横流竪木,以鐵鎖 及至清口, 以憂遘疾,卒於長安,後故吏盜 知 事 ,不濟,遂從之。 水力微,舟艦並不 貫車輪,遏斷 堰下船,船 乃遣 得度, 蘆蘆摩 船 其 訶 必

北 譙 太守, 裴子烈字大士,河東聞喜人。 岳陽內史,封海安伯。 梁員外散騎常侍隨之子。 少孤,有志氣,以驍勇聞。

亂 言 |陝毛 之非 論 量望 妄 曰:古人云「知臣莫若 矣。 風 若不 景附 然者, 自等 誠臣,良 亦 何 君」,書曰「知 以 驅駕雄傑, 有以 也。 人則 昭達勤王之略 面 創基 哲」,觀夫 撥 亂 者 陳武論將,而周、侯遇 乎。 遠符 故 耿弇,行 瑱 頠 己之方,頗 並 自 **一**奔囚, 禍,有以 司 翻 吳漢 知斯 同 有

列

傳

第

五十

六

吳

明

徹

旣眇而貴,亦黥而王,吉凶之算,豈人事也。 **暗孫、吳,知進而不知止,知得而不知喪,犯斯不韙,師亡國蹙,宜矣哉。** 明徹屬運否之期,當闢土之任,才非韓、 白,識

校勘記

盧安興爲新州刺史南江督護 興死,杜僧明復副其子子雄,而據陳書武帝紀,子雄時爲新州刺史。則此廣州當爲新州之誤 「新州」各本作「廣州」。按下文,時廣州刺史爲新渝侯蕭映。 又安

今改正。

CII 啓薈爲前軍軍主 各本不疊「軍」字、據陳書補。

傅泰據墌口城以拒官軍 「塘口」各本作「塘口」,據陳書改。

C 图] 寶安字安人 「安人」本作「安民」,避唐諱改。

位晉陵定遠二郡太守「太守」二字各本並脫,據陳書、通志補。

範委以將帥之任 「將帥」各本作「將節」,據陳書、通志改。

C+) 瑱率軍進獸檻洲 「獸」本字「虎」,此避唐諱改。

東北 風 吹其舟艦並壞 「東北風」各本作「東西風」、據陳書、通志改。

[1.] 乃率船東下 「東下」各本作「來下」,據通志改。

禽齊儀同乞伏無芳 「乞伏無芳」南監本、汲古閣本、 局本作「乞扶無芳」,其他各本作「乞伏無

芳」,陳書作「乞伏無勞」。

 \subseteq 子晉乃僞以小船依觸而釣 「依」各本作「住」、據陳書改。

[三] 又手解文帝髮推就喪次 「又」各本作「叉」,據陳書改。

上乃下詔改桂陽郡之汝城縣爲盧陽郡 「盧陽」各本作「廬陽」,據陳書文帝紀天嘉元年紀改。

按隋書地理志有「盧陽」。

[18] 放拍碎其樓雉 「雉」字各本並脱,據陳書補。

〔三〕獻大銅鼓累代所無 「獻大」各本互倒,據陳書乙正。

蘭欽弟前高州刺史裕攻始興內史蕭昭基 「蕭昭基」陳書作「蕭紹基」。

[1七] 令以百兩還合浦太守襲薦 「襲薦」陳書作「襲薦」。

〕 割江州四郡置高州 「江州」各本作「江西」,據陳書改。

[14] 蕭勃遣歐陽頠來攻 「遣」字各本並脫,據陳書補。

永定二年王琳遣李孝欽樊猛余孝頃攻周迪且謀取法甦 「二年」各本作「三年」,據陳費改。按

陳書黃法輕傳、周迪傳並作「二年」。

竪拍以逼之砲加 其樓堞 陳書作「施拍加其樓堞」,疑「炮」字行。

列

傅第五十六

校

勘

記

尋出爲都督桂州刺史 「桂州」各本作「桂陽」,據陳費改。 按下「量保桂州」、則「桂陽」爲誤。

吳明徹字通炤 「通炤」陳書作「通昭」。

遣謁者蕭淳就壽陽授策 「蕭淳」陳書、通鑑作「蕭淳風」。

至 軌輕行自淸水入淮口 「淮口」各本作「灌口」,據陳書、通鑑改。 胡注:「淮口,淸水入淮之口,即

清口也。」

馬明戌裴子烈日 「馬明戌」陳書作「馬主」,通鑑從之,考異云:「馬主,馬軍主也。」

南史卷六十七

列傳第五十七

胡穎 徐度 子敬成 杜稜 周鐵武 程靈洗 子文季 沈恪

陸子 隆 錢道戢 駱文牙 孫瑒 徐世譜 周敷

荀 朗 子法尙 周炅 魯悉達 弟廣達 蕭摩訶 子世廉

任忠 樊毅 第五

景仲,平蔡路養、李遷仕皆有 胡穎字方秀,吳興人也。 功。 偉姿容,性寬厚。 武帝進軍頓西昌,以穎爲巴丘 梁末,陳武帝在廣州,穎深自結託。 一令,鎭大皐, 督糧 運。 從克元 下至

豫章 ,以穎監豫章郡。 武帝率衆 與王僧辯會白茅灣,同討侯景,以穎知留府事。

列傳第五十七 胡額

一六二八

元建 出東關,武帝令穎率府內驍勇隨侯瑱, 梁承聖初, 元帝授穎羅州刺史, 封漢陽縣侯。 於東關大破之。 尋除豫章內史,隨武帝鎭京口 後從武帝襲王僧辯, 又隨周文 齊遣郭

育於吳興討杜龕。武帝受禪、兼左衞將軍。

天嘉元年,除散騎常侍,吳興太守。 卒官、諡曰壯。 二年,配享武帝廟庭。 子六同嗣。

徐度字孝節,安陸人也。少倜儻,不拘小節。 及長,姿貌蠰偉,嗜酒好博,恒使僮僕屠

酤爲事。

初從梁始興內史蕭介征諸山洞,以驍勇聞。 陳武帝征交阯,乃委質焉。四侯景之亂,

武帝剋廣州,平蔡路養,破李遷仕,計畫多出於度。侯景平後,追錄前後戰功,封廣德縣侯。

武帝鎮朱方,除朦陵太守。武帝遣衡陽獻王往荆州,度率所領從焉。 江陵覆亡,間行

東歸。

之於北郊壇。 與敬帝還都,時賊已據石頭,使度頓軍於冶城寺。 武帝東討杜龕、奉敬帝幸京口,以度領宿衞、并知留府事。 以功除郢州刺史,兼領吳興太守。 明年,嗣徽等又引齊寇濟江,度隨衆軍破 徐嗣徽、任約等來寇、武帝

將軍 封湘 東郡公。 文帝卽位,累遷侍中、中撫將 文帝崩,度預 及太尉侯瑱薨于湘 顧命,許以甲仗五十人入殿省。 州 軍 ,以度代與爲都督、湘州 、開府儀 同三司,進爵爲 廢帝即位,進位司空。薨,贈太尉,諡 刺 公。 史。 天嘉元年,以平王 秩滿,復爲侍中、中軍 琳 功, 大 改

忠肅。

太建四年,配享武帝廟庭。

子敬成嗣。

豫州 王琳、於沌口 刺史,襲爵湘 光大元年,爲 敬成幼聰慧,好讀書。 敗績 東郡 巴州刺史。 ,爲琳所縶。 公。 起家著作佐郎。 尋爲水軍,隨吳明徹平華皎。 二年,隨文育、安都得歸。 永定元年,領度所部士卒,隨周文育、侯安都征 父度爲吳郡太守,以敬成 二年,以父憂去職。 尋起爲南 監郡。

宿預。 陽引 剋鬱洲 埭泝江,由廣陵,齊人皆城守,弗敢 太建 卒、諡曰思。 五. 進號壯武將軍,鎮朐 年,除吳興太守。 El 子敞嗣。 Щ 隨都督吳明徹北討,出秦郡,別遣敬成爲都督,乘金翅 坐於軍中輒 出 自繁梁湖 . 科訂,幷誅新附者,免官。 下淮,剋淮陰、 山陽、 尋除安州刺史,鎮 鹽城 那 仍 自

淮

歐

新渝侯蕭映。 杜稜字雄盛,吳郡錢唐人也。 映卒,從陳武帝,平蔡路養、李遷仕皆有功。 少落泊,不爲時知。 頗涉書傳。 梁元帝承制,授石州刺史、上陌 游嶺南,事梁廣州 刺史

縣侯

稜隨方抗拒,未嘗解帶。 僧辯平後,武帝東征杜龕等,留陵與安都居守。 議,稜難之。」武帝懼其泄己,乃以手巾絞稜,稜悶絕於地,因閉於別室。 軍發,召與同行。及 侯景平後,武帝鎭朱方,以陵監義興、琅邪二郡。武帝謀誅王僧辯,引稜與侯安都等共 賊平,以功除右衞將軍、丹陽尹。 徐嗣徽、任約引齊師濟江,攻臺城,安都與

光大元年,解尹,量置佐史,給扶。 都、徐度等並在軍中,朝廷宿將,唯陵在都,獨典禁兵,乃與蔡景歷等祕不發喪,奉迎文帝 文帝即位,遷領軍將軍,以預建立功,改封永城縣侯,位丹陽尹。廢帝即位,加特進、侍中。 |永定元年,位侍中、中領軍。|武帝崩,文帝在|南皖。 時內無嫡嗣,外有强敵,侯瑱、侯安

中、護軍。四年,復爲侍中、右光祿大夫,將軍、佐史、扶並如故。 太建元年,出爲吳興太守。二年,徵爲侍中。 尋加特進、護軍將軍。 三年,以公事免侍

諡曰成、配享武帝廟庭。子安世嗣。 **稜歷事三帝,並見恩寵。末年不預征役,優游都下。頃之,卒于官。** 贈開府儀同三司

聞。 武功最。 譽爲湘州,以爲臨蒸令。 周鐵武,三不知何許人也。 及王僧辯討譽,於陣獲之,將烹焉,鐵武呼曰:「侯景未滅,奈何殺壯士」」僧辯奇 侯景之亂,梁元帝遣世子方等伐譽,譽拒戰,大捷,方等死,鐵 語音儋重,膂力過人,便馬槊。 事梁河東王蕭譽,以勇敢

授潼州刺史,封沌陽縣子。 其言,宥之,還其麾下。 及侯景西上,鐵武從僧辯剋任約,獲宋子仙,每戰有功。元帝承制, 又從僧辯定建鄴,降謝答仁,平陸納於湘州,錄前後功,進爵

爲侯。

徽平,遷太子左衞率。 文育西征王琳於沌口,敗績,與文育、侯安都並爲琳所禽。 屈,故琳盡宥文育之徒,獨鐵武見害。 子瑜嗣。 陳武帝誅僧辯,鐵武率所部降,因復其本職。 尋隨周文育拒 蕭勃,文育命鐵武偏軍襲勃, 贈侍中、護軍。 徐嗣徽引齊寇度江,鐵武破其水軍。 天嘉五年,四文帝又詔配食武帝廟 琳見諸將與語,唯鐵武辭氣不 禽勃前軍歐陽頠。 叉隨

嗣

程 靈 洗 字 玄滌,新安海寧人也。 少以勇力聞,步行日二百 里, 便騎善游, 素爲 **网鄉里畏**

洗 伏。 奉 以主盟。 侯景之亂,據黟、歙聚徒以拒景。 梁元帝授靈洗譙州刺史資,領新安太守,封巴丘縣侯。 景軍據有新安、新安太守湘西鄉侯蕭隱奔依靈洗 後助王僧辯鎭防。

及武帝誅僧辯、靈洗率所領來援、其夜力戰於石頭西門、武帝軍不利、遣使招喻、久之

乃 安縣侯。 降,帝深義之。 後隨周文育西討王琳, 授蘭陵太守,仍助防京口。及平徐嗣徽,靈洗有功,除南丹陽太守,封遂 軍敗,爲琳所拘。 尋與侯安都等逃歸。 累遷太子左衞率。

帝崩、王琳前軍東下、靈洗於南陵破之、虜其兵士、幷獲青龍十餘乘。

以功授都督、

迪 南 豫州 寇 刺史。 臨]]] ,以靈洗爲都督,自鄱陽別道擊之,迪又走山谷間。 侯與等敗王琳于栅口,靈洗逐北,據有魯山。 徵爲左衞將軍。 遷中護軍, 出爲都督、郢州 天嘉四年,周

刺史。

武

守。 因 推 乃皎 心 廢 待之,使其子文季領水軍 帝即位,進號雲麾將軍。 敗,及出 軍躡定,定不獲濟江,以其衆降。 助防。 華皎之反,遣使招靈洗,靈洗斬皎使以聞。 時周將元定率步騎二萬助鮫, 因進攻, 剋周沔州, 圍靈 禽其刺史裴寬。 洗, 朝廷深嘉其忠, 靈洗嬰城固 以

霊 |冼性嚴急,御下甚苛刻,士卒有小罪,必以軍法誅之。 號令分明,與士卒同甘苦,衆

功

改

封

重安縣公

亦 手,並督之紡績。 以此德之。 性好播植,躬勤 至於散 用貲 財 耕稼,至於水陸所宜, 亦 弗 儉 吝。 卒,贈鎭 川 穫 西將軍 早晚, 、開府 雖老農不能及 儀 同 三司 也。 諡 日忠壯。太 妓妾 〈無游

建四年,配享武帝廟庭。子文季嗣。

王 琳 所執 文季字少卿,幼習騎射,多幹略, ,武帝召陷賊諸 將子弟厚遇 之,至文季最 果決有父風。 有 靈洗與周文育、侯安都等敗 禮容,深見賞 於沌

華皎平, 郢 州 文帝 靈洗及文季並有扞禦之功。 嗣位,除宣惠始興王 府限內 中直兵參軍 及靈洗卒, o 文季 累遷 盡領其 臨海 太守。 衆。 起爲超武 後乘金翅助父鎮郢城 將 軍 仍 助 防

周 荆 兵大出 孙 征梁。 文季性至孝,雖軍旅奪禮, ,文季僅以身免。 梁 人與周軍多造舟艦,置于青泥 以功加 而毁瘠甚至。 通直散騎 常侍 水 服闋, 中 一、昭達遣 襲封 文季共錢道 重安 〈縣公。 | 戢盡: 隨都督 一焚其 章昭 舟艦 達 率 軍 旣

其 中。 城 文季 進 拔 乃 盱 前 胎。 領 驍勇,拔開其栅, 仍隨 明徹 韋 壽陽。 明徹 率大 文季 軍自後 臨 事 謹 飭, m 至,攻剋秦郡 御下嚴整, 前後所克城壘,率皆迮水 叉 别 遣 文季 攻涇州 屠

太建

五.

年,

都督吳明

徹

北

討,

至秦郡。

秦郡前

冮

浦

通

涂

水,齊

人並

下

大柱

爲代,

棚

水

而

列

刺史,加都督。

爲 其勤幹。每戰爲前鋒,齊軍深憚之,謂爲程彪。 堰 土木之功 了動踰 數萬。 置陣役人,文季必先於諸將,夜則早起,迄暮不休 以功除散騎常侍,帶新安內史。 ",軍 累遷北徐州 中莫不服

其廢絕,降封重安縣侯,以子響襲封。 吏執送長安,死于獄。 後隨明徹北侵,軍敗,爲周所囚,仍掇開府儀同三司。 是時旣與周絕,不之知。 至德元年,後主知之,贈散騎常侍。又詔傷 十一年,自周逃歸,至渦 陽, 爲邊

軍。 宮直後。 陳武帝與恪同郡、情好甚 沈恪字子恭,吳興武康人也。 以嶺南勳,除員外散騎侍郎。仍令總集宗從子弟。 呢。 蕭映卒後,武帝南討李賁,仍遣妻子附恪還鄉。 深沈有幹局。 梁新渝侯蕭映之爲廣州,兼映府中兵參 尋補 東

功封 東興侯。 侯景圍臺城,起東西二土山以逼城,城內亦作土山應之,恪爲東土山主,晝夜拒戰。 及城陷,間行歸鄉。 武帝討景,遣使報恪,恪於東起兵相應。 贼平後,授都 以

軍副。

及武帝謀討王僧辯,恪預其事。 武帝使文帝還長城立栅備杜龕,使恪還武康招集兵

及僧辯誅、龕果遣副將杜泰襲文帝於長城, 恪時已出縣, 誅龕黨與。 武帝尋遣周

來援 長 城 文育至,泰 泛乃走。 及龕平,文帝襲東揚 州 刺 史張彪 以將 監吳興郡

命。 宮。 一武帝 恪排 武 帝 闥 受禪, 嘉 入見武帝, 其意,不復 時幣 自吳 逼,更以盪主王僧志 吅 頭 興 入朝, 謝曰:「恪身經 武帝 使 中 事 代之。 書舍 蕭家 人劉 來 師 今日不 知引 恪, 忍見此事, **令勒兵**入, 分受死耳, 因衞敬帝 決 不奉 如 別

不得 恩 將 惠 軍 進。 ,嶺表賴之。 帝 至宣 踐 朝廷 作,除吳興太守。 帝即位,除平越中郎將、都督、 遣 司空章昭達討平紇, 後主卽位,爲特進、金紫光祿大夫。 永定三年,除散騎常侍、會稽太守。 乃得 入州。 廣州 刺 兵荒之後, 所在 史。 卒,諡 恪未至嶺,前 日光。云 歷事 一殘毁, 文帝及廢帝,累遷護軍 刺 子法興 史歐陽紇 烙綏 嗣 懷安輯, 舉 兵 狂嶮, 被以

|陸 子隆字興世 | |吳 郡 人也。 祖敞之,梁嘉 興 令。 父俊,封氏

彪 之,復使領 徙 鎭 子 會稽 隆 少 其 慷 部 (慨,有 及 曲 文帝討彪,彪將沈泰、 志功名。 侯景 之亂,於鄉 吳寶眞、 里 申縉等皆降、「も」 聚徒。 時張彪為 吳郡 而子隆力戰敗績。 太守,引 爲 將 帥 文帝義 仍

隨

六三五

列

傳

昭達討迪,迪退走,因隨昭達討陳寶應。晉安平,子隆功最,遷武州刺史,改封朝陽縣伯。 文帝嗣位, 子隆領甲仗宿衞。 封益陽縣子, 累遷廬陵太守。 周迪據臨川反,子隆隨章

績,詔許之。卒,諡威。子之武嗣。 公安,城池未固,子隆修立城郭,綏集夷夏,甚得人和,號爲稱職。 於郢州,子隆出兵襲其後,因與大軍相會。 華皎據湘州反,以子隆居其心腹,皎深患之,頻遣使招,子隆不從,攻又不剋。 進爵爲侯。 尋遷都督、荆州刺史。 吏人詣闕求立碑頌美功 荆州新置,居 及皎敗

子隆弟子才,亦有幹略。從子隆征討有功,除始平太守,封始康縣子。〔5〕卒於信州刺史。 之武年十六,領其舊軍。後爲弘農太守,乃隸吳明徹,於呂梁軍敗逃歸,爲 人所害。

幹,陳武帝微時,以從妹妻焉。武帝輔政,道戢隨文帝平張彪于會稽,以功拜東徐州刺史, 錢道戢字子韜,吳興長城人也。父景深,梁漢壽令。 道戢少以孝行著聞,及長,頗有材

封永安縣侯。

都督、衡州刺史、領始興內史。後與章昭達討歐陽紇、紇平、除左衞將軍。 天嘉元年,爲臨海太守。 侯安都之討留異, 道戢帥軍出松陽以斷其後。 異平,以功拜

太建二年,又隨昭達征江陵,以 功加散騎常侍。 後爲都督、 郢州刺史。 與儀同黃法與

攻下 歷陽,因以道戢鎭之。 卒官,諡 日 庸。 子)邈 嗣

夫人, 諡曰恭。 表,知非常人,賓待甚厚。 有善相者,云:「此郎容貌非常,必將遠致。」梁太淸末, 駱文牙字旗門,日見興臨安人也。 文帝卽位,封臨安縣侯,位越州刺史。 及帝爲吳興太守,引文牙爲將帥。 父裕,梁鄱陽 初,文牙母卒,時兵荒,至是始葬,詔贈臨安國太 嗣王中兵參軍事。 陳文帝避地 從平杜龕、張彪, 臨安, 文牙 文牙年十二,宗人 母陳、観帝 勇冠衆軍 儀

史。 子義嗣。 太建八年,文牙累遷散騎常侍,入直殿省。 十年,授豐州刺史。 至德二 一年卒,贈廣州刺

博涉 經史,尤便書翰。 孫瑒字德璉,吳郡吳人也。 列 傅 第 Тî. --七 仕梁爲邵 鉵 道 戢 父脩道,[10]梁中散大夫,以雅 陵王中兵參軍事。 鴎 文 牙 孫 瑪 太清之難,授假節、宣猛將軍、軍主。 素知 名。 瑒 少倜儻,好謀 王

一大三八

僧辯之討侯景也,王琳為前軍,琳與陽親婭, 乃表薦爲宜都太守。 後以軍功封富陽侯。 敬

帝立、累遷巴州刺史。

軍敗王琳,乘勝而進,自己周兵乃解,場於是盡有中流之地。旣而遣使奉 總留府之任。 及陳武帝受禪,王琳立梁永嘉王蕭莊於郢州,徵陽爲少府卿,自己仍徙都督、郢州刺 周遣大將軍史寧乘虛攻之,陽兵不滿千人,乘城拒守,周兵不能剋。 表 歸 陳。 及聞大

部。 軍。[15]未拜,文帝謂曰:「昔朱買臣願爲本郡,卿豈有意乎。][18] 改授吳郡 秩滿,徵拜散騎常侍、中護軍。 天嘉 頃之,出爲建安太守。 元年,授湘州刺史,封定襄縣侯。 及留異反,據東陽,詔陽督舟師進討。 陽懷不自安,乃固請入朝,徵 太守, 爲 異平,遷鎭右將 侍 中、 給鼓 領軍將 吹

徹 軍敗呂梁,詔授都督緣江水陸諸 太建四年,爲都督、荆州 刺史,出鎭 軍事。 公安,爲鄰境所憚。 尋授都督、郢州 刺 史。 居職六年,以公事免。 及吳明

頻 《幸其宅,賦詩述勳德之美。 遷五兵尙書,領左軍將軍,三三侍中如故。 二年,坐疆場交通 抵罪。 後主嗣位,復爵邑。 歷位度支尚書,侍中,祠部尚 頑明元年,卒官,諡 後主

日恒。

瑒 事親以孝聞,於諸弟甚篤睦。 性通泰,有財散之親友。 居家頗失於侈,家庭穿築,極

列傳第五十七 徐世贈

銘後四十字,遣左戶尚書蔡徵就宅宣敕鐫之。 國器械,多所創立。有鑒識,男女婚姻,皆擇素貴。及卒,尚書令江總爲之銘誌,後主又題 齋設講肆,集玄儒之士,冬夏資奉,爲學者所稱。 而處己率易,不以名位驕物。 時興皇寺慧 舫,於中立亭池,植荷菱,每良辰美景,賓僚並集,泛長江而置酒,亦一時之勝賞焉。常於山 林泉之致,江江歌鍾舞女,當世罕儔。 何處山阿。今時日月,宿昔綺羅。 朗法師該通釋典,[12]楊每造講筵,時有抗論,法侶莫不傾心。又巧思過人,爲起部尙書,軍 天長路遠, 地久靈多。 賓客塡門,軒蓋不絕。 其詞曰:「秋風動竹,烟水驚波。幾人樵徑, 功臣未勒,此意如何。」時論以 及出鎭郢州,乃合十餘船爲大

陽二十一子,第二子訓頗知名,位高唐太守,陳亡入隋。

善水戰。梁元帝之爲荆州刺史,世譜將領鄉人事焉 徐世譜字興宗,巴東魚復人也。世居荆州爲主帥,征伐蠻蜒。 至世譜尤勇敢,有膂力,

湖。 時景軍甚盛,世譜乃別造樓船、拍艦、火舫、水車以益軍勢。將戰,又乘大艦居前,大敗 侯景之亂,因預征討,累遷至員外散騎常侍。尋領水軍,從司徒陸法和與景戰於赤亭

景軍,全 降。 以 禽景將任約。 功除 信州刺 史,封魚復縣侯。 景退走,因隨王僧辯攻郢州,世譜復乘大艦臨其倉門,賊將宋子仙據城 仍隨僧辯東下,恒爲軍鋒。 景平,以衡州刺史資,領 河

東太守。

西 魏 攻荆州,世體鎭馬頭岸,口心據有龍洲。 元帝授侍中、都督江南諸軍事、鎭南將軍、

護軍將軍。魏剋江陵,世譜東下依侯瑱。

紹泰 元年,徵爲侍中、左衞將軍。 陳武帝之拒 王琳,其水戰之具,悉委世譜。 世譜性機

巧,諳解舊法,所造器械,並隨機損益,妙思出人。

永定二年、遷護軍將軍。 文帝卽位,歷特進、 右光祿大夫。 以疾失明、謝病不朝。

諡曰桓。

周 敷字仲遠,臨川 人也。 爲郡豪族。 敷形貌眇小,如不勝衣,膽力勁果,超出 時輩。

豪俠、輕財重士、鄉黨少年任氣者咸歸之。

掠 一般者 侯景之亂, ,敷擁護之,親 鄕 人周 率其黨, 續合衆以討 捍送至豫章。 賊 《爲事》 梁內史始興蕃王蕭毅以郡讓續,續所部 時梁 觀寧侯蕭永、長樂侯蕭基 豐城侯 肅 有 泰避 欲侵

列 傳 第 Ŧi. + 周 魱 荀 朗

難 迪甚恭,迪大憑仗之。 將 流 帥 爭權,殺續以降周迪。 寓,聞戲信義,皆往依之。 迪據臨川之工塘,敷鎭臨川故郡。 迪素無簿閥,又失衆心,倚敷族望,深求交結。 敷愍其危懼,屈體崇敬,厚加給卹,送之西上。 侯景平,梁元帝授敷寧州刺史,封 敷未能自固,事 俄而續部下

等, 敷功最多。 熊曇朗之殺周文育,據豫章,將兵襲敷, 陳武帝受禪,王弥據有上流,余孝頃與琳黨李孝欽等共圍周迪, 敷大破之。 曇朗走巴山郡,敷因與 敷助於迪, 迪禽孝頃

王琳平、授散騎常侍、豫章太守。

周迪、黃法髡等進兵屠之。

西豐縣侯。

達征 章。 督吳明徹攻破 諡 迪,敷又從軍。至定川縣與迪相對, 周迪以敷素出己下,超致顯達,深不平,乃舉兵反,遣弟方興襲敷,敷大破之。 日脱。 迪,禽方興。 子智安嗣,位至太僕卿。 再遷都督、南豫州刺史。迪又收餘衆襲東興,文帝遣都督章昭 迪給敷求還朝, 欲立盟,敷許之。 方登壇,爲迪所 仍從 都

荀 朗 字深明,潁 川潁陰 人也。 祖延祖,梁潁川太守。 **父伯道,衞尉卿。**□弘 六四一

豫州 破之。 魏 部 剋荆州 曲,衆至數萬。 刺史,令與外蕃討景。 朗 少 慷 陳武帝入輔,齊遣蕭軌、東方老等來寇, 慨 ,有將帥大略。 侯景敗於巴陵,朗截破其後軍。 景使儀同宋子仙、任約等頻征之、不能剋。 侯景之亂,據巢湖,無所屬。 景平後,又別破齊將郭元建於踟蹰山。及 據石頭, 臺城陷沒後,梁簡文帝密詔授朗 朗自宣城來赴, 時都下饑,朗 與侯安都等大 更招致

弟。 諡 與舍人蔡景歷祕不發喪,朗弟曉在都微知之,謀率其家兵襲臺。 日 朏。 文帝卽位,並釋之。 武 帝受禪,賜爵興寧縣侯,以朗兄昂爲左衞將軍,弟晷爲太子右衞率。 子法 尙 嗣。 因 厚撫朗,令與侯安都等拒王琳。 琳平, 遷都督、 事覺,景歷殺曉,仍繫其兄 |合||州 武帝崩、宣太后 刺史。

歷邵 観綿 法尚 少俶儻,有文武幹略。 豐四 州刺史,巴東 、敦煌 顧明中, 二郡太守。 爲都督、 郢州 刺史。 及隋軍濟江,法尚降。

周 炅字文昭, 汝南安成人也。 祖强, 齊梁州刺史。 父靈起, 梁廬、 桂 二州刺史, 保城

縣侯。

太守 封 **炅少豪俠任氣**, 西 陵縣伯。 以軍功累遷都督、江州刺史,進爲侯。 有將帥才。 梁太清元年,爲弋陽太守。 陳武帝踐 侯景之亂 作, 王琳擁據 元帝承制改授西陽 上流

以 州從之。 後爲侯安都所禽,送都。 文帝釋之,授定州刺史,帶西陽、武 昌二郡太守。

月之中 太 建五 ,獲十二城。 年,爲都督、安州刺史,改封龍源縣侯。 敗齊尚書左丞陸騫軍。 進攻巴州 其年,隨都督吳明徹北討,所向剋捷, 剋之。 於是江北諸城及穀陽土人,

並

誅其渠帥

以

以城降。

進號

和戎

將軍

仍敕追炅入朝

昇 州 七鎭 , 斬之, 盡復江北之地。 後 叛 梁 定 入于齊, 州 刺史田 齊遣歷陽王高景安應之。 龍昇 進號平北將軍。 以 城降,詔 以為定州 卒於官,贈司州刺史,改封武昌郡公,諡 於是令炅爲江北道大都督, 刺史,封赤亭王。及炅入朝,龍昇以江北 總統衆 軍 以討 壯 龍

魯悉達 字志 通,扶風 郿 人也 祖斐, 齊衡州刺史、陽塘侯。 **父**益之, 梁雲麾將 軍 一、新蔡

義陽二郡太守。

九, 悉達幼以 有得存者,皆攜老幼 多聞。 侯景之亂,糾合鄉 以 歸焉,悉達所濟活者甚衆。 人保新蔡, 力 田 蓄 穀。 招集晉熙等五 時兵荒,都下及上川 那、盡 |有其地。[10] 餓 死

列

僡

便 其 弟 廣達領兵隨王僧辯討平侯景。 梁元帝授北江州刺 史。

琳 下 數千人濟江 敗 帝 授悉達 齊軍 遣 乃連 安 敬 帝 西 紹宗 ·結於齊,齊遣淸河王高岳 旧將軍 鎭 卽 . 而 北 位 僅以身発。 歸武 沈泰潛師襲之,不能 將軍,陳武 ,王琳據有上流, 帝。 帝見之喜曰:「來何遲也。」授北江州 王琳 帝亦遣 欲 留異、 圖 趙知禮授征 助之。 東下 剋。 余孝頃 ,以悉達 齊遣行臺慕容紹宗來攻鬱口 會裨將 活周 西將軍 迪等所 梅天養等懼罪,乃引齊軍 制其中流、遣使 、江州刺史, 在蜂起, 刺 史,封彭澤 悉達 招誘,悉達終不從。 悉達撫綏五郡,甚 諸鎭,至三悉達與戰,大 兩受之,遷延顧望。 縣侯。白司 入城,悉達勒 得人和 琳 不 得 武

刺 史。 悉達 遭 雖 母 仗氣任俠,不以富貴驕人。 憂,哀毀過 禮,因遘疾卒,諡孝侯。 雅 好詞賦,招禮賢才, 子覽嗣。 弟廣達 與之賞會。 文帝 即位,遷吳州

察。 以千 梁元 數, 魯晉州 廣達 而 帝 字編覽,少慷慨,志立 承制 魯氏尤為 亦 是王 授 晉州 一師東 多。 道 刺 主 史。 仕 梁 人。」仍 爲 |功名,虛心愛士,賓客自遠而 王僧辯 平 率衆隨 南當陽 之討侯景, 僧辯。 公府中兵參 景平, 廣 達 軍 出 加 境候接, 員 侯景 至。 外散騎常侍。 之亂, 時江表將帥各領部曲 資奉 軍 與兄 儲 悉達聚衆保新 僧辯謂 沈 一,動 炯

陳武受禪

授東海太守。

後代兄悉達為吳州刺史,

封

中宿縣侯。

光大元年,遷南豫州

刺 史。 華皎 稱兵 上流,詔司空淳于量進討。 軍至夏口, 見皎舟師强盛, 莫敢進。 廣達首率

勇,直 衝城軍 廣達 **墮水,沈溺久之,因救獲免。** 皎平,授巴州 刺 史。

糧 青泥, 建 廣達 初,與儀 與錢道戢等將兵掩襲,縱火焚之,仍還本鎭。 同章昭達 入峽口 ,招定安蜀等諸州鎭。 時周 廣達 圖 爲政簡要,推誠任下,吏人 江左,大造舟艦於屬,幷運

便

之。

及秩滿,皆詣闕表請,於是

詔申二年。

範 。〔三進剋 五. 年 衆 北徐州。 軍 北伐,三 仍授北 略淮 徐州 南舊地, 刺史。 廣達 十年 與齊 ,授都督、合州 軍會於大峴,大破之,斬其敷城王 刺 史。 張元

淮 達 南 率 之地 衆 入淮 一年, う廣 爲掎角以擊之。 達 周 因発官,以侯還第。 將梁士彥圍 壽春, 周軍 攻陷 韶遣中領軍 豫、霍二州,南北兗、晉等各自拔,諸將並無 樊毅、左衞 將軍任忠等分部趣陽平、秦郡,廣 功,盡失

軍 事 頓 十二年, 兵江夏。 與南 周安州 豫 州刺 史樊毅 總管元景山 北討、三剋郭默城。 征江 外,公園達命 尋授平西將軍、都督郢州以 偏 師擊走之。 上七州諸

置 及 陣 酮 乘勝 與與 至 德 酮 二年, 至 旗鼓 宮 城 相 爲 " 燒 北 對。 侍 中, 掖 廣 門,廣 達 改封 躬 浸 提甲 綏 達猶督餘兵苦戰不息。 越郡 ·胄 手 公。 執桴: 尋 爲 鼓, 中 領 率勵 軍 敢 會且暮 及賀若酮 死而 進, ,乃解甲 進軍 隋 軍 退走。 鍾 面 山,廣達於白 臺 再 如 拜慟哭。 是者數 土岡 兀 謂

列

傅

第

一六四六

衆 曰:「我身不 能救國 `角罪深矣。」 士卒皆涕泣歔欷,於是就執

慟哭,乃命筆題其棺頭,為詩曰:「黃泉雖抱恨,白日自留名, **i 順明三年,依例入隋。** 廣達追愴本朝淪覆, **遘疾不療,尋以憤慨卒。** 悲君感義死,不作負恩生。」又 尚書令江總撫柩

製廣達墓銘,述其忠概。

廣達。 初,隋將韓擒濟江,廣達長子世眞在新蔡,乃與其弟世雄及所部奔擒, 廣達時屯兵都下,乃自劾廷尉請罪,後主謂曰:「世眞雖異路中大夫,公國之重臣,吾 擒遣使致書招

所恃賴,豈得自同嫌疑之間乎。」加賜黃金,卽日還營。

廣達有隊主楊孝辯,時從廣達在軍中,力戰陷陣,其子亦隨孝辯揮刀殺隋兵十餘

窮,父子俱死。

蕭摩訶字元胤,蘭陵人也。 父諒,梁始興郡丞。 摩訶隨父之郡,年數歲而父卒,其姊夫

蔡路養時在南康,曰己乃收養之。稍長,果毅有勇力。

及路養敗,摩訶歸侯安都,常從征討,安都遇之甚厚。及任約、徐嗣徽引齊兵爲寇,武 侯景之亂,陳武帝赴援建鄴,路養起兵拒武帝,摩訶時年十三,單騎出戰, 軍中莫有當

帝 訶 造 安都 對 日 北 今日 拒齊軍於鍾 令公見之。」及戰 山龍尾及北郊壇 安都 墜馬被圍 安都謂摩訶曰:「卿 摩 訶 獨 騎 大呼, 驍勇有名, 直 衝 |齊軍, 千聞 齊 不如一 軍稍解去, 見。」

安都乃免。以平留異、歐陽紇功,累遷巴山太守。

脚, 妙 樺 徹 餘 軍 有 來 援 皮裝弓, 進 人 關 胡 少其前 出 圍 太建 張之 於 挺 宿 戰 身 弓 五 預 么名? 摩 矢, 隊 出 兩端 年 訶 擊 有「蒼頭」、「犀角」、「大力」之號, 陣 弦 可 衆軍 走 叉 前 骨 無虚 斬 斬 齊 十 頭。 顏良矣。」 北 之, 將 餘 一發,衆軍尤憚之。 步 伐,摩訶隨都督吳明徹濟江 \pm 明徹 於 ず、穀 康 是齊師 德 摩訶 弓未 遣人覘 以 發 功除晉 日三 退走。 伺, 摩 願得識其 知胡在 及將 訶 熙 以 遙 太守。 功封 、戰,明 擲 皆身 銑 陣, 形 廉平 鋧 狀。 徹 攻秦郡。 長 仍 謂 八尺,膂力絕倫,其鋒 縣 正 自 明 摩 伯 酌 中 徹 訶 酒 其 乃召 時齊遣大將尉破胡等率衆十萬 曰:「若殪 尋進 飮 額 摩 降 應 爲侯, 訶 À 手 而 有 此 摩 位 仆 識 胡 訶 湖者 甚銳。 太僕卿。 飮 則 齊軍「大力」十 訖, 彼 一云湖 軍 퉨 叉 奪氣、君 馬 有 叉 絳 隨 衝 西 衣 明 齊 域

九 年 明 徹 進 軍 呂梁 與齊大戰 摩訶 率 七 騎先入,手奪齊軍 大旗,齊 衆 大潰。 以 、功授

橫 奮擊 及 斬 周 武 馘 帝 甚 滅齊, 衆 遣 及 周 其將字文忻爭 遣 大將 王 朝 來赴, 呂梁。 結長圍 忻 時 有精 連鎖 騎 於呂梁 數千,摩訶 下 流 領十 斷 大 軍 騎 還路 深 入周 摩訶 軍 一、從 謂

率兼行, 圖 未足爲恥。 退。 立, 明徹曰:「聞軌始鎖下 也。 則吾屬虜矣。」明徹奮髯曰:「搴旗陷陣,將軍事也; 一旬之中,水路遂斷,周兵益至。 然老夫受脈專征,今被圍逼,慚置無地。 弟馬軍宜須在前。」摩訶因夜發,選精騎八千,至三率先衝突,自後衆騎繼焉。比旦, 宣帝徵還,授右衞將軍。 願公率步卒乘馬輿徐行,摩訶驅馳前後,必使公安達京邑。」明徹曰:「弟計乃良 流,其兩頭築城,今尙未立,公若見遣擊之, 摩訶又請曰:「今求戰不得, 且步軍旣多,吾爲總督,必須身居其後,相 長算遠略, 進退無路, 彼必不敢相 老夫事 也。」摩訶 若潛軍突圍 拒。 彼城若 失色而

賜之。 黃閤,門施行馬,聽事寢堂,並置鴟尾。 東府城,斬之。 及宣帝崩,始興王叔陵於殿內手,刃後主,遂奔東府城。 改授侍中、驃騎大將軍、左光祿大夫。舊制三公黃閤聽事置鴟尾。 以功授車騎大將軍,回己封綏建郡公。 。仍以其女爲皇太子妃。 叔陵素所蓄聚金帛累巨萬,後主悉以 摩訶入受敕,乃率馬步數 後主特詔摩訶 百 開 趣

達淮南。

入,壘 朝,阙乘虚 「從來行陣,爲國爲身,今日之事,兼爲妻子。」後主多出金帛賦諸軍,以充賞賜。 會隋總管賀若弼鎭廣陵,後主委摩訶禦之,授南徐州刺史。 塹未堅,出兵掩 濟江,襲京口。 襲,必剋。」又不許。 摩訶請率兵逆戰,後主不許。 及將出戰,後主謂曰:「公可爲我一決。」摩訶 及爾進鍾山,摩訶又曰:「弼懸軍深 **i 順明三年元會,徵摩訶** 令中領軍

魯廣達陳兵白土岡,居衆軍南,鎭東大將軍任忠次之,護軍將軍樊毅、都官尚書孔範又次

之,摩訶軍最居北。 衆軍南北亘二十里,首尾進退不相知。

者二百七十三人,所縱煙以自隱,窘而復振。 明、 黃昕、 張默言、 達奚隆、 張辯等甲士凡八千人, 各勒陣以待之。 明禽摩訶以送剛,弼以刀臨頸,詞色不撓,乃釋而禮之。 兵八千,初無戰意,唯魯廣達、田端以其徒力戰。賀若弼及所部行軍七總管楊牙、韓洪、員 孔範,範兵暫交便敗走。 弼初謂未戰,將輕騎登山,望見衆軍,因馳下置陣。 後主通於摩訶之妻,故摩訶雖領勁 陳軍盡潰,死者五千人。 陳兵得人頭,皆走獻後主,求賞金銀。 諸門衞皆走,黃昕馳燒北掖門而 **顾躬當魯廣達,麾下戰死** 入。 員

主,死無所恨。」,弱哀而許之。入見後主,俯伏號泣,仍於舊厨取食進之,辭訣而出,守衞者 皆不能仰視。 及城平,附置後主於德敎殿,令兵衞守,摩訶請附曰:「今爲囚虜,命在斯須,願一 尋從漢王諒詣幷州,同諒作逆,伏誅,年七十三。 隋文帝聞摩訶抗答賀若弼,曰:「壯士也,此亦人之所難。」入隋,授開府儀同 見舊

京口、性好獵、無日不畋游。 摩訶訥於言,恂恂長者。 及安都征伐,摩訶功居多。 至於臨戎對寇,志氣奮發,所向無前。 年未弱冠,隨侯安都在

子世廉. ,有父風。 性至孝,及摩訶凶終,服闕後,追慕彌切。 其父時賓故,脫有所言及,

世廉對之,哀慟不自勝,言者爲之歔欷。 終身不執刀斧,時人嘉焉。

訶 有騎士陳智深者,勇力過人,以平叔陵 功,爲巴陵內史。 摩訶之戮也,其子先已籍

沒,智深收摩訶屍,手自殯斂,哀感行路,君子義之。

潁 JII 陳禹,亦隨摩訶征討。 聰敏有識量,涉獵經史,解風角兵書,頗能屬文,便騎射,官

至王

一府諮議。

過 人,尤善騎射,州里少年皆附之。 任忠字奉誠,小名蠻奴,汝陰人也。 梁鄱 陽王蕭範爲合州刺史,聞其名,引置 少孤微,不爲鄉黨所齒。 及長, 譎詭多計略, 膂力 左 右。

會土人胡通聚衆寇抄 侯景之亂,忠率鄉黨數百人,隨晉熙太守梅伯龍討景將王貴顯於 <u>い</u>範命

忠與主帥

梅思立

弁軍討

平之。 仍隨範世子嗣率衆入援,會京城 壽春、[10]每戰却敵

陷,旋戍,晉熙。 侯景平,授蕩寇將軍。

湘。 累遷 王琳立蕭 豫寧太守,衡陽內史。 莊,署忠爲巴陵太守。 華皎之舉兵也, |琳敗,還朝,授明毅將軍 忠預其謀。 及皎平,宣帝以忠先有密啓於 、安湘太守,仍隨侯瑱進討巴、

朝廷,釋而不問。

太建 初,隨章昭達討歐陽統於廣州,以功授直閣將軍。 遷武毅將軍、廬陵內史。 秩滿,

入爲右軍將軍。

援, 忠大破之, 生禽延貴。 安復縣侯。 東西二城。進軍廝、譙,並拔之。 入爲左衞將軍。 五年,衆軍北伐,忠將兵出西道,「三」擊走齊壓陽王高景安於大峴,逐北至東關,仍剋其 呂梁之喪師也,忠全軍而還。尋授忠都督壽陽、新蔡、霍州緣淮衆軍,霍州刺史。 遷平南將軍、南豫州刺史,加都督。 徑襲合肥,入其郛。 進剋霍州。 率步騎趣歷陽。 以功授員外散騎常侍,封 周遣王延貴率衆爲

後主嗣位,進號鎭南將軍,給鼓吹一部。 入爲領軍將軍,加侍中,改封梁信郡公。 出爲

吳興內史。

往徐州、斷彼歸路,則諸軍不擊而自去。待春水長,上江周羅睺等衆軍,必沿流赴援,此良 度江將士已被獲,自然挫氣。 分兵斷江路,無令彼信得通。 法客貴速戰,主貴持重。今國家足食足兵,宜固守臺城,緣准立栅。 及隋兵濟江、忠自吳興入赴,屯軍朱雀門。 給臣精兵一萬,金翅三百艘,下江徑掩六合。彼大軍必言其 淮南土人,與臣舊相知悉,今聞臣往,必皆景從。臣復揚聲欲 後主召蕭摩訶以下於內殿定議,忠曰:「兵 北軍雖來,勿與交戰,

列

裝 流 東以待忠,久望不至。 衆軍,臣以死奉衞。」後主信之,敕忠出部分。 後主與之金兩縢曰:[雪]「爲我南岸收募人,猶可一戰。」 忠曰:「陛下唯當具舟檝,就 時隋將韓擒自新林進軍,忠率數騎往石子岡降之。 |忠辭云:「臣處分訖,卽奉迎。」後主令宮人 仍引擒 軍共 上

初, 也。」子幼武,位儀同三司。 我悔不殺任蠻奴。 隋文帝後以散騎常侍袁元友能直言於後主,嘉之,擢拜主爵侍郎,謂羣臣曰:「平陳之 受人榮祿,兼當重寄,不能橫屍,云『無所用力』,與弘演納肝,何其遠

南

掖門。

臺城平,入長安,隋授開府儀

同三司。

卒,年七十七。

樊毅字智烈,南陽湖陽 人也。 祖方興、梁散騎常侍、司州刺史、 魚復縣侯。 父文熾,梁

散騎常侍、東益州刺史、新蔡縣侯。

殁, <u> 毅赴江陵,仍隸王僧辯討河東王蕭譽,以功除右中郎將。</u> |毅家本將門, 少習武, 善騎射。 侯景之亂,率部曲隨叔父文皎援臺城。 代兄俊爲梁興太守,領三州游 文皎於青溪戰

列傳第五十七 樊毅

伯。 皆驚擾, ,隨宜豐侯蕭循討陸納於湘州。 尋除天門太守,進虧爲侯。 |毅獨與左右數十人當營門力戰, 斬十餘級, 擊鼓申令, 及西魏圍江陵,毅率郡兵赴援。 軍次巴陵,營頓未立,納潛軍夜至薄營,大譟,軍中將士 會魏剋江陵,爲後梁所俘, 衆乃定焉。 以功封夷道縣

陳武 帝受禪, |毅與弟猛舉兵應王琳,琳敗奔齊,太尉侯與遣使招毅, 毅率子弟部曲還 **外之遁歸**。

朝。 太建初,爲豐州刺史,封高昌縣侯。 入爲左衞將軍。

衆度淮,對清口築城,與周 五年,衆軍北伐,毅攻廣陵楚子城,拔之,擊走齊軍。 人相抗。霖雨城壞、毅全軍自拔。尋遷中領軍。十一年、周將梁 及呂梁喪師、韶以毅爲大都督、率

<u>士彥圍壽陽,詔以|毅爲都督北討諸軍事。[言]十三年,爲|荆州刺史。</u>

矣。」諸將咸從其議。 、采石,俱是要所,各須銳卒數千,金翅二百,都下江中,上下防捍。 後主 |即位,改封逍遙郡公。 入爲侍中、護軍將軍。 及隋軍濟江, 毅謂僕射袁憲曰:「京 會施文慶等寢隋兵消息,毅計不行。 臺城平、隨例入關、卒。 如 其不然,

興 、侯景 毅 弟猛 軍 短 兵接 字智武, 、戰,殺傷甚衆。 幼俶 . 儻,有幹略。 臺城陷,隨兄毅西上。〔言〕梁南安侯方矩爲湘州刺史,以猛 及長,便弓馬,膽氣過人。 青溪之戰,猛自 旦訖暮,

爵

爲

侯。

爲 司 斬 馬。 於 觸 武 中 陵 , 盡 王 紀 收 其 舉兵自漢江 船 艦 器械。 東下, 以功封 方矩遣猛隨都督陸法和進軍拒 安 山 縣伯 進軍 撫 定 之梁、益。 之。 還 遷 猛 司 手禽紀父子 州 刺 、史,進

太守。 等將 陳永 兵 太建 攻 豫 定 中 章 元 一,進 以以 年, 軍 逼 周文育等敗於沌口, 功封 周 迪 富][軍 縣侯。 敗 , 為迪所: 歷散騎常侍,荆 爲王 執。 琳所獲。 尋遁 歸 王 州 琳 琳 刺 乘勝將事 史。 琳 敗, 入 爲左衞 南中諸郡, 還朝。 將軍 天嘉 遣 猛與李孝 年 ·, 授 永 欽

隋六合兵。 以 陷 之,巡 聞,後主 後主 及 卽 家 重傷其意,乃止 後主 位 П 一,爲 並 知猛 南 見 執 豫 妻子 州 時 刺 在 猛 史。 隋 禎 與 明 隋將 懼 左 三年,入隋。 衞 有 將 異 韓擒之濟 志 軍 蔣元 欲 使任忠代之,令蕭摩 遜 江 猛 領青龍 在 都 八十艘 下,第六子巡攝行 爲 訶 水 徐喻毅 軍, 於白下 荊 毅 事 不悅 游 擒 弈, 進 以 軍 詗 禦

攻

沈恪 靈 洗 等 行己之方,不踐非義之迹,子隆持身之節,無失事人之道,仁矣乎! 論) 或 日 梁氏 風 云 雲 季 ', 運 畢 力 屬 驅 雲雷 馳 之日 陳武 或或 帝 擢 杖 旗 自降 掃 難, 附 乃贊 經綸 興 伊 王之 始,)始,咸 胡穎 徐度 得配享 錢道 杜稜 清廟 戢 、駱文牙、孫 豊 周 鐵 徒 然 武 哉

蕭 異,至於功名自立,亦各因時。 瑒、徐世譜、周敷、荀朗、周**炅、魯悉達、廣達、蕭摩訶、任忠、** 、魯所行,固不同日。 持此百心,而事二主,欲求取信,不亦難乎? 當金陵覆沒,抑惟天數,然任忠與亡之義,無乃致虧, 樊毅等,所以獲用當年,其道雖 首領獲全,亦爲幸也。 與夫

校勘記

- 陳武帝征交阯乃委質焉 「征」各本作「在」、據陳書、通志改。
- 二年以父憂去職至太建五年除吳興太守 建」二字,此蓋錯簡,今移正。 按陳書廢帝紀、徐度傳並云度死於光大二年,敬成「丁父憂」不得 「二年」上各本有「太建」二字;「五年」上各本無「太

在太建二年。

- [1] 周鐵武 「武」本字「虎」,避唐諱改。
- 四〕天嘉五年 「五年」各本作「三年」,據陳書改。
- Ŧī 武帝召陷賊諸將子弟厚遇之 「將」字各本並脫,據陳書補
- C*」諡曰光 「光」陳書作「元」。
- [4] 彪將沈泰吳寶眞申縉等皆降 「申縉」張彪傳作「申進」。
- ス 除始平太守封始 康 際子 「始平」、「始康」陳書作「南平」、「始興」。

列傳第五十七 校勘記

- [元] 駱文牙字旗門 「駱文牙」陳書作「駱牙」。
- [10] 父脩道 「脩道」陳書作「循道」。脩循形似,未知孰是。
- [11] 徵瑒爲少府卿 「少府卿」陳書作「太府卿」。
- 及聞大軍敗王琳乘勝 而進 「聞大軍 敗」四字各本並脫, 據陳書補。 按大軍謂陳軍。

時王琳攻

- 陳、周乘虛攻郢。及聞陳大軍勝琳而進,乃解圍去。
- [1]] 徵爲侍中領軍將軍 陳書作「徵爲散騎常侍、中領軍」。
- [三] 領左軍將軍「左軍將軍」陳書作「右軍將軍」。

卿豈有

意乎

「乎」上各本衍一「授」字,據陳書删。

- 時興皇寺慧朗法師該通釋典 「家庭」陳書作「庭院」。 「慧朗」各本作「朗」、據陳書、册府元龜八二一補。

按陳書陸縡傳

作「惠朗法師」,慧、惠古字通。

- 西魏攻荆州世譜鎭馬頭岸 「荆州」各本作「荆門」,據陳書改。按「馬頭岸」近荆州,荆門非是。
- **父伯道衞尉卿** 「伯道」各本作「伯通」。據陳書改。按羊鴉仁傳,鴉仁爲荀伯道子晷所殺。
- 招集晉熙等五郡盡有其地 「五郡」各本作「五部」,據陳書改。按下「悉達撫綏五郡」,則「五部」

齊遣行臺慕容紹宗來攻鬱口諸鎭 錢大昕廿二史考異:「按慕容紹宗之死在齊未受禪以前, 安

得此 時 尙 存。 此史家傳聞之誤,南史亦仍舊聞,而未據北史以正之。」

封彭澤縣侯 各本脫「封」字,據陳書補

三三 五年衆軍北伐 「五年」二字 各本並脫,據陳書補。 按下所出各事,皆繫之以年,與陳書合,不

應此 條 獨 異

斬其敷 城王張元範 「敷城王」各本作「敷城主」。按魏書地形志、晉州有敷城郡及敷城縣、肆州

秀容郡 有敷城縣。 大峴在合肥之南、歷陽之北、其地無名敷城者。 且若是城主,當云 敷城 《城主,

不當言敷城主。 蓋「主」是「王」字之譌。北齊張保洛封敷城王,張元範或是張保洛之子,襲爵爲

王。今訂正。

十二年與南豫州刺史樊毅北討 按陳書樊毅傳毅無爲南豫州事, 其弟猛為南豫州乃在後主至

德四年。 或樊毅爲任忠之譌,任忠爲南豫州刺史正在太建十二年。

至

周安州總管元景

Щ

征江外

「元景山」各本作「元景」,據隋書元景山傳訂

其姊夫蔡路養時在 南康 「姊夫」陳書作「姑夫」。

摩訶 因夜發選精騎 八千 「精騎八千」陳書作「精騎八十」,疑兩史有

以功授車 騎大將軍 「大將軍」陳書後主紀無「大」字,下「驃騎大將軍」同。

列

傅

潲

Б.

+ 七

校

勘 記

七

隨晉熙太守梅伯龍討景將王貴顯於壽春 「王貴顯」梁書侯景傳、通鑑並作「王顯貴」。

忠將 兵出 西道 「兵」字各本並脫,據陳書補。

後主與之金兩 滕日 「曰」字各本並脫,據通志補。

韶以毅 爲都督北討諸軍事 「諸軍 ·事」各本作「前 軍 事」, 據陳書宣帝紀 按都督北討前軍

事

者乃任忠 ,見本傳及宣帝紀。

謂王 臺城陷隨兄毅西上 一僧辯 平臺 城。 據樊毅傳毅赴江陵即在青溪役後, 「臺城陷」各本作「臺城平」,據陳書改。 景陷 臺城時, 按臺城陷,謂侯景陷臺城,臺城平 猛 隨兄西上自不得在臺城

平時。

六五八

